



# 全宋詞

2

中國詩詞大全  
黃華鼎電子圖書系列

## 方 衡

### 齐天乐 寿贾使三月二十八日生

伏以皇祚中兴，笃生元哲，维岳受命，允协良辰。同禀天地之清宁，间出山河之气数。仰惟某官，身兼三杰，德盛一夔。西清学士之班，选高天下；东方诸侯之长，功冠域中。拥百万之貔貅，制三边之狼虎。克膺大任，宜受遐龄。某辱在万间，尤深鼓舞。敬裁一曲，莫尽形容。仰祈熏慈，俯加采览。

皇天眷佑中兴烈。维岳共生鸿硕。镇抚精神，规恢调度，未数至言长策。中原僖望，总万里山河，尽归经画。更看旋乾转坤，烦一指麾力。

胡尘顿消海岱，倚天长啸处，兼惠南北。宝镇还朝，圣恩如海，趁得崧高华席。星辰步峻，看丹凤飞来，趣登枢极。□寿齐天，愿齐开寿域。

## 方 君 遇

### 风流子

春被雨禁持。伤心事、仿佛去年时。记芳径暮归，褪妆微醉，暗帙先寝，闻笑佯痴。回首别离容易过，杨柳又依依。红烛怨歌，鬓花零落，青绡牵梦，屏影参差。

桃源今何在，刘郎去，应念瘦损香肌。误约夜阑，从前怪我多疑。但怕收残泪，对人徐语，指弹新恨，推户潜窥。还是恹恹病也，无计怜伊。

## 方千里

### 瑞龙吟

楼前路。愁对万点风花，数行烟树。依依斜日红收，暮山翠接，平芜尽处。小留伫。还是画栏凭暖，半扃朱户。帘栊尽日无人，消凝怅望，时时自语。

堪恨行云难系，赋情杨柳，徘徊犹舞。追想向来欢娱，怀抱非故。题红寄绿，魂断江南句。何时见、轻衫雾唾，芳茵莲步。燕子西飞去。为人试道，相思闷绪。空有肠千缕。清泪满，斑斑多于春雨。忍看鬓发，密堆飞絮。

### 琐窗寒

燕子池塘，黄鹂院落，海棠庭户。东君暗许，借与轻风柔雨。奈春光困人正浓，画栏小立慵无语。念冶游时节，融怡天气，异乡愁旅。

朝暮。凝情处。叹聚散悲欢，岁常十五。连飞并羽，未抵鸳朋凤侣。算章台、杨柳尚存，楚娥鬓影依旧否。再相逢、拚解雕鞍，

燕乐同杯俎。

### 风流子

春色遍横塘。年华巧、过雨湿残阳。正一带翠摇，嫩莎平野，万枝红滴，繁杏低墙。恼人是，燕飞盘软舞，莺语咽轻簧。还忆旧游，禁烟寒食，共追清赏，曲水流觞。

回思欢娱处，人空老，花影尚占西厢。堪惜翠眉环坐，云鬓分行。看恋柳烟光，遮丝藏絮，妒花风雨，飘粉吹香。都为酒驱歌使，应也无妨。

### 渡江云

长亭今古道，水流暗响，渺渺杂风沙。倦游惊岁晚，自叹相思，万里梦还家。愁凝望结，但掩泪、慵整铅华。更漏长，酒醒人语，睥睨有啼鸦。

伤嗟。回肠千缕，泪眼双垂，遏离情不下。还暗思、香翻香烬，深闭窗纱。依稀看遍江南画，记隐隐、烟霭蒹葭。空健羨，鸳鸯共宿丛花。

### 应天长

嫩黄上柳，新绿涨池，东风艳冶天色。又见乍晴还雨，年华傍寒食。春依旧，身是客。对丽景、易伤岑寂。怅凝望、一带平芜，

剪就茵藉。

前度少年场，醉记旗亭，联句遍窗壁。调笑映墙红粉，参差水边宅。芦鞭懒过故陌。恨未老、渐成尘迹。谩无语，立尽斜阳，怀抱谁识。

### 荔枝香

胜日登临幽趣。乘兴去。翠壁古木千章，林影生寒雾。空濛冷湿人衣，山路元无雨。深涧、斗泻飞泉溜甘乳。

渔唱晚，看小棹、归前浦。笑指官桥。风飏酒旗斜举。还脱宫袍，一醉芳杯倒鹦鹉。幸有雕章蜡炬。

又

小园花梢雨歇，浪羞泫。碧瓦光霁，罗幕香浮，莺啼燕语交加，是处池馆春遍。风外、认得笙歌近远。

醉魂半萦，夜酒吹未散。暗忆年时，正日赴、西池宴。笑携艳质，郢曲新声妙如剪。有愁容易排遣。

### 还京乐

岁华惯，每到和风丽日欢再理。为妙歌新调，粲然一曲，千金轻费。记夜阑沈醉。更衣换酒珠玑委。怅画烛摇影，易积银盘红泪。

向笙歌底。问何人、能道平生，聚合欢

娱，离别兴味。谁怜露浥烟笼，尽栽培、艳桃秣李。谩萦牵，空坐隔千山，情遥万水。纵有丹青笔，应难摹画憔悴。

### 扫花游

野亭话别，恨露草芊绵，晓风酸楚。怨丝恨缕。正杨花碎玉，满城雪舞。耿耿无言，暗洒阑干泪雨。片帆去。纵百种避愁，愁早知处。

离思都几许。但渐惯征尘，斗迷归路。乱山似俎。更重江浪淼，易沈书素。瞪目销魂，自觉孤吟调苦。小留伫。隔前村、数声箫鼓。

### 解连环

素封谁托。空寒潮浪叠，乱山云邈。对倦景，无语消魂，但香断露晞，絮飞风薄。杜宇声中，动多少、客情离索。远阑干伫立，暗记那回，赏遍花药。

依依岁华自若。更低烟暮草，残照孤角。□叹息、故里春光，有幽圃名园，算也闲却。早早归休，渐过了芳条华萼。趁良时，按歌唤舞，旧家院落。

### 玲珑四犯

倾国名姝，似晕雪匀酥，无限娇艳。素

质闲姿，天赋淡蛾丰脸。还是睡起慵妆，顾鬓影、翠云零乱。怅平生、把鉴惊换。依约琐窗逢见。

绣帟凝想鸳鸯荐。画屏烘、兽烟葱茜。依红傍粉怜香玉，聊慰风流眼。空叹倦客断肠，奈听彻、残更急点。仗梦魂一到，花月底、休飘散。

### 丹凤吟

宛转回肠离绪，懒倚危栏，愁登高阁。相思何处，人在绣帟罗幕。芳年艳齿，枉消虚过，会合丝轻，因缘蝉薄。暗想飞云骤雨，雾隔烟遮，相去还是天角。

怅望不将梦到，素书谩说波浪恶。纵有青青发，渐吴霜妆点，容易凋铄。欢期何晚，忽忽坐惊摇落。顾影无言，清泪湿、但丝丝盈握。染斑客袖，归日须问著。

### 满江红

为忆仙姿，相思恨、缠绵未足。从别后、沈郎消瘦，带围如束。消息三年沈过处，关山千里无飞肉。算谁知、中有不平心，弹棋局。

空想像，金钗卜。时展玩，回纹曲。许何时重到，琐窗华屋。长得一生花里活，软红深处鸳鸯宿。也胜如、骑马著征衫，京尘扑。

### 瑞鹤仙

看青山绕郭。更暮草萋萋，疏烟漠漠。无风自花落。欲黄昏，谁向官楼吹角。刚肠顿弱。恨别来，辜负厚约。想香闺念旧，还忆去年，共举杯酌。

寂寞。光阴虚度，未说离愁，泪痕先阁。珠帘翠幕。除相见，是寄药。况中年已后，凭高临远，情怀终是易恶。早归休，月地云阶，剩追笑乐。

### 西平乐

倦踏征尘，厌驱匹马，凝望故国犹赊。孤馆今宵，乱山何许，平林漠漠烟遮。怅过眼光阴似瞬，回首欢娱异昔，流年迅景，霜风败苇惊沙。无奈轻离易别，千里意，制泪独长嗟。

绮窗人远，青门信杳，叙影何时，重见云斜。空怨忆、吹箫韵曲，旋锦回文，想像宫商蠹损，机杼生尘，谁为新装晕素华。那信自怜，悠扬梦蝶，浮没书鳞，纵有心情，尽为相思，争如傍早归家。

### 浪淘沙

素秋霁，云横旷野，浪拍孤堞。柔橹悲声顿发。骊歌恨曲未阕。念一寸回肠千缕结。

柳条在、忍使攀折。但怅惘章台路多少，相思拚愁绝。

凄切。去程浩渺空阔。奈断梗孤蓬，西风外、簌簌残吹咽。应暗为行人，伤念离别。泪波易竭。凝怨怀、羞睹当时明月。烟浪无穷青山叠。鱼封远、雁书渐歇。甚时合、金钗分处缺。谩飘荡、海角天涯，再见日，应怜两鬓玲珑雪。

### 忆旧游

念花边玉漏，帐里鸾笙，曾款良宵。镂鸭吹香雾，更轻风动竹，韵响潇潇。画檐皓月初挂，帘幕縠纹摇。记罢曲更衣，挑烟细语，酒晕全消。

迢迢。旧时路，纵下马铜驼，谁听扬镳。奈可怜庭院，又徘徊虚过，清梦难招。断魂暗想幽会，回首渺星桥。试仿佛仙源，重寻当日千树桃。

### 蓦山溪

园林晴昼，花上黄峰尾。莺语怯游人，又还傍、绿杨深避。曲池斜径，草色碧於蓝，栏倦倚。帘半起。魂断斜阳里。

江南春尽，渺渺平桥水。身在一天涯，问此恨、何时是已。飞帆轻桨，催送莫愁来，歌舞地。尊酒底。不羨东邻美。

### 少年游

丹青闲展小屏山。香炷一丝寒。织锦回纹，生绡红泪，不语自羞看。

相思念远关河隔，终日望征鞍。不识单栖，忍教良夜，魂梦觅长安。

又

东风无力扬轻丝。芳草雨馀姿。浅绿还池，轻黄归柳，老去愿春迟。

栏干凭暖慵回首，闲把小花枝。怯酒情怀，恼人天气，消瘦有谁知。

### 秋蕊香

一枕盘莺锦暖。初起懒匀妆面。绿云袅娜映娇眼。酒入桃腮晕浅。

翠帘半卷香萦线。碍飞燕。画屏浅立意闲远。春锁深沈小院。

### 渔家傲

烛彩花光明似昼。罗帏夜出倾城秀。红锦纹茵双凤斗。看舞后。腰肢宛胜章台柳。

眼尾春娇波态溜。金樽笑捧纤纤袖。一阵粉香吹散酒。更漏久。消魂独自归时候。

又

冷叶啼蛩声恻恻。银床晓起清霜积。魂

全宋词 方千里

断江南烟水国。书难得。相思此意无人识。  
绿鬓金钗年少客。愁来懒傍菱花仄。雾  
阁云窗闲枕席。情何适。杯盈珠泪还偷滴。

### 南乡子

西北有高楼。淡霭残烟渐渐收。几阵凉  
风生客袖，飕飕。心逐年华袞袞流。  
花卉满前头。老懒心情万事休。独倚栏  
干无一语，回眸。鼓角声中唤起愁。

### 望江南

春色暮，短艇舫长堤。飞絮空随花上下，  
啼莺占断水东西。来往燕争泥。  
桑柘绿，归去觅前蹊。夜瓮酒香从蚁斗，  
晓窗眠足任鸡啼。犹胜旅情凄。

### 浣沙溪

杨柳依依翠地垂。曲尘波影渐平池。霏  
微细雨出鱼儿。  
先自别来容易瘦，那堪春去不胜悲。腰  
肢宽尽缕金衣。

又

无数流莺远近飞。垂杨袅袅弄晴晖。断  
肠声里送春归。  
鬓影空思香雾湿，袜尘还想步波微。去  
年花下酒阑时。

又

清泪斑斑著意垂。消魂迢递一天涯。谁能万里布长梯。

先自楼台飞粉絮，可堪帘幕卷金泥。相思心上乳莺啼。

迎春乐

参差凤铎鸣高屋。渐惊觉、清眠熟。看夕阳倒影花阴速。双燕子、归来宿。

几曲危肠愁易束。问雪鬓、何时重绿。料想此情同，应暗损、香肌玉。

又

红深绿暗春无迹。芳心荡、冶游客。记摇鞭跋马铜驼陌。凝睇认、珠帘侧。絮满愁城风卷白。递多少、相思消息。何处约欢期，芳草外、高楼北。

点绛唇

池馆春深，海棠枝上斑斑雨。酒旗斜举。风滚杨花絮。

游子征衫，凭暖阑干处。空凝伫。杜鹃啼苦。还报南楼鼓。

一落索

月影娟娟明秀。帘波吹皱。徘徊空度可

怜宵，谩问道、因谁瘦。

不见芳音长久。鳞鸿空有。渭城西路恨依然，尚梦想、青青柳。

又

心抵江莲长苦。凌波人去。厌厌消瘦不胜衣，恨清泪、多于雨。

旧曲慵歌琼树。谁传香素。碧溪流水过楼前，问红叶、来何处。

### 垂丝钓

锦鳞绣羽。难传愁态颦妩。岸草际天，云影垂絮。人何许。谩并栏倚柱。

烟光暮。怅榆钱满路。送春殢酒。欢期幽会希遇。彩箫凤侣。回首分携处。双脸吹愁雨。无限语。再见时记否。

### 满庭芳

山色澄秋，水光融日，浮萍飘碎还圆。数行征雁，分破白鸥烟，高下回塘暗谷，写幽思、终日溅溅。闲凝望，残霞暝霭，何处一渔船。

江南，思旧隐，筠轩野径，茅舍疏椽。惯携壶花下，敲帽风前。想像渊明旧节，琴中趣、何必疏弦。归欤计，不将五斗，输与北窗眠。

### 隔浦莲

垂杨烟湿嫩葆。别屿环清窈。绀影浮新涨，夷犹终日鱼鸟，花妥庭下草。鸣蝉闹。暗绿藏台沼。

野轩小。敲眠断梦，闲书风叶颠倒。诗怀酒思，悔费十年昏晓。投老红尘倦再到。愁觉。悠然心寄天表。

### 法曲 献仙音

庭叶飘寒，砌蛩催织，夜色迢迢难度。细剔灯花，再添香兽，凄凉洞房朱户。见凤枕羞孤另，相思洒红雨。

有谁语。道年来，为郎憔悴，音问隔，回首后期尚阻。寂寞两愁山，锁闲情、无限颦妩。嫩雪消肌，试罗衣、宽尽腰素。问何时梦里，趁得好风飞去。

### 过秦楼

柳拂鹅黄，草揉螺黛，院落雨痕才断。蜂须雾湿，燕嘴泥融，陌上细风频扇。多少艳景关心，长苦春光，疾如飞箭。对东风忍负，西园清赏，翠深香远。

空暗忆、醉走铜驼，闲敲金鞵，倦迹素衣尘染。因花瘦觉，为酒情钟，绿鬓几番催变。何况逢迎向人，眉黛供愁，娇波回倩。

料相思此际，浓似飞红万点

### 侧 犯

四山翠合，一溪碧绕秋容靓。波定。见鹭立鱼跳动平镜。修林散步屨，古木通幽径。风静。烟雾直、池塘倒晴影。

流年旧事，老矣尘心莹。还暗省。点吴霜、憔悴愧潘令。梦忆江南，小园路迥。愁听。叶落辘轳金井。

### 塞翁吟

暮色催更鼓，庭户月影胧。记旧迹、玉楼东。看枕上芙蓉。云屏几轴江南画，香篆烬暖烟空。睡起处，绣衾重。尚残酒潮红。

忡忡。从分散，歌稀宴小，怀丽质，浑如梦中。苦寂寞、离情万绪，似秋后、怯雨芭蕉，不展愁封。何时细语，此夕相思，曾对西风。

### 苏幕遮

扇留风，冰却暑。夏木阴阴，相对黄鹂语。薄晚轻阴还阁雨。远岸烟深，仿佛菱歌举。

燕归来，花落去。几度逢迎，几度伤羁旅。油壁西陵人识否。好约追凉，小舫蒹葭浦。

### 浣沙溪

菱藕花开来路香。满船丝竹载西凉。波  
摇发彩粉生光。

翡翠双飞寻密浦，鸳鸯浓睡倚回塘。闲  
情须与酒商量。

又

密约深期卒未成。藏钩春酒坐频倾。向  
人娇艳夜亭亭。

相顾无言情易觉，归来单枕梦犹惊。眼  
梢怨泪几时晴。

又

面面虚堂水照空。天然一朵玉芙蓉。千  
娇百媚语惺惚。

未散娇云轻髻鬟，欲融轻雪乍凝胸。石  
榴裙衩为谁红。

又

刻样衣裳巧刻缁。彩枝环绕万年藤。生  
香吹透縠蚕冰。

嫩水带山娇不断，湿云堆岭腻无声。香  
肩婀娜许谁凭。

### 点绛唇

闲荡兰舟，翠娥仙袂风中举。鸳鸯深浦。  
绿暗曾来路。

留恋荷香，薄晚慵归去。还相顾。练波

澄素。月上潮生处。

### 诉衷情

远山重叠乱山盘。江上晚风酸。秋容更兼残日，枫叶照人丹。

书未到，梦犹闲。鬓先斑。凭高无语，征雁知愁，声断云间。

### 风流子

河梁携手别，临歧语，共约踏青归。自双燕再来，断无音信，海棠开了，还又参差。料此际，笑随花便面，醉骋锦障泥。不忆故园，粉愁香怨，忍教华屋，绿惨红悲。

旧家歌舞地，生疏久，尘暗凤缕罗衣。何限可怜心事，难诉欢期。但两点愁蛾，才开重敛，几行清泪，欲制还垂。争表为郎憔悴，相见方知。

### 华胥引

长亭无数，羁客将归，故园换叶。乳鸭随波，轻苹满渚时共唼。接眼春色何穷，更橹声伊轧。思忆前欢，未言心已愁怯。

欺鬓吴霜。恨星星、又还盈镊。锦纹鱼素，那堪重翻再阅。粉指香痕依旧，在绣裳鸳篋。多少相思，皱成眉上千叠。

### 宴清都

暮色闻津鼓。烟波碧、数行征雁时度。轻榔聚网，长歌和楫，水村渔户。行人又落天涯，但怅望、高阳伴侣。记旧日、酒卸宫袍，马酬少妾词赋。

如今鬓影萧然，相逢似雪，徒话愁苦。芳尘暗陌。残花遍野，岁华空去。垂杨翠拂门径，尚梦想、当时住处。纵早归、绿渐成阴，青娥在否。

### 四园竹

花骢纵策，制泪掩斜扉。玉炉细袅，鸳被半闲，萧瑟罗帏。银漏声，那更杂、疏疏雨里，此时怀抱谁知。

恨凄其。西窗自剪寒花，沈吟暗数归期。最爱深情密意，无限当年，往复诗辞。千万纸。甚近日、人来字渐稀。

### 齐天乐

碧纱窗外黄鹂语，声声似愁春晚。岸柳飘绵，庭花堕雪，惟有平芜如剪。重门尚掩。看风动疏帘，浪铺湘簟。暗想前欢，旧游心事寄诗卷。

鳞鸿音信未睹，梦魂寻访后，关山又隔无限。客馆愁思，天涯倦迹，几许良宵展转。

闲情意远。记密阁深闺，绣衾罗荐。睡起无人，料应眉黛敛。

### 木兰花

溶溶水映娟娟秀。浅约宫妆笼翠袖。舞余杨柳乍萦风，睡起海棠犹带酒。

憔悴萧郎缘底瘦。那日花前相见后。西窗疑是故人来，费得罗笺诗几首。

### 霜叶飞

塞云垂地，堤烟重，燕鸿初度江表。露荷风柳向人疏，台榭还清悄。恨脉脉、离情怨晓。相思魂梦银屏小。奈倦客征衣，自遍拂尘埃，玉镜羞照。

无限静陌幽坊，追欢寻赏，未落人后先到。少年心事转头空，况老来怀抱。尽绿叶红英过了。离声慵整当时调。问丽质，从憔悴，消减腰围，似郎多少。

### 蕙兰芳

庭院雨晴，倚斜照、睡余双鹭。正学染修蛾，官柳细匀黛绿。绣帘半卷，透笑语、琐窗华屋。带脆声咽韵，远近时闻丝竹。

乍著单衣，才拈圆扇，气候暄燠。趁骄马香车，同按绣坊画曲。人生如寄，浪勤耳目。归醉乡，犹胜旅情愁独。

### 塞垣春

四远天垂野。向晚景，雕鞍卸。吴蓝滴草，塞绵藏柳，风物堪画。对雨收雾霁初晴也。正陌上、烟光洒。听黄鹂、啼红树，短长音□如写。

怀抱几多愁，年时趁、欢会幽雅。尽日足相思，奈春昼难夜。念征尘、满堆襟袖，那堪更、独游花阴下。一别鬓毛减，镜中霜满把。

### 丁香结

雨湿高花，烟藏低叶，为谁翠消红陨。叹水流波迅。抚艳景、尚有轻阴余润。乳莺啼处路，思归意，泪眼暗忍。青青榆荚满地，纵买闲愁难尽。

勾引。正记著年时，乍怯春寒阵阵。小阁幽窗，残妆剩粉，黛眉曾晕。迢递魂梦万里，恨断柔肠寸。知何时重见，空为相思瘦损。

### 氏州第一

朝日融怡，天气艳冶，桃英杏萼犹小。燕垒初营，蜂衙乍散，池面烟光缥缈。芳草如薰，更潏潏、波光相照。锦绣萦回，丹青映发，未容春老。

倦客自嗟清兴少。念归计、梦魂飞绕。  
浪阔鱼沈，云高雁阻，瞪目添愁抱。忆香闺、  
临丽景，无人伴、轻颦浅笑。想像消魂，怨  
东风、孤衾独晓。

### 解蹀躞

院宇无人晴昼，静看帘波舞。自怜春晚，  
漂流尚羁旅。那况泪湿征衣，恨添客鬓，终  
日子规声苦。

动离绪。谩徘徊愁步。何时再相遇。旧  
欢如昨，匆匆楚台雨。别后南北天涯，梦魂  
犹记关山，屡随书去。

### 少年游

人如秣李，香濛翠缕，芳酒嫩於橙。宝  
烛烘香，珠帘闲夜，银字理鸾笙。

归时醉面春风醒，花雾隔疏更。低辗雕  
轮，轻桡骄马，相伴月中行。

### 庆春宫

宿霭笼晴。层云遮日，送春望断愁城。  
篱落堆花，帘栊飞絮，更堪远近莺声。岁华  
流转，似行蚁、盘旋万星。人生如寄，利锁  
名缰，何用萦萦。

駉駉皓发相迎。斜照难留，朝雾多零。  
宜趁良辰，何妨高会，为酬月皎风清。舞台

歌榭，遇得旅、欢期易成。莫辞杯酒，天赋吾曹，特地钟情。

### 醉桃源

良宵相对一灯青。相思写研绫。去时情泪滴红冰。西风吹涕零。

愁宛转，意飞腾。晴窗穿纸蝇。梦知关塞不堪行。忆君犹问程。

又

鸳鸯浓睡碧溪沙。荷花深处家。快风收电掣金蛇。凉波流素华。

吴国艳，楚宫娃。红潮连翠霞。坐来忽忽烛光斜。城头闻乱鸦。

### 点绛唇

绿叶阴阴，满城风雨催梅润。画楼人近。朝雾来芳信。

从解雕鞍，休数花吹阵。无多闷。燕催莺趁。付与春归恨。

### 夜游宫

一带垂杨蘸水。映芳草、萋萋千里。跋马回堤少年子。拥青娥，向红楼，南酒市。

拚饮莺花底。恣欢笑、粉融香坠。不趁临分醉中起。但依稀，写柔情，留蜀纸。

又

城上昏烟四敛。画楼外、陡听更点。千里相思梦中见。恨年华，逐东流，随急箭。

帘影参差转。夜初过、水沈烟乱。剩枕余衾故人远。忆闲窗，弹云鬓低粉面。

诉衷情

一钩新月淡于霜。杨柳渐分行。征尘厌堆襟袂，鸡唱促晨装。

淮水阔，楚山长。暗悲伤。重阳天气，杯酒黄花，还寄他乡。

伤情怨

闲愁眉上翠小。尽春衫宽了。舞鉴孤鸾，严妆羞独照。

王孙音信尚渺。度寒食、禁烟须到。趁赏芳菲，今年春事早。

红林擒近

花幕高烧烛，兽炉深炷香。寒色上楼阁，春威遍池塘。多情天孙罢织，故与玉女穿窗。素脸浅约宫装。风韵胜笙簧。

游冶寻旧侣，尊酒老吾乡。清歌度曲，何妨尘落雕梁。任瑶阶平尺，珠帘人报，剩拚酩酊飞羽觞。

又

晓起山光惨，晚来花意寒。映月衣纤缟，  
因风佩琅玕。三弄江梅听彻，几点岸柳飘残。  
宛然舞曲初翻。帘影卷波澜。

把酒同唤醒，促膝小留欢。清狂痛饮，  
能消多少杯盘。况人生如寄，相逢半老，岁  
华休作容易看。

### 满路花

帘筛月影金，风卷杨花雪。天边鸿雁少，  
音尘绝。春光欲暮，客心归心折。江湖波浪  
阔。目断家山，料应易过佳节。

柔情千点，杜宇枝头血。危肠余寸许，  
谁能接。眠思梦忆，不似今番切。欲对何人  
说。揽镜沈吟，瘦来须有差别。

### 解语花

长空淡碧，素魄凝辉，星斗寒相射。凤  
楼鸳瓦。天风动，冉冉佩环高下。歌清韵雅。  
对好景、芳樽满把。花雾浓，灯火荧煌，笑  
语烘兰麝。

千斛明珠照夜。况人如图画，明艳容冶。  
绣巾香帕。归来路，缓逐杏鞞骄马。笙歌散  
也。愁万炬、绛莲分谢。更漏残，惊听西楼，  
吹小梅初罢。

### 六么令

照人明艳，肌雪消繁燠。娇云慢垂柔领，绀发浓于沐。微晕红潮一线，拂拂桃腮熟。群芳难逐。天香国艳，试比春兰共秋菊。

当时相见恨晚，彼此萦心目。别后空忆仙姿，路隔吹箫玉。何处栏干十二，缥缈阳台曲。佳期重卜。都将离恨，拚与尊前细留嘱。

### 倒犯

尽日、任梧桐自飞，翠阶慵扫。闲云散缟。秋容莹、暮天清窈。斜阳到地，楼阁参差帘栊悄。嫩袖舞凉飏，拂拂生林表。荡尘襟，写名醮

携手故园，胜事寻踪，松篁幽径窈。曲沼瞰静绿，荫檐影、龟鱼小。信倦迹、归来好。倩叮咛、长安游子道。任鬓发霜侵，莫待菱花照。醉乡深处老。

### 大酺

正夕阳闲，秋光淡，鸳瓦参差华屋。高低帘幕迥，但风摇环佩，细声频触。瘦怯单衣，凉生两袖，零乱庭梧窗竹。相思谁能会，是归程客梦，路谙心熟。况时节黄昏，闲门人静，凭栏身独。

欢情何太速。岁华似、飞马驰轻毂。谩自叹、河阳青鬓，苒苒如霜，把菱花、怅然凝目。老去疏狂减，思堕策、小坊幽曲。趁游乐、繁华国。回首无绪，清泪纷于红菽。话愁更堪剪烛。

玉烛新 海棠

海棠初雨后。似露粉妆成，肉红团就。太真帐里，春眠醒、缓蹙楼前宫漏。潮生酒晕，独自倚、阑干时候。吹鬓影、斜立东风，余寒半侵罗袖。

骊山宫殿无人，想笑问君王，艳容如否。万花竞斗。难比并、丽美巧匀丰瘦。闺房挺秀。□一顾、丹铅低首。应对羯鼓声中，清歌美奏。

花犯 荷花

渚风低，芙蓉万朵，清妍赋情味。雾绡红缀。看曼立分行，闲淡佳丽。靓姿艳冶相扶倚。高低纷愠喜。正晓色、懒窥妆面，娇眠敲翠被。

秋光为花且徘徊，朱颜迎缟露，还应憔悴。腰肢小，腮痕嫩、更堪飘坠。风流事、旧宫暗锁，谁复见、尘生香步里。谩叹息、玉儿何许，繁华空逝水。

丑奴儿

凌波台畔花如剪，几点吴霜。烟淡云黄。

东阁何人见晚妆。

江南春近书千里，谁寄清香。别墅横塘。  
鼓角声中又夕阳。

水龙吟 海棠

锦城春色移根，丽姿迥压江南地。琼酥拂脸，彩云满袖，群芳羞避。双燕来时，暮寒庭院，雨藏烟闭。正□□未足，宫妆尚怯，还轻洒胭脂泪。

长是欢游花底。怕东风、陡成怨吹。高烧银烛，梁州催按，歌声渐起。绿态多慵，红情不语，动摇人意。算吴宫独步，昭阳第一，可依稀

六 丑

看流莺度柳，似急响、金梭飞掷。护巢占泥，翩翩飞燕翼。昨梦前迹。暗数欢娱处，艳花幽草，纵冶游南国。芳心荡漾如波泽。系马青门，停车紫陌。年华转头堪惜。奈离襟别袂，容易疏隔。

人间春寂。谩云容暮碧。远水沈双鲤、无信息。天涯渐老羁客。叹良宵漏断，独眠愁极。吴霜皎、半侵华帙。谁复省十载，匀香晕粉，髻倾鬟侧。相思意、不离潮汐。想旧家、接酒巡歌计，今难再得。

虞美人

花台响彻歌声暖。白日林中短。春心摇

荡客魂消。搓粉揉香排比、一团娇。

重来犹自寻芳径。吹鬓东风影。步金莲处绿苔封。不见彩云双袖、舞惊鸿。

又

高楼远阁花飞遍。急雨捎池面。悠悠杨柳不知门。多少乱莺啼处、暮烟昏。

银钩小字题芳絮。宛转回文语。可怜单枕梦行云。肠断江南千里、未归人。

### 兰陵王

晚烟直。池沼波痕皱碧。年芳为、花态柳情，揆粉揉蓝酿春色。繁华记上国。曾识。倾城幼客。风流是、联句送钩，笺绿绡红递书尺。

行云去无迹。念暖响歌台，香雾瑶席。当时谁信盟言食。知一岁离聚，几多间阻，人生如梦寄堠驿。况分散南北。

悲恻。万愁积。奈鸾凤欢疏，鱼雁音寂。天涯何处相思极。但目断芳草，恨随塞笛。那堪庭院，更听得，夜雨滴。

### 蝶恋花

漏泄东君消息后。短叶长条，著意遮轩牖。嫩比鹅黄初熟酒。染匀巧费春风手。

万缕筛金新月透。入夜柔情，还胜朝来秀。彩笔雕章知几首。可人标韵无新旧。

又

一搦腰肢初见后。恰似娉婷，十五藏朱牖。春色恼人浓抵酒。风前脉脉如招手。

黛染修眉蛾绿透。态婉仪闲，自是闺房秀。堪惜年华同转首。女郎台畔春依旧。

又

碎玉飞花寒食后。薄影行风，终日穿疏牖。有客思归还把酒。闲吹倦絮轻黏手。

雪满愁城寒欲透。飘尽残英，翠幄成秋秀。张绪风流今白首。少年襟度难如旧。

又

翠浪蓝光新雨后。整整斜斜，高下笼窗牖。万斛深倾重碧酒。量愁知落何人手。

栊雾梳烟晴色透。照影回风，一段嫣然秀。白下门东空引首。藏鸦枝叶长怀旧。

## 西河 钱塘

都会地。东南王气须记。龙盘凤舞到钱塘，瑞烟回起。画图彩笔写西湖，波光溶漾无际。

翠栏最宜半倚。柳阴骏马谁系。鳞差观阁接飞鞚，衙庐万垒。倒空碧浸软琉璃，云收天净如水。

夕阳照晚听近市。沸笙箫、欢动闾里。比屋乐逢尧世。好相将载酒寻歌玄对。酬答年华莺花里。

### 三部乐

帘卷窗明，听杜宇乍啼，漏声初绝。乱云收尽，天际□留残月。奈相送、行客将归，怅去程渐促，霁色催发。断魂别浦，自上孤舟如叶。

悠悠音信易隔。纵怨怀恨语，到见时难说。堪嗟水流急景，霜飞华发。想家山、路穷望睫。空倚仗、魂亲梦切。不似嫩朵，犹能替、离绪千结。

### 菩萨蛮

黄鸡晓唱玲珑曲。人生两鬓无重绿。官柳系行舟。相思独倚楼。

来时花未发。去后纷如雪。春色不堪看。萧萧风雨寒。

### 品 令

露晞烟静。寂寥转、梧桐寒影。天际历历征鸿近。被风吹散，声断无行阵。

秋思客怀多少恨。谩厌厌谁问。晕残兰炷香消印。梦魂长定。愁伴更筹尽。

### 玉楼春

华堂银烛堆红泪。解说离人多少意。恨

从别后恨无穷，愁到浓时惟一味。

江南渭北三千里。憔悴相思何日已。马蹄清晓草黏天，庭院黄昏花满地。

### 满路花

莺飞翠柳摇，鱼跃浮萍破。班班红杏子，  
交榴火。池台昼永，缭绕花阴里。山色遥供  
座。枕簟清凉，北窗时唤高卧。

翻思少年，走马铜驼左。归来敲铎月，  
留关锁。年华老矣，事逐浮云过。今吾非故  
我。那日尊前，祇今问有谁呵。

## 方乔

### 菩萨蛮 复答紫竹

秋风即拟同衾枕。春归依旧成孤寝。爽约不思量。翻言要打郎。

鸳鸯如共耍。玉手何辞打。若再负佳期。还应我打伊。

### 玉楼春 答紫竹

绿阴扑地莺声近。柳絮如绵烟草衬。双鬟玉面碧窗人，一纸银钩青鸟信。佳期远卜清秋夜。桐树梢头明月挂。天公若解此情深，此岁何须三月夏。

## 方味道

### 庄椿岁 寿赵丞相

恭审某官间期淑气，特立高标。仰维岳之生贤，一朝献颂；赋缁衣而入相，四海同声。欣逢五百年之期，愿上八千岁之祝。可占耆艾，曷尽形容。音寄水龙吟，名为庄椿岁。倘蒙省览，万有荣光。

纶巾少驻家山，北窗睡觉南薰起。黄庭细看，长生秘诀，神仙奇趣。奈此苍生，愿苏炎热，仰为霖雨。趁丹心未老，将整顿乾坤，手为经理。

好是今年庆事。抱奇孙、一门佳气。蓬山振佩，麟符重锡，褒纶新美。玉树参庭，桂枝分种，香浮兰芷。看他年、接武三槐，长是伴、庄椿岁。

## 方信孺

西江月 再游龙隐岩，追和陶商翁韵

碧洞青崖著雨，红泉白石生寒。曛来十月九湖山。人笑元郎太漫。

绝壑偏宜叠鼓，夕阳休唤归鞍。兹游未必胜骖鸾。聊作湖南公案。

## 方有开

### 点绛唇 钓台

七里滩边，江光漠漠山如戟。渔舟一叶。  
径入寒烟碧。

笑我尘劳，羞对双台石。身如织。年年  
行役。鱼鸟浑相识。

### 满江红 钓台

跳出红尘，都不顾、是非荣辱。垂钓处、  
月明风细，水清山绿。七里滩头帆落尽，长  
山泷口潮回速。问有谁、特为上钩来，刘文  
叔。

貂蝉贵，无人续。金带重，难拘束。这  
白麻黄纸，岂曾经目。昨夜客星侵帝座，且  
容伸脚加君腹。问高风、今古有谁同，先生  
独。

## 方岳

### 满江红 乙巳生日

说与梅花，且莫道、今年无雪。君不见、秋崖鬓底，荳荳骚屑。笔砚只催人老大，湖山不了诗愁绝。问萸簪、何事下矶来，抛云月。

重省起，西山笏。终负却，东山屐。把草堂借与，鹭眠鸥歇。乌帽久闲苍藓石，青衫今作枯荷叶。笑人间、万事竟何如，从吾拙。

### 又 九日冶城楼

且问黄花，陶令后、几番重九。应解笑、秋崖人老，不堪诗酒。宇宙一舟吾倦矣，山河两戒天知否。倚西风、无奈剑花寒，虬龙吼。

江欲醺，谈天口。秋何负，持螯手。尽石麟芜没，断烟衰柳。故国山围青玉案，何人印佩黄金斗。倘只消、江左管夷吾，终须有。

### 又 和程学谕

苍石横筇，松风外，自调龟息。浑不记，

全宋词 方岳

东皋秋事，西湖春色。底处未嫌吾辈在，此心说与何人得。向海棠，烂醉过清明，酬佳节。

君莫道，江鲈忆。吾自爱，山泉激。尽月明夜半，杜鹃声急。人事略如春梦过，年光不啻惊弦发。怕醒来、失口问诸公，今何日。

水调歌头 九日醉中

左手紫螯蟹，右手绿螺杯。古今多少遗憾，俯仰已尘埃。不共青山一笑，不与黄花一醉，怀抱向谁开。举酒属吾子，此兴正崔嵬。

夜何其，秋老矣，盍归来。试问先生归否，茅屋欲生苔。穷则箪瓢陋巷，达则鼎彝清庙，吾意两悠哉。寄语雪溪外，鸥鹭莫惊猜。

又 平山堂用东坡韵

秋雨一何碧，山色倚晴空。江南江北愁思，分付酒螺红。芦叶蓬舟千重，菰菜莼羹一梦，无语寄归鸿。醉眼渺河洛，遗恨夕阳中。

苹洲外，山欲暝，敛眉峰。人间俯仰陈迹，叹息两仙翁。不见当时杨柳，只是从前烟雨，磨灭几英雄。天地一孤啸，匹马又西风。

又 九日多景楼用吴侍郎韵

醉我一壶玉，了此十分秋。江涛还此，

当日击楫渡中流。问讯重阳烟雨，俯仰人间今古，此意渺沧洲。天地几今夕，举白与君浮。

旧黄花，新白发，笑重游。满船明月犹在，何日大刀头。谁夸扬州鹤去，已怨故山猿老，借箸欲前筹。莫倚阑干北，天际是神州。

又 寿丘提刑

鹭社有明月，夜半吐光寒。淮南草木飞动，秀出斗牛间。自有秦沙以后，试问少游而下，谁卷入毫端。补袞仲山甫，冰雪照云寰。

霄汉近，绣衣去，锦衣还。江南且为梅醉，莫道岁将阑。三百六旬欲换，五百岁终才始，日月两循环。酌彼金错落，浇此碧琅玕。

又 寿吴尚书

明日又重午，搀借玉蒲香。劝君且尽杯酒，听我试平章。时事艰难甚矣，人物眇然如此，骚意满潇湘。醉问屈原子，烟水正微茫。

溯层峦，浮叠嶂，碧云乡。眼中犹有公在，吾意亦差强。胸次甲兵百万，笔底天人三策，堪补舜衣裳。要及黑头耳，霖雨趁梅黄。

又 寿赵文昌

剡曲一篷月，乘兴到人间。蓬莱山在何处，鹤骨不禁寒。胸有云门禹穴，笔有楔亭

晋帖，风露洗脾肝。秋入紫宸殿，磨玉写琅玕。

问何如，趋琐闼，系狨鞍。江涛今已如此，可奈寸心丹。我宋与天无极，公寿如春难老，王气自龙蟠。勋业付浯石，留与世人看。

又 别庐山题龙湖阁

宇宙一杯酒，暝色倚重湖。青山杳杳何处，烟水瀉愁予。别岸风涛喷薄，半夜鱼龙悲啸，能撼我诗无。李白醉不醒，唤起问何如。

是耶非，天莽苍，雪模糊。苍颜白发如此，空复笑今吾。寄语鹭朋鸥侣，好在风飧水宿，底处不烟芜。吾亦从此逝，从我者谁欤。

沁园春 赋子规

尽为春愁，尽劝春归，直恁恨深。况雨急黄昏，寒欺客路，月明夜半，人梦家林。店舍无烟，楚乡寒食，一片花飞那可禁。小凝伫，黯红蔫翠老，江树阴阴。

汀洲杜若谁寻。想朝鹤怨兮猿夜吟。甚连天芳草，凄迷离恨，拂帘香絮，撩乱深心。汝亦知乎，吾今倦矣，瓮有馀春可共斟。归来也，问渊明而后，谁是知音。

又

櫟栝兰亭序 汪强仲大卿褰饮水西，令妓歌兰亭，皆不能，乃为以平仄度此曲，俾歌之

岁在永和，癸丑暮春，修禊兰亭。有崇山峻岭，茂林修竹，清流湍激，映带山阴。曲水流觞，群贤毕至，是日风和天气清。亦足以，供一觴一咏，畅叙幽情。

悲夫一世之人。或放浪形骸遇所欣。虽快然自足，终期于尽，老之将至，后视犹今。随事情迁，所之既倦，俯仰之间迹已陈。兴怀也，将后之览者，有感斯文。

又 用梁权郡韵饯春

莺带春来，鹃唤春归，春总不知。恨杨花多事，杏花无赖，半随残梦，半惹晴丝。立尽碧云，寒江欲暮，怕过清明燕子时。春且住，待新篁熟了，却问行期。

问春春竟何之。看紫态红情难语离。想芳韶犹剩，牡丹知处，也须些个，付与荼蘼。唤取娉婷，劝教春醉，不道五更花漏迟。愁一饷，笑车轮生角，早已天涯。

又 寿赵尚书

蠢彼黠譎，嗟尔何为，敢瞰长淮。遣诗书元帅，又劳指画，神仙寿日，不放襟怀。略已三年，可曾一笑，天岂慳吾老子哉。诸人者，且携将雅颂，留待磨崖。

我姑酌彼金罍。便小醉、宁辞鹦鹉杯。问今何时也，子其休矣，有如此酒，奚取吾侪。帝曰不然，政须卿辈，作我长城惟汝谐。凝望处，见红尘飞骑，捷羽东来。

又 和宋知县致苔梅

有美人兮，铁石心肠，寄春一枝。喜蘚

生龙甲，那因雪瘦，月横鹤膝，不受寒欺。云卧空山，梦回孤驿，生怕渠嗔未敢诗。江头路，问销魂几许，索笑何时。

赋成字字明珠。君莫倚、家风旧解题。叹水曹安在，飘然欲去，逋仙已矣，其与谁归。烟雨愁予，江山老我，毕竟岁寒然后知。微酸在，尽危谯斜倚，残角孤吹。

又 和赵司户红药

把酒问花，茧栗梢头，春今几何。笑身居近侍，阶翻万玉，面丐菩萨，髻拥千螺。一一牙签，英英碧字，占定花间甲乙科。归来也，傍紫薇吟处，揉作阳和。

祇今花事无多。看几许风烟付与他。待围将翡翠，怕蜂粘粉。织成云锦，遣凤衔梭。谁翦并刀，赠之燕玉，莫负双娥娇溜波。花应道，尽花强人面，底用能歌。

又 和林教授

子盍观夫，商丘之木，有樗不才。纵斧斤睥睨，何妨雪立，风烟傲兀，怎问春回。老子似之，倦游久矣，归晒渔蓑羹芋魁。村锄外，闻韭今有子，芥已生台。

天于我辈悠哉。纵作赋问天天亦猜。且醉无何有，酒从陶陆，与二三子，诗友陈雷。正尔眠云，阿谁敲月，不是我曹不肯来。君且住，怕口生荆棘，胸有尘埃。

望江南

乙未生日 时赴官淮东，以是日次南徐，泊舟

全宋词 方岳

普照寺下，侍亲具汤饼。寺中门有扁曰寿丘山，亲意欣然，盖以丘山为岳字云

梅欲老，撑月过南徐。家口纵多难减鹤，路程不远易携书。只是废春锄。

霜满袖，茶灶借僧庐。湖海甚豪今倦矣，丘山虽寿竟何如。一笑荐冰蔬。

蝶恋花 用韵秋怀

雁落寒沙秋恻恻。明月芦花，共是江南客。骑鹤楼高边羽急。柔情不尽淮山碧。

世路只催双鬓白。菰菜莼羹，正自令人忆。归梦不知江水隔。烟帆风过平如席。

又

山抹修眉横绿净。浦溆生寒，立尽梧桐影。香爇未消帘幕静。醉红如洗风吹醒。

一夜秋声连玉井。梦落孤篷，已尽山阴兴。戍角凄凉清漏永。江南烟雨何堪省。

又

秋水涵空如镜净。满镜清寒，倒碧摇山影。药户谁扃圆玉静。碧纱人怯黄昏醒。

丛桂小山寒井井。唤起江南，一叶莼鲈兴。先自新愁愁夜永。不堪宋□重提省。

木兰花慢 吴尚书宴客涟沧观，即席用韵

慨晴江渺渺，乘风下、倚沧浪。问许大乾坤，金焦两点，曾几兴亡。平章古人安在，但青山、烟水共微茫。不道鹭嘲鸥笑，归来

鬓已苍苍。

垂杨。舞尽斜阳。双燕语、尽渠忙。黯  
柔情不管，花深传漏，羽急飞觞。思量人间  
如梦，放半分、佯醉半佯狂。明日海棠犹旧，  
春风未老秋娘。

如梦令 春思

知是谁家燕子。直恁惺松言语。深入绣  
帘来，无奈落花飞絮。春去。春去。且道干  
卿何事。

又 海棠

雨洗海棠如雪。又是清明时节。燕子几  
时来，只了为花愁绝。愁绝。愁绝。枉与春  
风分说。

贺新凉

别吴侍郎 吴时闲居，数夕前梦枯梅成林，一  
枝独秀

霜月寒如洗。问梅花、经年何事，尚迷  
烟水。梦著翠霞寻好句，新雪阑干独倚。见  
竹外、一枝横蕊。已占百花头上了，料诗情、  
不但江山耳。春已逗，有佳思。

一香吹动人间世。奈何地、丛篁低碧，  
巧相亏蔽。尽让春风凡草木，便做云根石底。  
但留取、微酸滋味。除却林逋无人识，算岁  
寒、只是天知己。休弄玉，怨迟暮。

又 戊戌生日用郑省仓韵

问讯江南客。怕秋崖、苔荒诗屋，云侵山屐。留得钓竿西日手，梦落鸥傍鹭侧。倩传语、溪翁将息。四十飞腾斜暮景，笑双篷、一懒无他画。惟饱饭，散轻策。

世间万事知何极。问乾坤、待谁整顿，岂无豪杰。水驿山村还要我，料理松风竹雪。也不学、草颠诗白。自有春蓑黄犊在，尽诸公、宝马摇金勒。容我辈，醉云液。

又 寄两吴尚书

雁向愁边落。渺汀洲、孤云细雨，暮天寒角。有美人兮山翠外，谁共霜桥月壑。想朋友、春猿秋鹤。竹屋一灯棋未了，问人间、局面如何著。风雨夜，更商略。

六州铁铸从头错。笑归来、冰鲈堪鲙，雪螯堪嚼。莫遣孤舟横浦溆，也怕浪狂风恶。且容把、钓纶收却。云外空山知何似，料清寒、只与梅花约。逋老句，底须作。

又 戊申生日

一笑君知否。笑当年、山阴道士，行歌樵叟。五十到头公老矣，只可鹭朋鸥友。便富贵、何如杯酒。好在归来苍崖底，想月明、不负携锄手。谁共酌，翦霜韭。

乾坤许大山河旧。几多人、剑倚西风，笔惊南斗。俯仰之间成陈迹，亡是子虚乌有。渺烟草、不堪回首。隔坞筑亭开野径，尽一筇、两屐山前后。春且为，催花柳。

又

己酉生日，用戊申韵。时自康庐归，犹在道也  
天意然乎否。待相携、风烟五亩，招邀  
迂叟。屋上青山花木野，尽可两朋三友。笑  
老子、只堪棋酒。似恁疏顽何为者，向人前、  
不解高叉手。宁学圃，种菘韭。

春猿秋鹤皆依旧。怪吾今，鬓已成丝，  
胆还如斗，谁与庐山麾之去，尔辈何留之有。  
黯离绪、暮江搔首。非我督邮犹束带，这一  
归、更落渊明后。君试问，长亭柳。

西江月 以两鹤寿老人

茅屋何堪翠袖，芝田自有霓裳。一双雪  
舞碧云乡。富贵人家以上。

竹外山童敲臼，梅边溪友传觞。青霞道  
服石炉香。便是寿星模样。

又 和郑省仓韵，因以为寿

燕子催将初度，梨花指定清明。春风可  
是太多情。乐事良辰一并。

绛老从头甲子，楚骚几度庚寅。晴光不  
隔凤凰城。花底举头天近。

又

蔬甲初肥雨润，茶枪小摘春明。野篱是  
处可诗情。打过下湖船并。

捷报秋来旁午，贤关早晚同寅。绿杨连  
骑带春城。不问南山远近。

一落索 九日

瘦得黄花能小。一帘香杳。东篱云冷正愁予，犹幸是、西风少。

叶下亭皋渺渺。秋何为者。无钱持蟹对黄花，又辜负、重阳也。

汉宫春 寿王尉

云涧之癯，有诗盟未了，鸥泛江湖。一官直为仙耳，不受尘驱。高情逸韵，自兰亭、已后都无。准拟画、剡舟夜雪，与君相对成图。

半竹苔寒如此，问谁欵来者，鹤伴熏炉。何如贮之天上，风露冰壶。江南春早，想梅花、不肯欺吾。疑便是，孤山之北，水香月影林逋。

又 探梅用潇洒江梅韵

问讯何郎，怎春风未到，却月横枝。当年东阁诗兴，夫岂吾欺。云寒岁晚，便相逢、已负深期。烦说与、秋崖归也，留香更待何时。

家住江南烟雨，想疏花开遍，野竹巴篱。遥怜水边石上，煞欠渠诗。月壶雪瓮，肯相从、舍我其谁。应自笑，生来孤峭，此心却有天知。

酹江月 梦雪

问天何事，雪垂垂欲下，又还晴却。春到梅梢香逗也，尽有心情行乐。剡曲舟回，灞桥诗在，一笑人如昨。此情分付，暮天寒月残角。

谁道飞梦江南，群山如画，一一琼瑶琢。中有玉田三万顷，云是幼舆丘壑。招我归来，和春醉去，休跨扬州鹤。万花曾约，酒醒当有新作。

又

八月十四，小集郑子重帅参先月楼。是夕无月，和朱希真插天翠柳词韵

绿尊翠勺，约秋风、一醉小楼先月。谁取宝奁奔帝所，深琐玉华宫阙。老桂香寒，疏桐云重，生怕金蛇掣。那知天柱，一峰别与天接。

我欲飞佩重游，置之衣袖，照我襟怀雪。玉斧难藏修月手，待做明宵清绝。天地无尘，山河有影，了不遗毫发。举杯相属，唤谁筇与天说。

又 寿老父

幅巾云麓。笑人生瓮等，何时是足。莫道年来无好处，第一秣田新熟。孙息乘鸾，大儿荐鹗，翁已恩袍绿。笑谭戎幕，尽教岳也碌碌。

是则江南江北，月明飞梦，认得溪桥屋。多少睡乡闲日月，不老柯山棋局。唱个曲儿，

吃些酒子，检点茅檐竹。问梅开未，一枝初破寒玉。

又 戊戌寿老父

且拌春醉。问人间、谁是十分如意。道不好来人又道，也有一分好处。管甚长贫，只消长健，切莫眉头聚。尽教江路，梅花仍旧留住。

儿辈虽不如人，有何不可，怎敢嫌迟暮。但喜吾翁躔度转，唤起烟霞深痼。否极而亨，剥馀而复，长至迎初度。龟图羲画，直从今日重数。

又 万花园用朱行父韵呈制帅赵端明

花风初逗，喜边亭依旧，春闲营柳。烟草隋宫歌舞地，谁遣万红围绣。结酒因缘，装春富贵，也要经纶手。笙箫声里，一江晴绿吹绉。

是处羽箭如飞，那知鹤府，花压阑干昼。油幕文书谈笑了，馀事尽堪茶酒。报答东风，流连西日，绿外沈吟久。与春无负，醉归香满襟袖。

又 和君用

槎牙诗骨，想生来无分，史闱经幄。呵护九关多虎豹，谁道去天一握。奏赋两都，闻韶三月，雁远书难托。一寒如许，蟾枝莫倚高擢。

空使满壑风烟，半村雪月，孤负梅花约。渺渺愁予初度也，山沍同云垂幕。鹤帐何如，牛衣无恙，麦陇占优渥。不如归去，檐花深

夜春酌。

又 送吴丞入幕

祈山底处，为二松千竹，肯题崖壁。雪洒谈犀麾雁鹭，尔辈何烦涉笔。使者知乎，民其劳止，且莫闲耕织。片言金石，唤回春意无极。

虽则王谢人家，一癯仙泽，面作苍烟色。茶灶笔床将雨屐，吟到梅花消息。贱子何为，老仙如问，莫道头今白。寒蓑几梦，研朱看点周易。

水龙吟 和朱行甫帅机瑞香

当年睡里闻香，阿谁唤做花间瑞。巾飘沈水，笼熏古锦，拥青绫被。初日酣晴，柔风逗暖，十分情致。掩窗绡，待得香融酒醒，尽消受、这春思。

从把万红排比。想较伊、更争些子。诗仙老手，春风妙笔，要题教似。十里扬州，三生杜牧，可曾知此。趁紫唇微绽，芳心半透，与骚人醉。

又 和朱行父海棠

昼长庭院深深，春柔一枕流霞醉。矇松欲醒，娇羞还困，锦屏围翠。豆蔻初肥，樱桃微绽，玉阑同倚。记华清浴起，渭流波暖，红涨腻、弃脂水。

燕子来时天气。尽韶风、与诗为地。芳丛雨歇，露痕日酽。英英仙意。莫恨无香，最怜有韵，天然情致。待问春能几，五更犹

是，拌今宵睡。

满庭芳 擘蟹醉题

半壳含黄，双螯擘紫，风流浑是芦花。  
江头秋老，谁了酒生涯。玉质金相如许，怎  
消受、明月寒沙。橙香也，不闲左手，除是  
付诗家。

草泥，行郭索，横戈曾怒，张翰浮夸。  
笑鲈鱼虽好，风味争些。醉嚼霜前松雪，江  
湖梦、不枉归槎。停杯问，余其负腹，是腹  
负余耶。

喜迁莺 和余义夫行边闻捷

淮山秋晓。问西风几度，雁云蛩草。铁  
色骢骄，金花袍窄，未觉塞垣寒早。笳鼓声  
中晴色，一羽不飞边报。君莫道，怎乾坤许  
大，英雄能少。

谈笑。鸣镝处，生缚胡雏，烽火传音耗。  
漠漠寒沙，荒荒残照，正恐不劳深讨。但喜  
欢迎马首，犹是中原遗老。关何事，待归来  
细话，一尊倾倒。

浣溪沙 赵阁学饷螯蚌酒春螺

半壳含潮带靛香。双螯嚼雪迸脐黄。芦  
花洲渚夜来霜。

短棹秋江清到底，长头春瓮醉为乡。风

流不枉与诗尝。

又 寿潘宰

夜醉渊明把菊图。宿醒扶晓又冰壶。秋香留得伴双凫。

并日满浮金凿落，明年初赐玉茱萸。更书欲上有除书。

齐天乐 和楚客赋芦

孤篷夜傍低丛宿，萧萧雨声悲切。一岸霜痕，半江烟色，愁到沙头枯叶。澹云没灭。黯西风吹老，满汀新雪。天岂无情，离骚点点送归客。

归去来兮怎得，尽鹭翘鸥倚，乍寒时节。秋晚山川，夕阳浦溆，赢得别肠千结。涛翻浪叠。那得似西来，一筇横绝。搔首江南，雁衔千里月。

花心动 和楚客忆梅

雪带边寒，渺愁予。雪中谁抱奇节。逊在扬州，逋老孤山，芳信顿成消歇。江南茅屋今安在，疏影瘦、祇堪叹息。归来未，沙头立尽，暮天云碧。

自笑梁园赋客。倚旧日鞍鞞，春风巾帻。问讯横枝，暖热新花，无处访寻诗阁。几年不见冰霜面，知谁共、批风支月。归来也，鸥盟不妨再结。

风流子 和楚客维扬灯夕

小楼帘不卷，花正闹、灯火竞春宵。想旧日何郎，飞金叵罗，三生杜牧，醉董娇饶。香尘路，云松鸾髻髻，月衬马蹄骄。彷彿神仙，刘安鸡犬，分明富贵，子晋笙箫。

人生行乐耳，君不见、迷楼春绿迢迢。二十四、经行处，旧月今桥。但索笑梅花，酒消新雪，纵情诗草，笔卷春潮。俯仰人间陈迹，莫惜金貂。

瑞鹤仙

寿丘提刑 岁十二月二十有九日，实维绣衣使者焕章公绂麟盛旦也，岳敢拜手而言曰：月穷于纪，星回于天，盖三百有六旬有六日于是焉极、而岁功成矣。惟天之运，循环无穷，一气推移，不可限量，其殆极而无极欤。分岁而颂椒，守岁而爆竹，人知其为岁之极耳。洪钧转而万象春，瑶历新而三阳泰，不知自吾极而始也。始而又极，极而又始，元功宁有穷已哉。天之生申于此时，意或然也。岳既不能测识，而又旧为场屋士，不能歌词，辄以时文体，按谱而腔之，以致其意。

一年寒尽也。问秦沙、梅放未也。幽寻者谁也。有何郎佳约，岁云除也。南枝暖也。正同云、商量雪也。喜东皇，一转洪钧，依旧春风中也。

香也。骚情酿就，书味熏成，这些情也。玉堂深也。莫道年华归也。是循环、三百六旬六日，生意无穷已也。但丁宁，留取微酸，

调商鼎也。

又 寿宋倅 七月二十三日

中元才过节。正宇宙澄清，一天寒碧。凉飙动秋色。算佳辰恰是，下弦当日。天生俊杰。富文才、瑰奇挺特。看葱葱，和气薰城，共庆武夷仙伯。

难得。钓鳌连六，虎榜登名，新题淡墨。从容莲幕。游花县，无邀隔。纵风流别驾，难淹紫诏，行对天颜咫尺。更堪夸，萱草长春，红衣交列。

哨遍 问月

月亦老乎，劝尔一杯，听说平生事。吾问汝，开辟自何时。有乾坤更应有尔。年几许。鸿荒邈哉遐已。吾今断自唐虞起。繫帝曰放勋，甲辰践祚，数至今、宋嘉熙。凡三千五百二十年馀。嗟雨旸风僝几盈亏。老兔奔驰，痴蟆吞吐，定应衰矣。

噫。月岂无悲。吾观人寿几期颐。炯炯双眸子，明清无过婴儿。但才到中年，昏然欲眊，那堪老矣知何似。试以此推之。吾言有理，不能不自疑耳。恐古时月与今时异。恨则恨今人不千岁。但见今、冰轮如洗。阿谁曾自前古，看到隋唐世。几时明洁，几时昏暗，毕竟少晴多雨。须臾月落夜何其。曰先生、置之姑醉。

又 用韵作月对和程申父国录

月曰不然，君亦怎知，天上从前事。吾

全宋词 方岳

语汝，月岂有弦时。奈人间并观乃尔。休浪许。历家繆悠而已。谁云魄死生明起。又明死魄生，循环晦朔，有老兔、自熙熙。妄相传、月溯日光馀。嗟万古谁知了无亏。玉斧修成，银蟾奔去，此言荒矣。

噫。世已堪悲。听君歌复解人颐。桂魄何曾死，寒光不减些儿。但与日相望，对如两镜，山河大地无疑似。待既望观之。冰轮渐侧，转斜才一钩耳。论本来不与中秋异。恐天问灵均未知此。又底用、咸池重洗。乾坤一点英气。宁老人间世。飞上天来，摩挲月去，才信有晴无雨。人生圆缺几何其。且徘徊、与君同醉。

眼儿媚 泊松洲

雁带新霜几多愁。和月落沧洲。桂花如许，菊花如许，怎不悲秋。

江山例合闲人管，也白几分头。去年曾此，今年曾此，烟雨孤舟。

鹊桥仙 七夕送荷花

银河无浪，琼楼不暑。一点柔情如水。肯捐兰佩了渠愁，尽闲却、纤纤机杼。

波心沁雪，鸥边分雨。翦得荷花能楚。天公煞自解风流，看得我、如何销汝。

又 辛丑生日小尽月

今朝廿九，明朝初一。怎欠秋崖个生日。

全宋词 方岳

客中情绪老天知，道这月、不消三十。

春盘缕翠，春缸摇碧。便泥做、梅花消息。雪边试问是耶非，笑今夕、不知何夕。

玉楼春 秋思

木犀过了诗憔悴。只有黄花开又未。秋风也不管人愁，到处相寻吹短袖。

露滴碧觞谁共醉。肠断向来携手地。夜寒笺与月明看，未必月明知此意。

虞美人 见梅

鸥清眠碎晴溪月。几梦寒蓑雪。断桥篱落带人家。枝北枝南初著、两三花。

曾于春底横孤艇。香似诗能冷。娟娟立玉载归壶。渺渺愁予肯入、楚骚无。

一翦梅 客中新雪

谁翦轻琼做物华。春绕天涯。水绕天涯。园林晓树恁横斜。道是梅花。不是梅花。

宿鹭联拳倚断槎。昨夜寒些。今夜寒些。孤舟蓑笠钓烟沙。待不思家。怎不思家。

烛影摇红 立春日柬高内翰

辇路融晴，宫云逗晓青旂报。梅边香沁彩鞭寒，初信花风到。笑语谁家帘幕，镂冰

丝、红粉绿闹。髻横玉燕，鬟颤琼幡，不能知掉。

看见春来，曲尘微涨催兰棹。娇黄拂略上柔条，等得莺眠觉。引出千花万草。喜搀先、椒盘竹爆。问谁天上，瑶帖初供，玉堂归倬。

最高楼 壬寅生日

溪南北，本自一渔舟。烟雨几盟鸥。白鱼不负鸬鹚杓，青蓑不减鹧鸪裘。怎无端，贪射策，觅封侯。

既不似、古人能识字。又不似、今人能识事。空老去，自宜休。帝乡五十六朝暮，人间四十四春秋。问何如，茅一把，橘千头。

又 寿黄宰，七月十六日

朝元了，万鹤放班回。携月下天来。初平家看青羊石，滕王阁醉绿螺杯。试鸣琴，花荡漾，玉崔嵬。

前十日、鹊桥飞宝鞮。后一月、兔奩开玉镜。秋色净，夜徘徊。申从五狱三光出，亥将二首六身排。问何其，餐沆漑，宴蓬莱。

又 和人投赠

秋崖底，云卧欲生苔。无梦到公台。有月锄、晓带乌犍去，与烟蓑、夜钓白鱼来。问谁能，供酒料，办诗材。

君莫笑、闲忙棋得势。也莫笑、浮湛鱼得计。胸次老，雪崔嵬。付老夫、小小鸬鹚杓，尽诸公、衮衮凤凰台。且容依，多种竹，

剩栽梅。

行香子 癸卯生日

说与樵青。紧闭柴门。道先生检校东屯。阿戎安在，未扫愁痕。且免歌词，休载妓，莫携尊。

梅自生春。雪立前村。道此杯、酒也须温。无穷身外，付与乾坤。谁共耕山，闲钓水，饱窥园。

江神子 牡丹

窗绡深隐护芳尘。翠眉颦。越精神。几雨几晴，做得这些春。切莫近前轻著语，题品错，怕渠嗔。

碧壶谁贮玉粼粼。醉香茵。晚风频。吹得酒痕，如洗一番新。只恨谪仙浑懒却，辜负那，倚阑人。

又 发金陵

梅花吹梦过溪桥。路迢迢。雪初消。似恁天寒，诗瘦想无聊。听得草堂人有语，能几日，是生朝。

乱云深处洗山瓢。鬓萧萧。酒红朝。回首六朝，南北黯魂销。纵使钟山青眼在，终不似，侣渔樵。

水调歌头 庆平交 七月十七

世不乏季子，藉甚有休声。芝兰挺秀庭

砌，广厦万间新。胸次金天爽豁，风骨玉堂清彻，才器更轮裼。劲节九秋干，和气万家春。

过中元，才两日，是生辰。瓣香西上，都向此夕颂殷勤。自有阴功天佑，合享人间长寿，不独我知君。从此见今日，丹桂伴灵椿。

### 瑞鹧鸪

中元过后恰三朝。因甚庭闱喜气飘。李谪若非当此夕，申生应是在今宵。

满斟绿醕歌檀口，慢拍红牙舞柳腰。富贵荣华谁得似，祝公千岁乐逍遥。

### 酹江月 寿松山主人 七月十九日

楚天秋早，过中元捻指，萸飞四荚。怪得千门佳气满，恰值生申时节。蓬矢当年，椒盘今夕，瑞木金炉爇。主人情重，酒红潮上双颊。

且看戏彩□□。鼎分丹桂，兰玉同班列。更喜萱庭南极老，亲授长生秘诀。养浩颐然，后昌青紫，天报公阴德。年年盛会，祝延椿算千百。

### 满庭芳 寿刘参议 七月二十日

秋入西郊，律调夷则，韩堂风露清凉。

洞天昨夜，响动玉玎珰。朱户银环放钥，长庚梦、应诞星郎。垂弧旦，冀飞五荚，簪履共称觞。

未施经济手，暂参雄府，公论声扬。便好趁昌辰，入辅吾皇。况是中兴启运，正当宁、梦想循良。从兹去，万年佐主，福寿总无疆。

又 寿通判 七月二十日

星昴呈祥，山川钟秀，果然生此真贤。精神莹澈，秋水共长天。况值西风初起，中元过、七日凉先。庭院爽，称觞贺客，车马看骈阗。开筵称寿处，红袖歌舞，脆管繁弦。愿公与椿松，对阅天年。纵使平分风月，不容暂、吟醉苔川。龙光近，行看凤诏，促入秉钧权。

百字谣 寿丘郎 七月二十四日

河南灵地，信从生俊杰，皆由天佑。见说簪纓称世袭，复是青毡还旧。学海渊源，笔端锋镝，未逊谁居右。使台暂赞，直须黄阁环召。

欣遇初度良辰，中元节过，九日方称寿。好看莱衣□舞处，尽羨一门三秀。名过河东，迭居宰职，复见韦平胄。祝君遐算，南山松柏长茂。

八六子 子寿父

喜椿庭。近来强健，团栾雁序欢声。正

全宋词 方岳

柳絮帘栊清昼，牡丹栏槛新晴，缓飞翠觥、  
阿戎碌碌功名。但要无灾无难，何曾著公卿。  
且抖擞斑衣，笑供儿戏，共将乐事，细酬佳  
景，须知翠袖全盛绿黛，金章不埒蓑青。松  
亭。中间顿个寿星。

## 方 资

### 黄鹤引

予生浙东 ,世业农。总角失所天 ,稍从里闾儒者游。年十八 ,婺以充贡。凡八至礼部 ,始得一青衫。间关二十年 ,仕不过县令 ,擢才南阳教授。绍圣改元 ,实六十五岁矣。秋风忽起 ,亟告老於有司 ,适所愿也。谓同志曰 :仕无补於上下 ,而退号朝士。婚姻既毕 ,公私无虞。将买扁舟放浪江湖中 ,浮家泛宅 ,誓以此生 ,非太平之幸民而何。因阅阮田曹所制黄鹤引 ,爱其词调清高 ,写为一阕 ,命稚子歌之 ,以侑尊焉。

生逢垂拱。不识干戈免田陇。士林书圃终年 ,庸非天宠。才初闾茸。老去支离何用。浩然归弄。似黄鹤、秋风相送。

尘事塞翁心 ,浮世庄生梦。漾舟遥指烟波 ,群山森动。神闲意耸。回首利鞞名鞚。此情谁共。问几斛、淋浪春瓮。

## 房舜卿

### 忆秦娥

与君别。相思一夜梅花发。梅花发。凄凉南浦，断桥斜月。

盈盈微步凌波袜。东风笑倚天涯阔。天涯阔。一声羌管，暮云愁绝。

### 玉交枝

蕙死兰枯待返魂。暗香梅上又重闻。粉妆额子，多少画难真。

竹外冰清斜倒影，江头雪里暗藏春。千钟玉酒，休更待飘零。

## 飞红

青玉案 案此乃燕归梁调

花低莺踏红英乱。春心重、顿成愁懒。杨  
花梦散楚云平，空惹起、情无限。伤心渐觉成  
牵绊。奈愁绪、寸心难管。深诚无计寄天涯，  
几欲问、梁间燕。

## 费时举

### 蓦山溪 蜡梅

黄苞初绽，谁向江头寄。天赋与清香，笑红颜、呈妖逞媚。低垂花面，不与众争妍，春尚未。先群卉。独禀中央气。

何须施巧，点缀芳丛里。只恐暗寻香，误蜂儿、归来故垒。玉纤攀处，金钏色相宜，朔风寒，空雪坠。痛赏休辞醉。

## 冯取洽

### 贺新郎 寿张宜轩

九日明朝是。问宜轩何事，今朝众宾交至。长记每年八月八，曾庆饮仙出世。直推到、于今何意。要待千崖秋气爽，向东篱、试探花开未。挝急鼓，舞长袖。主人臭味花相似。笑争春、红紫低昂，转头扫地。独占西风摇落候，旋屑黄金点缀。做得个、秋花元帅。旧说东阳流菊水，饮之者、寿过百馀岁。泛此酒，劝公醉。

又 黄玉林为风月楼作，次韵以谢

自顾卑栖翼。似沧洲、白鸟悠悠，静依拳石。聊寄一梯云木表，俯视霓虹千尺。乐江上、山间声色。镜样清流环样绕，笑赐湖、一曲夸唐敕。尘外趣，有谁识。飞来妙墨痕犹湿。走盘珠流出，不火食人胸膈。三叹阳春知和寡，但觉光生虚室。何处觅、倚歌箫客。他日玉林来得否，待平分、风月供吟笔。添一友，共闲逸。

又 次韵江定轩咏菊

句里思黄九。笑王郎、不奈寒芳，腰围

如柳。得似江郎饶雅趣，时揽黄花诳口。吐妙语、与之争秀。闲绕珍丛吟不尽，尽风前、露下栾栾瘦。香自足，岂劳嗅。一尊问我能同否。叹双溪、冷落篱边，傲霜犹有。浩唱云笺金缕调，兴发小槽珠酒。待唤醒、早春梅友。独恨爱花人易老，漫一年、好景还依旧。东望处，立良久。

又 送别定轩

梦折营门柳。送君归、暂戏斑衣，又拢征袖。到得皇州风景异，只有湖山似旧。把感慨、寓之杯酒。雨抹晴妆西子样，且平章、胜赋诗千首。富与贵，本来有。青油幕底筹攻守。拥貔貅、朝气凌云，夜锋冲斗。蜀祲淮氛犹在眼，一扫正须健帚。又何惜、驱驰奔走。快展韬铃资世用，看归来、金印悬双肘。倾玉斝，为亲寿。

又 次玉林见寿韵

那得身无事。问双溪老子，而今万缘空否。正使尘劳偿未了，毕竟难昏灵府。已笑唾、功名如土。五十九年风雨过，算非非、是是何须数。垂老也，信缘度。

绿阴朱夏回清暑。叹病来、觴怯流霞，扇闲白羽。方念生初增感慨，谁寄乐章新语。知是我、花庵庵主。一别三年惟梦见，定何时、相对倾琼醕。惊世路，有豺虎。

又 次玉林感时韵

知彼须知此。问筹边、攻守规模，云何

则是。景色悒悒犹日暮，壮士无由吐气。又安得、将如廉李。燕坐江沱甘自蹙，笑腐儒、枉植朝家紫。用与舍，徒为耳。

黄芦白苇迷千里。叹长淮、篱落空疏，仅馀残垒。读父兵书宁足恃，击楫谁盟江水。有识者、知其庸矣。多少英雄沈草野，岂堂堂、吾国无君子。起诸葛，总戎事。

又

花庵老子以游戏自在三昧，寓之乐府。溪翁随喜和韵以咏叹之，不知维摩燕坐次，可授散花女，俾歌之以侑茗饮否？艾子，汝为老人书以寄之

问讯花庵主。这一宗、拍板门槌，是谁亲付。逢翰墨场聊作戏，那个是真实语。算惟有、青山堪住。玉立林幽真脱洒，又何防、白石和泉煮。底用判，云游据。

朝三暮四从渠赋。且随缘、家养园收，自然成趣。此外盘蜗馀一室，人我两俱无负。要参到、道心微处。尽做逃禅逃得密，也难遮、拨草来寻路。应为拨，懒残芋。

又 追次玉林所赋溪楼燕集韵

二老交相访。正不妨、勃窣嫫媠，舍车而仗。忆在蓉村新雨过，门外春流浩荡。中有个、列仙臞相。把酒论诗饶胜韵，更柳边、花底同心赏。临别句，几回唱。

忽传风驭来溪上。遣儿曹、策马郊迎，老怀欣畅。争讶金华佳父子，飞下蓬莱昆阆。有四士、追随仙仗。我爱君如何次道，便令人、直欲倾家酿。歌妙曲，郑声放。

又 用前韵自寿

往事休寻访。幸老来、筋力差强，未须扶杖。收脚八风波外立，一片虚空荡荡。悟寿者、本来无相。今日不知何日也，便戊申、重见何须赏。大梦曲，此时唱。

团栾儿女溪堂上。且一觴、一咏陶然，此情堪畅。漫说神仙华屋好，缥缈峤壶蓬阆。这浮幻、也难凭仗。何似薰风来岁岁，蔼一家、和气如春酿。婚嫁了，尽闲放。

沁园春 次韵四友吴会卿次子西上

我爱□君，结屋并山，友松竹梅。有倦游孤剑，暂悬素壁，醉吟行履，时印苍苔。得失不惊，知恬交养，浩浩胸中何壮哉。须知道，似骅骝万里，道路方开。

相期湖上舒怀。莫放过花枝与酒杯。况上天已办，河东新赋，圜桥乐得，海内英才。矍铄溪翁，据鞍一笑，画饼功名赋佞来。长堤上，正柳花荷气，尽可追陪。

又

次玉林惠示韵 二月三日，诸少载酒邀往遗蜕观桃。半酣，追省昨游，因诵雅词“从此一春须一到”之句，竟堕渺茫，为之黯然。辄用惠示元日沁园春韵，写此怀思，一酹桃花也

人事好乖，云散风流，暗思去年。记竹舆伊轧，报临村里，筇枝颠倒，忙返溪边。翦韭新炊，寻桃小酌，取次欢谣俱可编。难忘处，是阳春一曲，群唱尊前。

新晴又放花天。况家酿堪携不用钱。想有人如玉，已过南市，无人伴我，重醉西阡。旧约难凭，新词堪赋，乐事赏心那得全。归来也，命儿将此意，写以朱弦。

又 用定轩雨馀有感韵写山中之趣

一雨霏然，六合全清，空无点埃。喜秋容新沐，为谁媚妩，凉蟾留照，正尔徘徊。蜡屐清游，渔蓑淡话，富贵于予何有哉。双溪上，总旧盟鸥鹭，来往无猜。

烟霞竹石松梅。更无数幽花陆续开。渐黄鸡啄黍，肥堪一箸，浮蛆拍瓮，美可三杯。儿解应门，翁方索句，俗客来时莫放来。青山好，尽从今日日，闷不妨排。

又 用前韵谢魏菊庄

举世纷纷，风靡波流，名氛利埃。有幽人嘉遁，长年修洁，寒花作伴，竟日徘徊。餐荐夕英，杯迎朝露，世味何如此味哉。扬扬蝶，尽弄芳来往，我又奚猜。

双溪约玉林梅。拟真到庄门一扣开。柰衢山风急，勒教回驾，横塘水弱，未许浮杯。恨结停云，神驰落月，白雪风前忽堕来。教儿唱，侑衰翁一醉，无闷堪排。

又 和答吕柳溪

问讯柳溪，溪上柳容，胡为带埃。叹阳春陡变，孰为披拂，赏音难遇，谁与徘徊。好在湖山，吾容不辱，寄径垂条岂偶哉。休摇荡，且深根宁极，免俗人猜。

何防傍竹依梅。待青眼春回一笑开。尽攀丝弄叶，效颦施黛，笼鞞拂帽，藉荫传杯。未碍飞绵，一高千丈，风力微时稳下来。天难问，便陶门汉苑，一任安排。

又 二月二日寿玉林

禀气之中，具圣之和，生逢令辰。算三春仲月，方才破二，百年大齐，恰则平分。立玉林深，散花庵小，中有悠然自在身。诗何似，似苏州闲远，庾府清新。

青鞋布袜乌巾。试勇往蓉溪一问津。有心香一瓣，心声一阕，更携阿艾，同寿灵椿。劫劫长存，生生不息，宁极深根秋又春。聊添我，作风流二老，岁岁寻盟。

又 赠锦江歌者何琮

有孤竹君，音节拂云，谥曰洞箫。纵柳郎填就，周郎顾罢，欠伊品藻，律也难调。惭愧何郎。呜呜袅袅，翻入罅唇齿舌喉。谁知道，是郭郎亲授，共贯同条。后来一辈枵枵。甚声响都如鸚鵡娇。叹秦青已往，嘉荣何在，念奴骨朽，李八魂消。试向尊前，听君一曲，前辈风流未觉凋。冯郎老，但点头咽唾，拚解金貂。

水调歌头

四月四日自寿，用玉林韵，兼效其体

林叶润而密，莺语老犹娇。懒翁那记生日，兀兀度昏朝。勘破富贫贵贱，参透死生寿夭，至竟本同条。胸次绝疑碍，物外自超

遥。

又何尝，贪七贵，慕三乔。溪山吾所自有，宜钓更堪樵。窃笑傍门小法，休觅驻颜大药，擅长只伤苗。造化大炉耳，愚智一齐销。

又

社后三日，诸少邀登北山之巔，把酒展眺，异趣同乐，又奚可不可之有。因赋是词付何琮，俾歌之以侑一醉

雪霁春已半，露重午方暄。一筇拄上高绝，便觉眼前宽。指点数家楼阁，检校一村花柳，绿水接青烟。峦岫竞围绕，风日更清妍。

闹媒蜂，纷使蝶，菜花繁。少年正尔行乐，谁复顾华颠。自有此丘此坂，那得游人箫鼓，暖响出中天。归步不妨晚，恰则月初弦。

念奴娇 次韵玉林寄示

高堂素壁，漫生绡十幅，图张消暑。不奈火云烧六合，逃也略无逃处。小派秋声，巨麓凉点，吸歛来何许。故人词翰，此时飞落蓬户。

何幸一笑掀髯，停杯浩唱，三叹遗音古。雪碗冰瓯无表里，更贮三危鲜露。咀嚼生香，清寒入梦，展转忘宵曙。对床误喜，与君同听风雨。

## 金菊对芙蓉

奉同刘篁嶮、魏菊庄、冯竹溪、吕柳溪、道士王溪云，赏西渚荷花，醉中走笔用篁嶮韵 庚寅

宝镜缘空，玉簪点水，荡摇千顷寒光。正江妃月姊，斗理明妆。扶阑一笑开诗眼，少容我、吟讽其旁。一川风露，满怀冰雪，云海弥茫。

不妨倚醉乘狂。问天公觅取，几曲渔乡。听小楼哀管，偷弄初凉。夜深欢极忘归去，锦江酿透碧筒香。对花无语，花应笑我，不似张郎。

## 木兰花慢 次韵奉酬玉林病中见示

叹年光婉晚，蒲柳质、易惊秋。况念远怀人，停云幂幂，时雨飕飕。西风堕来雁信，似知予、竟日倚溪楼。报道归调汤剂，不知谁护衣篝。

悠然富贵不须求。安乐万缘休。但饱饭煎茶，婆娑永日，也胜闲愁。寒花自便寂寞，怕纷纷、蝶引与蜂勾。莫问障从何起，祇凭心有天游。

## 摸鱼儿

玉林君为遗蜕山中桃花赋也。花与主人，何幸如之，用韵和谢

叹刘郎、那回轻别，霏霏三落红雨。玄

全宋词 冯取洽

都观里应遗恨，一抹断烟残缕。愁望处。想雾暗云深，忘却来时路。新花旧主。记刻羽流商，裁红翦翠，山径日将暮。

空枝上，时有幽禽对语。声声如问来否。人生行乐须闻健，衰老念谁免此。吾所与。在溪上深深，锦绣千花坞。何时定去。但对酒思君，呼儿为我，频唱小桃句。

蝶恋花 和玉林韵

秋到双溪溪上树。叶叶凉声，未省来何许。尽拓溪楼窗与户。倚阑清夜窥河鼓。

那得吟朋同此住。独对秋芳，欲寄花无处。杖屦相从曾有语。未来先自愁君去。

西江月 太岁日作

老子齐头六十，新年第一今朝。放开怀抱不须焦。万事付之一笑。

烟柳效颦翠敛，露桃献笑红妖。已拚行乐到元宵。尚可追随年少。

## 冯 去 非

### 八声甘州 过松江

买扁舟、载月过长桥，回首梦耶非。问  
往日三高，清风万古，继者伊谁。惟有茶烟  
轻扬，零露湿莼丝。西子知何处，鸿怨蛩悲。

遥想家山好在，正倚天青壁，石瘦云肥。  
甚抛奇殓秀，猿鹤互猜疑。归去好、散人相  
国，迴升沈、毕竟总尘泥。须远我，松间旧  
隐，竹上新诗。

### 点绛唇

秋满孤篷，翠蒲红蓼留人住。一帘香缕。  
边影惊鸿度。

小据胡床，旧事新情绪。凭谁诉。蜡灯  
犀麈。拟共西风语。

### 喜迁莺

凉生遥渚。正绿芰擎霜，黄花招雨。雁  
外渔村，蛩边蟹舍，绛叶满秋来路。世事不  
离双鬓，远梦偏欺孤旅。送望眼，但凭舷微

笑，书空无语。

慵觑。清镜里，十载征尘，长把朱颜污。借箸青油，挥毫紫塞，旧事不堪重举。间阔故山猿鹤，冷落同盟鸥鹭。倦游也，便檣云柁月，浩歌归去。

## 冯 熔

### 如梦令 题龙脊石

素养浩然之气，铁石心肠谁拟。蒿目县前江，不逐队鱼游戏。藏器。藏器。只等时乘奋起。

## 冯时行

### 青玉案 和贺方回青玉案寄果山诸公

年时江上垂杨路。信拄杖、穿云去。碧涧步虚声里度。疏林小寺，远山孤渚，独倚阑干处。

别来无几春还暮。空记当时锦囊句。南北东西知几许。相思难寄，野航蓑笠，独钓巴江雨。

### 虞美人 咏茶蘼

东君已了韶华媚。未快芳菲意。临居倾倒向茶蘼。十万宝珠璎珞、带风垂。合欢翠玉新呈瑞。十日傍边醉。今年花好为谁开。欲寄一枝无处、觅阳台。

又

芳菲不是浑无据。只是春收取。都将酿造晚风光。百尺瑶台、吹下半天香。多愁多病疏慵意。也被香扶起。微吟小酌送花飞。更拚小屏幽梦、到开时。

又 重阳词

去年同醉黄花下。采采香盈把。今年仍

全宋词 冯时行

复对黄花。醉里不羞斑鬓、落乌纱。劝君莫似  
阳关柳。飞伴离亭酒。愿君只似月常圆。还  
使人人一月、一回看。

渔家傲 冬至

云覆衡茅霜雪后。风吹江面青罗皱。镜  
里功名愁里瘦。闲袖手。去年长至今年又。  
梅逼玉肌春欲透。小槽新压冰渐溜。好  
把升沈分付酒。光阴骤。须臾又绿章台柳。

天仙子 荼蘼已凋落赋

风幸多情开得好。忍却吹教零落了。弄  
花衣上有馀香,春已老。枝头少。况又酒醒鸚  
鹉晓。

一片初飞情已悄。可更如今纷不扫。年  
随流水去无踪,恨不了。愁不了。楼外远山眉  
样小。

点绛唇

闲居十七年,或除蓬州。二月到官,三月罢归。  
同官置酒,为赋点绛唇作别

十日春风,吹开一岁闲桃李。南柯惊起。  
归踏春风尾。

世事无凭,偶尔成忧喜。歌声里。落花流  
水。明日人千里。

### 玉楼春

杏花微露春犹浅。春浅愁浓愁送远。山  
拖馀翠断行踪，细雨疏烟迷望眼。暮云浓处轻  
吹散。往事时时心上见。不禁慵瘦倚东风，燕  
子双双花片片。

### 点绛唇

江上新晴，闲撑小艇寻梅去。自知梅处。  
香满鱼家路。

路尽疏篱，一树开如许。留人住。留人不  
住。黯淡黄昏雨。

又

眉黛低颦，一声春满流苏帐。却从檀响。  
渐到梅花上。

归卧孤舟，梅影舟前扬。劳心想。岸横千  
嶂。霜月铺寒浪。

### 梦兰堂 送史谊伯倅潼川

小雨清尘淡烟晚。官柳殢花待暖。君愁  
入伤眼。芳草绿、断云归雁。酒重斟，须再劝。  
今夕近、明朝乍远。到时暗花飞乱。千里断肠  
春不管。

蓦山溪 村中闲作

艰难时世。万事休夸会。宦宦误人多，道是也、终须不是。功名事业，已是负初心，人老也，发白也，随分谋生计。

如今晓得，更莫争闲气。高下与人和，且觅个、置锥之地。江村僻处，作个老渔樵。一壶酒，一声歌，一觉醺醺睡。

醉落魄

点酥点蜡。凭君尽做风流骨。汉家旧样宫妆额。流落人间，真个没人识。佳人误拨龙香觅。一枝初向烟林得。被花惹起愁难说。恰恨西窗，酒醒乌啼月。

## 冯 伟 寿

### 玉连环 忆李谪仙

谪仙往矣，问当年、饮中俦侣，于今谁在。叹沈香醉梦，胡尘日月，流浪锦袍宫带。高吟三峡动，舞剑九州隘。玉皇归跸，半空遗下，诗囊酒佩。

云月仰挹清芬，揽虬须、尚友千载。晋宋颓波，羲皇春梦，尊前一慨。待相将共蹑，龙肩鲸背。海山何处，五云缓缓。

### 春风袅娜 春恨 黄钟羽

被梁间双燕，话尽春愁。朝粉谢，午花柔。倚红阑故与，蝶围蜂绕，柳绵无数，飞上搔头。风管声圆，蚕房香暖，笑挽罗衫须少留。隔院兰馨趁风远，邻墙桃影伴烟收。

些子风情未减，眉头眼尾，万千事、欲说还休。蔷薇露，牡丹球。殷勤记省，前度绸缪。梦里飞红，觉来无觅，望中新绿，别后空稠。想思难偶，叹无情明月，今年已是，三度如钩。

春云怨 上巳 黄钟商

春风恶劣。把数枝香锦，和莺吹折。雨重柳腰娇困，燕子欲扶扶不得。软日烘烟，乾风吹雾，芍药荼蘼弄颜色。帘幕轻阴。图书清润，日永篆香绝。

盈盈笑靥宫黄额。试红鸾小扇，丁香双结。团凤眉心倩郎贴。教洗金盃，共看西堂，醉花新月。曲水成空，丽人何处，往事暮云万叶。

云仙引 桂花 夹钟羽

紫凤台高，红鸾镜里，馥馥几度秋馨。黄金重，绿云轻。丹砂鬓边滴粟，翠叶玲珑烟剪成。含笑出帘，月香满袖，天雾萦身。

年时花下逢迎。有游女、翩翩如五云。乱掷芳英，为簪斜朵，事事关心。长向金风，一枝在手，嗅蕊悲歌双黛颦。绕临溪树，对初弦月，露下更深。

眼儿媚 春情

自嗔双黛听啼鸦。帘外翠烟斜。社前风雨，已归燕子，未入人家。

鞋儿试著无人看，莫是忒宽些。想它楼上，闷拈箫管，憔悴莺花。

木兰花慢 和答玉林韵

酒醒人世换，碧桃靛、海山春。任青鸟沈沈，紫鳞杳杳，有玉林人。宫袍掉头未爱，爱荷衣、不染市朝尘。仙样蓬莱翰墨。云间鸾凤精神。

笑呼银汉入金鲸。琼苑自由身。羨咳唾成章，香薰花雾，音和韶钧。六丁夜来捧去，便天人、也自叹尖新。那得金笺飞洒，浩歌飞步苍旻。

## 冯应瑞

### 天香 宛委山房拟赋龙涎香

枯石流痕 ,残沙拥沫 ,骊宫夜蛰惊起。海市收时 ,鲛人分处 ,误入众芳丛里。春霖未就 ,都化作、凄凉云气。惟有清寒一点 ,消磨小窗残醉。

当年翠篝素被。拂余薰、倦怀如水。谩惜舞红犹在 ,为谁重试。几片金昏字古 ,向故篋聊将伴憔悴。□□□□ ,□□□□。

## 福建士子

### 卜算子

月上小楼西 ,鸡唱霜天晓。泪眼相看话别时 ,把定纤纤手。

伊道不忘人 ,伊却都忘了。我若无情似你时 ,瞒不得、桥头柳。

## 赋梅

### 齐天乐 令狐金迁新廨

雕阑曲曲芙蓉水 ,天然一时潇洒。露浥冰壶 ,风摇玉佩 ,缥缈蓬莱如画。银烛欲下。照藻桷翬飞 ,杏梁虹架。如此规模 ,杜陵何止万间厦。

明年春燕归早 ,卷帘应认得 ,旧家王谢。袖里经纶 ,幕中佳话 ,高斲云根谁写。青冥纵鞞。看人在金坡 ,炬莲盈把。句忆湘南 ,绿池明月夜。

## 傅大询

### 水调歌头

草草三间屋，爱竹旋添栽。碧纱窗户，眼前都是翠云堆。一月山翁高卧，踏雪水村清冷，木落远山开。唯有平安竹，留得伴寒梅。

唤家童，开门看，有谁来。客来一笑，清话煮茗更传杯。有酒只愁无客，有客又愁无酒，酒熟且徘徊。明日人间事，天自有安排。

### 锦堂春 寿许宰

梅要疏开，雪教迟下，怕他寒入江天。有月桥仙客，相伴婵娟。巷陌升平气象，一时都在鸣弦。望东家锦里，雁到云边。书到云边。

尊前翠眉环唱，道新腔字稳，花折声圆。此去凤池游戏，碧波添插金莲。看长生叶上，龟寿千年。人寿千年。

柳梢青 庆叶丞

春到江南，今年寒少，早有疏梅。相伴双松，吟哦风月，着意花开。

天香甚处安排。便何似、调羹去来。劲节仙姿，玉堂难老，身在蓬莱。

念奴娇

江梅破腊，把一枝来报，□春消息。锦帐银瓶龙麝暖，画烛光摇金碧。两径桃花，一溪流水，路入神仙宅。云裳羽佩，洞天相会今夕。

堂下乐问灵鼈，玉人清唱，舞袖低回雪。富贵风流须道是，天上人间难得。玉镜台边，琼浆盏畔，共说春心切。百年偕老，凤凰楼上风月。

行香子 寿邓宰母 二月初五

玉佩簪纓。罗袜生尘。问何时、来到湘滨。尧蓂五叶，二月阳春。一霎时风，一霎时雨，一霎时晴。

有子鸣琴。有路登瀛。戏斑衣、温酒重斟。蟠桃难老，相伴长生。一千年花，一千年果，一千年人。

## 富 掬

### 多 丽 寿刘帅

淡云收、晓来春满湘中。柳如烟、花枝如糝，万红千翠纤浓。照帘旌、微穿丽日，动罗幕、轻转香风。天上良辰，人间淑景，生贤和气显殊钟。映时表、南山北斗，相并两穹崇。须知道、英明罕比，文武谁同。

奉慈亲、承颜戏彩，更闻吉梦占熊。扫蛮氛、遂清三楚，定徐方、行策元功。趣召遄归，康时佐主，指挥谈笑虏巢空。寿觞举、器舟斟海，不用水精钟。休辞醉，千龄会遇，美事重重。

## 高登

### 多丽

人间世 ,偶然攘臂来游。何须恁、乾坤角抵 ,又成冷笑俳优。且宽心、待他天命 ,漫鼓舌、夸吾人谋。李广不侯 ,刘蕡未第 ,千年公论合谁羞。往矣瓦瓢无意 ,甌堕懒回头。真堪笑 ,直钩论议 ,圆枘机筹。

幸斯道、元无得丧 ,壮心岂有沈浮。好温存、困中节概 ,莫冷落、穷里风流。酒滴真珠 ,饭钞云子 ,醉饱卧信缘休。归去也 ,幅巾谈笑 ,卒岁且优游。循环事 ,亡羊须在 ,失马何忧。

阮郎归 过武仙县 ,谒许宰不遇 ,作此寄之

武仙花县谒皂仙。急招横渡船。重门昼掩讼庭闲。虚檐群雀喧。

金屋畔 ,玉阑边。新春桃李妍。主人情重客无缘。销魂空黯然。

蓦山溪 容州病起作

黄茅时节 ,病恼南来客。瘦得不胜衣 ,试

全宋词 高登

腰围、都无一搦。东篱兴在 ,手种菊方黄 ,摘晚艳 ,泛新篘 ,谁道乾坤窄。

百年役役 ,乐事真难得。短发已无多 ,更何劳、霜风染白。儿曹齐健 ,扶□一翁孱 ,龙山帽 ,习池巾 ,归路从敲侧。

行香子

瘴气如云。暑气如焚。病轻时、也是十分。沈疴恼客 ,罪罟萦人。叹槛中猿 ,笼中鸟 ,辙中鳞。

休负文章 ,休说经纶。得生还、已早因循。菱花照影 ,筇竹随身。奈沈郎厄 ,潘郎老 ,阮郎贫。

渔家傲 绍兴甲子潮州考官作

名利场中空扰扰。十年南北东西道。依旧缘山尘扑帽。空懊恼。羡他陶令归来早。

归去来兮秋已杪。菊花又绕东篱好。有酒一尊开口笑。虽然老。玉山犹解花前倒。

好事近 黄义卿画带霜竹

潇洒带霜枝 ,独向岁寒时节。触目千林憔悴 ,更幽姿清绝。

多才应赋得天真 ,落笔惊风叶。从此绿窗深处 ,有一梢秋月。

又 再和钱别

送客过江村 ,况值重阳佳节。向晚西风萧

瑟 正离人愁绝。

尊前相顾惜参商 ,引十分蕉叶。回首高阳人散 ,负西楼风月。

又 又和纪别

饮兴正阑珊 ,正是挥毫时节。霜干银钩锦句 ,看壁间三绝。

西风特地飒秋声 ,楼外触残叶。匹马翩然归去 ,向征鞍敲月。

浪淘沙 王宰母生日 ,寓居道州 ,勉其来富州

璧月挂秋宵。丹桂香飘。广寒宫殿路迢迢。试问嫦娥缘底事 ,欲下层霄。

兰玉自垂髫。拜命当朝。神仙会里且逍遥、分取壶中闲日月 ,来伴王乔。

### 西江月

渺渺西江流水 ,翩翩北客征帆。清秋月影浸人寒。云净碧天澄淡。

飘泊道途零落 ,疏慵鬓发鬢髵。从来涉世戒三緘。只好随时饮啖。

### 南歌子

菊捻黄金嫩 ,杯倾琥珀浓。良辰何处寄萍踪。短艇飘摇一叶、浪花中。

凤阙游娃馆 ,幽坡赏梵宫。当年乐事总成空。目断天边想像、意何穷。

全宋词 高登

### 好事近

富贵本无心 ,何事故乡轻别。空惹猿惊鹤  
怨 ,误松萝风月。

囊锥刚强出头来 ,不道甚时节。欲命巾车  
归去 ,恐豺狼当辙。

## 高观国

### 齐天乐

碧云阙处无多雨，愁与去帆俱远。倒苇沙闲，枯兰溼冷，寥落寒江秋晚。楼阴纵览。正魂怯清吟，病多依黯。怕挹西风，袖罗香自去年减。

风流江左久客，旧游得意处，朱帘曾卷。载酒春情，吹箫夜约，犹忆玉娇香软。尘栖故苑，叹璧月空檐，梦云飞观。送绝征鸿，楚峰烟数点。

### 又 菊

丛幽一笑东篱晓，霜华又随香冷。晕色黄娇，低枝翠婉。来趁登高佳景。谁偏管领。是彭泽归来，未荒三径。最惬清觞。道家标致自风韵。

南山依旧翠倚。采花无限思，西风吹醒。万蕊金寒，三秋梦好，曾记餐英清咏。斓斑泪沁。怕节去蜂愁，雨荒烟暝。明日重阳，为谁管短鬓。

### 又 中秋夜怀梅溪

晚云知有关山念，澄霄卷开清霁。素景

分中，冰盘正溢，何啻婵娟千里。危阑静倚。正玉管吹凉，翠觞留醉。记约清吟，锦袍初唤醉魂起。

孤光天地共影，浩歌谁与舞，凄凉风味。古驿烟寒，幽垣梦冷，应念秦楼十二。归心对此。想斗插天南，雁横辽水。试问姮娥，有谁能为寄。

玉楼春 拟宫词

几双海燕来金屋。春满离宫三十六。春风翦草碧纤纤，春雨秣花红扑扑。

卫姬郑女腰如束。齐唱阳春新制曲。曲终移宴起笙箫，花下晚寒生翠縠。

又 海棠题寅斋挂轴

燕脂染出春风锦。生怕黄昏人有恨。雨难揩泪玉环娇，烟不遮愁红袖冷。

醉魂吹断香魂静。拂拂翠眉羞带粉。最怜新燕识风流，只为春寒消瘦损。

又

多时不踏章台路。依旧东风芳草渡。莺声唤起水边情，日影炙开花上雾。

谢娘不信佳期误。认得马嘶迎绣户。今宵翠被不春寒，只恐香秣春又去。

又

春烟澹澹生春水。曾记芳洲兰棹舫。岸花香到舞衣边，汀草色分歌扇底。

棹沈云去情千里。愁压双鸳飞不起。十

年春事十年心，怕说湔裙当日事。

### 玉蝴蝶

唤起一襟凉思，未成晚雨，先做秋阴。  
楚客悲残，谁解此意登临。古台荒、断霞斜照，  
新梦黯、微月疏砧。总难禁。尽将幽恨，分付孤斟。

从今。倦看青镜，既迟勋业，可负烟林。  
断梗无凭，岁华摇落又惊心。想蕤汀、水云愁凝，  
闲惠帐、猿鹤悲吟。信沈沈。故园归计，休更侵寻。

### 临江仙 东越道中

俱是洛阳年少客，才华迥出天真。青衫  
惯拂软红尘。酒狂因月舞，诗俊为梅新。

寄语长安风月道，莺花缓作青春。披风  
沐露问前津。客中春不当，归去倍还人。

又

风月生来人世，梦魂飞堕仙津。青春日  
日醉芳尘。一鞭花陌晓，双桨柳桥春。

前度诗留醉袖，昨宵香浥罗巾。小姬飞  
燕是前身。歌随流水咽，眉学远山颦。

### 金人捧露盘 水仙花

梦湘云，吟湘月，吊湘灵。有谁见、罗  
袜尘生。凌波步弱，背人羞整六铢轻。娉娉

袅袅，晕娇黄、玉色轻明。

香心静，波心冷，琴心怨，客心惊。怕  
佩解、却返瑶京。杯擎清露，醉春兰友与梅  
兄。苍烟万顷，断肠是、雪冷江清。

又 梅花

念瑶姬，翻瑶佩，下瑶池。冷香梦、吹  
上南枝。罗浮梦杳，忆曾清晓见仙姿。天寒  
翠袖，可怜是、倚竹依依。

溪痕浅，云痕冻，月痕澹，粉痕微。江  
楼怨、一笛休吹。芳音待寄，玉堂烟驿两凄  
迷。新愁万斛，为春瘦、却怕春知。

又

楚宫闲，金成屋，玉为阑。断云梦、容  
易惊残。骊歌几叠，至今愁思怯阳关。清音  
恨阻，抱哀箏、知为谁弹。

年华晚，月华冷，霜华重，鬓华斑。也  
须念、闲损雕鞍。斜緘小字，锦江三十六鳞  
寒。此情天阔，正梅信、笛里关山。

### 凤栖梧

云唤阴来鸠唤雨。谢了江梅，可踏江头  
路。拚却一番花信阻。不成日日春寒去。

青山，依旧修眉妩。归雁不如箏上柱。  
一行常见相思苦。

又 题岩室

岩室归来非待聘。渺渺千崖，漠漠江千  
顷。明月清风休弄影。只愁踏破苍苔径。

摘取香芝医鹤病。正要臞仙，相伴清闲性。朝市不闻心耳静。一声长啸烟霞冷。

又 湖头即席，长翁同赋

西子湖边眉翠妩。魂冷孤山，谁是风烟主。相唤吟诗天欲雨。嫩凉不隔鸥飞处。

移下天孙云锦渚。翠盖牵风，绰约凌波女。清约已成君记取。月明夜半鱼龙舞。

### 贺新郎 赋梅

月冷霜袍拥。见一枝、年华又晚，粉愁香冻。云隔溪桥人不度，的皪春心未纵。清影怕、寒波摇动。更没纤毫尘俗态，倚高情、预得春风宠。沈冻蝶，挂么凤。

一杯正要吴姬捧。想见那、柔酥弄白，暗香偷送。回首罗浮今在否，寂寞烟迷翠拢。又争奈、桓伊三弄。开遍西湖春意烂，算群花、正作江山梦。吟思怯，暮云重。

### 喜迁莺 代人吊西湖歌者

歌音凄怨。是几度诉春，春都不管。感绿惊红，颦烟啼月，长是为春消黯。玉骨瘦无一把，粉泪愁多千点。可怜损，任尘侵粉蠹，舞裙歌扇。

转盼。尘梦断。峡里云归，空想春风面。燕子楼空，玉台妆冷，湖外翠峰眉浅。绮陌断魂名在，宝篋返魂香远。此情苦，问落花流水，何时重见。

又

凉云归去。再约著，晚来西楼风雨。水静帘阴，鸥闲菰影，秋到露汀烟浦。试省唤回幽恨，尽是愁边新句。倦登眺，动悲凉还在，残蝉吟处。

凄楚。空见说，香锁雾扃，心似秋莲苦。宝瑟弹冰，玉台窥月，浅澹可怜偷聚。几时翠沟题叶，无复绣帘吹絮。鬓华晚，念庾郎情在，风流谁与。

菩萨蛮

春风吹绿湖边草。春光依旧湖边道。玉勒锦障泥。少年游冶时。

烟明花似绣。且醉旗亭酒。斜日照花西。归鸦花外啼。

又 苏堤芙蓉

红云半压秋波碧。艳妆泣露娇啼色。佳梦入仙城。风流石曼卿。

宫袍呼醉醒。休卷西风锦。明日粉香残。六朝烟水寒。

又 水晶脍

玉鳞熬出香凝软。并刀断处冰丝颤。红缕间堆盘。轻明相映寒。

纤柔分劝处。膩滑难停箸。一洗醉魂清。真成醒酒冰。

又

玉阑秋色知谁主。隔阑一架葡萄雨。绿

藓怕啼螿。可堪宫漏长。

乌丝吟古怨。清泪消尘砚。梦冷不成云。  
□峰峰外情。

又

何须急管吹云暝。高寒滟滟开金饼。今夕不登楼。一年空过秋。

桂花香雾冷。梧叶西风影。客醉倚河桥。清光愁玉箫。

又 咏双心水仙

云娇雪嫩羞相倚。凌波共酌春风醉。的的玉台寒。肯教金盏单。

只疑双蝶梦。翠袖和香拥。香外有鸳鸯。风流烟水乡。

### 青玉案

平生似欠西湖债。每拚了、金貂解。妩媚烟云多变态。雕鞍来处，画船归去，花柳春风隘。

玉京相接蓬壶界。入画遥山翠分黛。苏小不来时节改。一堤风月，六桥烟水，鹭约鸥盟在。

### 醉落魄

钩帘翠湿。寒江上、雨晴风急。乱峰低处明残日。雁字成行，写破暮天碧。

故人天外长为客。倚阑一望情何极。新

来得个归消息。去棹回舟，数过几千只。

### 夜合花

斑驳云开，蒙松雨过，海棠花外寒轻。  
湖山翠暖，东风正要新晴。又唤醒，旧游情。  
记年时、今日清明。隔花阴浅，香随笑语，  
特地逢迎。

人生好景难并。依旧秋千巷陌，花月蓬  
瀛。春衫抖擞，余香半染芳尘。念嫩约，杳  
难凭。被几声、啼鸟惊心。一庭芳草，危阑  
晚日，无限消凝。

### 花心动 梅意

碧藓封枝，点寒英、疏疏玉清冰洁。梦  
忆旧家，春与新恩，曾映寿阳妆额。绿裙青  
袂南邻伴，应怪我、精神都别。恨衰晚，春  
风意思，顿成羞怯。

犹念横斜性格。恼和靖吟魂，自来清绝。  
斜傍劲松，偷倚修篁，总是岁寒相识。绿阴  
结子当时意，到如今，芳心消歇。小桥夜，  
清愁倦陪澹月。

### 昭君怨 题春波独载图

一棹莫愁烟艇。飞破玉壶清影。水溅粉  
绡寒。渺云鬟。

不肯凌波微步。却载春愁归去。风澹楚

魂惊。隔瑶京。

### 杏花天

霁烟消处寒犹嫩。乍门巷、愔愔昼永。  
池塘芳草魂初醒。秀句吟春未稳。

仙源阻、春风瘦损。又燕子、来无芳信。  
小桃也自知人恨。满面羞红难问。

又

远山学得修眉翠。看眉展、春愁无际。  
雨痕半湿东风外。不管梨花有泪。

西园路、青鞋暗记。怕行人、秋千径里。  
一春多少相思意。说与新来燕子。

又 题杏花春禽扇面挂轴

花凝露湿燕脂透。是彩笔、丹青染就。  
粉绡帕入班姬手。舒卷清寒时候。

春禽静、来窥晴昼。问冷落、芳心知否。  
不愁院宇东风骤。日日娇红如旧。

又 杏花

玉坛消息春寒浅。露红玉、娇生靓艳。  
小怜鬓湿燕脂染。只隔粉墙相见。

花阴外、故宫梦远。想未识、莺莺燕燕。  
飘零翠径红千点。桃李春风已晚。

### 祝英台近 荷花

拥红妆，翻翠盖，花影暗南浦。波面澄霞，  
兰艇采香去。有人水溅红裙，相招晚醉，

正月上、凉生风露。

两凝伫。别后歌断云闲，娇姿黯无语。魂梦西风，端的此心苦。遥想芳脸轻颦，凌波微步，镇输与、沙边鸥鹭。

又

一窗闲，孤烬冷，独自个春睡。绣被熏香，不似旧风味。静听滴滴檐声，惊愁搅梦，更不管、庾郎心碎。

念芳意。一并十日春寒，梅花煞憔悴。懒做新词，春在可怜里。几时挑菜踏青，云沈雨断，尽分付、楚天之外。

### 江城子 代作

绿丛篱菊点娇黄。过重阳。转愁伤。风急天高，归雁不成行。此去郎边知近远，秋水阔，碧天长。

郎心如妾妾如郎。两离肠。一思量。春到春愁，秋色亦凄凉。近得新词知怨妾，无处诉，泣兰房。

### 生查子 咏芹

野泉春吐芽，泥湿随飞燕。碧涧一杯羹，夜韭无人剪。

玉钗和露香，鹅管随春软。野意重殷勤，持以君王献。

又

芙蓉羞粉香，倚竹窥烟霁。眼带楚波寒，

骨艳春风醉。

谁传侧帽情，想解遗鞭意。红叶可怜秋，  
不寄相思字。

又 史辅之席上歌者赠云头香乞词

蓬莱一捻云，彻骨龙涎染。风味韵而芳，  
笑语柔而婉。

花娇绿鬓寒，酒凝清歌怨。翠幄已烟秣，  
银烛重休剪。

又 木香

春笼云润香，露湿青蛟瘦。偷学汉宫妆，  
舞彻霓裳后。

酥胸紫领巾，冰翦柔黄手。有意入罗囊，  
不肯成春酒。

又

飞花澹澹风，破暖疏疏雨。香润玉阶尘，  
翠湿纱窗雾。

钿筝离雁行，宝篋留钗股。惟有凤楼魂，  
夜夜江南路。

又 梅次韵

香惊楚驿寒，瘦倚湘筠暮。一笛已黄昏，  
片月尤清楚。

沈沈冰玉魂，漠漠烟云浦。酸泪不成弹，  
又向春心聚。

解连环 柳

露条烟叶。惹长亭旧恨，几番风月。爱

细缕、先宰轻黄，渐拂水藏鸦，翠阴相接。  
纤软风流，眉黛浅、三眠初歇。奈年华又晚，  
萦绊游蜂，絮飞晴雪。

依依灞桥怨别。正千丝万绪，难禁愁绝。  
怅岁久、应长新条，念曾系花骢，屡停兰楫。  
弄影摇晴，恨闲损、春风时节。隔邮亭，故  
人望断，舞腰瘦怯。

又 春水

浪摇新绿。漫芳洲翠渚，雨痕初足。荡  
霁色、流入横塘，看风外漪漪，皱纹如縠。  
藻荇萦回，似留恋、鸳飞鸥浴。爱娇云蘸色，  
媚日揆蓝，远迷心目。

仙源漾舟岸曲。照芳容几树，香浮红玉。  
记那回、西洛桥边，裙翠传情，玉纤轻掬。  
三十六陂，锦鳞渺、芳音难续。隔垂杨，故  
人望断，浸愁万斛。

烛影摇红

别浦潮平，远村帆落烟江冷。征鸿相唤  
著行飞，不耐霜风紧。雪意垂垂未定。正惨  
惨、云横冻影。酒醒情绪，日晚登临，凄凉  
谁问。

行乐京华，软红不断香尘喷。试将心事  
卜归期，终是无凭准。寥落年华将尽。误玉  
人、高楼凝恨。第一休负，西子湖边，江梅  
春信。

忆秦娥

栖乌惊。隔窗月色寒于冰。寒于冰。澹

移梅影，冷印疏棂。

幽香未觉魂先清。无端勾起相思情。相思情。恼人无睡，直到天明。

又 舟中书事

歌声闲。兰舟只隔芙蓉湾。芙蓉湾。扇摇波影，风卷云鬟。

余音袅袅留余欢。双鸳飞处传情难。传情难。曲终人去，愁寄湖山。

清平乐 秋叶

盘枝翦翠。叶叶西风意。吹上玉人云□底。无限新凉气味。

飘萧露卷烟柔。绝怜不逐宫流。寄语多情宋玉，悲秋得似宜秋。

又

春蒲雨湿。燕子低飞急。云压前山群翠失。烟水满湖轻碧。

小莲相见湾头。清寒不到青楼。请上琵琶弦索，今朝破得春愁。

更漏子

玉箫闲，清韵咽。人倚画阑愁绝。云恼月，月羞云。半溪梅影昏。

恨春风，萧散后。夜夜数残更漏。情悄悄，思依依。天寒一雁飞。

东风第一枝 为梅溪寿

玉洁生英，冰清孕秀，一枝天地春早。  
素盟江国芳寒，旧约汉宫梦晓。溪桥独步，  
看洒落、仙人风表。似妙句、何逊扬州，最  
惜细吟清峭。

香暗度、照影波渺。春暗寄、付情云杳。  
爱随青女横陈，更怜素娥窈窕。调羹雅意，  
好赞助、清时廊庙。羨韵高、只有松筠，共  
结岁寒难老。

又 壬戌立春日访梅溪，雨中同赋

烧色回青，冰痕绽白，娇云先酿酥雨。  
纵寒不压葭尘，应时已鞭黛土。东君入夜，  
怕预恼、诗边心绪。意转新，无奈吟魂，醉  
里已题春句。

香梦醒、几花暗吐。绿睡起、几丝偷舞。  
酒醅清惜重斟，菜甲嫩怜细缕。玉纤彩胜，  
愿岁岁、春风相遇。要等得、明日新晴，第  
一待寻芳去。

摊破浣溪沙 七夕

袅袅天风响佩环。鹊桥有女夜乘鸾。也  
恨别多相见少，似人间。

银浦无声云路渺，金风有信玉机闲。生  
怕河梁分袂处，晓光寒。

浣溪沙

遮坐银屏度水沈。障风罗幕皱泥金。  
日迟宫院静愔愔。繁杏半窥红日薄，小  
怜低唱绿窗深。试拈犀管写春心。

又

魂是湘云骨是兰。春风冰玉注芳颜。谁  
招仙子在人间。  
溅水裙儿香雾皱，唾花衫子碧云寒。洞  
箫声绝却骖鸾。

又

偷得韩香惜未烧。吹箫人在月明桥。草  
芳似待玉骢骄。  
吹絮绣帘春澹澹，隔香罗帐夜迢迢。楚  
魂须著楚词招。

又 小春

云外峰峦翠欲埋。雨沾黄叶湿青鞋。小  
惊春色入寒茭。  
风月愁新空雁字，神仙梦冷忆鸾钗。凄  
凉不是好情怀。

又 题湖楼壁

一色烟云澹不消。两峰眉黛为谁娇。春  
寒犹占木兰桡。  
燕子似甘愁寂寞，海棠未肯醉妖娆。小  
园嫩约尚萧条。

兰陵王 为十年故人作

凤箫咽。花底寒轻夜月。兰堂静，香雾翠深，曾与瑶姬恨轻别。罗巾泪暗叠。情入歌声怨切。殷勤意，欲去又留，柳色和愁为重折。

十年迴凄绝。念髻怯瑶簪，衣褪香雪。双鳞不渡烟江阔。自春来人见，水边花外，羞倚东风翠袖怯。正愁恨时节。

南陌。阻金勒。甚望断青禽，难倩红叶。春愁欲解丁香结。整新欢罗带，旧香宫篋。凄凉风景，待见了，尽向说。

又 春雨

洒虚阁。幂幂天垂似幕。春寒峭，吹断万丝，湿影和烟暗帘箔。清愁晚来觉。佳景恹恹过却。芳郊外，莺恨燕愁，不管秋千冷红索。

行云楚台约。念今古凝情，朝暮如昨。啼红湿翠春情薄。谩一犁江上，半篙堤外，勾引轻阴趁暮角。正孤绪寂寞。

斑駁。止还作。听点点檐声，沈沈春酌。只愁入夜东风恶。怕催教花放，趁将花落。冥冥烟草，梦正远，恨怎托。

水龙吟 云意

旧家心绪如云，乍舒乍卷初无定。西郊载雨，东城隔雾，还开晴景。爱恼花阴，喜

移月地，朦胧清影。任无心有意，溶溶曳曳，萧散处、有谁问。

朝暮如今难准。枉教他、惜春人恨。远峰依旧，前踪何在，有时愁凝。此兴飘然，不妨吹断，一川轻暝。待良宵，再入高唐梦里，觅巫阳信。

又 为放翁寿

道山玉府真仙，去年再履论思地。西清禁域，眷深名重，年高身退。玉振金声，水增川涌，德兼才贵。爱知章引去，安车稳驾，轩冕付、谈笑外。

兰玉孙枝竞秀，奉亲欢、莱衣同戏。蓬莱东接，苕萝西顾，三山耸翠。赐杖清朝，命堂绿野，放怀高致。似太公出将，卫公入相，为苍生起。

又 为梦庵寿

夜来曾跨青虬，海风袅袅吹襟袖。蓬莱误入，群仙争问，刘郎安否。玉麈冰壶，日庭星角，孕成奇秀。看丹分宝鼎，篆传秘箬，闻重寄、长生酒。

归梦惊回晓漏。正长庚、辉躔南斗。祥开华旦，菊香秋杪，枵黄霜后。笔扫龙蛇，句裁螭锦，俊才谁右。看功勋绣袞，家声再振，数千龄寿。

声声慢 元夕

壶天不夜，宝炷生香，光风荡摇金碧。月滟冰痕，花外峭寒无力。歌传翠帘尽卷，

全宋词 高观国

误惊回、瑶台仙迹。禁漏促，拚千金一刻，未酬佳夕。

卷地香尘不断，最得意、输他五陵狂客。楚柳吴梅，无限眼边春色。蛟绡暗中寄与，待重寻、行云消息。乍醉醒，怕南楼、吹断晓笛。

隔浦莲 七夕

银湾初霁暮雨。鹊赴秋期去。浅月窥清夜，凉生一天风露。纤巧云暗度。河桥路。缥缈乘鸾女。正容与。

西厢旧约，玉娇谁见私语。柔情不尽，好似冰绡云缕。回首天涯又怨阻。无语。西风魂断机杼。

思佳客 秋扇

入手西风意已羞。不须玉斧为重修。扑萤凉夜沈沈月，障面清歌澹澹秋。

休弃置，且迟留。可怜又向篋中收。莫教暗损乘鸾女，汉殿凄凉万古愁。

又 题太真出浴图

写出梨花雨后晴。凝脂洗尽见天真。春从翠髻堆边见，娇自红绡脱处生。

天宝梦，马嵬尘。断魂无复到华清。恰如伫立东风里，犹听霓裳羯鼓声。

又

有约湖山却解襟。昼眠占得一庭深。树

边风色寒滋味，愁里年华雁信音。

惊楚梦，听瑶琴。黄花尚可伴孤斟。断云万一成疏雨，却向湖边看晚阴。

又

剪翠衫儿稳四停。最怜一曲凤箫吟。同心罗帕轻藏素，合字香囊半影金。

春思悄，昼窗深。谁能拘束少年心。莺来惊碎风流胆，踏动樱桃叶底铃。

又 立秋前一日西湖

不肯楼边著画船。载将诗酒入风烟。浪花溅白疑飞鹭，荷芰藏红似小莲。

醒醉梦，唤吟仙。先秋一叶莫惊蝉。白云乡里温柔远，结得清凉世界缘。

又 中秋后一日借月意

白玉楼台知几重。夜来望断广寒宫。一分乍阙婵娟影，二八尤宜冰雪容。

云鬓露，玉钗风。水晶帘幕正玲珑。殷勤再为天香醉，可惜清光付晓钟。

### 永遇乐 次韵吊青楼

浅晕修蛾，脆痕红粉，犹记窥户。香断帘空，尘生砌冷，谁唤青鸾舞。春风花信，秋宵月约，历历此心曾许。衔芳恨、千年怨结，玉骨未应成土。

木兰艇子，莫愁何在，谩系寒江烟树。事逐云沈，情随佩冷，短梦分今古。一杯遥夜，孤光难晓，多少碎人肠处。空凄黯、西

风细雨，尽吹泪去。

### 玲珑四犯

水外轻阴，做弄得飞云，吹断晴絮。驻马桥西，还系旧时芳树。不见翠陌寻春，每问著、小桃无语。恨燕莺、不识闲情，却隔乱红飞去。

少年曾识春风意，到如今、怨怀难诉。魂惊冉冉江南远，烟草愁如许。此意待写翠笺，奈断肠、都无新句。问甚时、舞凤歌鸾，花里再看仙侣。

### 御街行 赋帘

香波半翠深深院。正日上、花阴浅。青丝不动玉钩闲，看翠额、轻笼葱茜。莺声似隔，篆醒微度，爱横影、参差满。

那回低挂朱栏畔。念闲损、无人卷。窥春偷倚不胜情，仿佛见、如花娇面。纤柔缓揭，瞥然飞去，不似春风燕。

### 又 赋轿

藤筠巧织花纹细。称稳步、如流水。踏青陌上雨初晴，嫌怕湿、文鸳双履。要人送上，逢花须住，才过处、香风起。

裙儿挂在帘儿底。更不把、窗儿闭。红红白白簇花枝，恰称得、寻春芳意。归来时晚，纱笼引道，扶下人微醉。

### 霜天晓角

春云粉色。春水和云湿。试问西湖杨柳，  
东风外、几丝碧。

望极。连翠陌。兰桡双桨急。欲访莫愁  
何处，旗亭在、画桥侧。

又

炉烟浥浥。花露蒸沈液。不用宝钗翻炷，  
闲窗下、袅轻碧。

醉拍。罗袖惜。春风偷染得。占取风流  
声价，韩郎是、旧相识。

又 九日苏堤

霜清水碧。冷浸红云湿。休说季伦锦帐，  
山南岸、更花密。

露滴。空翠幂。两峰开霁色。不为秣妆  
一醉，西风帽、为谁侧。

### 眼儿媚

轻云终被断云留。不肯放春愁。翠楼旧  
倚，粉墙重见，歌酒风流。

今朝毕竟吟情澹，芳意未全酬。东风向  
晚，莺花有意，吹转船头。

卜算子 泛西湖坐间寅斋同赋

屈指数春来，弹指惊春去。檐外蛛丝网

落花，也要留春住。

几日喜春晴，几夜愁春雨。十二雕窗六曲屏，题遍伤春句。

### 西江月

小舫半帘山色，断桥两岸秋阴。芙蓉消息已愁深。红染云机翠锦。

几度烟波共酌，半生风月关心。飞来鸥鹭是知音。一笑歌边醉醒。

### 点绛唇

天外青鸾，几时常向人间住。断歌零舞。月上桐阴暮。

憔悴潘郎，不解为花主。知何处。梦云愁雨。怕向西楼去。

又

钓月篷闲，载诗却向旗亭醉。翠蒲阴外。莫放双鸥起。

水佩仙裳，洒落烟云意。来相试。玉绡新制。要写蓬壶记。

### 踏莎行 九日西山

水减堤痕，秋生屐齿。瘦筇唤起登高意。翠烟微冷梦凄凉，黄花香晚人憔悴。

怀古风流，悲秋情味。紫萸劝入旗亭醉。玉人相见说新愁，可怜又湿西风泪。

又

花染烟香，柳摇风翠。春工写出清明意。  
翠湾还趁画船开，粉墙到处骄骢系。

歌唤红裙，酒招青旆。吟情又许春风醉。  
何妨日日烂芳游，今宵先向西城睡。

恋绣衾

碧梧偷恋小窗阴。恨芭蕉、不展寸心。  
暗语近、阳台远，奈秋宵、砧断漏沈。

月明欲教吹箫去。隔骖鸾、空留怨音。  
从此是、天涯阻，这一场、愁梦更深。

风入松

卷帘日日恨春阴。寒食新晴。马蹄只向  
南山去，长桥爱、花柳多情。红外风娇日暖，  
翠边水秀山明。

杜郎歌酒过平生。到处蓬瀛。醉魂不入  
重城晚，秣欢寄、桃叶桃根。绣被嫩寒清晓，  
莺声唤醒春醒。

又 闻邻女吹笛

粉娇曾隔翠帘看。横玉声寒。夜深不管  
柔荑冷，樱朱度、香喷云鬟。霜月摇摇吹落，  
梅花簌簌惊残。

萧郎且放凤箫闲。何处骖鸾。静听三弄  
霓裳罢，魂飞断、愁里关山。三十六宫天近，  
念奴却在人间。

南乡子 赋十四弦

直柱倚冰弦。曾见胡儿马上弹。却笑琵琶风韵古，泔泔。想像湘妃水一帘。

塞恨曲中传。两折琴丝费玉纤。不似江南风月好，厌厌。拍手齐看舞袖边。

洞仙歌 题真

轻痕浅晕。偷染春风面。恰似西施影儿现。拟新妆、临槛一段天真，闲态度，长恁香娇玉软。

从今怀袖里，不暂相离，似笑如颦任舒卷。顾芳容不老，只似如今，娇不语、无奈情深意远。便雨隔云疏暂分携，也时展丹青，见伊一见。

柳梢青 柳

翠拂晴波，烟垂古岸，灞桥春色。斜带鸦啼，乱萦莺梦，愁丝如织。

为怜张绪风流，正瘦损、宫腰褪碧。绽绾同心，留连不住，天涯行客。

少年游 草

春风吹碧，春云映绿，晓梦入芳裯。软衬飞花，远连流水，一望隔香尘。

全宋词 高观国

萋萋多少江南恨，翻忆翠罗裙。冷落闲门，凄迷古道，烟雨正愁人。

### 诉衷情

西楼杨柳未胜烟。寒峭落梅天。东风渡头波晚，一棹木兰船。

花态度，酒因缘。足春怜。屏开山翠，雨怯云娇，尽付愁边。

### 夜行船

剪水天风吹醉醒。高楼外、冻云愁凝。袖口香寒，歌喉春暖，不管雁边寒紧。

琼屑瑶花飞碎影。应须待、玉田千顷。小约梅英，教吟柳絮，春在绣红鸳锦。

### 满江红

击碎空明，沧浪晚、棹歌飞入。西山外、紫霞吹断，赤尘无迹。飞上冰轮凉世界，唤回天籁清肌骨。看骊珠、影堕冷光斜，蛟龙窟。

长啸外，纶巾侧。轻露下，纤絺湿。听洞箫声在，卧虹阴北。十万江妃留醉梦，二三沙鸟惊吟魄。任天河、落尽玉杯空，东方白。

酹江月 灵岩吊古

万岩灵秀，拱崇台飞观，凭陵千尺。清磬一声帘幕冷，无复宫娃消息。响屐廊空，采香径古，尘土成遗迹。石闲松老，断云空锁愁寂。

专宠谁比轻颦，楚腰吴艳，一笑无颜色。风月荒凉罗绮梦，输与扁舟归客。舞阁歌残，国倾人去，青草埋香骨。五湖波淼，远空依旧涵碧。

谒金门

烟墅暝。隔断仙源芳径。雨歇花梢魂未醒。湿红如有恨。

别后香车谁整。怪得画桥春静。碧涨平湖三十顷。归云何处问。

留春令 淮南道中

断霞低映，小桥流水，一川平远。柳影人家起炊烟，仿佛似、江南岸。

马上东风吹醉面。问此情谁管。花里清歌酒边情，问何日、重相见。

又

粉绡轻试，绿裙微褪，吴姬娇小。一点清香著芳魂，便添起，春怀抱。

玉脸窥人舒浅笑。寄此情天渺。酒醒罗

浮角声寒，正月挂、南枝晓。

又 梅

玉清冰瘦，洗妆初见，春风头面。等得  
黄昏月溪寒，爱顾影、临清浅。

历尽冰霜空羞怨。怨粉香消减。江北江  
南旧情多，奈笛里、关山远。

又 红梅

玉妃春醉，夜寒吹堕，江南风月。一自  
情留馆娃宫，在竹外、尤清绝。

贪睡开迟风韵别。向杏花休说。角冷黄  
昏艳歌残，怕惊落、燕脂雪。

太常引

玉肌轻衬碧霞衣。似争驾、翠鸾飞。羞  
问武陵溪，笑女伴、东风醉时。

不飘红雨，不贪青子，冷澹却相宜。春  
晚涌金池，问一片、将愁寄谁。

浪淘沙 杜鹃花

啼魄一天涯。怨入芳华。可怜零血染烟  
霞。记得西风秋露冷，曾浼司花。

明月满窗纱。倦客思家。故宫春事与愁  
赊。冉冉断魂招不得，翠冷红斜。

意难忘 代赠

仙子奇容。是名花第一，美占春风。烟

全宋词 高观国

香笼浅翠，露靛浥芳红。怜舞燕，惜惊鸿。  
想独步吴宫。料认得、娇云媚雨，来自巫峰。  
风流正与欢浓。羨高楼并倚，曲影阑东。  
烛摇留醉枕，尘坠恋歌钟。三弄笛，五花骢。  
莫行乐匆匆。但看取、天长地久，笑语相逢。

雨中花

旆拂西风，客应星汉，行参玉节征鞍。  
缓带轻裘，争看盛世衣冠。吟倦西湖风月，  
去看北塞关山。过离宫禾黍，故垒烟尘，有  
泪应弹。

文章俊伟，颖露囊锥，名动万里呼韩。  
知素有、平戎手段，小试何难。情寄吴梅香  
冷，梦随陇雁霜寒。立勋未晚。归来依旧，  
酒社诗坛。

八归 重阳前二日怀梅溪

楚峰翠冷，吴波烟远，吹袂万里西风。  
关河迥隔新愁外，遥怜倦客音尘，未见征鸿。  
雨帽风巾归梦杳，想吟思、吹入飞蓬。料恨  
满、幽苑离宫。正愁黯文通。

秋浓。新霜初试，重阳催近，醉红偷染  
江枫。瘦筇相伴，旧游回首，吹帽知与谁同。  
想萸囊酒盏，暂时冷落菊花丛。两凝伫，壮  
怀立尽，微云斜照中。

瑞鹤仙 筇枝

一枝苍玉冷。爱露节霜根，从来孤劲。

提携远尘境。自清臞骨力，岁寒心性。登临助兴。甚偏与，芒鞋相称。笑葛洪、陂外腾飞，渺渺水闲烟迥。

寻胜。拨开林影，斫破苔痕，缓支幽径。分云度岭。待随处、问梅信。任香挑村醕，寒拖夜月，识尽江山好景。扣禅关拗折，归来万缘自静。

## 高似孙

### 金人捧露盘 送范东叔给事帅维扬

下明光，违宣曲，上扬州。玉帐暖、十万貔貅。梅花照雪，月随歌吹到江头。牙樯锦缆，听雁声、夜宿瓜州。

南山客，东山妓，蒲萄酒，鹧鸪裘。占何逊、杜牧风流。琼花红药，做珠帘、十里遨头。竹西歌吹，理新曲、人在春楼。

### 眼儿媚

翠帘低护郁金堂。犹自未忺妆。梨花新月，杏花新雨，怎奈昏黄。

春今不管人相忆，欲去又相将。只销相约，与春同去，须到君行。

### 莺啼序

屈原九歌东皇太一，春之神也。其词凄惋，含意无穷。略采其意，以度春曲。

青旗报春来了，玉鳞鳞风旆。陈瑶席、新奏琳琅，窈窕来荐嘉祉。桂酒洗琼芳，丽

景晖晖，日夜催红紫。湛青阳新沐，人声澹荡花里。

光泛崇兰，坼遍桃李，把深心料理。共携手、蘅室兰房，奈何新恨如此。对佳时、芳情脉脉，眉黛蹙、羞拈琼珥。折微馨、聊寄相思，莫愁如水。

青苹再转，淑思菲菲，春又过半矣，细雨湿香尘，未晓又止。莫教一鹄无聊，群芳亹亹。伤情漠漠，泪痕轻洗。曲琼桂帐流苏暖，望美人、又是论千里。佳期杳渺，香风不肯为媒，可堪玩此芳芷。

春今渐歇，不忍零花，犹恋馀绮。度美曲、造新声，乐莫乐此新知。思美人兮，有花同倚。年华做了，功成如委。天时相代何日已。怅春功、非与他时比。殷勤举酒酬春，春若能留，□还亦喜。

### 失调名

红翻茧栗梢头遍。

### 江神子 寄王德新

春风花柳日相催。浙江梅。腊前开。开遍山桃，恰野茶蘼。商岭东来三百里，红作阵，绿成堆。

半山亭下钓鱼台。拂层崖。坐苍苔。林影湖光，佳处两三杯。恨杀玉溪王老子，忙个甚，不同来。

又

众人皆醉屈原醒。笑刘伶。酒为名。不道刘伶，久矣笑螟蛉。死葬糟丘殊不恶，缘底事，赴清冷。

醉乡千古一声平。物忘情。我忘形。相去羲皇，不到一牛鸣。若见三闾凭寄语，吾有酒，可同倾。

又

二更轰饮四更回。宴繁台。尽邹枚。谁今梁园，回首便成灰。今古废兴浑一梦，凭底事，寄悲哀。

青天荡荡镜奁开。月光来。且徘徊。何用东生、西没苦相催。世事悠悠吾老矣。歌一曲，尽馀杯。

木兰花慢 孟津官舍寄钦若、钦用昆弟，并长安故人

流年春梦过，记书剑、入西州。对得意江山，十千沽酒，著处欢游。兴亡事、天也老，尽消沈、不尽古今愁。落日霸陵原上，野烟凝碧池头。

风声习气想风流。终拟觅菟裘。待射虎南山，短衣匹马，腾踏清秋。黄尘道、何时了，料故人、应也怪迟留。只问寒沙过雁，几番王粲登楼。

二

拥都门冠盖，瑶圃秀、转春晖。帐华屋生存，丘山零落，事往人非。追随。旧家谁

在，但千年、辽鹤去还归。系马凤凰楼柱，倚弓玉女窗扉。

江头花落乱莺飞。南望重依依。渺天际归舟，云间江树，水绕山围。相期。更当何处，算古来、相接眼中稀。寄与兰成新赋，也应为我沾衣。

三

赋招魂九辩，一尊酒，与谁同。对零落栖迟，兴亡离合，此意何穷。匆匆。百年世事，意功名、都在黑头公。乔木萧萧故国，孤鸿澹澹长空。

门前花柳又春风。醉眼眩青红。问造物何心，村箫社鼓，奔走儿童。天东。故人好在，莫生平、豪气减元龙。梦到琅邪台上，依然湖海沈雄。

四

对西山摇落，又匹马、过并州。恨秋雁年年，长空澹澹，事往情留。白头。几回南北，竟何人、谈笑得封侯。愁里狂歌浊酒，梦中锦带吴钩。严城笳鼓动高秋。万灶拥貔貅。觉全晋山河，风声习气，未减风流。风流。故家人物，慨中宵、拊枕忆同游。不用闻鸡起舞，且须乘月登楼。

江神子 寄德新丈

草堂潇洒浙江头。傍林丘。买扁舟。隔岸红尘，无路近沙鸥。枕上看书樽有酒，身外事，竟何求。

全宋词 高似孙

暮云归鸟仲宣楼。弊貂裘。为谁留。千古书生，那得尽封侯。好在半山亭下路，闻未老，去来休。

### 满江红

寄方城商师国器军中。寄同年李钦用，时钦用为西台掾，在长安

汉水方城，今古道、几回投迹。留滞久，浩歌狂醉，此心谁识。渭北清光摇草树，故人对酒应相识。记雨窗、相对话离忧，秋风夕。

风月笛，烟霞屐。身易老，时难得。鸟飞天不尽，野春平碧。我梦秦东亭上饮，举头但有长安日，便与君、重结入关期，明年必。

### 洞仙歌

超化蘸碧轩得钦之书，有相调之语，因代书以寄，寺有长明灯龕，即所见而言。

青钱白璧，自买愁肠绕。更恨欢狂负年少。记阳关图上，尊酒留连，儿女泪，输与闲人坐钓。

茂陵多病后，懒尽琴心，无复求凰与同调。似清风古殿，风动幡摇，晴昼永，惟有龕灯静照。看蝴蝶、飞来淡无情，问墙角茂葵，为谁凝笑。

临江仙 寄德新丈

自笑此身无定在，北州又复南州。买田何日遂归休。向来元落落，此去亦悠悠。

赤日黄尘三百里，嵩丘几度登楼。故人多在玉溪头。清泉明月晓，高树乱蝉秋。

点绛唇 寄李辅之

生死论交，有情何似无情好。满前花草。更觉今年老。

塞上春迟，湖上春风早。东州道。几时飞到。烂醉红云岛。

又

十六芳年，锦儿娇小琼儿秀。海棠红绉。恰愁时候。

天上歌声，未省人间有。休回首。渭城烟柳。肠断离亭酒。

## 高惟月

### 念奴娇

三山高惟月以庆元戊午校秋试於零陵竣事，尝游淡岩，观山谷留题。后廿九年，揭来分符，暮秋复游。睹景物之依然，叹岁月之逾迈。归兴翩翩，赋念奴娇一阕。

岩扃不锁，算空洞深窈，是谁初凿。帝遣六丁持月斧，乱把云根斲。骇目奇观。恍如崩浪，汹涌从天落。谪仙何处，翠珉佳句如昨。

惆怅白首重游。多情还似，与青山有约。且对清尊酬胜赏，休想舞衣歌乐。景物依然，头颅如许，何事嗟漂泊。翩翩归兴，故山无限林壑。

全宋词 高晞远

高晞远

失调名

梦绕荆溪，蟹肥春瓮满。

## 高宣教

### 卜算子

去又如何去。住又如何住。但得山花插  
满头，休问奴归处。

## 高子芳

### 念奴娇 庆朱察推

葱葱佳气 ,人都道、今日垂弧令旦。怪得欢声如鼎沸 ,准拟华堂开宴。三虎容仪 ,二乔态度 ,争捧金杯劝。瑶池王母 ,何妨引领仙眷。

况有道骨仙风 ,灵丹秘诀 ,钟鼎何心恋。却笑玉阶轩冕客 ,难脱功名羁绊。萧散陶篱 ,徜徉裴野 ,风月堪为伴。拳拳祝颂 ,寿龄期等龟算。

### 菩萨蛮 寿夫人

去年曾祝夫人寿。今岁也又还依旧。鬓绿与颜朱。神仙想不如。

骨相真难老。疑是居蓬岛。那更舞霓裳 ,笙歌溢画堂。

## 高 翥

### 秋日田父辞 二首

啄黍黄鸡没骨肥，绕篱绿橘缀枝垂。新  
酿酒，旋裁衣。正是昏男嫁女时。

又

少妇挈蓝旋染裙。大儿敲葛自浆巾。新  
摘摘，笑欣欣。相唤相呼看赛神。

## 葛长庚

### 兰陵王

一溪碧。何处桃花流出。春光好，寻个□□，小小篮舆漫行适。苍苔满白石。涧底阴风凜栗。疑无路，幽壑琮琤，峡转山回入林僻。

千峰呈翠色。时亦有声声，樵唱渔笛。忽然一树樱桃白。又回头一顾，掀髯一笑，诗情酒思正豪逸。虎蹄过新迹。

幂幂。雾如织。见异草珍禽，问名不识。山灵勒驾雨来急。欲游观未已，仆言日夕。看来看去，似那里，似少室。

### 又 题笔架山

三峰碧。缥缈烟光树色。高寒处，上有猿啼，鹤唳天风夜萧瑟。山形似笔格。人道江南第一。游紫观，月殿星坛，积翠楼前吹铁笛。

客来访灵迹。闻王郭当年，曾此驻锡。二仙为谒浮丘伯。从骖鸾去后，云深难觅。丹炉灰冷杵声寂。依然旧泉石。

泉石。最幽阒。更禽静花闲，松茂竹密。清都绛阙无消息。共羽衣挥麈，感今怀昔。

堪嗟人世，似梦里，驹过隙。

又 紫元席上作

桃花瘦。寒食清明前后。新燕子，禁得余寒。风雨把人苦厮恹。梅粒今如豆。减却春光多少。空自有，满树山茶，似语如愁卧晴昼。

幽人展襟袖。惜莺花未老，江山如旧。杜鹃声里同携手。叹陌上芳草，堤边垂柳。一春十病九因酒。愁来独搔首。

豆蔻。枝头小。应可惜年华，孤负时候。九十韶光那得久。问芍药觅醉，牡丹索笑。三万六千，能几度，君知否。

### 沁园春

嫩雨如尘，娇云似织，未肯便晴。见海棠花下，飞来双燕，垂杨深处，啼断孤莺。绿砌苔香，红桥水暖，笑捻吟髭行复行。幽寻懒、就半窗残睡，一枕初醒。

消凝。次第清明。渺南北东西草又青。念镜中勋业，韶光冉冉，尊前今古，银发星星。青鸟无凭，丹青有约，独倚东风无限情。谁知有，这春山万点，杜宇千声。

又

暂聚如萍，忽散似云，无可奈何。向天涯海角，两行别泪，风前月下，一片离骚。啼罢栖乌，望穷芳草，此恨与之谁较多。昏黄后，对青灯感慨，白酒悲歌。

梦中作梦知么。忆往事落花流水呵。更

凭高□远，沈腰不瘦，怅今怀昔，潘鬓须皤。  
去燕来鸿，寻梅问柳，寸念从他寒暑熬。消  
魂处，但烟光缥渺，山色周遭。

又 送王侍郎帅三山

锦绣文章，圭璋闻望，碧落侍郎。昨履  
声渐近，星辰避次，竹符重剖，湖海生光。  
委羽天空，石桥水冷，每为众生时雨滂。君  
知否，是民心襦裤，吏胆冰霜。

少须召入鹓行。也不念无人荷紫囊。有  
本朝曾旦，移春手段，旧家羲献，补月心肠。  
此去三山，却登八座，已准金瓯姓氏香。还  
朝处，双凫作对，五马成行。

又

大丈夫儿，冰肝玉胆，砺山带河。算此  
身此世，无过驹隙，一名一利，未值鸿毛。  
相府如潭，侯门似海，那得烟霄尔许高。当  
初我，是乘云御气，几百千遭。

此生勋业无多。也手种梅花三百窠。又  
底曾嗅著，庙堂钟鼎，底曾拈得，帷幄弓刀。  
玉帝遥知，金书何晚，时有鹤鸣千九皋。如  
今且，向风前浪舞，月下高歌。

又 寄鹤林

三径就荒，松菊犹存，归去来兮。叹折  
腰为米，弃家因酒，往之不谏，来者堪追。  
形役奚悲，途迷未远，今是还知悟昨非。舟  
轻扬，问征夫前路，晨色熹微。

欢迎童稚嘻嘻。羨出岫云闲鸟倦飞。有  
南窗寄傲，东皋舒啸，西畴春事，植杖耘耔。

矫首遐观，壶觞自酌，寻壑临流聊赋诗。琴书外，且乐天知命，复用何疑。

又

乍雨还晴，似寒而暖，春事已深。是妇鸠乳燕，说教鱼跃，豪蜂醉蝶，撩得莺吟。斗茗分香，脱禅衣袂，回首清明上巳临。芳菲处，在梨花金屋，杨柳琼林。

如今。诗酒心襟。对好景良辰似有妊。念恨如芳草，知他多少，梦和飞絮，何处追寻。病酒时光，困人天气，早有秋秧吐嫩针。兰亭路，渐流觞曲水，修禊山阴。

又

吹面无寒，沾衣不湿。岂不快哉。正杏花雨嫩，红飞香砌，柳枝风软，绿映芳台。燕似谈禅，莺如演史，犹有海棠连夜开。清明也，尚阴晴莫准，蜂蝶休猜。

朝来。应问苍苔。甚几日都成锦绣堆。念四方宾友，不堪渭树，一年春事，已属庭槐。宿酒难醒，多情易老，争奈传杯不放杯。如何好，看秋千戏剧，蹴鞠恢谐。

又 赞吕公

渭水秋深，湓江春老，洞庭一湖。问城南古树，如今在否，洛中狂客，还更来无。独上君山，渺观岩石，八百里鲸波泛巨区。何曾错，有茶中上灶，酒里仙姑。

终须。度了肩吾。稽首终南钟大夫。自太平寺里，题诗去后，东林沈宅，大醉归欤。天上筵多，人间到少，更不向庐山索鱖鱼。

如何好，好借君黄鹤，上我清都。

又 题罗浮山

且说罗浮，自从石洞，水帘以还。是向时景泰，初来卓锡，旧家勾漏，曾此修丹。药院空存，铁桥如故，上更有朱仙朝斗坛。飞云顶，在石桥高处，杳霭之间。

山前。拾得清闲。也分我烟霞数亩宽。自竹桥人去，青莲馥郁，柴门闭了，绿柳回环。白酒初筭，清风徐至，有桃李时新钉几盘。仙家好，这许多快活，做甚时官。

又 赠胡葆元

要做神仙，炼丹工夫，亦有何难。向雷声震处，一阳来复。玉炉火炽，金鼎烟寒。姪女乘龙，金公跨虎，片晌之间结大还。丹田里，有白鸦一个，飞入泥丸。

河车运入昆山。全不动纤毫过玉关。把龟蛇乌兔，生擒活捉，霎时云雨，一点成丹。白雪漫天，黄芽满地，服此刀圭永驻颜。常温养，使脱胎换骨，身在云端。

又

岁去年来，思量人生，空自沈埋。既这回冬至，一阳来复，便须修炼，更莫疑猜。好个鼎炉，见成铅汞，片晌工夫结圣胎。人身里，三千世界，十二楼台。

周年造化安排。只在这些些真妙哉。要先擒日月，后攒星斗，黄庭中畔，化作琼瑰。谁会天机，分明说破，恰似江头雪里梅。丹成后，做些功行，归去蓬莱。

又 题桃源万寿宫

黄鹤楼前，吹笛之时，先生朗吟。想剑光飞过，朝游南岳，墨篮放下，夜醉东邻。铛煮山川，粟藏世界，有明月清风知此音。呵呵笑，笑酿成白酒，散尽黄金。

知音。自有相寻。休踏破葫芦折断琴。唱白苹红蓼，庐山日暮，西风黄叶，渭水秋深。三入岳阳，再游湓浦，自一去优游直至今。桃源路，尽不妨来往，时共登临。

又 题湖头岭庵

客里家山，记踏来时，水曲山崖。被滩声喧枕，鸡声破晓，匆匆惊觉，依旧天涯。抖擞征衣。寒嘶晓袂。回首银河西未斜。尘埃债，叹有如此发，空为伊华。

古为客况堪嗟。尽贫也输他□在家。料驿舍旁边，月痕白处，暗香微度，应是梅花。拣折一枝，路逢南雁，和两字平安寄与他。教知道，有长亭短堠，五饭三茶。

水龙吟

层峦叠嶂浮空，断崖直下分三井。苍苔路古，鹿鸣芝涧，猿号松岭。露浥凤箫，烟迷枸杞，绿深翠冷。笑携筇一到，登高眺远，是多少、仙家景。

长念青春易老，尚区区、枯蓬断梗。人间天上，喟然俯仰，只身孤影。世事空花，春心泥絮，此回还省。向琼台双阙，结间茅屋，坐千峰顶。

又 采药径

云屏漫锁空山，寒猿啼断松枝翠。芝英安在，术苗已老，徒劳屐齿。应记洞中，凤箫锦瑟，镇常歌吹。怅苍苔路杳，石门信断，无人问、溪头事。

回首暝烟无际，但纷纷、落花如泪。多情易老，青鸾何处，书成难寄。欲问双娥，翠蝉金凤，向谁娇媚。想分香旧恨，刘郎去后，一溪流水。

瑞鹤仙

残蟾明远照。正一番霜讯，四山秋老。孤村带清晓。有鸣鞭归骑，乱林啼鸟。青帘缥缈。懒行时，持杯自笑。甚年来、破帽凋裘，惯得淡烟荒草。

多少。客愁羁思，雨泊风餐，水边云杪。西窗正好。疏竹外，粉墙小。念归期相近，梦魂无奈，不为罗轻寒悄。怕无人、料理黄花，等闲过了。

又

赋情多懒率。每醉后疏狂，醒来飘忽。无心恋簪绂。漫才高子建，韵欺王勃。胸中绝物。所容者、诗兵酒卒。一两时，调发将来，扫尽闷妖愁孽。

莫说。杀人一万，自损三千，到底隳砮。悬河口讷。非夙世，无灵骨。把湖山牌印，莺花权柄，牒过清风朗月。且束之、高阁休休，这回更不。

### 祝英台近

月如酥，天似玉，长啸弄孤影。十二楼台，昨梦暗寻省。自怜露满衣襟，风吹毛发，浑无寐、寒宵漏永。

捧香鼎。翻起一片龙涎，梅花对人冷。庭户冰清，何处鹤声警。少时烛暗梧窗，烟生苔砌，晓钟动。忽然心醒。

### 水调歌头 咏茶

二月一番雨，昨夜一声雷。枪旗争展，建溪春色占先魁。采取枝头雀舌，带露和烟捣碎，炼作紫金堆。碾破香无限，飞起绿尘埃。

汲新泉，烹活火，试将来。放下兔毫瓯子，滋味舌头回。唤醒青州从事，战退睡魔百万，梦不到阳台。两腋清风起，我欲上蓬莱。

### 菊花新

渺渺烟霄风露冷，夜未艾、凉蟾似水。海山外、五云散彩，三峰凝翠。一鹤横空何缥缈，见殿阁、笙歌拥罗绮。笑劳生，空如尺鷃，恋槿花篱。

于中青鸾唱美。丹鹤舞奇。有粉娥琼女，齐捧芳卮。天真皇人陈玳席，宴太姥、思之

暗生悲。念如今，红尘满面，漫洒晚风泪。

又

十二楼台，但前回旧迹。想琪花似雪，忘了还思。朝暮痴痴地。只有老天知。却自省，玉阶金砌。错抛离。

梧桐声颤，窗外草蛩吟细。醉魂觉，又听秋鸿悲唳。极目寒空，叹未有紫云梯。绛阙消息子。也无一二、枉垂涕。

又

宝鸭温香，诉丝诚寸意。记当年事，闷本愁基。人间天上，只争得那些儿。吃禁持。却念九霄风味。

清晨雁字。一句句在天如在纸。只得向风前，默默自嗟惜、业债俱消，还未了、甚时已。一日里。滴了俺儿来泪。

又

念我东皇大帝儿。是操觚弄翰之职。飞落尘寰，似此度，算应希。向这里。安能便、策景御气。

灰头土面、千河水。把我如何洗。纵便有铢衣，已失眉峰翠。看看皓首，瞒不过镜台儿。除是去、青松下、碧云底。

又

弱水去蓬莱，四万八千里。远漠漠，俯仰天水青无际。鸟飞不到船去难，渺无依。翦锦字。云信待凭鸾翼。

青芝素瀑，草舍儿、隐隐烟霞里。向闲处，批风切月烹天地，三岛十洲，去有日，

几何时。胎仙就，直待鹤书来至。

又

铜壶四水。寒生素被。夜迢迢，烟月熹微。池浸霜荷，槛竹响，井枫飞。宝枕潭无梦，念忡忡地。

形留神往，镇日价、忘食应忘寐。省得起、都是天上仙家事。珠歌舞，酌玉液，饭云子。怎得麒麟脯，更教知味。

又

有个闷甚处，一向如痴醉。独倚住危阑，坐咬无名指。金鱼玉雁一从去，绝消息。念念怀天帝。密与冥契。

晴霞照水。叹细草新蒲寒萋萋。对夕照，树色烟光相紫翠。花落莺啼。把往事似川逝。光阴速，何时是伊归日。

又

雪牖风轩度岁。时听芭蕉，雨声凄恻。情多易感，渐不觉鬓成丝。忽又成千古，谪如梦里。

西山南浦尽秋意。一望芦花飞。有一点沙鸥，点破松梢翠。凄然念起。觉两腋凉飙细。诗兴浑飞在渔乡橘里。

又

忽水远天长，笑把玉龙嘶。一声声，吹断寒云沧波里。幽愁暗恨，弄皓月，怨白日。问太虚不尚，则成休矣。

云心鹤性，死也要冲霄，乘风去。分自有、终合仙飞。感古怀今聊把笔。落叶寒蝉

悲。使人增怨抑。

菩萨蛮 送刘贵伯

崑山云冷风萧瑟。野猿啼罢蟾光白。听  
彻太清弦。断肠云水天。

金陵君此去。秋入蒹葭浦。兴满即回辕。  
明年二月春。

谒金门

春又去。愁杀一声杜宇。昨夜海棠无  
□□。晓来闻燕语。

缥缈佳人何处。镇日愁肠万缕。千里无  
家归未得，春风知我苦。

水调歌头 自述

金液还丹诀，无中养就儿。别无他术，  
只要神水入华池。采取天真铅汞，片晌自然  
交媾，一点紫金脂。十月周天火，玉鼎产琼  
芝。

你休痴，今说破，莫生疑。乾坤运用，  
大都不过坎和离。石里缘何怀玉，因甚珠藏  
蚌腹，借此显天机。何况妙中妙，未易与君  
知。

又

吃了几辛苦，学得这些儿。蓬头赤脚，  
街头巷尾打无为。都没蓑衣笠子，多少风烟

雨雪，便是活阿鼻。一具骷髅骨，忍尽万千饥。

头不梳，面不洗，且憨痴。自家屋里，黄金满地有谁知。这里一声惭愧，那里一声调数，满面笑嘻嘻。白鹤青云上，记取这般时。

又

有一修行法，不用问师傅。教君只是，饥来吃饭困来眠。何必移精运气，也莫行功打坐，但去净心田。终日无思虑，便是活神仙。

不憨痴，不狡诈，不风颠。随缘饮啄，算来命也付之天，万事不由计较，造物主张得好，凡百任天然。世味只如此，拚做几千年。

又

一个清闲客，无事挂心头。包巾纸袄，单瓢只笠自逍遥。只把随身风月，便做自家受用，此外复何求。倒指两三载，行过百来州。

百来州，云渺渺，水悠悠。水流云散，于今几度蓼花秋。一任乌飞兔走，我亦不知寒暑，万事总休休。问我金丹诀，石女跨泥牛。

又

不用寻神水，也莫问华池。黄芽白雪，算来总是假名之。只这坤牛乾马，便是离龙坎虎，不必更猜疑。药物无斤两，火候不须

时。

偃月炉，朱砂鼎，总皆非。真铅真汞不炼，之炼要何为。自己金公妣女，渐渐打成一块。胎息象婴儿。不信张平叔，你更问他谁。

又

要做神仙去，工夫譬似闲。一阳初动，玉炉起火炼还丹。捉住天魂地魄，不与龙腾虎跃，满鼎汞花乾。一任河车运。径路入泥丸。

飞金精，采木液，过三关。金木间隔，如何上得玉京山。寻得曹溪路脉，便把华池神水，结就紫金团。免得饥寒了，天上即人间。

又

草涨一湖绿，天籟四山青。这千年里，几多兴废不容声。无分貂金佩玉，不梦歌钟食鼎，何处有车旌。便念旌阳剑，枉自染蛟腥。

生诸葛，少马援，尚云萍。醉乡日月，飘然身世付刘伶。知道东门黄犬，不似西山白鹭，风月了平生。起来忽清啸，惊落夜潭星。

又

杜宇伤春去，蝴蝶喜风清。一犁梅雨，前村布谷正催耕。天际银蟾映水，谷口锦云横野，柳外乱蝉鸣。人在斜阳里，几点晚鸦声。

采杨梅，摘卢橘，钉朱樱。奉陪诸友，  
今宵烂饮过三更。同入醉中天地，松竹森森  
翠幄，酣睡绿苔茵。起舞弄明月，无籁奏箫  
笙。

又

一个江湖客，万里水云身。鸟啼春去，  
烟光树色正黄昏。洞口寒泉漱石，岭外孤猿  
啸月，四顾寂无人。梦魂归碧落，泪眼看红  
尘。

烟蒙蒙，风惨惨，暗消魂。南中诸友，  
而今何处问浮萍。青鸟不来松老，黄鹤何之  
石烂，叹世一伤神。回首南柯梦，静对北山  
云。

又

昔在虚皇府，被谪下人间。笑骑白鹤，  
醉吹铁笛落星湾。十二玉楼无梦。三十六天  
夜静，花雨洒琅玕。瑶台归未得，忍听洞中  
猿。

也休休，无情绪，炼金丹。从来天上，  
神仙官府更严难。翻忆三千神女，齐唱霓裳  
一曲，月里舞青鸾。此恨凭谁诉，云满武夷  
山。

又 和懒翁

昔在虚皇府，啸咏紫云中。不知何事，  
误蒙天谪与公同。偶到金华洞口，忽见懒翁  
老子，挺挺众中龙。握手归仙隐，谈笑起天  
风。

忽相逢，一转瞬，酒杯空。几时再会，

唱麋词翰倒金钟。只恐武夷山里，千古猿啼鹤唳，未便蹑飞虹。公欲归仙去，我欲继公踪。

又

误触紫清帝，谪下汉山川。既来尘世，奇奇怪怪被人嫌。懒去蓬莱三岛。且看江南风月，一住数千年。天风自霄汉，吹到剑峰前。

做些诗，吃些酒，放些颠。木精石怪，时时唤作地行仙。朝隐四山猿鹤，夜枕一天星斗，纸被裹云眠。梦为蝴蝶去，依约在三天。

又 丙子中元后风雨有感

一叶飞何处，天地起西风。夜来酒醒，月华千顷浸帘栊。塞外宾鸿来也，十里碧莲香满，泽国蓼花红。万象正萧爽，秋雨滴梧桐。

钓台边，人把钓，兴何浓。吴江波上，烟寒水冷剪丹枫。光景暗中催去，览镜朱颜犹在，回首鹭巢空。铁笛一声晓，唤起玉渊龙。

又

江上春山远，山下暮云长。相留相送，时见双燕语风樯。满目飞花万点，回首故人千里，把酒沃愁肠。回雁峰前路，烟树正苍苍。

漏声残，灯焰短，马蹄香。浮云飞絮，一身将影向潇湘。多少风前月下，迤迤天涯

海角，魂梦亦凄凉。又是春将暮。无语对斜阳。

又 石知院生辰

两鬓青丝发，双眼黑方瞳。人皆道是，昭庆一个老仙翁。暂别蓬莱弱水，自把星冠月帔，玉佩舞薰风。醉入桃源路，归去不知踪。

举云璈，鸣铁笛，抚丝桐。满前剑弁森列，稽首捧金钟。挺挺松形鹤貌，任待桑田变海，宝鼎粒丹红。玉帝下明诏，独骑上瑶空。

满江红 咏武夷

忆昔秦时，中秋日、武夷九曲。烟寂寂、斜阳数尺，寒鸦枯木。三十六峰凝晓翠，一溪流水生秋绿。正满林、桂子散天香，飞金粟。

神仙客，金丹熟。玉诏下，云生足。岩头新换骨，尚黏红肉。夜半月华明似昼，玉皇降辇铺肴餼。笑曾孙、回首幔亭前，空松竹。

又 咏白莲

昨夜姮娥，游洞府、醉归天阙。缘底事、玉簪坠地，水神不说。持向水晶宫里去，晓来捧出将饶舌。被薰风、吹作满天香，谁分别。

芳而润，清且洁。白似玉，寒于雪。想玉皇后苑，应无此物。只得赋诗空赏叹，教

人不敢轻攀折。笑李粗、梅瘦不如他，真奇绝。

又 听陈元举琴

树色冥蒙，山烟暮、鸟归日落。凭阑处、眼空宇宙，心游碧落。古往今来天地里，人间那有扬州鹤。幸而今，天付与青山，甘寥寞。

好花木，多岩壑。得萧散，耐淡泊。把他人比并，我还不错。一曲瑶琴知此意，从前心事都忘却。况新秋、不饮更何时，何时乐。

又 别鹤林

明日如今，我已是、天涯行客。相别后、麻姑山上，齐云亭侧。几个黄昏劳怅想，几宵皓月遥思忆。与二仙、不但此今生，皆畴昔。

频到此，欢无极。今去也，来无的。念浪萍风絮，东西南北。七八年中相契密。三千里外来将息。怅金丹、未就玉天辽，还凄恻。

又

钧天高处，元自有、琼楼玉阙。又那更、九霄隐映，五云斗绝。八面玲珑光不夜，四围晃耀寒如月。有广寒、宫殿隐姮娥，冰壶洁。

飘飘去，天风冽。星河外，花飞雪。见三千神女，尊前一阙。来到人间浑似梦，未能归去空悲咽。问仙都、此去几由旬，归心

热。

又 赠豫章尼黄心大师尝为官妓

豆寇丁香，待则甚、如今休也。争知道、本来面目，风光洒洒。底事到头鸾凤侣，不如躲脱鸳鸯社。好说与、几个正迷人，休嗟讶。

纱窗外，梅花下。酒醒也，教人怕。把翠云翦却，缁衣披挂。柳翠已参弥勒了，赵州要勘台山话。想而今、心似白芙蕖，无人画。

### 摸鱼儿

问苍江、旧盟鸥鹭。年来景物谁主。悠悠客鬓知何似，吹满西风尘土。浑未悟。漫自许。功名谈笑侯千户。春衫戏舞。怕三径都荒，一犁未把，猿鹤笑君误。

君且住。未必心期尽负。江山秋事如许。月明风静苹花路。敲枕试听鸣橹。还又去。道唤取。陶泓要草归来赋。相思最苦。是野水连天，渔榔四处，蓑笠占烟雨。

又 寿觉非居士

雨肥梅、亭台初夏。昙花开向前夜。纯阳鹤会先三日，何处神仙降驾。知得也。□□是、西山彭抗来胎化。平生性野。自倒指今年，七旬有六，使节半天下。

焚金兽，毋惜满斟玉斝。儿孙况又潇洒。公今骨相如松在，一掬精神堪画。于今且。□□炼、金丹成了为凭藉。归心莲社。便做

得乃翁，年登八百，未是寿长者。

又

这身儿、从来业障。一生空自劳攘。生  
生死死皆如梦，更莫别生妄想。没伎俩。只  
管去、天台雁荡寻方广。几人不省。被妻子  
萦缠，生涯拘束，甘自归黄壤。

世间事，一斤两个八两。问谁能去俯仰。  
道义重了轻富贵，却笑轮回来往。休勉强。  
老先生、从来恬淡无妆幌。一声长啸，把拄  
杖横肩，草鞋贴脚，四海平如掌。

又 寿傅枢阁中李夫人

跨飞鸾、醉吹瑶笛，蓬莱知在何处。薰  
风飘散荷花露。梦觉已非帝所，忘归路。谁  
知道、人间别有神仙侣。身游枢府。奈诏入  
玉楼，猛骑箕尾，四海忆霖雨。

问天母。天上桃红几度。蕊宫今是谁主。  
明年甲子从头数，春入鬢云鬢雾。如今去。  
是处里、福田都著黄金布。庭前玉树。看子  
早生孙，孙还生子，岁岁彩衣舞。

洞仙歌 鹤林赋梅

南枝漏泄，一点春光别。无蝶无蜂正霜  
雪。向竹梢疏处，瘦影横斜，真个是、潇洒  
冰肌玉骨。

黄昏人静，踏碎阶前月。忍冻相看惜攀  
折。巡檐空索笑，似笑无言，夜悄悄、香入  
寒风清冽。更那堪、画角恼幽人，又满地落  
英，愁肠万结。

满庭芳 和陈隐芝韵

百雉城边，乱花深处，竹间一笑双清。  
天公解事，为我弄阴晴。雨过槐阴绿净，女  
墙外、杨柳丝轻，堪嗟惜，诗尤酒殢，镜里  
失青春。

清和，如许在，鸳鸯燕燕，相与忘情。  
谪仙风度，命代万人英。游戏琴棋书画，人  
间世、别有方瀛。酩酊后，玄裳效舞，所欠  
董双成。

瑶台月

烟霄凝碧。问紫府清都，今夕何夕。桐  
阴下、幽情远，与秋无极。念陈迹、虎殿虬  
宫，记往事、龙箫凤笛。露华冷，蟾光白。  
云影净，天籁息。知得。是蓬莱不远，身无  
羽翼。

广寒宫、舞彻霓裳，白玉台、歌罢瑶席。  
争不思下界，有人岑寂。羨博望、两泛仙槎，  
与曼倩、三偷蟠实。把丹鼎，暗融液。乘云  
气，醉挥斥。嗟惜。但城南老树，人谁我识。

永遇乐

懒散家风，清虚活计，与君说破。淡酒  
三杯，浓茶一碗，静处乾坤大。倚藤临水，  
步履登山，白日只随缘过。自归来，曲肱隐

几，但只恁和衣卧。

柴扉草户，包巾纸袄，未必有人似我。我醉还歌，我歌且舞，一恁憨痴好。绿水青山，清风明月，自有人间仙岛。且偎随、补破遮寒，烧榾柮火。

又 寄鹤林靖

银月凄凉，绮霞明灭，秋色如此。露满清襟，风生衰鬓，夜已三更矣。寻思往事，千头万绪，回首谩如梦里。指烟霄，不如归去，不知今夕何夕。

鹑衣百结，胭脂垢腻，犹是小蛮针指。对酒逢诗，高吟大笑，四海今谁似。荷亭竹阁，共风同月，此会今生能几。君须记，去来聚散，只□底是。

好事近 赠赵制机

行到竹林头，探得梅花消息。冷蕊疏英如许，更无人知得。

冰枯雪老岁年徂，俯仰自嗟惜。醉卧梅花影里，有何人相识。

又

何事雁来迟，独步秋园默默。莫恨桂花开尽，有菊花堪惜。

回头顾影背斜阳，听西风萧瑟。无限诗情酒思，那早梅知得。

桂枝香

楼前凝望。见水满一溪，云满千嶂。将

晚欲行无绪，欲眠无况。岩花涧草春无极，倚东风、忽然惆怅。淡烟飞过，幽禽叫断，远钟嘹亮。

为底事、沈吟一晌。念只影飘浮，寸心虚旷。无限游丝落絮，此怀难状。江湖淮海行将遍，觉诗肠、酒胆超畅。一丘一壑归来，念我旧家天上。

南乡子 爱阁赋别二首

夜月照千峰。影满荷池静袅风。明日今宵还感慨，梧桐。叶叶随云扬碧空。

聚散与谁同。野鹤孤云有底踪。别处要知相忆处，无穷。总在青山夕照中。

又

前度几相逢。此日游从乐不同。竹阁荷亭欢聚处，雍容。如在蓬莱第一宫。

夜半月朦胧。秉烛东园风露中。明日匆匆还入浙，忡忡。却把音书寄远鸿。

霜天晓角 绿净堂

五羊安在。城市何曾改。十万人家闾閻，东亦海、西亦海。

年年蒲涧会。地接蓬莱界。老树知他一剑，千山外、万山外。

贺新郎

且尽杯中酒。问平生、湖海心期，更如

君否。渭树江云多少恨，离合古今非偶。更风雨、十常八九。长铗歌弹明月堕，对萧萧、客鬓闲携手。还怕折，渡头柳。小楼夜久微凉透。倚危阑、一池倒影，半空星斗。此会明年知何处，苹末秋风未久。漫输与、鹭朋鸥友。已办扁舟松江去，与鲈鱼、莼菜论交旧。因念此，重回首。

又

梦绕荷花国。遍□□、橘州柳市，芙蓉巷陌。桂社兰乡白苹里，月冷波寒之夕。有孤鹭、落霞知得。一鹤横空云漠漠，见梅梢、万粒真珠滴。犹未把，寒香惜。

画楼何处吹瑶笛。便□□、酥颦玉笑，露松霜瘖。姑射真人游紫府，下戏三江七泽。此莫是、冰魂雪魄。半逐风飞半随水，半在枝、半落苍苔白。酒醒后，晓窗碧。

又 雪

是雨还堪拾。道非花、又从帘外，受风吹入。扑落梅梢穿度竹，恐是鲛人诉泣。积至暮、萤光熠熠。色映万山迷远近，满空浮、似片应如粒。忘炼得，我双睫。

吟肩耸处飞来急。故撩人、黏衣喫袖，嫩香堪浥。细听疑无伊复有，贪看一行一立。见僧舍、茶烟飘湿。天女不知维摩事，漫三千、世界缤纷集。是剪水，谁能及。

又 咏牡丹

晓雾须收霁。牡丹花、如人半醉，抬头不起。雪炼作冰冰作水。十朵未开三四。又

加以、风禁雨制。□是东吴春色盛，尽移根、换叶分黄紫。所贵者，称姚魏。

其间一种尤姝丽。似佳人、素罗裙在，碧罗衫底。中有一花边两蕊。恰似妆成小字。看不足、如何可比。白玉杯将青玉绿，据晴香、暖艳还如此。微笑道，有些是。

又 紫元席上作

飞尽桃花片。倚东风、高吟大啸，开怀消遣。芍药牡丹开未遍。不道韶华如电。无心向、小庭幽院。秉烛夜游虽不倦，奈一番、风雨花容变。春去也，无人见。

何处莺莺啼不断。探后园、红稀翠减，青稠绿满。蝶在花间犹死恋。早有行人摇扇。故自要、与春为饯。笑指白云归去好，对夕阳、泻酒凭谁荐。柳深处，有双燕。

又 肇庆府送谈金华、张月窗

谓是无情者。又如何、临歧欲别，泪珠如洒。此去兰舟双桨急，两岸秋山似画。况已是、芙蓉开也。小立西风杨柳岸，觉衣单、略说些些话。重把我，袖儿把。小词做了和愁写。送将归、要相思处，月明今夜。客里不堪仍送客，平昔交游亦寡。

况惨惨、苍梧之野。未可凄凉休哽咽，更明朝、后日才方罢。却默默，斜阳下。

又 再送前人

风雨今如此。问行人、如何有得，许多儿泪。为探木犀开也未，只有芙蓉而已。九十日、秋光能几。千里送人须一别，却思量、

我了思量你。去则是，住则是。

归归我亦行行矣。便行行、不须回首，也休萦系。一似天边双鸣雁，一个飞从东际。那一个、又飞西际。毕竟人生都是梦，再相逢、除是青霄里。却共饮，却共醉。

又 櫟括菊花新

露白天如洗。淡烟轻、疏林映带，远山横翠。对此情怀成甚也，云断小楼风细。独倚遍、画阑十二。花馆云窗成憔悴。听宾鸿、天外声嘹唳。但不过，闷而已。

房栊深静难成寐。夜迢迢、银台绛蜡，伴人垂泪。巴得暂时朦胧地。还又匆匆惊起。漫自展、云间锦字。往后各收千张纸。念梦劳魂役空凝睇。终不负，骖鸾志。

又 罗浮作

醉见千山面。晚晴初、蝉声未了，鸟声尤速。知道仙人丹灶在，尚有陈灰犹暖。但只恐、松枯石烂。笑问年华应不换，又如何、洞里笙箫断。还念我，去归晚。

千岩万壑猿啼遍。一思量、一回懊恨，一回泪眼。岂是自家无仙骨，尚被红尘牵绊。要分此、烟霞一半。当日朱仙和葛老，更老黄、亦合同萧散。上帝近，永容懒。

又 贺大卿生日

仙鹊梁银汉。见青原、白鹭一点，秋光犹嫩。青鸟密传云外信，王母夜临香案。与河鼓、天孙为伴。太素真人乘此景，到芑城、即嗣胡忠简。南极上，星璀璨。

松溪居士多词翰。是神仙风骨，元自无心仕宦。人道月卿临总饷，便合机廷揆馆。还又爱、山林萧散。玉女金钟萦暖响，指灵椿、仙鹤祈遐算。公自有，青精饭。

又 送赵师之江州

倏又西风起。这一年光景，早过三分之二。燕去鸿来何日了，多少世间心事。待则甚、功成名遂。枫叶荻花动凉思，又寻思、江上琵琶泪。还感慨，劳梦寐。

愁来长是朝朝醉。划地成、宋玉伤感，三闾憔悴。况是凄凉寸心碎。目断水苍山翠。更送客、长亭分袂。冢皂山前梧桐雨，起风樯、露舶无穷意。君此去，趁秋霁。

又

一别蓬莱馆。看桑田成海，又见松枯石烂。目断虚皇无极处，安得殿头宣唤。指归路、钧天早晚。此去罡风三万里，但九霄、渺渺青云远。望不极，空泪眼。

瑶池昔会群仙宴。此秋来、荻花枫叶，令人凄惋。满面朱尘那忍见，酒病花愁何限。知几度、春莺秋雁。从此飞神腾碧落，向清都、来往应无间。丹渐熟，骨将换。

又

遥想阳明洞。夜深时、猿啼鹤唳，露寒烟重。家在神霄归未得，十二玉楼无梦。梦里听、瑶琴三弄。醉卧长安人不识，晚秋天、此意西风共。黄金印，吾何用。

云衢高策青鸾鞵。把天书玉篆，留与世

人崇奉。垂手入廛长是醉，醉则从教懵懂。那些子、凝然不动。一剑行空神鬼惧，金粟儿、日向丹田种。把得稳，任放纵。

又 西湖作呈章判镇、留知县

万顷湖光绿。是处里、芙蓉金盏，木犀金粟。鹧御飘飘行水毂，正是蟹香橙熟。山色似、风梳雨沐。携取阿娇命豪杰，过北山、曈处南山曲。寒烟淡，晴鸦浴。

巨觥数引苍髭矗。便论诗说剑，人各有怀西北。两见西风客京国，多在红楼金屋。凝情处、落霞孤鹜。蒲柳凄凉今如许，问功名、志在何时足。更簪取，一枝菊。

又 赠紫元

极目神霄路。斗柄南、丹华翠景，红霞紫雾。手折琪花今似梦，十二楼台何处。犹记得、当时伴侣。东府西台知谁主，忆当时、自泻金瓶雨。人间事，等风絮。

上皇赫赫雷霆主。我何缘、清都绛阙，遽成千古。白鹤青乌消息断，梦想鸾歌凤舞。应未得、翻身归去。业债须教还净尽，这一回、尝遍红尘苦。归举似，西王母。

又 别鹤林

昔在神霄府。是上皇娇惜，便自酣歌醉舞。来此人间不知岁，仍是酒龙诗虎。做弄得、襟情如许。俯仰红尘几今古。算风灯、泡沫无凭处。即有这，烟霄路。

淮山浙岸潇湘浦。一寻思、柳亭枫驿，泪珠溅俎。此去何时又相会，离恨萦人如缕。

更天也、愁人风雨。语燕啼莺莫相管，请各家、占取闲亭坞。人事尽，天上去。

又 游西湖

倚剑西湖道。望弥漫、苍葭绿苇，翠芜青草。华表凄凉市朝古，极目暗伤怀抱。秋色与、菱荷俱老。桂棹兰舟聊遣兴，仗金风、吹使芙蓉破。柳阴里，堪少坐。

衷肠底事君知那。要繁弦急管，又且沈酣则个。烟水冥茫黄叶断，嘹唳数声雁过。醉归去、山寒云苍。整日消闲镇来往，问城南、老树知渠么。黄鹤擎，青纱帽。

又 赋西峰

风送寒蟾影。望银河、一轮皎洁，宛如金饼。料得故人千里共，使我寸心耿耿。浑无奈，天长夜永。万树萧森猿啸罢，觉水边、林下非人境。睡不著，酒方醒。

芙蓉池馆梧桐井。悄不知、今夕何夕，寒光万顷。年少风流多感慨，况此良辰美景。须对此、大拚酩酊。满目新寒舞黄落，嗟此身、何事如萍梗。桂花下，露华冷。

又 咏雪二首

俯仰天黏水。尽□□、山河大地，光涵表里。一夜春风搜万象，檐外雨声不已。到晓来、六花靡靡。瑶树琪林寒彻骨，知谁家、娇女慵梳洗。且捏个，小狮子。

琼楼架就东皇喜。□□使、玉龙战罢，柳绵飞起。千古佳人诗句在，一任如盐似米。君试看、岩头溪底。刹刹尘尘银世界，记当

年、曾赴瑶池会。玉清境，还如此。

又

银汉千丝雨。被东风作恶，吹落满室柳絮。恰自江南消息断，才此六花飞舞。最好是、鹅毛鹤羽。万顷平田三尺玉，月明中、不见沙头鹭。苍烟里，一渔父。

鹊桥半夜寒云妒。到晓来、千岩万壑，了无认处。极目四方银世界，五凤楼前如许。应自感、伤心凝伫。人在神霄玉清府，小狮儿、捏就无佳句。骑汗漫，好归去。

又 赠林紫元

月插青螺髻。柳梢头、夕阳荏苒，西风摇曳。数粒苍山黏远汉，树包烟光紫翠。飞骑气、半醒半醉。剑跨秋空磨星斗，指琼童、不得鸣金辔。恐惊动，紫清帝。

浮云飞度蓬莱水。忆山中、松寒露冷，猿啼鹤唳。家在武夷岩谷里，一亩烟霞活计。叹捻指、人生百岁。兰畹芝田几今古，洞门前、小鹿衔花戏。不知有，人间世。

又 赋白芍药号为玉盘盂

静看春容瘦。未清明、荼蘼避席，蔷薇出昼。花里流莺骂桃李，似与东风管句。怕虚度、兰亭时候。我也别来天上夕，向年时、感叹湖山旧。旧日事，君知否。

玉皇驾出清都晓。就御前、三千神女，指麾八九。化作花神下人世，如把粉团搦就。又一似、玉盘在手。莫是蕊珠亲付属，教小心、劝我杯儿酒。也只得，为陪笑。

又 怀仙楼

极目飙尘表。醉酣时、楼中起舞，楼前舒啸。坐见四山烟雾散，是处落花啼鸟。忽惊下、九天星斗。双鹤飞来风露爽，一声声、清唳苍松杪。奈对景，不酾酒。

旧家三点蓬莱小。有琼台双阙，长是香花缭绕。铁笛夜吹金剑吼，恨此瀛洲路杳。知几度、琪林春老。闲倚朱阑思昨梦，对江山、感慨无人晓。但千里，月华皎。

柳梢青 海棠

一夜清寒，千红晓粲，春不曾知。细看如何，醉时西子，睡底杨妃。

尽皆蜀种垂丝。晴日暖、薰成锦围。说与东风，也须爱惜，且莫吹飞。

又 寄鹤林

鹤使南翔。词珍翰绮，谊暖情香。如在琼台，梦回初饮，月液云浆。

风吹芦叶冥茫。夕照外、山高水长。遥想东楼，琪花玉树，梅影昏黄。

又 送温守王侍郎帅三山

五马风流，销金帐暖，药玉船宽。放下荷囊，携来铜虎，又举熊幡。

棠阴已接三山。此列郡、彼食大藩。柳雪萦旗，东风拦马，父老争看。

一剪梅 赠紫云友

剑倚青天笛倚楼。云影悠悠。鹤影悠悠。  
好同携手上瀛洲。身在阎浮。业在阎浮。

一段红云绿树愁。今也休休。古也休休。  
夕阳西去水东流。富又何求。贵又何求。

虞美人

萍花零乱秋亭暮。篱落江村路。棹歌摇曳钓船归。  
搅碎清风千顷、碧琉璃。

山衔初月明疏柳。平野垂星斗。莫辞沈醉伴孤吟。  
他日江南江北、两关心。

阮郎归 舟行即事

淡烟凝翠锁寒芜。斜阳挂碧梧。沙头三两雁相呼。  
萧萧风卷芦。

何处笛，一声孤。岸边人钓鱼。快帆一夜泊桐庐。  
问人沽酒无。

酹江月

思量世事，几千般翻覆，是非多少。随分随缘天地里，  
心与江山不老。道在天先，神游物外，自有长生宝。  
洞门无锁，悄无一个人到。

一条柱杖横肩，芒鞋紧峭，正风清月好。

惊觉百年浑似梦，空被利名萦绕。野鹤纵横，孤云自在，对落花芳草。来朝拂袖，谁来南岳寻我。

又 咏梅

孤村篱落，玉亭亭、为问何其清瘦。欲语还愁谁索笑，临水嫣然自照。甘受凄凉，不求识赏，风致何高妙。松挨竹拶，更堪霜雪偃傺。

争奈终是冰肌，也过了几个，晴昏雨晓。冷艳寒香空自惜，后夜山高月小。满地苍苔，一声哀角，疏影归幽渺。世无和靖，三花两蕊不少。

又

当初误触，紫微君、谪下神霄玉府。醉后骑龙吹铁笛，酒醒不知何处。绛阙寥寥，红尘扰扰，老泪滂如雨。人间天上，桑田沧海如许。

遥想十二楼前，琪花开已遍，鸾歌鹤舞。梦到三天还又落，愁听空中箫鼓。独倚阑干，笑拈花片，细写思归字。东风还会，为伊吹上天去。

又 次韵东坡赋别

寄言天上，石麒麟、化作人间英物。醉拥诗兵驱笔阵，百万词锋退壁。世事空花，赏心泥絮，一点红炉雪。识时务者，当今惟有俊杰。

我本浩气天成，才逢知己，便又清狂发。富贵于我如浮云，且看云生云灭。羊石论交，

鹅湖惜别，别恨多于发。共君千里，登楼何患无月。

又 罗浮赋别

罗浮山下，正秋高气爽，凄凉风物。瘦落丹枫飞紫翠，峭拔青山石壁。客鬓萧疏，诗肠清苦，病骨如冰雪。怒髯铁立，有怀不下三杰。

袖里宝剑生寒，中宵起舞，引酒清歌发。襟曲屡兴猿鹤梦，坐看月痕生灭。露沁桃花，云笼芝草，任长莓苔发。如今话别，橙黄橘绿时月。

又

旧家宋玉，是何人、偏到秋来凄惨。细雨疏风天气冷，离别令人销黯。樯燕飞归，岸花吹送，自是生怀感。挑灯酌酒，平生明目张胆。

二十年在江湖，枫亭柳驿，往事都曾览。胸次可吞云梦九，也没尘埃一糝。木落山高，云寒雁断，水瘦溪痕减。不知把菊，又在何处轩檻。

又

海天秋老，夜凄清、坐对香温金鸭。听得寒蝉声断续，一似离歌相答。鸿雁初来，骅骝欲去，永夜烧红蜡。不须别酒，有时亦呷一呷。

丈夫南北东西，何天不可，鸣剑雄开匣。岂特东湖徐孺子，下得陈蕃之榻。黄叶声干，碧莲香减，枕上凉萧飒。出门一笑，四方风

起云合。

又 送周舜美

道人于世，已忘情、尚更区区钱别。栖碧先生辞蕙帐，夜夜猿声凄切。剑上星寒，琴中风惨，眉宇飞黄色。一杯判袂，出门烟水空阔。

我今流落江南，朝朝还暮暮，千愁万结。那更荻花枫叶景，又见长亭短驿。世事空花，人情风絮，山外云千叠。君还到阙，为言踪迹风雪。

又 春日

桃花开尽，正溪南溪北，春风春雨。寒食清明都过了，愁杀一声杜宇。醉跨蹇驴，踏翻芳草，满满斟鹦鹉。游仙梦觉，不知身在何处。

因甚青鸟不来，一年春事，捻指都如许。人在白云流水外，多少莺啼燕语。遣兴成诗，烹茶解酒，日落蔷薇坞。玉龙嘶断，乱鸦惊起无数。

又 武昌怀古

汉江北泻，下长淮、洗尽胸中今古。楼橹横波征雁远，谁见鱼龙夜舞。鹦鹉洲云，凤凰池月，付与沙头鹭。功名何处，年年惟见春絮。

非不豪似周瑜，壮如黄祖，亦随秋风度。野草闲花无限数，渺在西山南浦。黄鹤楼人，赤乌年事，江汉亭前路。浮萍无据，水天几度朝暮。

又 西湖

绿荷十里吐秋香，湖水掌平如镜。日落云收天似洗，况又月明风静。露逼葭蒲，烟迷菱芡，缩尽寒鸦颈。两枝画桨，柳阴浓处乘兴。

遥想和靖东坡，当年曾胜赏，一觴一咏。是则湖山常不老，前辈风流去尽。我兴还诗，我欢则酒，醉则还草圣。明朝却去，冷泉天竺双径。

促拍满路花 和纯阳韵

多才夸李白，美貌说潘安。一朝成万古，又徒闲。如何猛省，心地种仙蟠。堪叹人间事，泡沫风灯，阿谁肯做飞仙。

莫思量、骏马与高轩。快乐任天然。最坚似松柏、更凋残。有何凭据，谁易复谁难。长啸青云外，自嗟自笑，了无恨海愁山。

行香子 题罗浮

满洞苔钱。买断风烟。笑桃花流落晴川。石楼高处，夜夜啼猿。看二更云，三更月，四更天。

细草如毡。独枕空拳。与山麋、野鹿同眠。残霞未散，淡雾沈绵。是晋时人，唐时洞，汉时仙。

八六子 戏改秦少游词

倚危亭。恨如芳草，萋萋划尽还生。念柳外青鸾去后，洞中白鹤归来，恍然暗惊。

吾家渺在瑶京。夜月一帘花影，春风十里松鸣。奈昨梦、前尘渐随流水，凤箫歌杳，水长天远，那堪片片飞霞弄晚，丝丝细雨笼晴。正消凝。子规又啼数声。

汉宫春 次韵李汉老咏梅

潇洒江梅，似玉妆珠缀，密蕊疏枝。霜风应是，不许蝶近蜂欺。嫣然自笑，与山矾、共水仙期。还亦有，青松翠竹，同今凜冽年时。

何事向人如恨，带苍苔，半倚临水荒篱。孤山嫩寒放晓，尚忆前诗。黄昏顾影，说横斜、清浅今谁。他自是，移春手段，微云淡月应知。

卜算子 景泰山次韵东坡三首

云散雨初晴，蝉噪林逾静。古寺敲钟暮掩门，灯映琉璃影。

浩气镇长存，昨梦还重省。独倚阑干啸一声，毛发萧萧冷。

又

古寺枕空山，楼上昏钟静。饥鼠偷灯尾

蘸油，悄悄无人影。

长剑匣中鸣，今古深思省。此夕行藏独倚楼，风雨凄凄冷。

又

渔火海边明，烟锁千山静。独坐僧窗夜未央，寂寞孤灯影。

感慨辄兴怀，往事无人省。江汉飘浮二十年，一枕西风冷。

### 鹧鸪天

雨过山花向晚香。烟丝空翠柳微茫。旧家丹灶何人葛，今日帘泉阿姥黄。

犀角枕，象牙床。椰心织簟昼生凉。杯行无算何曾醉，不觉罗浮日月长。

又

西畔双松百尺长。当时亲自见刘王。山前今日莲花水，往者将军洗马塘。

南粤路，汉宫墙。晚风历历说兴亡。摩挲东晋苍苔灶，细说仙翁炼药方。

又 灯夕天谷席上作

翠幄张天见未曾。驼峰鹅掌出庖烹。醉酣浑是迷天地。但见尊前万点星。

人似玉，酒如觴。果盘簇钉不知名。东风吹我三山下，如在神霄上帝庭。

### 蝶恋花 题爱阁

冷雨疏风凉漠漠。云去云来，万里秋阴

薄。笑倚玉阑呼白鹤。烟笼素月青天角。  
竹影松声浑似昨。醉胆如天，谁道词源  
涸。满地苍苔霜叶落。今宵不饮何时乐。

又

绿暗红稀春已暮。燕子衔泥，飞入谁家  
去。柳絮欲停风不住。杜鹃声里山无数。  
白马青衫无定据。好底林泉，信脚随缘  
寓。拚却此生心已许。一川风月聊为主。

又

楼上风光都占断。楼下风光，还许诗人  
管。管领风光谁是伴。一堤杨柳开青眼。  
波面琉璃花影乱。玉笋持杯，画舸歌声  
颤。醉里寻春春不见。夕阳芳草连天远。

### 杨柳枝

掇碎梅花一断肠。送斜阳。风烟缥缈月  
微茫。又昏黄。

平野寒芜何处断，接天长。短篱浅水橘  
青黄。度清香。

### 沁园春

要做神仙，炼丹工夫，譬之似闲。但姪  
女乘龙，金公御虎，玉炉火炽，土釜灰寒。  
铅里藏银，砂中取汞，神水华池上下间。山  
田内，有一条径路，直透泥丸。

一声雷震昆山。真橐籥、飞冲夹脊关。

见白雪漫天，黄芽满地，龟蛇缭绕，乌兔掀翻。自古乾坤，这些离坎，九转烹煎结大还。灵丹就，未飞升上阙，且在人寰。

### 水调歌头

土釜温温火，橐籥动春雷。三田升降，一条径路属灵台。自有真龙真虎，和合天然铅汞，赤子结真胎。水里捉明月，心地觉花开。

一转功，三十日，九旬来。抽添气候，炼成白血换骷髅。四象五形聚会，只在一方凝结，方寸绝纤埃。人在泥丸上，归路入蓬莱。

又

一个奇男子，万象落心胸。学书学剑，两般都没个成功。要去披缁学佛，首下一拳轻快，打破太虚空。末后生华发，再拜玉清翁。

二十年，空挫过，只飘蓬。这回归去，武夷山下第三峰。住我旧时庵子，碗水把柴升米，活火煮教浓。笑指归时路，弱水海之东。

又 自述

苦苦谁知苦，难难也是难。寻思访道，不知行过几重山。吃尽风儻雨愆，那见霜凝雪冻，饥了又添寒。满眼无人问，何处扣玄关。

好因缘，传口诀，炼金丹。街头巷尾，

无言暗地自生欢。虽是蓬头垢面，今已九旬来地，尚且是童颜。未下飞升诏，且受这清闲。

又

天下云游客，气味偶相投。暂时相聚，忽然云散水空流。饱饫闽中风月，又爱浙间山水，杖屨且逍遥。太上包中下，只得个无忧。

是和非，名与利，一时休。自家醒了，不成得恁地埋头。任是南州北郡，不问大张小李，过此便相留。且吃随缘饭，莫作俗人愁

又

未遇明师者，日夜苦忧惊。及乎遇了，得些口诀又忘情。可惜蹉跎过了，不念精衰气竭，碌碌度平生。何不回头看，下手采来烹。

天下人，知得者，不能行。可怜埋没，如何恁地不惺惺。只见口头说著，方寸都无些子，只管看丹经。地狱门开了，急急办前程。

又

堪笑塵中客，都总是迷流。冤家缠缚，算来不是你风流。不解去寻活路，只是担枷负锁，不肯放教休。三万六千日，受尽百年忧。

得人身，休蹉过，急须修。乌飞兔走刹那，又是死临头。只这眼前快乐，难免无常

两字，何似出尘囚。炼就金丹去，万劫自逍遥。

念奴娇 咏雪

广寒宫里，散天花、点点空中柳絮。是处楼台皆似玉，半夜风声不住。万里盐城，千家珠瓦，无认蓬莱处。但呼童、且去探梅花、攀那树。

垂帘未敢掀开，狮儿初捏就，佳人偷觑。溪畔渔翁蓑又重，几点沙鸥无语。竹折庭前，松僵路畔，满目都如许。问要晴，更待积痕消，须无雨。

满庭芳

鼎用乾坤，药须乌兔，恁时方炼金丹。水中虎吼，火里赤龙蟠。况是兑铅震汞，自元谷、上至泥丸。些儿事，坎离复垢，返老作童颜。

五行，全四象，不调停火候，间断如闲。六天罡所指，玉出昆山。不动纤毫云雨，顷刻处、直透三关。黄庭内，一阳来复，丹就片时间。

又

两种汞铅，黄婆感合，如如真虎真龙。周年造化，蹙在片时中。炉里温温种子，玄珠象、气透三宫。金木处，炼成赤水，白血自流通。

无中。胎已兆，见龟蛇乌兔，恍惚相逢。但坎离既济，复垢交融。了得真空命脉，天地里、万物春风。阴阳外，天然夫妇，一点便成功。

### 酹江月 冬至与胡胎仙

因看斗柄，运周天、顿悟神仙妙诀。一点真阳生坎位，点却离宫之缺。造物无声，水中起火，妙在虚危穴。今年冬至，梅花依旧凝雪。

先圣此日闭关，不通来往，皆为群生设。物物□含生育意，正在子初亥末。自古乾坤，这些离坎，日日无休歇。如今识破，金乌飞入蟾窟。

### 珍珠帘

阴阳内感相交结。有铅汞、分八卦罗列。金鼎炼黄芽，正一阳时节。子后午前方进火，向玉炉、烹成白雪。透彻。这玄关、深奥难轻泄。

因师指诀幽微，把金丹大药，将来分说。捉住虎龙精，自然日月。造化天机人怎晓，换俗骨、永无魔折。超越。望仙都稽首，朝元金阙。

### 山坡羊

默坐寒灰清静。会向时中一定。金城贼

返，报乐流星奔。用将须分左右军。出师交征定主宾。排的是天文地理，九宫八卦天魂阵。捉住金精也，送黄庭土釜封。神通。战罢方能见圣人。英雄。不时干戈定太平。

又

不刻时阴阳交并。古盆一声号令。九宫八卦，排列下拿龙阵。领金乌左右军。夺乾坤始媾精。三回九转，交战在西南境。得胜回朝也，河车不曾暂停。辛勤。曲枕昼夜行。专精。铁打方梁磨绣针。

又

独坐无为宫殿。息息绵绵不断。我把生身父母，要使他重相见。青头郎天外玄。白衣妇海底眠。婴儿姹女，阻隔在天涯远。全仗着黄婆也，黄婆在两下缠。团圆。打破都关共一天。托延。赏罢蟾辉斗柄偏。

又

圆觉金丹太极。这造化谁人知味。傍门小径，正理全然昧。学三峰九鼎奇。习休粮与闭饥。吃斋入定，到底成何济。耽阁了浮生也，道无缘福不齐。思知。不识阴阳莫乱为。修持。莫信愚徒妄指迷。

## 葛立方

### 满庭芳 催梅

霜叶停飞 ,冰鱼初耀 ,梅花犹闷芳丛。剪  
酥装玉 ,应为费天工。争奈江南驿使 ,征鞍待、  
一朵香浓。凭谁报 ,冰肌仙子 ,闻早驾飞龙。

溶溶。春意动 ,寒姿未展 ,终愧群红。与  
斩新来上 ,开伴长松。要看黄昏庭院 横斜映、  
霜月朦胧。兰堂畔 ,巡檐索笑 ,谁羨杜陵翁。

### 又 和催梅

未许蜂知 ,难交雀啅 ,芳丛犹是寒丛。东  
方解冻 ,春仗做春工。何事仙葩未放 寒苞秘、  
冰麝香浓。应须是 ,惊闻羯鼓 ,谁敢喷髯龙。

梅花 ,君自看 ,丁香已白 桃脸将红。结岁  
寒三友 ,久迟筠松。要看含章檐下 ,闲妆靓、春  
睡朦胧。知音是 ,冻云影底 ,铁面葛仙翁。

### 又 探梅

狂吹鸣篴 ,祥霏剪水 ,分明欺压寒梅。冰  
威初敛 ,曦影上池台。应有一番和气 南枝上、  
恐有春来。须勤探 ,呼吾筇杖 ,屐齿上苍苔。

春风 ,浑未到 ,徘徊香径 巡绕千回。见琼  
英一点 ,小占条枚。且看先锋素艳 ,看看便、繁

蕾齐开 ,香浮动 ,微薰诗梦 ,须更著诗催。

又 赏梅

腊雪方凝 ,春曦俄漏 ,画堂小秩芳筵。玉台仙蕊 ,帘外幂瑶烟。莫话青山万树 ,聊须对、一段孤妍。杯行处 ,香参鼻观 ,百濯未为贤。

吾庐 ,何处好 ,绣香竹畔 ,偶桂溪边。且为渠珍重 ,满泛金船。已拚春醒一枕 ,如今且、醉倒花前。花飞后 ,欢呼一笑 ,又是说明年。

又 泛梅

庾信何愁 ,休文何瘦 ,范叔一见何寒。梅花酷似 ,索笑画檐看。便肯嫣然一笑 ,疏篱上、玉脸冰颜。须勤赏 ,莫教青子 ,半著树头酸。

朱阑。聊掩映 ,昆仑顶上 ,琪树团栾。命儿曹班坐 ,草草杯盘。旋折溪边□朵 ,琼蕤泛、蕉叶杯宽。从教□ ,尊前有客 ,拍手笑颧山。

又 簪梅

弄月黄昏 ,封霜清晓 ,数枝影堕溪滨。化工先手 ,幻出一番新。片片雕酥碾玉 ,寒苞似、已泄香尘。聊相对 ,畸人投分 ,尊酒认荀陈。

吾年 ,今老矣 ,佳人薄相 ,笑插林巾。愧苍颜白发 ,回授乌云。玉镜台边试看 ,相宜是、浅笑轻颦。君知否 ,寿阳额上 ,不似鬓边春。

又 评梅

一阵清香 ,不知来处 ,元来梅已舒英。出篱含笑 ,芳意为人倾。细看高标孤韵 ,谁家、别得花人。应须是 ,魏徵妩媚 ,夷甫太鲜明。

北枝 ,方半吐 ,水边疏影 ,绰约娉婷。问横空皎月 ,匝地寒霰。何似此花清绝 ,凭君为、子

全宋词 葛立方

细推评。幽奇处 ,素娥青女 ,著意为横陈。

### 锦堂春 正旦作

气应三阳 ,氛澄六幕 ,翔鸟初上云端。问朝来何事 ,喜动门阑。田父占来好岁 ,星翁说道宜官。拟更凭高望远 ,春在烟波 ,春在晴峦。

歌管雕堂宴喜 ,任重帘不卷 ,交护春寒。况金钗整整 ,玉树团团。柏叶轻浮重醕 ,梅枝巧缀新幡。共祝年年如愿 ,寿过松椿 ,寿过彭聃。

### 水龙吟 游钓台作

九州雄杰溪山 ,遂安自古称佳处。云迷半岭 ,风号浅濑 ,轻舟斜渡。朱阁横飞 ,渔矶无恙 ,鸟啼林坞。吊高人遗迹 ,空瞻遗像 ,知英烈、垂千古。

忆昔龙飞光武。怅当年、故人何许。羊裘自贵 ,龙章难换 ,不如归去。七里溪边 ,鸬鹚源畔 ,一蓑烟雨。叹如今宕子 ,翻将钓手遮日 ,向西秦路。

### 菩萨蛮 侍饮赏黄花

井梧叶叶秋风晚。东篱点点金钱满。开急为重阳。日烘深院香。

幽姿无众草。莫恨生非早。嚼蕊傍池台。寿公桑落杯。

### 风流子

夜半春阳启,东风峭、犹带去年寒。叹榆塞战尘,玉关烟燧,壮心耿耿,青鬓斑斑。又还是,一年头上到,日月信跳丸。看门帖绘鸡,历颁金凤,酒浮柏叶,人颂椒盘。

幽园。春信近,帘栊静、小宴取次追欢。聊□水沈烟袅,清唱声闲。况良辰渐有,梅舒琼蕊,柳摇金缕,巧缀新幡。莫惜醉吟亲侧,衣曳荆兰。

### 多丽 赏梅

冷云收,小园一段瑶芳。乍春来、未回穷腊,几枝开犯严霜。傍黄昏、暗香浮动,照清浅、疏影低昂。却月幽姿,含章媚态,姮娥姑射下仙乡。倚阑看、殷勤持酒,索笑也何妨。堪怜处,东君不管,独自凄凉。

算何人、为伊销断,古今才子篇章。有西湖、赋诗处士,□东阁、年少台郎。驿使来时,吴王醉处,几番牵动广平肠。胜宴赏、微酸如豆,又是隔年长。高楼外,莫教羌管,吹堕寒香。

### 沙寒子 咏梅

天生玉骨冰肌。瘦损也、知他为谁。□寒底、傲霜凌雪,不教春知。

全宋词 葛立方

高楼横笛试轻吹。要一片、花飞酒后。拚  
沈醉、帽帘斜插，折取南枝。

### 多丽 七夕游莲荡作

破波光如镜，三翼轻舟。对雨馀、重岩叠  
嶂，何妨影堕清流。望芙蕖、渺然如海，张云  
锦、掩映汀洲。出水奇姿，凌波艳态，眼看□叶  
弄新秋。恍疑是、金沙池内，玉井认峰头。花  
深处，田田叶底，鱼戏龟游。

正微凉、西风初度，一弯斜月如钩。想天  
津、鹊桥将驾，看宝奁、蛛网初抽。晒腹何堪，  
穿针无绪，不如溪上少淹留。竞笑语、追寻惟  
有，沈醉可忘忧。凭清唱，一声檀板，惊起沙  
鸥。

### 满庭芳

扉映琉璃，窗摇云母，水堂新霁云湾。际  
天波面，玉镜宝奁宽。栏外青山几叠，瑶烟敛、  
影落千鬟。寒汀晚，芦花飞雪，风定白鸥闲。

尘寰。何处有，方壶圆峤，弱水波翻。问  
何如藜杖，此地跻攀。种竹今逾万个。风枝  
静、日报平安。他年事，苍云屯处，千亩看栖  
鸾。

### 春光好 立道生日作

去年曾寿生朝。正黄菊、初舒翠翘。今岁

全宋词 葛立方

雕堂重预宴 梨雪香飘。明年应傍丹霄。看宝  
胯、重重在腰。 鹊尾吹香笼绣段 ,且醉金蕉。

西江月 开炉

风送丹枫卷地 霜乾枯苇鸣溪。兽炉重展  
向深闺。红入麒麟方炽。

翠箔低垂银蒜 罗帏小钉金泥。笙歌送我  
玉东西。谁管瑶花舞砌。

蝶恋花 冬至席上作

缙室群阴清晓散。灰动葭莩 ,渐觉微阳  
扇。日永绣工才一线。挈壶已报添银箭。

六幕无尘开碧汉。非雾非烟 ,仿佛登台  
见。梅萼飘香萦小宴。霞浆莫放琉璃浅。

清平乐 子直过省 ,生日候殿试 ,席间作

文章惊世。半挹南宫第。蟾窟澄辉天似  
洗。折得窅窳丹桂。

当年蓬矢生贤。流霞满祝长年。更愿巨  
鳌连钓 ,枫宸第一胪传。

减字木兰花 四侄过省候廷试席上作

摇毫铸藻。纵有微之应压倒。万里鹏程。  
南省今书淡墨名。

胪传丹陛。月里桂花先著袂。雁塔高题。

玉季巍科尚觉低。

满庭芳 五侄将赴当涂,自金坛来别

栗里田园,乌衣门巷,别来几换星霜。华  
阳仙窟,翠桁彩衣香。梦堕当涂风月,披绛帐、  
欲指鱣堂。浮鸥外,来宁老子,特泛霁溪航。

相逢,春正好,梅舒香白,柳曳宫黄。且相  
将一笑,乐未渠央。须念离多会少,难轻负、百  
榼霞浆。深深观,舞回飞雪,乐奏小宫商。

水调歌头

睡鸭凝香缕,白酒泻无声。郊墟不办羊  
酪,照箸紫丝莼。此去青山深处,邀得白云为  
伴,绝意请长纓。一舸背君去,几幅布帆轻。

帝恩重,容禄隐,吏祠庭。膝间文度安亲,  
得计是扬名。珍重金兰交契,共惜匆匆别去,  
送我几烟林。异日怀君处,凝睇乱层岑。

风流子

细草芳南苑,东风里、赢得一身闲。见花  
朵绣田,柳丝络岸,沼冰方泮,山雪初残。又还  
是,陇头春信动,梅蕊入征鞍。月里暗香,水边  
疏影,淡妆宜瘦,玉骨禁寒。

泛金溪上好,开幽户、聊面翠麓云湾。知  
道醉吟堪老,名利难关。算书帙意懒,宦涂游  
倦,旧时习气,惟有跻攀。拟待杖藜花底,直到

春阑。

满庭芳 胡汝明罢帅归 坐间次韵作

江国麾幢 ,边城鼓角 ,溢川几报严更。笑谈油幕 ,英杰为时生。腹贮六韬三略 ,新诗就、  
矛槊频横。功名事 ,他年未晚 ,一筇落櫜枪。

归来 ,何早计 ,白苹洲畔 ,危获深耕。又何如 ,竹帛彝鼎垂名。犀节徵还伊迩 ,春风外、文  
鹞催行。岩廊上 ,谈兵齿颊 ,说论佐休明。

玉漏迟

窗户明环堵。山容黛染 ,水光绡舞。荷盖擎烟 ,花映步波神女。嫩脸铅华掩素。无语  
向、薰风凝伫。晴又雨。征鞞隐隐 ,云洲沙渚。

须臾风卷还晴 ,看香泄丹囊 ,乍飘沈炷。鱼飏荷衣 ,珠颗乱倾无数。休话金沙玉井 ,争  
似我、神龟□处。觴为举。何人解歌金缕。

行香子

风透纱窗。叶落银床。夹缬林、吹下严霜。新篘浮蚁 ,班坐飞觞。有岩中秀 ,篱中艳 ,  
洛中香。

金钿放蕊 ,玉粒争芳。惯年年、来趁清商。不应素节 ,还有花王。看正封诗 ,龟年调 ,太真  
狂。

玉楼春 雪中拥炉闻琵琶作

青女飞花浓剪水。寒气霏微度窗纸。人间那得骨为帘，炉有麒麟尊有蚁。

笙簧冻涩闲纤指。香雾暖熏罗帐底。却教试作忽雷声，往往惊开桃与李。

瑞鹧鸪 小孙周晬席上作

榴花庭院戏毵毹。水剪双眸画不如。莫恨未能通瑟侗，只今先已辩之无。

虎睛浅缀新花帽，龙脑浓熏小绣襦。乃祖未须贻厥力，及时须读五车书。

浪淘沙 子直新第落成席上作

休看辋川图。未是幽居。何如云水绕储胥。新湿青红开栋宇，雾拱风疏。

小辅秀郊墟。花破平芜。五峰列影水平铺。只欠五城楼十二，便是蓬壶。

卜算子 赏荷以莲叶劝酒作

明镜盖红蕖，轩户临烟渚。窈窕珠帘淡淡风，香里开尊俎。

莫把碧筒弯，恐带荷心苦。唤我溪边太乙舟，潋滟盛芳醑。

又 席间再作

袅袅水芝红 ,脉脉蒹葭浦。淅淅西风淡淡  
烟 ,几点疏疏雨。

草草展杯觞 ,对此盈盈女。叶叶红衣当酒  
船 ,细细流霞举。

减字木兰花 章甥筑地相望作

张南周北。谩说清漳摇绀碧。何似幽栖。  
甥舅相望共一溪。

璇题沙版。不用买邻糜百万。余户增辉。  
庭列芝兰户戟枝。

夜行船 章甥婚席间作

百尺雕堂悬蜀绣。珠帘外、玉阑琼甃。调  
鼎名家 ,吹箫贤胄 ,新卜凤皇佳繇。银叶添香  
香满袖。满金杯、寿君芳酒。喜动蟾宫 ,祥生  
熊帐 ,应在细君归后。

雨中花 睢阳途中小雨见桃李盛开作

以下奉使途中作壮岁嬉游 ,乐事几经 ,青  
门紫陌芳春。未见廉纤 ,膏雨浥花尘。濯锦宝  
丝增艳 ,洗妆玉颊尤新。向韶光浓处 ,点染芳  
菲 ,总是东君。

苏州老子 ,经雨南园 ,为谁一扫花林。谁  
信道、佳声著处 ,肌润香匀。晓试何郎汤饼 ,暮  
留巫女行云。寄言游子 ,也须留眄 ,小驻蹄轮。

又 和

寄径濉阳 ,陌上忽看 ,夭桃秣李争春。又见楚宫 ,行雨洗芳尘。红艳霞光夕照 ,素华琼树朝新。为奇姿芳润。拟倩游丝 ,留住东君。

拾遗杜老 ,犹爱南塘 ,寄情萝薜山林。争似此、花如姝丽 ,獭髓轻匀。不数江陵玉杖 ,休夸花岛红云。少须澄霁 ,一番清影 ,更待冰轮。

好事近 归有期作

几骑汉旌回 ,喜动满川花木。遥睇清淮古岸 ,散离愁千斛。

烟笼沙嘴定连艘 ,鹄脚蘸波绿。归话隔年心事 ,秉夜阑银烛。

又 和子直惜春

归日指清明 ,肯把话言轻食。已是飞花时候 ,赖东风无力。

青帘沽酒送春归 ,莫惜万金掷。屈指明年春事 ,有红梅消息。

朝中措

回至汴京喜而成长短句

暂时莫荡出燕然。冰柱冻层檐。时节马蹄归路 ,杨花乱扑征鞞。

如今归去 ,银钗宜见 ,七宝床边。待得退朝花底 ,家人争卷珠帘。

全宋词 葛立方

春光好 寒食将过淮作

禁烟却酿春愁。正系马、清淮渡头。后日  
清明催叠鼓，应在扬州。

归时元已临流。要绮陌、芳郊恣游。三月  
羁怀当一洗，莫放觥筹。

## 葛胜仲

### 江神子

初至休宁冬夜作

昏昏雪意惨云容。猎霜风。岁将穷。流  
落天涯，憔悴一衰翁。清夜小窗围兽火，倾  
酒绿，借颜红。

官梅疏艳小壶中。暗香浓。玉玲珑。对  
景忽惊，身在大江东。上国故人谁念我，晴  
嶂远，暮云重。

### 蝶恋花

二月十三日同安人生日作二首

雨后春光浓似醉。著柳催花，节物侵龙  
忌。绣褙香闺当日佩。紫兰宫堕人间世。  
歌管停云香吐穗。碧酒红裳，共祝鱼轩  
贵。天上阿环金篆秘。龟龄鹤寿三千岁。

又

共乐堂深帘不卷。恻恻寒轻，二月春犹  
浅。续寿竞来歌舞院。龙涎香衬蛟绡段。  
画栋朝飞双语燕。端似知人，著意窥金  
盞。柳外花前同祝愿。朱颜长在年龄远。

## 临江仙

尉姜补之托疾卧家作

郊外黄垓端可厌，归来移病香闺。象床珍簟共委蛇。耆婆寻草尽，天女散花迟。

小雨作寒秋意晚，檐声与梦相宜。冷侵罗幌酒烟微。试评书五朵，何似画双眉。

## 渔家傲

初创真意亭于南溪，游陟晚归作

岩壑萦回云水窟。林深路断迷烟客。茅屋数椽携杖舄。人寂寂。侵檐万个琅玕碧。

倦客羁怀情似涤。更无一点飞埃迹。溪涨慢流过几席。寒泚泚。鳧鹭点破琉璃色。

又

叠叠云山供四顾。簿书忙里偷闲去。心远地偏陶令趣。登览处。清幽疑是斜川路。

野蔌溪毛供饮具。此身甘被烟霞痼。兴尽碧云催日暮。招晚渡。遥遥一叶随鸥鹭。

## 鹧鸪天

九月十三日携家游夏氏林亭燕集作，并送汤词

小榭幽园翠箔垂。云轻日薄淡秋晖。菊英露浥渊明径，藕叶风吹叔宝池。酬素景，泥芳卮。老人痴钝强伸眉。欢华莫遣笙歌散，归路从教灯影稀。

又

婆律香浓气味佳。玻璃仙碗进流霞。凝膏清滌高阳醉，灵液甘和正焙芽。香染指，浪浮花。加笏礼尽客还家。贯珠声断红裳散，踏影人归素月斜。

点绛唇 县斋愁坐作

秋晚寒斋，藜床香篆横轻雾。闲愁几许。梦逐芭蕉雨。

云外哀鸿，似替幽人语。归不去。乱山无数。斜日荒城鼓。

行香子 愁况无聊作

风物飕飕。木落沧洲。渐老人、不奈悲秋。羁怀都在，鬓上眉头。似休文瘦，文通恨，子山愁。

庭梧影薄，篱菊香浮。强招寻、聊命朋俦。穷通皆梦，今古如流。且渊明径，子猷舫，仲宣楼。

诉衷情 友人生日

清明寒食景暄妍。花映碧罗天。参差捍拨齐奏，丰颊拥芳筵。

逢诞日，揖真仙。托炉烟。朱颜长似，头上花枝，岁岁年年。

## 水调歌头

程良器嘉量别赋一阕纪泛舟之会，往返次韵  
夜泛南溪月，光影冷涵空。棹飞穿碎金  
电，翻动水精宫。横管何妨三弄，重醕仍须  
一斗，知费几青铜。坐久桂花落，襟袖觉香  
浓。

庾公阁，子猷舫，兴应同。从来好景良  
夜，我辈敢情钟。但恐仙娥川后，嫌我尘容  
俗状，清境不相容。击汰同情赏，赖有紫溪  
翁。

又

下濂惊船驶，挥麈恐尊空。谁吹尺八寥  
亮，嚼徵更含宫。坐爱金波潋滟，影落蒲萄  
涨绿，夜漏尽移铜。回棹携红袖，一水带香  
浓。

坐中客，驰隼辨，语无同。青鞋黄帽，  
此乐谁肯换千钟。岩壑从来无主，风月故应  
长在，赏不待先容。羽化寻烟客，家有左仙  
翁。

又

胜友欣倾盖，羈宦懒书空。爱君笔力清  
壮，名已在蟾宫。萧散英姿直上，自有练裙  
葛帔，岂待半通铜。长短作新语，墨纸似鸦  
浓。

山吐月，溪泛艇，率君同。吾侪轰饮文  
字，乐不在歌钟。今夜长风万里，且倩泓澄  
浩荡，一为洗尘容。世上闲荣辱，都付塞边

翁。

木兰花 与诸人泛溪作

木阑干外池光阔。午夜乔林迷岸樾。掠船凉吹起青苹，萦水歌声欺白雪。

檀郎响趁红牙节。胡语嘈嘈仍切切。人生何乐似同襟，莫待骊驹声惨咽。

满庭霜

任昉尝为西安太守，风流名迹，图经史牒具载，感今怀古作

百不为多，一不为少，阿谁昔仕吾邦。共推任笔，洪鼎力能扛。不为桃花禄米，雠书倦、一苇横江。招寻处，徒行曳杖，曾不拥麾幢。

山川，真大好，鱼矶无恙，密岭难双。听讼诉多就，樵坞僧窗。岁月音容远矣，风流在、遐想心降。云烟路，搜奇吊古，时为酹空缸。

醉蓬莱 天宁节作

望葱葱佳气，虹渚祥开，斗枢光绕。析木天津、正灵晖腾照。鹭缀分班，象胥交贡，奉御觞清晓。玉殿寒轻，金徒漏永，瑞炉烟袅。

万宇均欢，示慈颁燕，寿祝南山，庆均皞藻。缥缈红云，望九重天表。舞兽锵洋，

全宋词 葛胜仲

扑鳌欣戴，度管弦声杳。历草长新，蟠桃永秀，与天难老。

### 西江月

正月十七日，与文中自邑境遍游歙黟祁门山水，十九日，在黟邑同灵观夜燕作二首

羈宦新来作恶，穷途谁肯相从。追攀十日水云中。情谊知君独重。

寂寂回廊小院，冥冥细雨尖风。凤山香雪定应空。昨夜疏枝入梦。

又

山镇红桃阡陌，烟迷绿水人家。尘容误到只惊嗟。骨冷玉堂今夜。

莫对佳人锦瑟，休辞洞府流霞。峰回路转乱云遮。归去空传图画。

### 南乡子

三月望日与文中诸贤泛舟南溪作

柳岸正飞绵。选胜斋轻漾碧涟。笑语忘怀机事尽，鸥边。万顷溪光上下天。

菰苇久延缘。不觉遥峰霭暮烟。对酒莫嫌红粉陋，婵娟。自有孤高月妇仙。

### 浣溪沙 木芍药词

可惜随风面旋飘。直须烧烛看娇娆。人间花月更无妖。

浓丽独将春色殿，繁华端合众芳朝。南床应为醉陶陶。

又

通白轻红溢万枝。浓香百和透丰肌。丹山威凤势将飞。

玉镜台前呈国艳，沉香亭北映朝曦。如花惟有上皇妃。

又

斗鸭栏边晓露沾。华堂醉赏轴珠帘。插花人好手纤纤。

遮护轻寒施翠幄，标题仙品露牙签。词人遗恨独江淹。

## 西江月

次韵林茂南博士杞泛溪

山外半规残日，云边一缕余霞。满城飞雪散苍花。万顷溪连罨画。

柳恹风流旧国，鹤龄潇洒人家。肯嗟流落在天涯。云水从今起价。

又 三月初六日席上代监酒和

晚路交游绿酒，平生志趣青霞。霜风时节近黄花。泛宅舟将鹧画。

不分两溪明月，夜深只属渔家。今朝清赏寄情涯。肯向綦涂索价。

## 蝶恋花 和王廉访

风过涟漪纹縠细。十指香檀，惊破交禽

全宋词 葛胜仲

睡。野蔌溪毛真易致。风流未减兰亭会。  
击汰千艘供洛禊。映水垂杨，万缕拖浓翠。  
小海一声波上戏。殷勤留客千金意。

临江仙 燕诸部使者

自古吴兴称冷僻，菰城水浸粼粼。回星  
难望使车尘。如何三日饮，并有五行人。

文似枚皋加敏速，记书易若张巡。幕中  
无用郗嘉宾。他年浮枣会，莫忘两溪春。

又

千古乌程新酿美，玉觞风过粼粼。歌声  
未办起梁尘。九天持斧客，来作绣衣人。

夙有辞华惊乙览，传闻献颂东巡。未应  
握节久宾宾。一封驰诏旨，却醉上林春。

又 与叶少蕴梦得上巳游法华山九曲池流杯

小样洪河分九曲，飞泉环绕粼粼。青莲  
往事已成尘。羽觞浮玉瓮，宝剑捧金人。

绿绮且依流水调，蓬蓬鼙鼓催巡。玉堂  
词客是嘉宾。茂林修竹地，大胜永和春。

定风波

与叶少蕴、陈经仲、彦文燕骆驼桥、少蕴作，  
次韵二首

千叠云山万里流。坐中碧落与鳌头。真  
意见嬉吾已领。烟景。不辞捧诏久汀洲。

老去一官真是漫。溪岸。独余此兴未能  
收。留与吴儿传胜事。长记。赤阑桥上揽清

秋。

又

共喜新凉大火流。一声水调听歌头。况有修蛾兼粉领。佳景。谢公无不碍沧洲。

平昔短檠真大漫。气岸。老来都向酒杯收。云水光中修禊事。犹记。转头不觉已三秋。

### 浣溪沙

少蕴内翰同年宠速，且出后堂，并制歌词侑觞，即席和韵二首

今夜风光恋渚苹。欲教四角出车轮。金钗离立座生春。

神女恍惊巫峡梦，飞琼原是阆风人。诏封后院宠儒臣。

又

溪岸沈深属泛苹。倾城容貌此推轮。可怜虚度二年春。

暮暮来时骚客赋，朝朝新处后庭人。天留花月伴羁臣。

又 少蕴内翰同年宠速，遣妓隐帘吹笙，因成一阕

东道殷勤玉笋飞。华灯倾国拥珠玑。玉奴嫌瘦玉环肥。

缥缈幸闻缑岭曲，参差犹隔夏侯衣。放开云月出清辉。

瑞鹧鸪 和通判送别

两年人住岂无情。别乘辞华四水清。何事千钟劝饮饯，故知一别未能轻。

解龟虽幸樊笼出，挂席还愁海汐平。江草江花都是泪，骊驹休作断肠声。

浪淘沙 将去南阳作

步履对东风。细探春工。百花堂下牡丹丛。莫恨使君来便去，不见鞦韆红。

雾眼一衰翁。无意芳秣。年来结习已成空。寄语国香雕槛里，好为人容。

蓦山溪

天穿节和朱刑掾二首

望云门外。油壁如流水。空巷逐朱幡，步春风、香河七里。冶容炫服，摸石道宜男，穿翠霭，度飞桥，影在清漪里。

秦头楚尾。千古风流地。试问汉江边，有鲜佩、行云旧事。主人是客，一笑强颁春，烧灯后，赏花前，遥忆年年醉。

又

春风野外。卵色天如水。鱼戏舞绡纹，似出听、新声北里。追风骏足，千骑卷高冈，一箭过，万人呼，雁落寒空里。

天穿过了，此日名穿地，横石俯清波，  
竞追随、新年乐事。谁怜老子，使得暂遨游，  
争捧手，乍凭肩，夹道游人醉。

又 送李彦时

出门西笑。千里长安道。不用引离声，  
便登荣、十洲三岛。画船珠箔，苹末水风凉，  
随柳岸，楚台人，景与人俱好。

应嗟见晚，玉殿生清晓。正是妙年时，  
步承明、谋身须早。轺车肤使，新逐凯歌回，  
恩綍重，彩衣轻，嘉庆知多少。

西江月

二首。一连水东楼燕集、一泛舟

艳曲醉歌金缕，朱门高耸铜环。中天楼  
观共跻攀。飞絮落花春晚。

低映绿阴朱户，斜拖素练沧湾。银钩华  
榜五云间。奕奕蛟龙字绶。

又

鞦韆斜红带柳，琉璃涨绿平桥。人在花  
月见新妖。不数江南苏小。

恨寄飞花蔌蔌，情随流水迢迢。鲤鱼风  
送木兰桡。回棹荒鸡报晓。

又 与王庭锡登燕集作

清樾已生昼寂，孤花尚表春余。象床筠  
簟燕堂虚。初过晚凉微雨。

圭壁新来北苑，鲈鱼未减东吴。捧觞红  
袖透香肤。不浥翔龙烟缕。

又 叔父庆八十会作

瑞兽香云轻袅，华堂绣幕低垂。人生七十尚为稀。况是钓璜新岁。

登俎青梅的皪，明阑红药芳菲。天教眉寿过期颐。常对风光沈醉。

浣溪沙 赏芍药

楼子包金照眼新。香根犹带广陵尘。翻阶不羨掖垣春。

不分与花为近侍，难甘溱洧赠闲人。如羞如怨独含颦。

虞美人 酬卫卿弟兄赠

三年曾不窥园树。辛苦萤窗暮。怪来文誉满清时。柿叶书残犹自、日临池。

春秋新学卑繁露。黄卷聊堪语。家人不用寄龟诗。行看升平楼外、化龙归。

又

一轮丹桂窅窳树。光景疑非暮。天公著意在兹时。扫尽微云点缀、展清池。

樽前金奏无晨露。只有君房语。骊驹客莫赋归诗。东道留连应赋、不庸归。

瑞鹧鸪 工部七月一日生辰

火云欲避金风至。秀气充闾初降瑞。去

全宋词 葛胜仲

家丁令却归来，还燕悬孤当日地。

金章紫绶身荣贵。寿福天储昌又炽。怪来一岁四迁官，还过当生元太岁。

### 鹊桥仙 七夕

鹊桥仙偶，天津轻渡，却笑嫦娥孤皎。平时五夜似经年，问何事、今宵便晓。

云车将驾，神夫留恋，更吐心期多少。支机休浪与闲人，莫倚赖、芳心素巧。

### 江城子 呈刘无言煮

浮家重过水晶宫。五年中。事何穷。无恙山溪，鬢影落青铜。欲向旧游寻旧事，云散彩，水流东。

苔花向我似情钟。舞霜风。雪蒙蒙。应怪史君，颜鬓便衰翁。赖是寻芳无素约，端不恨，绿阴重。

又 和无言雪词

飞身疑到广寒宫。玉花中。兴何穷。酒贵旗亭，谁是惜青铜。飘瞥三吴真妙绝，银万里，失西东。

草堂红蜡暖歌钟。卷帘风。赏空蒙。丰颊修眉，鹤氅拥仙翁。欲作氍毹花底客，清漏永，禁城重。

蝶恋花 章道祖侬生日

安石榴花浓绿映。解愠风轻，乍改朱明令。袞绣元臣门户盛。童孙此日悬弧庆。  
夜宴华堂添酒兴。□□除书，远带天香剩。欲浥苔波供续命。不须龙护江心镜。

南乡子

九日用玉局翁韵作呈坐上诸公

晴日乱云收。人在苹香柳恹洲。溪上清风楼上醉，飏飏。共折黄花插满头。  
佳客献还酬。不负山城九日秋。苕碧下青供酩酊，休休。楚客当年浪自愁。

又 九日

拂槛晓云鲜。销暑楼危竦半天。曾是携宾当荐九，开筵。度水萦山奏管弦。  
黄菊映华颠。千骑重来已六年。楼下东流当日水，依然。更对周旋旧七贤。

减字木兰花

薛肇明同二侍姬至葛山观梅，薛公会作

葛山仙隐。尚有馀膏留旧鼎。十里梅花。夹道争看袞绣华。  
人间妙丽。并侍黄扉开国贵。僻壤孤芳。羞涩尊前不敢香。

## 临江仙

上巳日游海昌王氏园，吴宰效及中散兄  
倦客身同舟不系，轻帆来访儒仙。春风  
元巳艳阳天。夭桃方散锦，高柳欲飞绵。

千古海昌佳绝地，双凫暂此留连。通宵  
娱客破芳尊。兰亭修禊事，梓泽醉名园。

又 席上和呈中散兄及吴令

宝观岩峣飞雉堞，登临恍欲升仙。野桃  
官柳衬吴天。春风寒食夜，遗恨在封绵。

闻道东溟才二里，银涛直与天连。凭谁  
都卷入芳尊。赋归欢靖节，消渴解文园。

减字木兰花 公弼侄初授官，以此劝酒

辛勤场屋。未遇知音甘陆陆。诏录遗忠。  
一札天书下九重。

鹅城初命。此去青云应渐近。解褐恩新。  
今岁吾家第四人。

又 病起不见杏花作

杏花零乱。拟把百觚来判断。病卧漳滨。  
不见枝头闹小春。

吾衰老矣。一醉花前犹不遂。情绪厌厌。  
虚度韶光又一年。

## 虞美人

自兰陵归，冬夜饮严州酒作

全宋词 葛胜仲

严陵滩畔香醪好。遮莫东方晓。春风盎盎入寒肌。人道霜浓腊月、我还疑。红炉火热香围坐。梅蕊迎春破。一声清唱解人颐。人道牢愁千斛、我谁知。

### 鹧鸪天 新春

玉琯还飞换岁灰。定山新棹酒船回。年时梁燕双双在，肯为人愁便不来。衰意绪，病情怀。玉山今夜为谁颓。年时梅蕊垂垂破，肯为人愁便不开。

### 西江月 送卫卿弟赴定远簿

万卷旧推鸿博，一官且慰蹉跎。升平楼下赐危科。曾对颀昂黼坐。

燕颔从来骨贵，鸾栖尚屈才多。今宵且共入无何。定远功名么麽。

### 浪淘沙

十月十九夜赏菊

我爱菊花枝。浥露偏宜。旋移佳种一年期。照眼黄金三径烂，可但东篱。秋老摘花吹。敢恨开迟。只愁一夜便香衰。待插满头年大也，且泛芳卮。

鹧鸪天 赏菊二首

黄菊鲜鲜带露浓。小园开遍度香风。自  
簪玉醖酬秋色，旋洗霜须对晚丛。香在手，  
莫匆匆。寻芳今夜有人同。黄金委地新收得，  
莫道山翁到底穷。

又

采采黄花鹄彩浓。吹开一夜为霜风。已  
邀骚客陶元亮，不用歌姬盛小丛。秋易老，  
莫匆匆。齐山高兴古今同。欲知此地花多少，  
一眼金英望不穷。

木兰花

十二月二十日卢姊生辰

谈围曾蔽青绫帐。林下中年敦素尚。烟  
波偶趁一帆风，却锁云扃来就养。自从悟得  
空无相。身把虚空来作样。大千沙界抹为尘，  
未比无生真寿量。

醉花阴 次韵印师

东皇已有来归耗。十里青山道。冻柯万  
株梅，一夜妆成，似趁鸣鸡早。年时清赏曾  
同到。先仗游蜂报。抖擞旧心情，一笑酬春，  
不羨和羹诏。

浣溪沙 赏梅

东阁郎官巧写真。西湖处士妙传神。嫣然一笑腊前春。

斗好虽无冰骨女，相宜幸是雪髯人。且烦疏影入清尊。

又 小饮

槃里明珠芡实香。尊前堆雪脍丝长。何妨羌管奏伊凉。

翠葆重生无复日，白波不鬻有如江。壁间醉墨任淋浪。

临江仙 章圃赏瑞香二首

二月风光浓似酒，小楼新湿青红。碧琉璃色映群峰。更携金凿落，来赏锦薰笼。

调客旧留□月旦，此花清软纤秣。未饶兰蕙转光风。赤阑呈雅艳，翠幕护芳丛。

又

雪壁歌词题尚湿，春风又见轻红。一枝斜插映头峰。不辞连夜赏，银烛透纱笼。

白发欺人今老矣，尊前羞见繁秣。清香尤嫖虎溪风。海棠须避席，佳种谩蚕丛。

浣溪沙 赏酴醾

一夜狂风尽海棠。此花天遣殿群芳。芝

兰百濯见真香。

劝客淋浪灯底韵，恼人魂梦枕边囊。一枝插不□□□。

### 鹊桥仙 七夕

凉飙破暑，清歌萦坐，缺月稀星庭户。瓜华草草具杯盘，喜共浥、初筵零露。

天孙东处，牵牛西望，劝汝一杯清醕。精灵何必待秋通，为一洗、朦胧今古。

### 临江仙

二月二十二日锦薰阁赏花

槛外奇葩江外种，娇春未减鞞红。画楼晴日敛云峰。佛香来海岸，蜀锦荐灯笼。

今夜那忧杀风景，酒花来斗妖浓。江梅冷淡避春风。明朝来纵赏，应醉绮罗丛。

### 蝶恋花

次韵张千里驹照花

二月春游须烂漫。秉烛看花，只为晨曦短。高举蜡薪通夕看。红光万丈腾天半。

寄语平时游冶伴。不负分阴，胜事输今段。灯火休催归小院。殷勤更照桃花面。

又

只恐夜深花睡去。火照红妆，满意留宾住。凤烛千枝花四顾。消愁更待寻何处。

汉苑红光非浪语。栖静亭前，都是珊瑚树。便请催尊鸣醺鼓。明朝风恶飘红雨。

又 再次韵千里照花

百紫千红今烂漫。举烛辉花，莫厌烧令短。酒里逢花须细看。人生谁似英雄半。

安得红颜为老伴。妙舞花前，杨柳夸身段。已倒玉山迴竹院。清香不断风吹面。

又

已过春分春欲去。千炬花间，作意留春住。一曲清歌无误顾。绕梁馀韵归何处。

尽日劝春春不语。红气蒸霞，且看桃千树。才子罪谈更五鼓。剩看走笔挥风雨。

### 浪淘沙

九月十八日与千里赏菊三首

又见菊花新。色浅香匀。老人衰病卧漳滨。虽是无聊仍止酒，幸有嘉宾。

不用怨萧辰。不似芳春。请看金蕊照金尊。今夜花前须醉倒，直到黎明。

又

歌阁斗清新。檀板初匀。画堂新筑太湖滨。好是黄花开应候，聊宴亲宾。

上客即逢辰。况是青春。上林开宴锡尧尊。今夜素娥真解事，偏向人明。

又

娱老小亭新。丹堊初匀。万枝金菊绕溪

滨。折向花堂遮醉眼，聊用娱宾。  
红烛夜香辰。广坐生春。月波新酿入芳  
尊。好向花前拚烂醉，不负承明。

### 南乡子

九日黄刚定再索席间作

秋水莹精神。靖节先生太逼真。谈麈生  
风霏玉屑，津津。爽气冷然欲侵人。  
一座尽生春。满引琼觞已半醺。更把黄  
花寿彭祖盈盈。数阕新声又遏云。

### 虞美人 题灵山广禅院

灵山法会何曾散。此地神光满。丁公潭  
下百雷霆。疑是银河挽下、一齐倾。  
高桥飞观连云起。槛外惊湍水。大矾才  
过小矾来。应有天孙灵驭、月中回。

## 葛郯

### 玉蝴蝶 和维扬晁侍郎寄伯强

忆昨苕溪,惯弄五亭月笛,四水烟蓑。何事毗檀门外,马驻长坡。野花中、乱红杳霭,小桥外、叠翠嵯峨。且颜酡。但存长袖,舞倒婆娑。

云何。主盟惠政,春行五马,月皎千波。赢得宾僚,听隔墙、无事高歌。帐烟寒、瑞麟影堕,帘雾细、宝鸭香多。试蹉跎。一桮落日,又送樵柯。

### 念奴娇 和人

冯夷微怒,被鲛人水府,织成绡縠。何处飞来双白鹭,点破一溪寒玉。岸柳烟迷,海棠酒困,赢得春眠足。凭栏搔首,为谁消遣愁目。

遥想居士床头,竹渠新雨,溜瓮中春醪。不惜千钟为客寿,倒卧南山新绿。晚月催归,春风留住,费尽纱笼烛。恍疑仙洞,梦游天柱林屋。

### 又 和人

阳关西路,看垂杨客舍,嫩浮波縠。宝马

嘶风人渐远 , 隐隐歌声戛玉。踏遍春山 , 归来高卧 , 笑濯沧浪足。孤鸿天际 , 断霞摇曳心目。

香露飞入壶中 , 仙家九酝 , 酿百花醪醕。一朵巫阳休怅望 , 且看家山眉绿。歌罢风生 , 舞余花颤 , 凤髓飘红烛。瑶台月冷 , 夜归斗挂银屋。

洞仙歌 壬辰六月十二日纳凉

琼楼十二 , 无限神仙侣。紫绂丹麾彩鸾驭。步虚声杳霭 , 碧落天高 , 微云淡 , 点破瑶阶白露。

暗香来水阁 , 冰簟纱厨 , 一枕风轻自无暑。更上水精帘 , 斗挂阑干 , 银河浅、天孙将渡。终不如、归去在苕川 , 看千顷菰蒲 , 乱鸣秋雨。

又 十三夜再赏月用前韵

藐姑仙子 , 天外谁为侣。八极浮游气为驭。看朝餐沆瀣 , 暮饮醍醐 , 瑶台冷 , 吹落九天风露。

翠空云幕净 , 宝鉴无尘 , 碧树秋来暗消暑。残夜水明楼 , 影落寒溪 , 行人起、沙头唤渡。任角声、吹落小梅花 , 梦不到渔翁 , 一蓑烟雨。

满庭霜 宴黄仲秉镇江守

红叶飞时 , 青山缺处 , 云横秋影斜阳。凤凰旌节 , 何事到吾乡。要见大江东去 , 寒光静、水与天长。人争看 , 恩袍焕锦 , 新惹御炉香。

满城 , 夸盛事 , 两邦鼓吹 , 几部笙簧。看万

红千翠 簇拥云裳。况是重阳近也 萸露紫、菊吐轻黄。休辞醉 明朝一枕 歌韵尚悠扬。

又 述怀

归去来兮 苕溪深处 上有苍翠千峰。月桥烟墅 家在五湖东。试觅桃花流水 鸡犬静、人迹才通。沙汀晚 一天云锦 飞下水精宫。

两年 官事少 江梅雾暗 多稼云丰。把毗坛清梦 尽入诗筒。只欠芦花夜宿 金溪上、一苇秋风。蓑衣在 不辞重整 来作钓鱼翁。

又 和前

归去来兮 家林不远 梦魂飞绕烟峰。洞房花木 只在小池东。谁道云深无路 小桥外、一径相通。功名小 从教群蚁 麀战大槐宫。

故人 书夜到 秫田百亩 已兆年丰。把乌程烂醉 不数郟筒。醉后村歌社舞 团圞坐、一笑春风。洪崖伴 定驱鸾鹤 时一访衰翁。

又 再和

归去来兮 心空无物 乱山不斗眉峰。夜禅久坐 窗晓回升东。已绝乘槎妄想 沧溪迥、不与河通。维摩室 从教花雨 飞舞下天空。

何人 开宴豆 楚羹莼嫩 吴脍盘丰。看一声欸乃 落日收筒。应笑红尘陌上 津亭暮、十里斜风。从今去 青鞋黄帽 分付紫髯翁。

满江红 和吕居仁酬芮国瑞提刑

家住苕西 小池映、青山一曲。翠深里、猿呼鹤应 短墙低屋。麦影离离翻翠浪 泉声泚泚

衰敲寒玉。怪夜来、有蚁出糟床 籊新绿。

和月种 南阳菊。饶云买 淇园竹。任蛮  
争触战 世间荣辱。两目未消凭远恨 一筇费  
尽登山足。便棹舟、炊火荻花中 鲈鱼熟。

又

卷尽珠帘 楚天迥、阑干几曲。最好是、瑶  
台归路 月翻银屋。深院数枰风入座 高楼一  
喷云横玉。看橘林、霜浅未全黄 犹悬绿。

悠然意 渊明菊。真如指 国师竹。者是  
非识破 都无荣辱。不管浮生如蝶梦 从教万  
事添蛇足。坐西昆、一笑八千秋 蟠桃熟。

又

郢客高歌 犹未睹、阳春一曲。多应是、连  
城有价 闷藏华屋。但使章台无异意 何妨一  
见邯郸玉。料锦囊、随客泛东溪 凌波绿。

难独唱 篱边菊。谁与咏 阶前竹。想秋  
光不久 又成虚辱。过雁不知蛩有恨 行夔应  
笑虺无足。愿为予、落笔走盘珠 争圆熟。

### 念奴娇

年来衰懒 渐无心赏遍 目前佳趣。寂寂  
墙阴春荠老 不到先生鼎俎。诗卷寻医 禅林  
结局 酒入昏田务。山头云气 为谁来往朝暮。

犹有筇杖多情 扞萝踏石 堕半岩花雨。  
更向葭丛摇短艇 惊起飞鸿烟渚。横玉凄清 焦桐古淡 一笑忘千虑。更阑人静 此声今在  
何处。

又

再和咏杜庵高君忻聚画屏

蓬莱一岛，卧长烟千柳，西溪幽趣。苜蓿盘中初日上，不把截肪充俎。和月栽松，饶云买石，只此为家务。倚楹清啸，断霞斜倚天暮。

闻道块磊浇胸，槎枒肝肺，动笔端风雨。壁上潇湘秋一帧，影落荻花洲渚。暗浦潮生，寒砒雪化，无复风尘虑。此时渔父，短蓑合在何处。

江神子

亭亭鹤羽戏芝田。看群仙。起青涟。绿盖红幢，千乘去朝天。留得瑶姬清夜舞，人与月，斗婵娟。

凭阑有恨不堪言。倩谁传。曲声圆。写尽清愁，香弄晚风妍。不羨山头窥玉井，花十丈，藕如船。

又

粼粼白水护青田。想真仙。弄清涟，十里香风，吹下碧云天。月在草堂人未寝，松竹暗，水涓涓。

夜阑何事悄无言。怨空传。事难圆。欲借寒光，谁与伴清妍。待得凌波人肯住，呼玉笛，劝金船。

鹧鸪天 咏野梅

千树家园锁旧津。谁移数点在孤村。海

仙探蕊禽留影 ,楚客穿花蝶舞魂。桥断港 ,水横门。残霞零落晚烟昏。只因留住三更月 ,暗里香来别是春。

又

万木家园雾暗津。不须踏影下前村。须知苔雪水云窟 ,自有罗浮冰雪魂。横水馆 ,倚楼门。参旗有约共黄昏。此中有句无人见 ,谁在樽前领略春。

### 洞仙歌

风摇丹髻 ,叶剪西岩树。岁律峥嵘又如许。看千峰倒影 ,浮动觥船 ,纱窗外 ,万幅鲛绡斗舞。

五弦弹不尽 ,碧落天高 ,隐隐孤鸿向云度。送斜红敛尽 ,催上蟾钩 ,金风细 ,点破瑶阶白露。任笛声、吹残一帘秋 ,看人□栏□ ,暮云高处。

又

橹声伊轧 ,影转云间树。试问扁舟在何许。正溪堂波动 ,沙渚苹轻 ,渔翁醉 ,隔岸蓑衣对舞。

归来无一事 ,尊酒相逢 ,莫把光阴更虚度。看歌云杳霭 ,香雾轻盈 ,银河转 ,笑浥芙蓉晓露。纵西风、黄叶满庭秋 ,也不碍凝眸 ,乱山多处。

又

丹青明灭 ,霜著谁家树。满眼风光向谁

许。送寒鸦万点 ,流水孤村 ,归来晚 ,月影三人夜舞。

金英秋已老 ,蜡缀寒葩 ,空里时闻暗香度。任一枝瓶小 ,数点钗寒 ,佳人笑 ,饮尽床头玉露。看纱窗、红日上三竿 ,把蝶影捎空 ,在花深处。

水调歌头 送唯斋之官回舟松江赋

年来惯行役 ,楚尾又吴头。餐霞吸露 ,何事佳处辄迟留。云听渔舟夜唱 ,花落牧童横笛 ,占尽五湖秋。胡床兴不浅 ,人在庾公楼。

绣帘卷 ,曲阑暝 ,翠鬟愁。森罗万象 ,与渠诗里一时收。天设四桥风月 ,地会三州山水 ,邀我伴沙鸥。明朝起归梦 ,一枕过苹洲。

又

舟回平望 ,久之过乌戍、值雨少憩 ,向晚复晴 ,再用韵赋二首

帆腹饱天际 ,树发渺云头。翠光千顷 ,为谁来去为谁留。疑是吴宫西子 ,淡扫修眉一抹 ,妆罢玉奁秋。中流送行客 ,却立望层楼。

风色变 ,堤草乱 ,浪花愁。跳珠翻墨 ,轰雷掣电几时收。应是阳侯薄相 ,催我胸中锦绣 ,清唱和鸣鸥。残霞似相贷 ,一缕媚汀洲。

又

青铜昏水面 ,乌帽裹山头。风涛如此 ,天公作意巧相留。常记垂虹晚渡 ,卧看菰蒲烟雨 ,屈指十三秋。恍若华胥梦 ,无语下西楼。

翠翻空 寒入座 ,不禁愁。五弦弹尽 ,隐隐

全宋词 葛郯

天末暮虹收。欲伴渔翁钓艇，欸乃一声江上，  
寒碧点轻鸥。无人阻归兴，直欲迈长洲。

兰陵王 和吴宣卿

乱烟簇。帘外青山渐肃。莲房静。荷盖半残，欲放清涟媚溪绿。凭高送远目。飞起沧洲雁鹭。寒窗静，茶碗未深，一枕胡床昼眠足。

闲行问松菊。今□雨谁家，空对银烛。箫声忽下瑶台曲。看鹤舞风动，乌啼云起，何须舟内怨女哭。抱琴写幽独。

情触。会相续。况节近中元，月浪翻屋。长鲸愁晓寒蟾促。要百柁倾□，万花流玉。山肴倒尽，又空腹，鲙野蔌。

柳梢青 和人

谢家池阁。翠桁香浓，琐纱窗薄。夜雨灯前，秋风笔下，与谁同乐。

主人许我清狂，奈酒量、从来最弱。颠倒冠巾，淋漓衣袂，醒时方觉。

又

空中雨阁。一段轻阴，翠铺林薄。橘内仙翁，棋边公子，共成清乐。

主人有井留车，看席上、云轻柳弱。斗转檐头，鸡鸣窗外，无人知觉。

朝中措 送蔡定夫

双鞬锦领出山西。戎幕护旌旗。横槊春

风百咏 ,临淮夜月千卮。

风流樽俎 ,琼花破艳 ,红药攒枝。赏尽竹  
西歌吹 ,珠帘十里香迷。

### 感皇恩

风雨半摧残 ,一园花老。绿遍池塘夜来  
草。看花何处 ,莫被此花相恼。世间多少事 ,  
邯郸道。

凭远下临 ,暗尘飞绕。数点烟中树、水村  
小。斜阳且住 ,为我花间留照。从教红满地 ,  
何须扫。

又

花似镜中人 ,不堪衰老。空羨青青岸边  
草。多情消瘦 ,更被无情相恼。近来无限事 ,  
凭谁道。

蝴蝶满园 ,丛边空绕。睡起流莺过、语声  
小。琐窗危坐 ,更被玉蟾相照。夜阑梅影瘦 ,  
凭谁扫。

## 耿时举

### 浣溪沙

露压蔷薇金井栏。辘轳声断碧丝乾。辽阳无信带围宽。

花落池塘春梦静，月生帘幕夜香寒。闲愁无力凭阑干。

又

独鹤山前步药苗。青山只隔过溪桥。洞宫深处白云飘。

碧井卧花人寂寞，画廊鸣叶雨潇潇。漫题诗句满芭蕉。

### 满江红 中秋泛月太湖

问月杯空，谪仙去、无人重举。兰台旧、扁舟乘兴，处留奇语。洞府初疑仙骨瘦，樽前尚爱纶巾舞。信前身、太白尚何疑，词高古。

盟后会，偕真侣。黄叶渡，丹枫渚。道五湖烟浪，胜游溢浦。念我身闲鸥样度，似海山共去君应许。但只愁、岳牧要人□，□撑住。

喜迁莺 送阜卿显谟知镇江府

暮春清昼。政莺啭夏林 ,棠阴初秀。鼓角欢雄 ,旌旗明灭 ,宝马又还西骤。山水六朝堪画 ,宫阙千门如绣。印悬斗。盛元戎小队 ,花间迎候。

芳酌。为公寿。带雨梨花 ,未用啼红袖。玉帐风前 ,胡床月下 ,谈笑要清群丑。桃叶渡船应在 ,太白酒楼依旧。暂回首。看槐班爱立 ,沙堤成就。

## 龚大明

### 缺调名 山居

山居好。山居好。鹤唳猿啼饒昏晓。碧窗柏子炷炉香，趺坐蒲团诵黄老。

又

山居好。山居好。门对青山水环绕。一榻烟霞梦寐清，我以不贪为至宝。

又

山居好。山居好。竹杖芒鞋恣幽讨。坐分苔石树阴凉，闲数落花听啼鸟。

又

山居好。山居好。剷月锄云种瑶草。泠泠碧涧响寒泉，簌簌落花风自扫。

又 赠道友雪崖朱先生

清高绝，雪崖翁。向上玄机顿观通。金鼎有丹成九转，凝然宴坐白云中。

### 西江月 书怀

我本无为野客。飘飘浪迹人间。一时被

全宋词 龚大明

命住名山。未免随机应变。

识破尘劳扰扰，何如乐取清闲。流霞细  
酌咏诗篇。且与白云为伴。

## 龚 日 升

柳梢青 范县尉美任

二十年前。君家桃李，种满螺川。凛凛英风，真如小范，不数梅仙。

薰风吹送朝天。指何物、装添去船。千首新诗，一轮明月，两字清廉。

## 鼓峰

烛影摇红 五月初三

风入虞弦 ,麦秋向晚梅天润。彩丝长命斗  
新奇 ,还是端阳近。想见瑶池仙韵。对蟠桃、  
朱颜相映。篆飘宝鼎 ,酒满霞觞 ,黄堂深静。

超悟真筌 ,凤归不作登台恨。庆余有子在  
河图 ,详试龚黄政。好是棠阴清永。且游戏、  
壶中光景。会有飞诏 ,却奉轻轩 ,天朝归覲。

顾 卞

虞美人

帐前草草军情变。月下旗旌乱。褫衣推  
枕惜离情。远风吹下楚歌声。正三更。

抚鞍欲上重相顾。艳态花无主。手中莲  
萼凛秋霜。九泉归路是仙乡。恨茫茫。

## 关 咏

### 迷仙引

春阴霁。岸柳参差。袅袅金丝细。画阁昼眠莺唤起。烟光媚。燕燕双高，引愁人如醉。慵缓步，眉敛金铺倚。嘉景易失，懊恼韶光改。花空委。忍厌厌地。施朱粉，临鸾鉴，腻香销减摧桃李。

独自个凝睇。暮云暗、遥山翠。天色无情。四远低垂淡如水。离恨托、征鸿寄。旋娇波、暗落相思泪。妆如洗。向高楼、日日春风里。悔凭阑、芳草人千里。

## 关注

### 桂华明

缥缈神京开洞府。遇广寒宫女。问我双鬟梁溪舞。还记得、当时否。

碧玉词章教仙侣。为按歌宫羽。皓月满窗人何处。声永断、瑶台路。

### 水调歌头

吾乡陆永仲，博学高才。自其少时，有声场屋，今栖白鹿洞下，绝荤酒，屏世事，自放尘埃之外。行将六十，而有婴儿之色，非得道者能如是乎。

凤舞龙蟠处，玉室与金堂。平生想望真境，依约在何方。谁信许君丹灶，便与吴君遗剑，只在洞天傍。若要安心地，便是远名场。

几年来，开林麓，建山房。安眠饱馆清坐，无事可思量。洗尽人间忧患，看尽仙家风月，和气满清扬。一笑尘埃外，云水远相忘。

### 剔银灯

小院烟凉雨细。正好恹恹春睡。暮被金

枝 连推绣枕 ,报道皇都书至。良人得意。集  
英殿、首攀仙桂。

斗帐重襟惊起。斜倚屏山偷喜。宝髻慵  
梳 ,香笺折破 ,果见中、高高名第。秦楼十二。  
知他向、谁家沈醉。

### 太平乐

玄衣仙子从双鬟。缓节长歌一解颜。满  
引铜盆效鲸吸 ,低徊舞袖作弓弯。

舞留月殿春风冷 ,乐奏钧天晓梦还。行听  
新声太平乐 ,犹留五拍到人间。

## 管鉴

### 念奴娇

癸巳重九 ,同陈汉卿、张叔信、王任道登金石台作  
登高作赋 ,叹老来笔力 ,都非年少。古观  
重游秋色里 ,冷怯西风吹帽。千里江山 ,一时  
人物 ,迥出尘埃表。危阑同凭 ,皎然玉树相照。

惆怅紫菊红萸 ,年年簪发、应笑人空老。  
北阙西江君赐远 ,难得一枝来到。莫话升沈 ,  
且乘闲暇 ,赢得清尊倒。饮酣归暮 ,浩歌声振  
林杪。

又

夷陵九日忆去岁金石之游 ,用旧韵寄汉卿、叔信。  
盖尝归饮任道家 ,故有徐娘及悲欢之句

楚山万叠 ,怅高情、不比当年嵩少。官况  
全如秋淡薄 ,枉却尘侵乌帽。菊蕊犹青 ,茱萸  
未紫 ,节意凭谁表。故园何处 ,暮云低尽残照。

追念往昔佳辰 ,尊前绝唱 ,未觉徐娘老。  
聚散悲欢回首异 ,今岁古台谁到。藉甚声名 ,  
难忘风味 ,何日重倾倒。交情好在 ,雁书频寄  
云杪。

又

丙申十二月六日赏梅 ,闻岑守得祠、下政将 ,代归

有日 喜见于辞

寒梢冰破 ,问何人远寄、江南春色。似是  
天怜为客久 ,报我春归消息。茅舍疏篱 ,故园  
开处 ,两岁关山隔。天涯重见 ,向人风味如昔。

谁念月底风前 ,当时青鬓、渐与花颜白。  
不恨一番花阴早 ,恨把年华虚掷。嚼蕊含香 ,  
攀条觅句 ,拚醉禁愁得。酒醒还是 ,梦魂数遍  
归驿。

又

移节岭表 ,宋子渊置酒后堂饯别 ,出词付二姬歌  
以侑觞 ,席间和

两鬟娇小 ,向尊前、未省修蛾攒碧。唱得  
主人英妙句 ,气压三江七泽。病怯遐征 ,老添  
离抱 ,我是愁堆积。故园归梦 ,等闲吹堕南国。

况是耐久交情 ,经年方幸 ,接从容辞色。  
告别匆匆聊共醉 ,惜此分阴如壁。锦瑟华堂 ,  
明朝回望 ,暮霭迷空隙。相思何处 ,风林月挂  
纤魄。

## 水龙吟

携家游甘泉寺 ,歌坡仙“小舟横截春江”之词 ,用  
韵。壮观、通幽、吸江 ,皆亭名

小舟横截西江 ,晓来风静无尘起。霜余日  
暖 ,东君见效 ,梅梢春醉。壮观亭高 ,通幽径  
远 ,吸江临水。任全抛簿领 ,携家访古 ,清泉  
畔、疏阴里。

楚蜀江山分处 ,望神京、三千余里。才高  
命偶 ,功名休羨 ,纷纷余子 ,强健身心 ,团栾尊  
酒 ,此游须记。便他年富贵 ,园林钟鼓 ,只如今

是。

又 夷陵雪作

晓来密雪如筛 ,望中莹彻还如洗。梅花过了 ,东风未放 ,满城桃李。碎翦琼英 ,高林低树 ,巧装匀缀。更江山秀发 ,田畴清润 ,满眼是、丰年意。

谁念危楼独倚。共飘零、茫茫天外。毫端句涩 ,杯中酒减 ,欢情难寄。天为凄凉 ,暂时遮尽 ,黄茅白苇。但神州目断 ,珠宫玉阙 ,缈三千里。

水调歌头 同张子仪诸公泛舟北渚 ,席间用子仪韵

平生五湖兴 ,梦想白苹洲。只今何处 ,卷帘波影漾风钩。况值晚天新霁 ,菱叶荷花如拭 ,香翠拥行舟。却为湖山好 ,牵思绕皇州。

柳边堤 ,竹里阁 ,旧曾游。恍然重到 ,不知身世此淹留。且对碧梧修竹 ,领略好风凉月 ,大白与重浮。欲和凌云赋 ,佳思苦难酬。

又

后十日 ,子仪相招游仓司后圃 ,舣舟堤岸 ,醉中再赋

凉意在何许 ,高柳荫汀洲。移船藕花深处 ,待得月如钩。一抹晚山残照 ,十顷醉红香绿 ,百桡列琼舟。浩歌激苍莽 ,豪气溢神州。

泛芙蓉 ,依绿水 ,并英游。明年此会 ,可怜独是贾胡留。赖有瀛洲仙子 ,少驻云霄高步 ,相与慰沈浮。富贵倘来尔 ,有酒且相酬。

又

同子仪、韦之登舟青阁，用韦之韵

秋色浩无际，风露洗晴空。登临江山胜处，楼倚最高峰。好是夕阳低后，四野暮云齐敛，遮尽远山重。城郭参差里，烟树有无中。

坐间客，才论斗，气如虹。挥毫万字，举双白眼送飞鸿。莫问梅仙丹灶，休觅山灵蕙帐，追忆采芝翁。便草凌云赋，归奏大明宫。

又

龙守沈商卿，三十年故交也，经过，为留五日。临行，以词为别，次韵以谢

一雨洗烦溽，天气爽如秋。江山佳处，眼明重见旧交游。去国三千余里，俯视朝宗一水，共笑此生浮。幸我扁舟具，归欲问菟裘。

叹君才，方进用，岂容休。銮坡凤沼，情知不为蜀人留。便恐升沈各异，后日相逢无处，别语易成愁。记取平安使，时访荻花洲。

又 大雪登望京楼

南雪不到地，今雪瑞非常。堆檐平砌，晚来风定转飞扬。浩荡乾坤无际，洗尽蛮烟瘴雾，和气遍遐荒。满眼丰年意，民共乐时康。

倚琼楼，临玉树，举瑶觞。高吟低唱，从他减尽少年狂。且趁明年春好，整顿雨犁风箬，归去老农桑。唤起江南梦，先到水云乡。

又 夷陵九日

举俗爱重九，秋至不须悲。登临昔贤胜地，空愧主人谁。滚滚长江不尽，叠叠青山无数，千载揖高姿。况有贤宾客，同醉此佳时。

坐间菊 ,青作袂 ,玉为肌。香英泛酒 ,风流  
绝胜酌醪醑。莫话龙山高会 ,只作东篱幽想 ,  
应有故人思。北望江南路 ,回首暮云披。

又

举俗爱重九 ,我辈更钟情。良辰好景 ,赏  
心乐事古难并。正是朝廷闲暇 ,四序均调玉  
烛 ,一路庆丰登。况值循良守 ,酒与政俱成。

倚危亭 ,持玉斝 ,泛金英。风高日淡 ,一天  
秋色共澄清。指点云间岳镇 ,寿与两宫齐久 ,  
天地永成平。岁岁同民乐 ,持此报君恩。

满江红 北岩寺饯别张子仪 醉归口占

百罚深杯 ,都不记、归来时节。仿佛听、重  
城更鼓 ,催成离缺。江上愁心山敛翠 ,津头夜  
色沙如雪。渐中年、怀抱更深交 ,难为别。

歌声缓 ,行云歇。尊酒散 ,香尘灭。想来  
宵何处 ,乱山明月。得意春风群玉府 ,第名早  
晚黄金阙。但相思、莫遣雁来时 ,音书绝。

又

寄寿宋子渊 宋生朝先余一日

去岁兹辰 ,记称寿、曾陪燕席。明朝更、屈  
公扶醉 ,相过为客。间世生贤元自异 ,偶然先  
后欢连日。怅如今、五岭望三湘 ,云霄隔。

松鹤算 ,圭璋德。廊庙器 ,神仙格。想尊  
前仍唱 ,雪中晴色。公上清都调鼎鼐 ,我归旧  
隐寻泉石。愿年年、东阁燕嘉宾 ,常相忆。

又 清明前三日登清晖作

十日狂风 ,都断送、杏花红去。却是有、海

棠枝上 ,一分春住。桃叶桃根浑未觉 樱桃杨柳成轻负。强尊前、抖擞旧精神 ,谁能许。

时不再 ,欢难屡。心未老 ,杯频举。尚不妨领略 ,登临佳处。山接武陵余胜气 ,江吞大别仍东注。叹圣贤、功业与江山 ,无今古。

洞仙歌 访郑德兴郎中留饮

悠然堂上 ,山色浑如画。堂下梅花未多谢。向小亭、留客处 ,晴雪初飞 ,香四面 ,不比茅檐低亚。

绿窗帘尽卷 ,吹到眉心 ,点缀新妆称闲雅。缓歌喉、余舞态 ,云遏风回 ,须信道、欲买青春无价。任匆匆、归去酒醒时 ,镇梦绕琼梢 ,月寒清夜。

又

夜宴梁季全大卿赏牡丹作

化工妙手 ,惯与花为主。忍便摧残任风雨。翦姚黄、移魏紫 ,齐集梁园 ,春艳艳 ,何必尊前解语。

绣屏深照影 ,帘密收香 ,夜久寒生费调护。宝杯翻、银烛烂 ,客醉忘归 ,共惜此、芳菲难遇。看明年、紫禁绕莺花 ,漫相望、春风五云深处。

蓦山溪 饯沈公雅移漕江东

潜藩报政 ,玉座勤深眷。假节上青霄 ,正霜风、轻寒翦翦。天香怀袖 ,凝燕得从容 ,占喜色 ,送新声 ,潏潏金荷满。

趣装入相 ,盛事应重见。尽待苦留连 ,怕九重、兴思见晚。休文未老 ,金带称围腰 ,丹禁密 ,凤池深 ,不但长安远。

又 甲辰生日醉书示儿辈

老来生日 ,渐觉心情懒。卯酒带春醒 ,更昨来、东风已转。衰颜易改 ,不用看传神 ,欢意浅 ,酒肠慳 ,孤负深深劝。

浮云富贵 ,本自无心羨。金带便围腰 ,也应似、休文瘦减。君恩未报 ,何日赋归欤 ,三径乐 ,五湖游 ,趁取身强健。

### 蝶恋花

辛卯重九 ,余在试闈 ,闻张子仪、文元益诸公登舟青阁分韵作词。既出院 ,方见所赋 ,以‘玉山高并两峰寒’为韵 ,尚余并字 ,因为足之

楼倚云屏江泻镜。尊俎风流 ,地与人俱胜。酒力易消风力劲。归时城郭烟生暝。

幕府俊游常许并。可惜佳辰 ,独阻登临兴。妙语流传空叹咏。一时珠玉交相映。

### 定风波

张子仪将赴南宫 ,同官移会饯别。有举“耳边听唱状元声”调子仪侍儿 ,子仪命足成词 ,戏作

秋入华堂一味清。四山环碧眼双明。欲送主人天上去。无绪。一尊已带别离情。

洞府桃花常许见。□□。为谁特地惜娉婷。祇待明年春醉里。偎倚。耳边听唤状元

声。

鹧鸪天 席上赠别

杨柳梢头月未残。杏花开尽却春寒。宾  
鸿社燕寻常别，渭北江东别更难。尊欲尽，夜  
将阑。明朝马首便长安。悬知不作人间住，归  
去春风玉笋班。

又

山色初晴翠拂云。画桥流水碧粼粼。一  
尊不尽登临兴，归及西湖二月春。班缀旧，诏  
除新。稳看腾踏上星辰。回头却望尘凡处，应  
记尘凡有故人。

又 为妻寿

前日新冬举寿觞。今朝喜色又非常。一  
阳生后逢生日，日渐舒长寿更长。移晚宴，庆  
新堂。堂前高竹早梅芳。年年一为梅花醉，醉  
到千回鬓未霜。

又 宋子渊生日

富贵楼台玉琢成。更移玉节下西清。才  
高不数梅花赋，笑捻琼苞泛寿觥。莲幕静，宝  
香凝。春风和气自然生。要知他日调元手，看  
取今朝雪里情。

又 为薛子昭寿

燕寝香中锦帐郎。二年和气蔼蒸湘。鬓  
间不减当年绿，眉上新添一点黄。徵诏近，寿  
筵长。乍晴人意喜非常。燕莺休苦留春住，归

趁薰风殿阁凉。

朝中措 为文倅元益寿。元益 陈鲁公之婿

十年班缀近彤庭。一笑下霓旌。好是平分风月，新秋特地凉生。

华堂燕喜，流霞觞满，彩戏衣轻。要识他年荣贵，从来玉润冰清。

又 以海错为唐守寿

暖风帘幕卷春阴。歌吹画堂深。云袖纤纤捧玉，霞觞滟滟浮金。

佳辰恨我，空传善颂，阻缀朋簪。莫笑海滨乡味，尊前会有知音。

又 游王沅州山亭

清江绕舍竹成阴。秋日共登临。地与主人俱胜，情如酒盏方深。

故园何处，时因望眼，聊寄归心。抖擞一襟凉韵，不教簿领尘侵。

又 立夏日观酴醾作

一年春事到酴醾。何处更花开。莫趁垂杨飞絮，且随红药翻阶。

倦游老矣，肯因名宦，孤负衔杯。寄语故园桃李，明年留待归来。

柳梢青 次韵赵德庄

神仙堕谪。天为赋与，经纶才识。盖代声名，宗英惟向，翰林颂白。

黄堂一笑留客。算此处、淹留未得。且对清尊，高谈风月，厌厌今夕。

又 七夕诸公祖席

澹云微月。又是一年，新秋佳节。天上欢期，人间何事，翻成离别。

清尊欲醉还歇。怕饮散、匆匆话别。若是经年，得回相见，甘心愁绝。

好事近 张子仪席上

风扫暮云空，依旧四山环碧。珍重主人清意，放梅梢春色。靓妆清唱两无尘，莲步绣鞋窄。莫怪十分沈醉，为教人消得。

又

列炬照梅花，仰看满空春雪。翠幕沈沈天净，挂一钩新月。

微风不动暖光融，金杯堕琼屑。仿佛暗香吹梦，醉广寒宫阙。

又 为妻寿

鸳瓦晓霜浓，酒力渐消寒力。好是一堂和气，胜十分春色。

髯翁笑领彩衣郎，同祝寿千百。看取明年欢宴，更强如今日。

又

七月十八日，移具宪司，为楚观落成。潘德廊举前岁私第方毕工有湖北之召

楚观落成初，还是诏书催发。却似爱山堂上，拜新除时节。

要知君自栋梁材 ,开藩暂南越。早建明堂  
一柱 ,去扶持天阙。

### 桃源忆故人

郑德舆饯别元益 ,余亦预席。醉中诸姬索词 ,为  
赋一阙

寿芽初长香英嫩。拾翠芳洲春近。倩笑  
脸霞羞褪。真个都风韵。

垂鬟小舞么歌趁。莺语绿杨娇困。多少  
旧愁新恨。一醉浑消尽。

又

小园日别作十日狂风雨。几阵桃花红去。  
惟有绿窗朱户。春色常如许。歌声屡唤飞云  
驻。销得行人且住。倒尽玉壶春露。醉到无  
愁处。

### 菩萨蛮 德舆饯别坐间作

今日云山堂上客。明朝真个云山隔。人  
不似行云。相随长短亭。

堂空歌韵响。清切缘云上。留住莫教飞。  
怕如人别离。

浣溪沙 饯别陈汉卿于张叔信后堂 ,席上用叔信韵

金殿晨趋玉佩苍。君才久合侍龙章。花  
砖学士紫薇郎。

小试一麾行促诏 ,暂留千骑且飞觞。夜堂

歌暖借春光。

又

秣李花开雪满空。缟裙香袂俨春容。靓  
妆一笑喜相逢。

拟倩清歌留白日，且扶残醉殢东风。好迟  
留处却匆匆。

又

十里狂风特地晴。天工著意送行人。负  
他桃李十分春。

杜宇已催归思乱，啼莺休惹客愁新。晚风  
溪路净无尘。

又 寿程将

小小梅花巧耐寒。曛曛晴日醉醒间。茶  
瓯金缕鹧鸪斑。

三寿作朋须共醉，一杯留客未应慳。酒肠  
如海寿如山。

醉落魄 正月二十日张园赏海棠作

春阴漠漠。海棠花底东风恶。人情不似  
春情薄。守定花枝，不放花零落。绿尊细细供  
春酌。酒醒无奈愁如昨。殷勤待与东风约。  
莫苦吹花，何似吹愁却。

又

三月十日赏酴醾，时坐客沈、赵与余将终更，花干  
复议归蜀，醉中口占

春愁无力。酴醾娇软难禁摘。风流彻骨  
香无敌。积玉团珠，明月夜同色。花时易失欢

难得。尊前半是将行客。为花一醉何须惜。  
明岁花时,何处谩相忆。

又

后两日,再拉同官,席上用前韵

寒欺酒力。一番风雨花如摘。酴醾不与  
群花敌。笑吐清香,独自殿春色。春愁惟酒消  
除得。何妨常满坐中客。因花更把光阴惜。  
莫待春归,空对花梢忆。

又

中秋前一日,饯潘德鄜于花光,用德鄜韵

碧云暮合。不教预赏中秋月。凉生楚观  
风初歇。山影沈沈,相对两奇绝。湘人怅望黄  
金节。只愁酒散仙舟发。凭谁为与姮娥说。  
明夜虽圆,空照人离别。

### 生查子

天教百媚生,赋得多情怨。背整玉搔头,  
宽了黄金钏。

情随歌意深,故故回娇眄。不是不相知,  
只为难相见。

### 虞美人 送杏花与陆仲虚

一枝繁杏千红蕊。酿笑东风里。恰如歌  
院晓妆迟。簇簇娇饶同步、出深闺。风流莲幕  
莺花主。持送花深处。花多莫便著情偏。一  
一谈匀深注、总堪怜。

又

与客赏海棠 ,忆去岁临川所赋 ,怅然有远宦之叹。  
晚过楚塞作

海棠花下春风里。曾拚千场醉。如今老去谩情多。步绕芳丛无力、奈春何。蜀乡不远长安远。相向空肠断。不如携客过西楼。却是江山如画、可消忧。

临江仙

十一月二十六日 ,雪霁 ,行武陵道中 ,江山莹彻 ,  
不类人世

昨日武陵溪上雪 ,今朝特地开晴。故留佳  
景付行人。琼田千顷熟 ,琪树万株春。

好是长松飘坠屑 ,天花时下缤纷。桃源何  
处更寻真。腰悬明月佩 ,直访玉华君。

又

三月更当三十日 ,留春不住春归。问春还  
有再来时。腊前梅蕊破 ,相见未为迟。

不似人生无定据 ,匆匆聚散难期。水遥山  
远谩相思。情知难舍弃 ,何似莫分飞。

清平乐

未春先暖。天与梅花便。点检枝头开已  
遍。一一檀心粉面。

巡檐索笑题诗。老怀不似当时。犹有惜  
花心在 ,等闲羌管休吹。

点绛唇 拉同官赏海棠

酒困诗慵 ,一春拚被花枝恼。艳妆浓笑。  
那更花中好。

不著清尊 ,持底宽愁抱。须颠倒。晚风如  
扫。忍见枝头少。

又

去岁今朝 ,海棠桃杏开都遍。今年花晚。  
不恨春情浅。

旋旋花开 ,图得春长远。且留恋。爱花心  
眼。常与花为伴。

酒泉子

唐德兴为海棠赋酒泉子词 ,而尊前无能歌者 ,即  
席用韵

春色十分。付与海棠枝上满。清尊我亦  
十分倾。未忘情。

阳春一曲唤愁醒。可惜无人歌此曲 ,须君  
别院恼春醒。绕梁声。

又

清夜将分。有酒为谁花下满 ,相逢轩盖暂  
时倾。故人情。

海棠欲睡照教醒。烛影花光浑似锦 ,伴君  
佳句解人醒。恨无声。

青玉案 永春夜宴张叔信后堂 ,席上用韵

相逢何处梅花好。深院宇、笙歌绕。春入侯门长不老。罗帏绣幕 ,护香藏粉 ,却许行人到。

遏云清唱倾城笑。玉面花光互相照。银烛频更尊屡倒。明年应是 ,对花相忆 ,君已班清要。

阮郎归 以红酒为马倅寿

浅寒天气雨催冬。梅梢糝嫩红。天教来寿黑头公。和羹信已通。

斟滟滟 ,劝重重。新篘琥珀浓。他年赐酒拆黄封。还思此会同。

木兰花 唐守生日

乱花飞絮。却是一年春好处。留住韶光。共醉蓬莱日月长。

翻阶红药。天上东风传近约。绿遍庭槐。看取除书一并来。

西江月

夜雨落花满地 ,晓风飞絮连天。苦无春恨可萦牵。只数年华暗换。

生意惟添白发 ,化工不染朱颜。老来愈觉

欠清闲。梦想故园春晚。

又 为细君寿

好个今年生日 ,满堂儿女团栾。歌声不似  
笑声喧。满捧金杯争劝。

富贵功名任运 ,佳辰乐事随缘。白头相守  
愿年年。只恁尊前长健。

### 鹊桥仙

中秋重九 ,等闲虚过 ,多病全疏酒盏。初  
寒时候试新醅 ,正好为、霜螯持满。诗情未减 ,  
酒肠宽在 ,且趁尊前强健。百年三万六千场 ,  
试屈指、如今过半。

又

重九前一日游向氏江东二园

东皋圃隐 ,木犀开后 ,香遍江东十里。因  
香招我渡江来 ,悄不记、重阳青蕊。人生行乐 ,  
宦游佳处 ,闲健莫辞清醉。不寒不暖不阴晴 ,  
正是好登临天气。

### 鹊桥仙 八月二十八日寿唐子才

中秋过了 ,重阳将近 ,正是一年佳处。枵  
黄橘绿总寻常 ,看丹桂、余香再吐。胸中星斗 ,  
笔端风雨 ,定约蟾宫高步。赐袍归带御炉薰 ,  
共岁岁、斑衣戏舞。

南乡子 张子仪席上作

檐外雪纷纷。雾阁云窗气自温。谩道使  
台霜样峻,情亲。引到壶中别有春。尊酒负殷  
勤。病减杯中量几分。十五年间无限事,休  
论。说与梅花解笑人。

玉连环 泊英州钟石铺

江上青山无数。绿阴深处。夕阳犹在系  
扁舟,为佳景、留人住。

已办一蓑归去。江南烟雨。有情鸥鹭莫  
惊飞,便相约、长为侣。

郭 □ □

菩萨蛮

卖饧天气箫声软。午院水沈烟未断。睡  
起补残眉。红绵入镜迟。

霎时开笑靥。花上看双蝶。新月上帘钩。  
相思不断头。

## 郭 居 安

### 声声慢 寿贾师宪

捷书连昼，甘洒通宵，新来喜沁尧眉。  
许大担当，人间佛力须弥。年年八月八日，  
长记他、三月三时。平生事，想祇和天语，  
不遣人知。

一片闲心鹤外，被乾坤系定，虹玉腰围。  
阊阖云边，西风万籁吹齐。归舟更归何处，  
是天教、家在苏堤。千千岁，比周公、多个  
彩衣。

### 木兰花慢 寿贾秋壑母两国胡夫人

听都人共语，又还是、岁逢庚。记金帖  
频催，袞衣将至，绣幌先迎。笙歌六宫齐奏，  
到而今、犹唱贺升平。千岁人间福本，天公  
著意看承。

秋深。帘卷空明。问西子、最宜晴。喜  
新来多暇，玉醪龙炙，菊院花城，明年耳孙  
头上，更君王、亲点泥金。兜率摩耶住世，  
长看佛度众生。

郭 诩

河 传 咏甘草

大官无闷。刚被傍人、竟来相问。又难  
为□□敷陈。且祇将、甘草论。

朴消大戟并银粉。疏风紧。甘草闲相混。  
及至下来，转杀他人。尔甘草、有一分。

## 郭生

### 玉楼春 游寒溪改乐天诗

乌啼雀噪昏乔木。清明寒食谁家哭。风吹旷野纸钱飞，古墓累累春草绿。棠梨花映白杨路。尽是死生离别处。冥漠重泉哭不闻，萧萧暮雨人归去。

## 郭世模

### 瑞鹧鸪 席上

倾城一笑得人留。舞罢娇娥敛黛愁。明月宝鞮金络臂，翠琼花珥碧搔头。

晴云片雪腰支袅，晚吹微波眼色秋。清露亭皋草绿，轻绡软挂玉帘钩。

### 瑞鹤仙

云阶连月地。记旧游、身在温柔乡里。花阴透窗绮。罗衾拥残梦，流莺惊起。银瓶水沸。待梳妆、屏风共倚。看情眉恨眼，宿粉剩香，乱愁无际。

长记。多情消减，宋玉连墙，茂陵同里。离怀似水。天涯路，叹愁悴。想鸳机织锦，鸾台窥镜，秦丝幽怨未已。好归去、共把琴书，倚娇扶醉。

### 朝中措

青灯听雨夜荒凉。旧梦苦难长。坐想玉奁鸳锦，空余臂粉衣香。

枕边共语 ,窗前执手 ,帘外啼妆。也是平生薄幸 ,须还几度思量。

### 南歌子

玉盏浮琼蚁 ,金奁吐翠虬。醉乡归路接温柔。暗卜幽期低约、笑藏阄。

索去眉先锁 ,将言泪已流。小窗移火更迟留。自剔灯花油灺、玉搔头。

### 念奴娇

光风转蕙 ,泛崇兰、漠漠满城飞絮。金谷楼危山共远 ,几点亭亭烟树。枝上残花 ,胭脂满地 ,乱落如红雨。青春将暮。玉箫声在何处。

无端天与娉婷 ,帘钩鹦鹉 ,梦断闻残语。玉骨瘦来无一把 ,手挹罗衣看取。江北江南 ,灵均去后 ,谁采苹花与。香销云散 ,断魂分付潮去。

### 浣溪沙

几点胭脂印指红。一双蛾绿敛眉浓。夜寒绡帐烛花融。

剩炷龙涎熏骨冷 ,旋调银液镇心忪。整鬟羞顾半娇慵。

## 郭祥正

### 醉翁操 效东坡

予甥法真禅师以子瞻内相所作醉翁操见寄。予以为未工也，倚其声作之，写呈法真，知可意否。谢山醉吟先生书。

冷冷潺潺。寒泉。泻云间。如弹。醉翁洗心逃区寰。自期猿鹤俱闲。情未阑。日暮造深原。异芳谁与攀。忘还。

琼楼玉阙，归去何年。遗风馀思，犹有猿吟鹤怨。花落溪边。萧然。莺语林中清圆。空山。春又残。客怀文章仙。度曲响涓涓。清商回徵星斗寒。

## 郭新

### 渔父

山光清 ,水色绿。春风澹荡看不足。草绵  
芊 ,花扑簌。渔艇移歌相续。信浮沈 ,无拘束。  
钓回乘月归湾曲。酒盈樽 ,云满屋。不见世间  
荣辱。

## 郭应祥

### 万年欢 瑞庆节

佳气葱葱，望长安日下，鸾鹤翔舞。天祐皇家，当年挺生真主。令节标名瑞庆，曾未数、电枢虹渚。人都道，福若高宗，太平赛过仁祖。

需云燕锡广宇。有霓旌绛节，西极金母。笑捧蟠桃，更酌九霞清醕。持向两宫三殿，愿岁岁、此觞同举。南山寿、海算沙量，定应高出前古。

### 菩萨蛮 喜雪

当年瑞雪多盈尺。今年仅有些儿白。天欲兆丰年。须教趁腊前。

南枝初破萼。风味浑如昨。快与泻银瓶。寒醅醉易醒。

### 又 施尉生日

开禧三月初逢九。持杯来庆梅仙寿。警捕恰三年。四封人宴然。

政成应不日。去作朝京客。阴德合长生。

休看三住铭。

又 立春日

雪销未久寒犹力。霜华特地催晴色。残腊尚余旬。隔年先见春。

独怜霜点鬓。羞戴银幡胜。百里却熙然。今年强去年。

又 同僚友泛舟作

泉江三遇昌阳节。棹歌还向中流发。急桨更轻桡。看谁夺得标。

明年归紫淦。尚忆舟同泛。应有旧双鬟。能讴菩萨蛮。

又 六月十三日，同官携具，以予被荐

转头又是清秋近。晚风淅淅凉犹嫩。多谢客携觞。空惭画饼章。

中亭明月可。未要亲灯火。十阅望舒圆。归期在眼前。

又 丁卯寿李嗣宗

去年持酒为君寿。劝君快上悬车奏。通籍已金闺。腰银袍亦绯。

壶中闲日月。自有长生诀。父子弟兄贤。一门行地仙。

又 去岁寿李嗣立

诞辰迟似秋三日。草堂已有新凉入。鬓绿未全霜。欣然把一觞。

吟松新纳禄。共享清闲福。两个老人星。君家难弟兄。

又

牡丹已过酴醾谢。那堪风雨连朝夜。底事最堪悲。春归人未归。

春宜留取住。人却推将去。早晚遂江滨。欢然夸尹新。

又 丁卯八月九日鹏飞集作

秋堂积雨新凉入。今宵雅趁鹏飞集。劲翮会高风。功名欬唾中。

笔头元有准。快写平生蕴。何日捷书来。重阳把一杯。

又 三月六日静胜小集

去年今日游稽古。斓斑曾著莱衣舞。四世共团栾。津然一笑欢。

归期今不远。孥累俱先遣。犹有社中人。相从寂寞滨。

又 钱太夫人之南丰

修途六月清无暑。潘舆稳向盱南去。喜气已津津。平反一笑春。

人言阴德报。罗纸重重诰。明岁早归来。泉江去鹤催。

又 邹伯源园木犀 次彭孚先韵

涂黄仙子娇无力。秋花不敢争颜色。风物一番新。从今到小春。

新词仍险韵。赍续惭非称。桃李寂无言。此花名独传。

又

县斋木犀今年殊未开，而盆菊特茂盛，以晦日

约客

未观岩桂先观菊。世间底事真迟速。节物苦相催。重阳便到来。

白衣何处觅。沽酒邀佳客。一笑有馀欢。官居终日闲。

又 送太夫人就养南安

佳辰昨日传筒黍。今朝重把离觞举。别驾奉安舆。前呵方塞途。

庞眉真寿相。两处交迎养。庾岭到星沙。风光属一家。

又 戊辰重阳

分宜七里逢重九。篱根无菊尊无酒。萧飒鬓如蓬。不禁吹帽风。

插花开口笑。未分输年少。明岁定王台。传杯不放杯。

渔家傲 丁卯生日自作

去岁簿书丛里过。生朝也有人来贺。随分侑尊呼几个。胡厮和。愁颜镇日何曾破。

素发如今添老大。归来方是闲当座。旋擘黄柑篋白堕。哩唵罗。从他扰扰如旋磨。

又 用履斋韵赠邵惜惜

自古余杭多俊俏。风流不独夸苏小。又见尊前人窈窕。花枝袅。贪看忘却朱颜老。

曲巷横街深更杳。追欢买笑须年少。悔不从前相识早。心灰了。逢场落得掀髯笑。

## 传言玉女

五月四日孙金判四昆仲携具稽古堂观竞渡有作  
稽古堂前，恰见四番端午又来江上，听  
鸣鼉急鼓。棹歌才发。漠漠一川烟雨。轻舟  
摇飏，浪心掀舞。

倦客今年续命，欠□彩缕。归期渐近，  
划地萦心绪。何日斑衣，更看迎门儿女。百  
怀且付，尊前蒲黍。

鹧鸪天 次孚先韵，重阳前两日无尽藏作

依约滩声杂橹声。波光隐映月华明。眼  
前好景真无尽，身外浮名尽可轻。

穷胜赏，续欢盟。直饶风雨也须晴。满  
头插菊掀髯笑，笑道齐山浪得名。

又 癸亥十一月十四日为内子寿

爱日迎长月向圆。当年飞堕蕊珠仙。相  
门赫奕人争羨，阃则柔嘉世所贤。

罗纸贵，彩衣鲜。鼎来盛事乐无边。妇  
姑夫妇孙和子，同住人间五百年。

又 甲子重阳

谁道他乡异故乡。泉江风物似湄湘。钗  
头缀糝萸偏紫，杯面浮金菊倍黄。

今共古，几重阳。休将往事更平章。舞  
衫歌扇姑随分，又得掀髯笑一场。

又

风雨潇潇旧满城。今年九日十分晴。且

同北海邀佳客，共向东篱看落英。

罗绮队，管弦声。银山高处好同登。催租岂解妨诗兴，自是潘郎句未成。

又 甲子十一月十四日寿内子

鸾诰双双妇与姑。家尊荣宦到中都。暂时花县飞凫舄，新看芝庭捧鹤书。

梅欲放，柳将舒。诞辰先占一阳初。清心堂下围红处，剩有长生酒满壶。

又 遁斋自作生日

垂领纷纷已二毛。可堪州县尚徒劳。催科自笑阳城拙，勇退应惭靖节高。

来祝寿，笑儿曹。说椿说柏说蟠桃。世间底事非前定，妙理还须问浊醪。

又 宴王园作

休道泉江寂寞滨。喧喧歌吹偏城闉。莫辞邀赏连三日，且庆开禧第一春。

呼小队，领嘉宾。王园佳处踏芳尘。星球不用随归骑，自有山头月逐人。

又 乙丑八月十八日寿太孺人

人道今年秋较迟。木犀全未放些儿。不因诞节开千岁，争得今辰把一枝。

呼宝鼎，伴渠伊。堂萱喜色正融怡。儿前妇后孙曾从，岁岁称觞无尽期。

又 中秋后一夕宴修成之、富正甫作

万里澄空没点云。素娥依旧驾冰轮。自缘人意看承别，未必清辉减一分。

倾白堕，拥红裙。不知谁主复谁宾。更

筹易促愁分袂，又作东西南北人。

又 乙丑岁寿内子

怪得欢声满十龙。诞辰和气敌严冬。安书莲幕欣频到，庆事花城喜屡逢。

琼液泛，宝熏浓。华堂交口祝椿松。阿姑同健夫偕老，会有重重锦诰封。

又 丙寅元夕

动地欢声遍十龙。元宵真赏与民同。春归莲焰参差里，人在蓬壶快乐中。

乘皓月，逐和风。凉舆归去莫匆匆。班春休道无千炬，也有星球数点红。

又 寿徐主簿

前数重阳后小春。中间十日是生辰。二年稳作栖鸾客，百里谁非贺燕人。

无一事，扰天真。年登八八愈精神。句稽宜解淹贤辙，黄发犹须上要津。

又 季功旬会之次日小醮饯陈巡入乡

点检尊前主与宾。今宵依旧昨宵人。自缘笑语生和气，不为风光属小春。

瓊醞，酒清醇。山肴野蔌总前陈。掀髯抵掌君休怪，镜里星星白发新。

又 丙寅岁寿内子

贺了生辰却贺冬。今年乐事又重重。寿香喷处芝兰馥，寿酒斟时琥珀浓。

偕桂隐，到花封。迎长介寿恰三逢。明年此日称觞罢，稳上肩舆九里松。

又 丁卯岁寿太夫人

诞节初开七帙祥。今秋仍喜十分凉。称觞堂下孙和息，备福人间寿且康。

从庾岭，到章江。两州元自接封疆。儿曹此去分风月，莱彩潘舆乐未央。

又 戊辰正月十一日寿八兄

瓶里梅花香正浓。阶前更著锦熏笼。且留幡胜明朝戴，共庆桑蓬此日逢。

眉镇绿，脸长红。后堂无日不春风。明年定又强今岁，会有明珠入掌中。

又 戊辰七夕

令节标名自古闻。今宵银汉耿无云。难寻海上乘槎客，空诵河东乞巧文。

罗异果，炷名熏。纫针捻线漫纷纷。蓬莱底事回车处，暗想当年钿合分。

又

梦符置酒於野堂，出家姬歌自制词以侑觞，次韵

我离浏川七载强。去思那有召公棠。方怀旧友归鸿阁，忽枉高轩戏彩堂。

频举白，剩添香。剧谈不觉引杯长。官居也有城门禁，未到三更尽不妨。

又 戊辰生日自作

古遂长沙千里遥。三年三处做生朝。试拈疏蕊铜瓶插，更把轻沈宝鼎烧。

杯绿泛，脸红潮。抱孙娱膝语声娇。官居只似私居样，管取寒松最后雕。

又 丁卯岁寿内子

方是闲堂寿宴开。今回生日胜前回。慈  
闾斑貌看看到，别驾除书鼎鼎来。

纷彩服，滟金杯。缓歌慢舞不须催。明  
年此际称觞罢，醉向裴亭与定台。

西江月 七夕后一日县斋小集

巧节已成昨梦，今宵重倒芳尊。主宾和  
气敌春温。雄辩高谈袞袞。

剩把烛花高照，频教舞袖轻翻。笛声幽  
咽鼓声喧。却恨更筹苦短。

又 鹏飞集作

锁棘方当拔士，挥毫正好摛文。词源三  
峡笔千军。尽出平生素蕴。

天府伫登名姓，夜窗不负辛勤。直须平  
步上青云。始信文章有准。

又

十桂胜如五柳，九秋赛过三春。蓬蓬金  
粟吐奇芬。自有天然风韵。

休羨一枝高折，尽教十里遥闻。尊前若  
有似花人。乞与些儿插鬓。

又

乙丑中秋前二日，约李季功、孙仲远、李茂叔、  
郭元择预赏月。申刻雨大作，酉刻已开霁，三更月  
出。

赏月几成喜雨，开尊仍间围棋。令人却  
忆敬斋词。小饮不妨文字。

底事冰轮未放，犹教银幕低垂。休言动是隔年期。闰八看看又至。

又

遁斋生日，有以喜神之轴来为寿者，悬之照壁，遂作

此老谁描拙状，今朝持献生辰。一人能变作三人。说与儿曹未信。

坐者行者立者，化身报身法身。且须辨取假和真。肥瘦短长休问。

又 寿李知丞

明日恰当人日，今年远胜常年。瓣香卮酒寿蓝田，喜色津然满面。

及戍人方竞进，悬车公独高骞。身闲便是地行仙。赢得千秋强健。

又 戊辰七月十日作

令节无过七夕，今年已隔三宵。奔驰五百里而遥。行止非人所料。

月入尊罍楚楚，风生襟袖飘飘。不须抵死殢河桥。对月临风一笑。

又 席间次潘文叔韵

妙句春云多态，丰姿秋水为神。慕潘应有捧心颦。谁是相看楚润。

试问甜言软语，何如大醉高吟。杯行若怕十分深。人道对花不饮。

又

洗眼重看十桂，转头已过三秋。人生遇坎与乘流。何况有花有酒。

花若於人有意，酒能为我浇愁。试挹金蕊泛金瓯。比似菊英胜否。

又 赋木犀次李季功韵

碎影乱筛月地，浓香时度风檐。渊明有菊径开三。不似此花雅淡。

兰蕙芬敷可并，芙蓉浅俗堪嫌。美人妆罢笑窥帘。插鬓些儿正欠。

又 次彭天若元夕观灯之韵

歌扇潜回暖吹，酒兵顿解寒围。红莲绛蜡两交辉。小醉何妨大醉。

落笔君如王勃，属辞我愧周墀。明年应记盍簪时。耿耿怀人不寐。

又 天祐遣饷牡丹，侑以新词，次韵为谢

为爱脸边著晕，更怜肌里生香。此花端合占年芳。两朵那堪一样。

自叹思归陶令，忽逢好事彭郎。朋来异卉与名章。击节何妨叹赏。

又 赋紫笑花

不但醪醑芍药，此花亦殿馀春。麝囊初破酒初醺。恰有这般风韵。

烂坼真成绝倒，半开犹带轻颦。不知抵死笑何人。待与折来细问。

又 寿韩宰

乐事无过新岁，生辰恰占元宵。湄湘台下有欢谣。令尹风流年少。

暂借牛刀鳧鳧，宜参豹尾鸡翘。政成三异合归朝。拭目天边紫诏。

又 庆太夫人七十

头上银幡初卸，堂前玉斝重飞。人言七十古来稀。七十如今已至。

斑白元无一点，微黄已透双眉。一番庆寿十年期。更庆十番不啻。

又 戊辰八月一日寿赵丞，其日社

朔旦生朝同贺，寿觞社瓮齐倾。湄湘元是小东京。著个风流贰令。

地胜岂如人胜，秋清争似官清。双瞳炯炯鬓青青。稳上华途捷径。

又 韩享道席上次方孚若韵

送我匆匆行色，赖君袞袞名章。德星今夜聚清湘。岂羨瀛洲方丈。

宾醉须教主醉，更长不怕杯长。凤鸣端合在朝阳。飞诏来从天上。

昭君怨 醉别小妓丽华

歌舞籍中第一。情致人间第一。年纪不多儿。尽娇痴。

昨夜华严阁下。今夜海棠洞下。多少别离情。泪盈盈。

又

乙丑九日前二日偕元择、茂叔、季功登高作

去岁银山塔上。今岁金山塔上。屈指到泉江。再重阳。

有菊不妨同戴。有酒不妨同醉。嘉客与

佳宾。两俱新。

### 玉楼春

匆匆相遇匆匆去。恰似当初元未遇。生憎黄土岭头尘，强学章台街里絮。

雨荒三径云迷路。总是离人堪恨处。从今对酒与当歌，空惹离情千万绪。

又 丁卯四月二十三日书考会作

贤僚益友俱亲密。真个三年如一日。清尊到处笑喧哗，彩笔吟馀才俊逸。

杯盘狼藉情真率。歌管棋枰仍间出。今朝又喜盍朋簪，何日定当抛县绂。

### 鹊桥仙 甲子七夕

金风淅淅，银河耿耿，七夕如今又至。人间唤作隔年期，但只似、屈伸指臂。

罗花列果，拈针弄线，等是纷纷儿戏。巧人自少拙人多，那牛女、何曾管你。

又 甲子中秋

金飙乍歇，冰轮欲上，万里秋空如扫。一年十二度团圆，甚恰限、今宵最好。

烹麟脍凤，幕天席地，争似杯盘草草。明年应更胜今年，但只恐、朱颜暗老。

又 □□立春

泥牛击罢，银幡卸了，又是一番春至。有人耳畔语低低，道宜入、新年吉利。

堆盘红缕，浮杯绿蚁，自有及时风味。  
从今日日是东风，待拚了、偎红倚翠。

又 乙丑七夕

薄云笼月，轻飙却暑，天上人间佳节。  
银河自有鹊为桥，又那要、兰舟桂楫。

后期可准，新欢如昨，选甚轻离易别。  
姮娥休要妒人呵，待更与、留连一霎。

又 周监旬会止作

六人欢笑，六姬讴唱，六博时分胜负。  
六家盘饌斗芳鲜，恰两月、六番相聚。

特排整整，华筵楚楚，终是不如草具。  
赏心乐事四时同，又管甚、落花飞絮。

又 旬会作

六丁文焰，六韬武略，那更六经心醉。  
六人相对座生风，继六逸、当年旧事。

六州清唱，六么妙舞，执乐仍呼六妓。  
大家且饮六分觥，看宾主、迭居六位。

又 雨中赏酴醾，次周监税韵

杯盘草草，园亭小小，不用罗帷锦幄。  
酴醾本是殿馀春，更风雨、无端趲却。

有词可和，有棋可赌，杂以诙谐戏谑。  
闲时日日可遨嬉，又选甚，花开花落。

又 五月四日仲远浴儿

去年七夕，今年五日，两见浴儿高会。  
乃翁种德已多年，看袞袞、公侯未艾。

封胡羯末，综维缜绉，堪羨金鱼垂袋。  
丹砂白蜜不须涂，把续命、彩丝与带。

又 丙寅七夕

两情相向，一年厮睚，等得佳期又到。  
休言夜半悄无人，那喜鹊、也须知道。

来今往古，吟诗度曲，总漫萦牵怀抱。  
不如乞取巧些些，待见了、分明祷告。

又 丙寅除夕立春，骨肉团聚，是夕大雪

立春除夕，并为一日，此事今年创见。  
席间三世共团栾，随分有、笙歌满院。

一名喜雪，二名钱岁，三则是名春宴。  
从教一岁大家添，但只要、明年强健。

又 丁卯七夕

今年七夕，新秋三日，已觉凉生院宇。  
吾乡风物胜他乡，那更著、莱衣起舞。

泛槎经岁，分钗半夜，往事流传千古，  
独怜词客与诗人，费多少、闲言泼语。

浣溪沙 次李茂叔韵

仙子凌波袜有尘。翰林摛藻笔如神。此  
花此曲两无伦。

不与妆台簪宝髻，却来书阁伴幽人。恨  
无佳客只空尊。

又 嗣立置酒稽古，令予坐东

屈指中秋一日期。雨馀云薄月来迟。冰  
轮犹自欠些儿。

世事孰非颠倒相，客居东位主人西。觴  
行莫惜醉如泥。

又

树底全无一点红。今年春事又成空。不须追恨雨和风。

欲去未来多恶况，独眠无寐少欢惊。一声啼鹄五更钟。

又 赠陈惜惜、怜怜

尊俎之间著二陈。津津眉宇笑生春。清歌妙舞两无伦。

叔隗轻盈饶态度，小乔妩媚足精神。风流总属一家人。

好事近 丙寅重阳

今日十分晴，好个重阳天气。又向银山高处，为黄花一醉。

泉江风物饱相谕，瞥眼过三岁。但得明年强健，任举杯何地。

又 丁卯元夕

今岁度元宵，随分点些灯火。不比旧家繁盛，有红莲千朵。

客来草草办杯盘，餠钉杂蔬果。休羨暗尘随马，与银花铁锁。

又 家人生日

今岁庆生朝，迟似迎长十日。试向彩衣堂下，听欢声洋溢。

小孙能笑长能歌，已自堪娱膝。管取婆犹未老，见满床堆笏。

满江红 次贾子济韵

节物匆匆，又还见、浓春入眼。那更是、晓风初扇，宿云都卷。蝶舞已便花蕊乱，燕归仍惬香泥暖。又何须、女手学春工，并刀剪。

欢乐事，郊垌遍。游赏处，轮蹄远。听谁家弦管，日开华宴。有客携毫多丽句，惭予拆袜无长线。问新来、诗酒顿然疏，怎消遣。

又 次子云弟韵

五十头颅，早已觉、飞腾景暮。愁眼看、蜂黄蝶粉，草烟花露。莫做阳台云雨梦，休怀渭北春天树。怅城闉、多少踏青人，红尘路。

怀古恨，凭书诉。倾国貌，障羞妒。记山阴陈迹，群贤星聚。对景裁诗真漫与，看花不饮成虚负。问落红，千点总随流，归何处。

又 寿韩思机

七帙华年，这强健、人谁得似。还又见，设弧令旦，秋风生桂。教子已成森砌玉，弄孙仍得追风骥。更后堂、深处著婣娟，笙歌沸。香爇篆，杯浮蚁。欢意洽，酡颜醉。有静中日月，闲中天地。不必亲扶灵寿杖，何须远挹浮丘袂。看蟠桃、著子又开花，三千岁。

念奴娇 次贾子济韵

琼苞玉屑，问天公、底事乱抛轻坠。城郭山川都一样，那得个般清气。谢女才情，如何只道，柳絮因风起。比梅差可，但无绿萼红蕊。

坐上十客雄豪，颓然一老，草具相邀致。驱尽寒威凭酒力，买笑千金须费。谁办佳词，洛阳年少，笔下生新意。待添几盏，共君今夕同醉。

虞美人 送张监税

二年浏水司征榷。小却平戎略。征衫指日去朝京。恰恰一江新绿、可扬舲。

诗工画妙俱臻极。到处留真迹。一尊莫惜暂停桡。不待离歌唱彻、已魂消。

又 茂叔、季功置酒稽古堂，以瓶贮四花，因赋

梅桃未利东篱菊。着个瓶儿簇。寻常四物不同时。恰似西施二赵、太真妃。

从来李郭多投分。伯仲俱清俊。苍颜独我已成翁。尚许掀髯一笑，对西风。

又 送周监税

周郎素蕴平戎略。聊此司征榷。他人两载已辞难。君独三年、只作一朝看。

紫萸黄菊重阳后，木落秋容瘦。休斟别酒惨离裾。戚畹如今、个个有新除。

又 次沈庄可韵

天公有意留君住。故作纤纤雨。闭门觅句自持觞。并舍官梅、时有过来香。

沈郎诗骨元来瘦。更挹湘江秀。不须骂雨及嘲风。收拾个船、都入锦囊中。

醉落魄 丙寅中秋

琼楼玉宇。分明不受人间暑。寻常岂是无三五。惟有今宵，皓彩皆同普。

素娥阅尽今和古。何妨小驻听吾语。当年弄影婆娑舞。妙曲虽传，毕竟人何许。

采桑子 老人生日

中秋过了还逢社，寿我亲闱。百里熙熙。尽道平反赖母慈。

浏川水阔吾山峻，福禄如斯。禄鬓青眉。子又生孙孙又儿。

又 赠丽华

饯筵绿绕红围处，只这孩儿。两泪垂垂。不忍教人遽别离。

别离不作多时计，千日为期。却恐归时。人道寻春已较迟。

朝中措 寒食前一日陪令佐小饮县圃，席上赋

海棠零落珎花繁。春意已将阑。予告恰

当寒食，邀宾同赏芳园。

湄湘台畔，杯盘楚楚，歌舞喧喧。预约牡丹开后，更须重倒清尊。

### 卜算子

春事到清明，过了三之二。秣李夭桃委路尘，太半成泥滓。

只有海棠花，恰似杨妃醉。折向铜壶把烛看，且莫教渠睡。

又

客有惠牡丹者，其六深红，其六浅红，贮以铜瓶，置之席间，约五客以赏之，仍呼侑尊者六辈，酒半，人簪其一，恰恰无欠余。因赋

谁把洛阳花，剪送河阳县。魏紫姚黄此地无，随分红深浅。

小插向铜瓶，一段真堪羨。十二人簪十二枝，面面交相看。

减字 木兰花 寿李茂叔 仲春上七。

门左垂弧当此日。点检春光。百草千葩已斗芳。

折花持酒。彩袖殷勤来祝寿。明岁而今，稳向南宫待捷音。

又

偶然相聚。最是人间堪乐处。散步寻春。来作琴堂不速宾。

缓歌一曲。野鹭纷纷都退缩。不用多杯。

准拟花时日日来。

又 戏万安胡簿

栖鸾高士。文采风流谁得似。年德虽高。  
对酒当歌气尚豪。

明眸皓齿。一朵红莲初出水。膝上安排。  
爱惜须教不离怀。

又 用季功韵戏呈子定

遇如不遇。最是暂来还复去。归到乡关。  
欲再来时却恐难。

丁宁去后。倩雁传书须访旧。万斛羁愁。  
逐水那容许大舟。

### 柳梢青 惜花

春事匆匆。花慵柳困，雨横风狂。寄语  
诗人，须烧银烛，与照红妆。

休言桃李河阳。但过眼、难寻色香。只  
有今宵，更无明日，且缓飞觞。

又 乙丑自寿

遁斋居士。今年今日，又添一岁。鬢雪  
心灰，十分老懒，十分憔悴。

休言富贵长年，那个是、生涯活计。茗  
饮一瓯，纹楸一局，沉烟一穗。

又

薄晚才晴。相邀移席，待月中庭。环坐  
斯须，屋山高处，忽吐微明。

云收雨止风停。人世有、琼楼玉京。一

任星移，从教斗转，且缓飞觥。

又 送别陈廉州于一片潇湘

合浦名邦。风流太守，紫绶金章。暂驻旌麾，来临祖席，一片潇湘。

且须缓举离觞。细看取、眉间点黄。未到还珠，已闻赐玺，归近清光。

又

两邑大夫鞭春之集，城南主人张澧州有词，次其韵

两令邀宾。城南佳处，饯腊迎春。步入梅林，纷然缟袂，间以红英。

遥岑寸碧增明。更酬唱、无惭昔人。一笑相欢，且斟佳醕，休羨莼羹。

生查子 八月二十四日桂隐观菊，次彭孚先韵

尊前主与宾，欠一还成九。休唱木犀词，预饮黄花酒。

开怀今夕同，分手明朝又。不管岁年催，且把馨香嗅。

又 谢德操席上次卢守韵

银烛映红衫，薄幕新梳洗。一笑奉宾欢，未解东君意。

回廊月转初，忆趁良宵会。喜事在明年，剧饮拚先醉。

点绛唇 王园次施尉韵

九十韶光，闲忙晴雨常相半。赏春有愿。

乘兴宁论晚。

纵饮筠溪，日午花阴转。杯行缓。量慳嫌浅。须索斟教满。

又 祇林寺劝农

小队郊垆，耄倪争看铜章吏。来宣德意。劝相遵彝制。

夜雨连明，百谷应滋遂。真奇事。开喜元二。总是丰登岁。

又 卢守席上

五马归来，后车裁得如花女。缓歌金缕。新样京华舞。

主悦宾欢，一醉祛祥暑。停箫鼓。且须听取。三朵花能语。

又 庆江王之武子新居

甲第初成，持杯酌酒来相庆。棣华辉映。相对开三径。

小巧规模，百事都相称。年方盛。从容啸咏。不碍青云兴。

### 江城子 重阳次施尉韵

开尊拟对菊花黄。舞伊凉。掺渔阳。更有风流，妓女胜徐娘。只道难逢开口笑，争驰逐，利名场。

玉山蓝水两茫茫。采幽香。泛清觞。橙橘堆盘，犹恨未经霜。底事□□堪喜处，丰年最，冠江乡。

临江仙 庆谢操生子

忆我归舟初系岸，君家盛事先知。后房深处第三姬。熊罴符吉兆，鸞产佳儿。

袞袞庆源真未艾，谢兰还茁新枝。娇婴想见白和眉。他年贤子弟，今日小机宜。

又 丙寅生日自作

老子开年年五十，依前恁地痴顽。昨非今是有无间。惟惭新赤绂，不称旧苍颜。

休羨长年并极富，休贪宝带腰环。人生难得是清闲。急须抛县印，归去隐家山。

露天晓角 赵簿席上写目前之景

琉璃十碗。兽炭红炉暖。花下两枝银烛，和气洽、欢声满。

从他吹急管。杯行须款款。尽做更移漏转，也犹胜、春宵短。

踏莎行

鸞离风尘，燕辞门户。翩然举翮轻飞去。当初自恨探春迟，而今岂解留春住。

花不重开，萍难再聚。垂杨只管牵离绪。直饶云雨梦阳台，梦回依旧无寻处。

又 三月二十日元择旬会

骤暖忽寒，送春迎夏。金沙过了酴醿谢。

漏声款款日偏长，奇峰历历云如画。

幸有杯觞，堪同保社。棋如飞雹晴空下。  
六人酬唱已成编，他年遂水留佳话。

又

季功席上赋，时移尊就月，凉意甚佳，主人亲  
摘阮以娱客，故云

露湿冠巾，风生襟袖。月华耿耿明如昼。  
主人情意十分浓，阮咸横膝清音奏。

渐永更筹，新凉气候。穿针乞巧看看又。  
却怜相聚日无多，偷闲且可陪觞豆。

又

明月清风，绿尊红袖。厌厌夜饮胜如昼。  
虽然文字有馀欢，也须闲把笙歌奏。

十雨如期，三秋届候。去年丰稔今年又。  
东阡西陌稼如云，笑他齐量区兼豆。

又 寄远

一撮精神，百般体态。兰心蕙性谁能赛。  
霎时不见早思量，许多日子如何睡。

我已安排，你须宁耐。看看重了鸳鸯债。  
此生永愿不分飞，傍人一任胡瞋怪。

又 七月十六日寿胡季海

自昔中元，多生上相。麒麟今又来天上。  
云衢虽未掇勋名，月评先已腾声望。

宝鼎浓熏，金翘绝唱。真珠百斛倾家酿。  
斯辰聊用祝龟龄，他年端合扶鸠杖。

又 乙巳正月二日雪

春已经旬，历方换岁。六花依旧来呈瑞。

细思残腊与新年，一般清绝元非二。

宿麦连云，遗蝗入地。坡仙有句谁能继。  
元宵此去日无多，会看霁色生和气。

### 南歌子

生世逢端午，齐头五十番。一番须作一般看。又听竞船箫鼓、沸江干。

不用丝缠臂，休将艾插门。及时蒲黍漫登盘。只恐岁华催促、鬓毛斑。

又 怀人

心下悬悬地，侬家好好儿。相怜相惜许多时。岂料一朝轻拆、便轻离。

要见无由见，教归不肯归。数珠懒把镜慵窥。

### 好事近 二月十日作

春事日相催，红尽浅桃深杏，可惜窥园无暇，任绿苔封径。

凭谁说与雨和风，休要太狂横。等待禁烟予告，要选幽寻胜。

### 卜算子 二月二十六日夜大雷雨，枕上作

午夜一声雷，急雨如飞雹。枝上残红半点无，密叶都成幄。

苦恨簿书尘，刚把闲身缚。却忆湄湘春暮时，处处堪行乐。

又

二月晦，偕徐孟坚、滕审言、李季功游裴公亭作

城上著裴亭，亭下临湘水。泼黛揉蓝画不成，暝色仍含紫。

忙里不知春，却问今余几。相与偷将半日闲，共把尘襟洗。

更漏子

与黄几叔然烛赏木犀。几叔归而有作，遂次其韵。

月蟠根，天雨粟。宜贮阿娇金屋。心欲醉，眼偏明。无穷佳思生。

焰银缸，纷宝斝。倒著接籬花下。人已散，梦初回。渴心犹望梅。

谒金门 己巳为内子寿

香篆袅。瓶里梅英犹小。鸳瓦霜华晴欲晓。今年生日好。

鬓绿颜朱不老。女嫁儿婚将了。四世团栾同一笑。人间如此少。

鹧鸪天 己巳生日自作

屈指新年五十三。未嫌垂领雪毵毵。设弧届旦人交贺，题座无功我自惭。

荣莫羨，富休贪。寿龄也不慕彭聃。只

全宋词 郭应祥

思了却痴儿事，一榻香凝晓梦酣。

秦楼月 为陈倅作

三月一。题舆恰届垂弧日。垂弧日。武安门外，欢声扬溢。

双瞳炯炯头如漆。天公付与长生质。长生质。云霄稳坐，持荷簪笔。

卜算子

清明前一日，约韩耕道、卢国英、皮国材、叶南叔同赏牡丹，因点黄几叔所惠绿烛，遂赋

绿烛间红花，绝艳交相照。不分花时雨又风，折取供吟笑。

拟把插乌巾，却恨非年少。点笔舒笺领略渠，座客词俱妙。

临江仙 次黄几叔韵赋酴醾

姑射仙人肌雪莹，笑他红紫纷纷。从教藏白后庭深。虬枝才破蕾，鼻观已遥闻。

花正繁时春又暮，年华荏苒催人。惜花心事与谁论。长哦清绝句，目断古南云。

## 郭章

### 点绛唇 天圣宫

翠柏丹崖，碧云深锁神仙府。势盘龙虎。  
楼观雄中土。

我欲停时，又恐斜阳暮。黄尘路。客怀  
良苦，满目西山雨。

## 郭仲宣

### 江神子

腊寒犹重见年芳。为花忙。倚雕墙。准拟巡檐，一笑但清狂。冷蕊疏枝浑不奈，凭折取，泛清觞。

扬州春梦两微茫。记娥妆。耿冰肠。春信全通，何用玉奁香。谁见月斜人去后，疏影乱，蘸寒塘。

## 郭仲循

### 玉楼春

靓妆才学春无价。腮粉额黄宫样画。妖  
娆闲倚曲阑边，孤净不胜微月下。

牵情群蕊临风亚。惜恐苍苔和雨借。何  
如相傍玉楼人，芳酒绣筵红烛夜。

## 郭子正

### 失调名

清晓开庭，茱萸初佩。

### 舜韶新

香满西风，催岁晚东篱，黄花争吐。嫩英细蕊，金艳繁、妆点高秋偏富。寒地花媒少，算自结、多情烟雨。每年年妆面，谢他拒霜相顾。

宝马王孙，休笑孤芳，陶令因谁，便思归去。负春何事，此恨惟、才子登高能赋。千古风流在，占定泛、重阳芳醑。堪吟看醉赏，何须杏园深处。

## 国 学 生

### 沁园春 挽徐元杰

三学上书，冤乎天哉，哲人已萎。自纲常一疏，为时太息，典刑诸老，尽力扶持。方哭南床，继伤右揆，死到先生事可知。伤心处，笑寒梅冷落，血泪淋漓。

人心公论难欺。愿君父、明明悟此机。昔九龄疏谏，禄山必叛，更生累奏，王氏为危。变起范阳，祸成新室，说著当年人噬脐。君知否，但皇天祚宋，此事无之。

## 海哥

### 失调名

海哥风措。被渔人、下网打住。将在帝城中，每日教言语。甚时节、放我归去。龙王传语。这里思量你。千回万度。螃蟹最恹惶，鲇鱼尤忧虑。

## 韩璜

### 清平乐 向伯恭韵木犀

秋光如水。酿作鹅黄蚁。散入千岩佳树里。惟许修门人醉。

轻钿重上风鬟。不禁月冷霜寒。步障深沈归去，依然愁满江山。

## 韩嘉彦

### 玉漏迟

杏香消散尽，须知自昔，都门春早。燕子来时，绣陌乱铺芳草。蕙圃妖桃过雨，弄笑脸、红筛碧沼。深院悄。绿杨巷陌，莺声争巧。

早是赋得多情，更遇酒临花，镇辜欢笑。数曲阑干，故国谩劳凝眺。汉外微云尽处，乱峰锁、一竿修竹。间琅玕，东风泪零多少。

## 韩驹

### 念奴娇 月

海天向晚，渐霞收馀绮，波澄微绿。木落山高真个是，一雨秋容新沐。唤起嫦娥，撩云拨雾，驾此一轮玉。桂华疏散，广寒谁伴幽独。

不见弄玉吹箫，尊前空对此，清光堪掬。雾鬓风鬟何处问，云雨巫山六六。珠斗斓斒，银河清浅，影转西楼曲。此情谁会，倚风三弄横竹。

### 失调名 西湖会词

孤舟晚扬湖光里。衰草斜阳无限意。

### 昭君怨

昨日樵村渔浦。今日琼川银渚。山色卷帘看。老峰峦。

锦帐美人贪睡。不觉天孙剪水。惊问是杨花。是芦花。

## 韩 琦

### 点绛唇

病起恹恹、画堂花谢添憔悴。乱红飘砌。  
滴尽胭脂泪。

惆怅前春，谁向花前醉。愁无际。武陵  
回睇。人远波空翠。

### 维扬好

二十四桥千步柳，春风十里上珠帘。

### 安阳好

安阳好，形势魏西州。曼衍山川环故国，  
升平歌吹沸高楼。和气镇飞浮。

笼画陌，乔木几春秋。花外轩窗排远岫，  
竹间门巷带长流。风物更清幽。

又

安阳好，戟户使君宫。白昼锦衣清宴处，  
铁榼丹榭画图中。壁记旧三公。

棠讼悄，池馆北园通。夏夜泉声来枕簟，

全宋词 韩琦

春来花气透帘栊。行乐兴何穷。

### 望江南

维扬好，灵宇有琼花。千点真珠擎素蕊，  
一环明玉破香葩。芳艳信难加。如雪貌，  
绰约最堪夸。疑是八仙乘皓月，羽衣摇曳上云车。  
来会列仙家。

### 眼儿媚 夏闺

石榴花发尚伤春。草色对斜曛。芙蓉面瘦，  
蕙兰心病，柳叶眉颦。

如年长昼虽难过，入夜更销魂。半窗淡月，  
三声鸣鼓，一个愁人。

## 韩师厚

### 御街行

合和朱粉千馀两。捻一个、观音样。大都  
却似两三分，少副玲珑五脏。等待黄昏，寻好  
梦底，终夜空劳攘。

香魂媚魄知何往。料只在、船儿上。无言  
倚定小门儿，独对滔滔雪浪。若将愁泪还做  
水，算几个、黄天荡。

### 西江月 赠刘金坛

玉貌何劳朱粉，江梅岂类群花。终朝隐几  
论黄芽。不顾花前月下。

冠上星簪北斗，杖头经挂南华。不知何日  
到仙家。曾许彩鸾同跨。

## 韩世忠

### 临江仙

冬看山林萧疏净，春来地润花浓。少年  
衰老与山同。世间争名利，富贵与贫穷。  
荣贵非干长生药，清闲是不死门风。劝  
君识取主人公。单方只一味，尽在不言中。

### 南乡子

人有几何般。富贵荣华总是闲。自古英  
雄都如梦，为官。宝玉妻男宿业缠。  
年迈衰残。鬓发苍浪骨髓乾。不道山林  
有好处，贪欢。只恐痴迷误了贤。

### 满江红

万里长江，淘不尽、壮怀秋色。漫说道、  
秦宫汉帐，瑶台银阙。长剑倚天氛雾外，宝  
弓挂日烟尘侧。向星辰、拍袖整乾坤，难消  
歇。  
龙虎啸，风云泣。千古恨，凭谁说。对

全宋词 韩世忠

山河耿耿，泪沾襟血。汴水夜吹羌笛管，鸾  
舆步老辽阳月。把唾壶敲碎问蟾蜍，圆何缺。

## 韩 维

### 西江月 席上呈子华

早岁相期林下，高年同在尊前。风花绣舞乍晴天。绿蚁新浮酒面。

身外虚名电转，人间急景梭传。当筵莫惜听朱弦。一品归来强健。

### 踏莎行 次韵范景仁寄子华

归雁低空，游蜂趁暖。凭高目向西云断。具茨山外夕阳多，展江亭下春波满。

双桂情深，千花明焕。良辰谁是同游伴。辛夷花谢早梅开，应须次第调弦管。

### 减字木兰花 颍州西湖

和风动□。□□新年□入手。世事尘□。  
□□□情近酒□。

水开湖□。□□笙歌波面起。相与排□。  
□□□胜特地□。

浪淘沙

饱食日□□。□上危亭。东风昨夜入  
□□。□□雪晴云□□，□偏银屏。

回首叹劳生。□鼎相承。皇恩早晚  
□□□。□□陂边垂钓手，不负幽情。

胡捣练令

夜来风横雨飞狂，满地闲花衰草。燕子  
渐归春悄。帘幕垂清晓。

天将佳景与闲人，美酒宁嫌华皓。留取  
旧时欢笑。莫共秋光老。

失调名

轻云薄雾。散作催花雨。

又

兄弟对举杯。

## 韩仙姑

### 苏幕遮

不忧贫 ,不恋富。大悟之人 ,开著波罗铺。  
内有真如无价宝 ,欲识真如 ,正照菩提路。

贪爱心 ,须除去。清净法身 ,直是堪凭据。  
忍辱波罗为妙药 ,服了一圆 ,万病都新愈。

## 韩信同

### 沁园春 寿南窗叶知录

望紫云翁 ,启明在东 ,长庚在西。但空有寸心 ,荆州江汉 ,未能百里 ,弱水沙黎。菊底秋深 ,樵边信至 ,一曲阳春草木知。长吟咏 ,觉声如韩操 ,骨似陶诗。

不应鬓发能稀。七十寿强如六十耆。想高谈倾坐 ,风斯下矣 ,微辞漱物 ,清且涟漪。谩说磻翁 ,休夸淇叟 ,用舍行藏各有时。真修养 ,有近思家学 ,字字参芝。

韩彦古

浣溪沙

一缕金香永夜清。残编未掩古琴横。绣  
衾寒拥宝缸明。

坐听竹风敲石磴，旋倾花水漱春醒。落  
梅和雨打帘声。

## 韩 玉

### 水调歌头 张魏公生日

间世真贤出，吉梦兆维熊。玉麟天上谪见，帙薄贯长虹。追念当年筹算，封魏封留熏业，千古事攸同。语云仁者寿，何必喻乔松。

嗣天子，乘九五，驭飞龙。分麾契符阍外，凭倚定寰中。由是天才英纵，散入枢庭闲暇，谈笑抚兵戎。伫看骄虏静，金鼎篆元功。

又 自广中出，过庐陵，赠歌姬段云卿

有美如花客，容饰尚中州。玉京杳渺天际，与别几经秋。家在金河堤畔，身寄白苹洲末，南北两悠悠。休苦话萍梗，清泪已难收。

玉壶酒，倾潋滟，听君讴。伫云却月，新弄一曲洗人忧。同是天涯沦落，何必平生相识，相见且迟留。明日征帆发，风月为君愁。

又

月里一枝桂，不付等闲人。昔年霄汉，

闻道争者尽输君。衣袖天香犹在，风度仙清难老，冰雪莹无尘。赋才三十倍，论寿八千春。

夏庭芝，周室凤，舜郊麟。岂如今日称瑞，皇国再生申。聊借济时霖雨，来种重湖桃李，和气一番新。尚闻虚黄阁，行看秉洪钧。

### 念奴娇

吴东清胜，是吴山苍翠，吴江澄绿。灵秀钟人文物盛，历历皆非凡俗。而况君家，风流遗世，犹寄山阴曲。继承才业，算来真是名族。

聊恁驻节重湖，惠歌仁咏，蔼丰年图录。行看登庸归去后，谁展高才相续。寿日称觞，一杯千岁，应见蟠桃熟。祝君难老，为君还更再祝。

### 感皇恩 广东与康伯可

远柳绿含烟，土膏才透。云海微茫露晴岫。故乡何在，梦寐草堂溪友。旧时游赏处，谁携手。

尘世利名，于身何有。老去生涯滞樽酒。小桥流水，一树雪香瘦。故人今夜月，相思否。

### 满江红 重九与张舍人

正欲登临，何处好、登临眺望。君约我、

全宋词 韩 玉

今朝携酒，古台同上。风静秋郊浑似洗，碧空淡覆玻璃盃。夕照外、渺渺万遥山，开青嶂。

龙山事，空追想。风流会，今安往。我劝君一杯，为君高唱。今日谋欢真雅胜，休辞痛饮葡萄浪。纵黄花、明日未凋零，非佳赏。

曲江秋 正宫

明轩快目。正雨过湘溪，秋来泽国。波面鉴开，山光澹拂，竹声摇寒玉。鸥鹭戏晚日，芰荷动，香红菼。千古兴亡意，凄凉扬□舟，望迷南北。

仿佛烟笼雾簇。认何处、当年绣毂。沈香花萼事，潇然伤□宫殿三十六。忍听向晚菱歌，依稀犹似新番曲。试与问，如今新蒲细柳，为谁摇绿。

一剪梅

镜里新妆镜外情。小眉幽恨，浅绿低横。只怨闲纵绣鞍尘。不道天涯，萦绊归程。

梦里兰闺相见惊。玉香花瘦，春艳盈盈。觉来敲枕转愁人。门外潇潇，风雨三更。

上平西

甲申岁西度道中作 原作上西平，从毛扆校本

东浦词

折腰劳，弹冠望，纵飞蓬。笑造化、相戏穷通。风帆浪桨，暮城寒角晓楼钟。暗借霜雪鬓边来，惊对青铜。

萧闲好，何时遂，门横水，径穿松。有无限、杯月襟风。区区个甚，帝尧堂下足夔龙。不如闻早问溪山，高养吾慵。

西江月

捍拨声传酒绿，蔷薇面衬宫黄。娇波斜入鬓云长。眉与春山一样。

潇洒不禁疏瘦，低回犹似思量。换花梨叶晚阴凉。说与三年梦想。

临江仙

月是银缸溪是镜，云霓与作衣裳。夜寒独立竹篱傍。妆成那待粉，笑罢自生香。

自古佳人多薄命，枉教傲雪凌霜。从来林下异闺房。何须三弄笛，方断九回肠。

番枪子

莫把团扇双鸾隔。要看玉溪头、春风客。妙处风骨潇闲，翠罗金缕瘦宜窄。转面两眉攒、青山色。

到此月想精神，花似秀质。待与不清狂、如何得。奈向难驻朝云，易成春梦恨又积。

全宋词 韩 玉

送上七香车、春草碧。

清平乐 赠棋者

梅花照雪。浑似人清绝。香叠绀螺双背结。曾侍霓旌绛节。

如今却向尘寰。棋中寄个清闲。纵使阿郎多病，也须偷画春山。

减字木兰花 赠歌者

香檀素手。缓理新词来伴酒。音调凄凉。便是无情也断肠。

莫歌杨柳。记得渭城朝雨后。客路茫茫。几度东风春草长。

行香子

一剪梅花，一见销魂。况溪桥、雪里前村。香传细蕊，春透灵根。更水清冷，云黯淡，月黄昏。

幽过溪兰，清胜山矾。对东风、独立无言。霜寒塞垒，风净谯门。听角声悲，笛声怨，恨难论。

太常引

荒山连水水连天。忆曾上、桂江船。风雨过吴川。又却在、潇湘岸边。不堪追念，

浪萍踪迹，虚度夜如年。风外晓钟传。尚独对、残灯未眠。

又

东城归路水云间。几曾放、梦魂闲。何日整归鞍。又人对、西风凭栏。温柔情性，系怀伤感，欲诉诉应难。愁聚两眉端。又叠起、千山万山。

### 贺新郎

柳外莺声碎。晚晴天、东风力软，嫩寒初退。花底觅春春已去，时见乱红飞坠。又闲傍、阑干十二。阑外青山烟缥缈，远连空、愁与眉峰对。凝望处，两叠翠。

鸳鸯结带灵犀佩。绮屏深、香罗帐小，宝檠灯背。谁谓彩云和梦断，青翼阻寻后会。待都把、相思情缀。便做锦书难写恨，奈菱花、都见人憔悴。那更有，枕痕泪。

又 咏水仙

绰约人如玉。试新妆、娇黄半绿，汉宫匀注。倚傍小阑闲伫立，翠带风前似舞。记洛浦、当年俦侣。罗袜尘生香冉冉，料征鸿、微步凌波女。惊梦断，楚江曲。

春工若见应为主。忍教都、闲亭邃馆。冷风凄雨。待把此花都折取。和泪连香寄与。须信道、离情如许。烟水茫茫斜照里，是骚人、九辨招魂处。千古恨，与谁语。

又

睡起帘栊静。□金铺、春帟半卷，宝香

烟冷。门外落花风不定。糝糝乱红堆径。谁  
唤做、春愁如病。零乱云鬟慵梳掠，傍菱花、  
羞对孤鸾影。情易感，恨难醒。

沙边柳外当时景。记分携、离筵乍阕，  
去帆初整。尽举棹歌和泪听。云淡水寒烟暝。  
空怆望、楼高天迥。犹未归来何处也，日长  
时、不念人孤另。书谩写，雁谁倩。

### 水调歌头 上辛幼安生日

重午日过六，灵岳再生申。丰神英毅，  
端是天上谪仙人。夙蕴机权才略，早岁来归  
明圣，惊耸汉庭臣。言语妙天下，名德冠朝  
绅。

绣衣节，移方面，政如神。九重隆眷倚  
注，伟业富经纶。闻道山东出相，行拜紫泥  
飞诏，归去秉洪钧。寿嘏自天锡，安用拟庄  
椿。

### 且坐令

闲院落。误了情明约。杏花雨过胭脂绰。  
紧了秋千索。斗草人归，朱门悄掩，梨花寂  
寞。

书万约、恨凭谁托。才封了、又揉却。  
冤家何处贪欢乐。引得我心儿恶。怎生全不  
思量著。那人人情薄。

### 风入松

柳阴亭院杏梢长。依约巫阳。凤箫已远

秦楼在，水沈烟暖余香。临镜舞鸾窥沼，倚  
箏飞雁辞行。

醉边人去自凄凉。泪眼愁肠。断云残雨  
当年事，到而今、好处难忘。两袖晓风花陌，  
一帘夜雨兰堂。

### 鹧鸪天

披拂芝兰便断金。顿成南北岂胜任。三  
年尊酒半生话，千里云山一寸心。

休怅望，莫登临。梦魂何处不相寻。柔  
肠欲问愁多少，未比湘江烟水深。

又

爱日烘晴句日间。谩邀朋辈为跻攀。无  
穷望眼无穷恨，不尽长江不尽山。

星点点，月团团。倒流河汉入杯盘。饱  
吟风月三千首，寄与吴姬忍泪看。

### 生查子

裙拖簇石榴，髻绾偏荷叶。头上短金钗，  
轻重还相压。

轻颦月入眉，浅笑花生颊。夫婿不风流，  
取次看承别。

### 卜算子

杨柳绿成阴，初过寒食节。门掩金铺独  
自眠，那更逢寒夜。

全宋词 韩 玉

强起立东风，惨惨梨花谢。何事王孙不早归，寂寞秋千月。

### 霜天晓月

竹篱茅屋。一树扶疏玉。客里十分清绝，有人在、江南北。

伫目。诗思促。翠袖倚修竹。不是月媒风聘，谁人与、伴幽独。

## 韩元吉

### 点绛唇 十月桃花

木落霜浓 ,探春只道梅花未。嫩红相倚。  
灼灼新妆腻。

莫问仙源 ,且问花前事。休辞醉。想君园  
□ ,总是生春地。

### 浣溪沙 次韵曾吉甫席上

莫惜清尊领客同。已无花伴舞衣红。强  
歌归去莫匆匆。

细雨弄烟烟弄日 ,断云黏水水黏空。酴醿  
飞下晚来风。

### 霜天晓角 蛾眉亭

倚天绝壁。直下江千尺。天际两蛾凝黛 ,  
愁与恨、几时极。

怒潮风正急。酒醒闻塞笛。试问谪仙何  
处 ,青山外、远烟碧。

又

夜饮武将家 ,有歌霜天晓角者 ,声调凄婉 ,戏为赋

之

几声残角。月照梅花薄。花下有人同醉，  
风满槛、波明阁。

夜寂香透幕。酒深寒未著。莫把玉肌相  
映，愁花见、也羞落。

菩萨蛮 青阳道中

春残日日风和雨。烟江目断春无处。山  
路有黄鹂。背人相唤飞。

解鞍宿酒醒。敲枕残香冷。梦想小亭东。  
蔷薇何似红。

又 腊梅

江南雪里花如玉。风流越样新装束。恰  
恰缕金裳。浓熏百和香。

分明篱菊艳。却作妆梅面。无处奈君何。  
一枝春更多。

又 夜宿余家楼闻笛声

薄云卷雨凉成阵。雨晴陡觉荷香润。波  
影澹寒星。水边镫火明。

白苹洲上路。几度来还去。敲枕恨茫茫。  
笛声依夜长。

又 郑舜举别席侑觞

诏书昨夜先春到。留公一共梅花笑。青  
琐凤凰池。十年归已迟。

灵溪霜后水。的的清无比。比似使君清。  
要知清更明。

又 春归

墙根新笋看成竹。青梅老尽樱桃熟。幽  
墙几多花。落红成暮霞。

闭门风又雨。只道春归去。媚脸笑持杯。  
却惊春思回。

又

叶丞相园赏木犀 次韵子师

梧桐叶上秋萧瑟。画阑桂树攒金碧。花  
底最风流。相逢不上楼。

数枝添宝髻。滴滴香沾袂。杯到莫留残。  
雾窗疑广寒。

减字木兰花 雪中集醉高楼

壶中春早。翦刻工夫天自巧。雨转风斜。  
吹作千林到处花。

瑶池清浅。璧月琼枝朝暮见。莫上扁舟。  
且醉仙家白玉楼。

又 次韵赵倅

风梳雨洗。玉阙琼楼何处是。万里秋容。  
唤起嫦娥酒未中。

相逢且醉。忙里偷闲知有几。况自丰年。  
须信金华别是天。

诉衷情 木犀

疏疏密密未开时。装点最繁枝。分明占  
断秋思，一任晓风吹。

全宋词 韩元吉

金缕细 ,翠绡垂。画阑西。嫦娥也道 ,一种幽香 ,几处相宜。

谒金门 春雪

春尚浅。谁把玉英裁翦。尽道梅梢开未遍。卷帘花满院。

楼上酒融歌暖。楼下水平烟远。却似涌金门外见。絮飞波影乱。

又 重午

幽槛暑。又是一年重午。猎猎风蒲吹翠羽。楚天梅熟雨。

往事潇湘南浦。魂断画船箫鼓。双叶石榴红半吐。倩君聊寄与。

好事近 辛幼安席上

花屋翠云深 ,云外晚山千叠。眼底无穷春事 ,对杨枝桃叶。

老来沈醉为花狂 ,霜鬓未须镊。几许夜阑清梦 ,任翻成胡蝶。

又 郑德与家留饮

秋意满芙蓉 ,红映小园丛竹。风里凤箫声扬 ,有新妆明玉。

诗翁相对两悠然 ,一醉绕黄菊。目尽晚山横处 ,共修眉争绿。

秦楼月 次韵陈子象

莺声寂。春风欲去难踪迹。难踪迹。几枝红药, 万金消得。

青铜镜里朱阑侧。照人也似倾城色。倾城色。一尊莫负, 赏心良夕。

朝中措 辛丑重阳日, 刘守招饮石龙亭, 追录

危亭崛起卧苍龙。绝景画图中。便作龙山高会, 千年乐事能同。

使君宴处, 丹枫影澹, 黄花香浓。不惜归鞍照月, 直教破帽吹风。

贺圣朝 送天与

斜阳只向花梢驻。似愁君西去。清歌也便做阳关, 更朝来风雨。

佳人莫道, 一杯须近, 总眉峰偷聚。明年归诏上鸾台, 记别离难处。

西江月 闰重阳

一度难逢佳节, 今年两度重阳。菊花犹折御衣黄。莫惜危亭更上。

况有飞觞滟玉, 从教醉帽吹香。兴来相与共清狂。频把新词细唱。

又 春归

山路冥冥雨暗，溪桥阵阵花飞。一年寂寂又春归。白发自惊尘世。

不惜障泥渡水，且寻团扇题诗。杜鹃休绕暮烟啼。我欲风前重醉。

燕归梁 木犀

凉月圆时翠帐深。锁非雾沈沈。广寒宫里未归人。共结屋、住黄金。

繁枝未老秋光澹，好风露、总关心。天香不奈远相寻。更翦巧、上瑶簪。

南柯子 次韵姚提点行可席上见贻

急雨朝来过，浓云晚半收。荷香便傍酒尊浮。极目澹烟斜照，满芳洲。消尽人间暑，翻成一段秋。使星南楚转东瓯。只恐禁林归诏，未容留。

又 广德道中遇重午

野杏抟枝熟。戎葵抱叶开。村村箫鼓画船回。客里不知时节，又相催。角黍堆冰碗，兵符点翠钗。去年今日共传杯。应捻榴花独立，望归来。

浪淘沙 觉度寺

席地赏残红。少驻孤蓬。一春不奈雨和

风。雨自无情风有恨,花片西东。云澹远峰浓。绿遍高桐。神仙知在此山中。万古消凝多少事,目尽晴空。

又 赵富文席上

倦客怕离歌。春已无多。闲愁须倩酒消磨。风雨才晴今夜月,不醉如何。玉笋滌金荷。情在双蛾。二年能得几经过。花满碧溪归棹远,回首烟波。

又 芍药

鶉鴒怨花残。谁道春阑。多情红药待君看。浓澹晓妆新意态,独占西园。风叶万枝繁。犹记平山。五云楼映玉成盘。二十四桥明月下,谁凭朱阑。

鹧鸪天 雪

山绕江城腊又残。朔风垂地雪成团。莫将带雨梨花认。且作临风柳絮看。烟杳渺,路弥漫。千林犹待月争寒。凭君细酌羔儿酒,倚遍琼楼十二阑。

又 九日双溪楼

不惜黄花插满头。花应却为老人羞。年年九日常拚醉,处处登高莫浪愁。酬美景,驻清秋。绿橙香嫩酒初浮。多情雨后双溪水,红满斜阳自在流。

又 九日登赤松绝顶

老去休惊节物催。菊花端的为君开。携

壶幸有齐山客，怀古还如单父台。松掩映，水萦回。使君强健得重来。不须细把茱萸看，且尽丰年酒一杯。

虞美人 送韩子师

西风斜日兰皋路。碧嶂连红树。天公也自惜君行。小雨霏霏特地、不成晴。满城桃李春来处。我老君宜住。莫惊华发笑相扶。记取他年同姓、两尚书。

又 怀金华九日寄叶丞相

登临自古骚人事。惨慄天涯意。金华峰顶做重阳。月地千寻风里、万枝香。相君携客相应记。几处容狂醉。双溪明月乱山青。飞梦时时犹在、最高亭。

又 七夕

烟霄脉脉停机杼。双鹊飞来语。踏歌声转玉钩斜。好是满天风露、一池花。离多会少从来有。不似人间久。欢情谁道隔年迟。须信仙家日月、未多时。

又 叶梦锡园十月海棠盛开

诏书昨夜催春到。绿野花争早。几枝先见海棠开。全胜陇头冲雪、寄江梅。破寒滴滴娇如醉。不比春饶睡。万红千紫莫嫌迟。看取满城花送、袞衣归。

夜行船 再至东阳，有歌予往岁重九词者

极目高亭横远岫。拂新晴、黛蛾依旧。策

马重来 秋光如画 霜满翠梧高柳。菊美橙香  
还对酒。欢情似、那时重九。楼上清风 溪头  
明月 不道沈郎消瘦。

南乡子 龙眼未闻有诗词者 戏为赋之

江路木犀天。梨枣吹风树树悬。只道荔枝  
无驿使 依然。赢得骊珠万颗传。香露滴芳  
鲜。并蒂连枝照绮筵。惊走梧桐双睡鹊 应  
怜。腰底黄金作弹圆。

又

中秋前一日饮赵信申家

细雨弄中秋。雨歇烟霄玉镜流。唤起佳  
人横玉笛 凝眸。收拾风光上小楼。烂醉拚扶  
头。明日阴晴且漫愁。二十四桥何处是 悠  
悠。忍对嫦娥说旧游。

醉落魄 务观席上索赋

楼头晚鼓。佳人莫唱黄金缕。良宵镫火  
还三五。肠断扁舟 明日江南去。离觞欲醉谁  
能许。风前蝶闹蜂儿舞。明年此夜知何处。  
且插梅花 同听画檐雨。

又 戊戌重阳龙山会别

菊花又折。今年真是龙山客。杯行潋滟  
新醅白。一醉相欢 莫便话离恻。从教破帽频  
敲侧。楼头霜树明秋色。凭高待把疏星摘。  
天近风清 不怕暮云隔。

一翦梅 叶梦锡席上

竹里疏枝总是梅。月白霜清,犹未全开。  
相逢聊与著诗催。要趁金波,满泛金杯。

多病惭非作赋才。醉到花前,探得春回。  
明年公已在鸾台。看取春风,丹诏重来。

临江仙 次韵子云中秋

记得年时离别夜,都门强半清秋。今年想  
望只邻州。星连南极动,月满大江流。

芸阁老仙多妙语,云阶清梦曾游。屐声还  
认庾公楼。金波摇酒面,河影堕帘钩。

又 寄张安国

自古文章贤太守,江南只数苏州。而今太  
守更风流。熏香开画阁,迎月上西楼。

见说宫妆高髻拥,司空却是遨头。五湖莫  
便具扁舟。玉堂红蕊在,还胜百花洲。

江神子 建安县戏赵德庄

十年此地看花时,醉题诗。夜弹棋。湖海  
相逢,曾共惜芳菲。前度刘郎今度客,嗟老矣,  
鬓成丝。

江梅吹尽柳桥西。雪纷飞。画船移。满  
眼青山,依旧带寒溪。往事如云无处问,云外  
月,也应知。

又 金山会饮

金银楼阁认蓬莱。晓烟开。上崔嵬。风引孤帆，谁道却船回。鹏翼倚天鳌背稳，惊浪起，雪成堆。

翩翩黄鹤为谁来。醉持杯。共徘徊。四面江声，脚底隐晴雷。织女机头凭借问，何处更、有琼台。

满江红 丁亥示庞祐甫

梅欲开时，君欲去、花谁同折。应怅望、江津千树，晚烟明雪。花似故人相见好，人如塞雁多离别。待留君、重看水边花，花边月。

台城路，山如阙。追往事，伤时节。但春风春雨。古人愁绝。多少扬州诗兴在，直须清梦翻胡蝶。问他年、谁记饮中仙，花应说。

又

自鹿田山桥小集潜岳寺，坐中酬陈子象词

寂寞山城，春已半、好花都折。无奈向、阴晴不定，冷烟寒食。莫问花残风又雨，且须烂醉酬春色。叹使君、华发又重来，人应识。

丹井畔，山桥侧。空翠里，烟如织。便直教马上，醉巾沾湿。丞相车茵端未惜，孟公好客聊无客。算明年、溪路海棠开。还相忆。

又

再至丹阳，每怀务观，有歌其所制者，因用其韵示王季夷、章冠之

江绕层城，重楼迥、依然山色。□□有、佳

人犹记,旧家离别。把酒只如当日醉,挥毫剩  
欠尊前客。算平林、有恨寄伤心,烟如织。

湖平树,花连陌。风景是,光阴易。叹新  
声浑在,断云难觅。暮雨不成巫峡梦,数峰还  
认湘波瑟。但与君、同看小槽红,真珠滴。

水调歌头 席上次韵王德和

世事不须问,我老但宜仙。南溪一曲,独  
对苍翠与孱颜。月白风清长夏。醉里相逢林  
下。欲辩已忘言。无客问生死,有竹报平安。

少年期,功名事,觅燕然。如今憔悴,萧萧  
华发抱尘编。万里蓬莱归路。一醉瑶台风露。  
因酒得天全。笑指云阶梦,今夕是何年。

又

七月六日与范至能会饮垂虹。是时至能赴括苍,  
余以九江命造朝,至能索赋

江路晓来雨,残暑夜全消。人言天上今  
夕,飞鹤渐成桥。杳杳云车何处。脉脉红渠香  
度。瓜果趁良宵。推枕断虹卷,抚槛白鱼跳。

五湖客,临风露,倚兰苕。云涛四起,极目  
人世有烟霄。我送君舟西渡。君望我帆南浦。  
明日恨迢迢。且醉吴淞月,重听浙江潮。

又 寄陆务观

明月照多景,一话九经年。故人何在,依  
约蜀道倚青天。豪气如今谁在。剩对岷峨山  
水。落纸起云烟。应有阳台女,来寿隐中仙。

相如赋,王褒颂,子云玄。兰台麟阁,早晚  
飞诏下甘泉。梦绕神州归路。却趁鸡鸣起舞。

余事勒燕然 ,白首待君老 ,同泛五湖船。

又 次韵子云惠山见寄

泚泚桂华满 ,摇落楚江秋。去年今夜 ,相望千里一扁舟。满目都门风露。离别凄凉几度。霜雪渐盈头。山水最佳处 ,常恨不同游。

少年约 ,谈笑事 ,取封侯。田园归晚 ,休问适不用吾谋。身外功名何处。屈指如今老去。无梦到金瓯。剩买五湖月。吹笛下沧洲。

又 水洞

今日俄重九 ,莫负菊花开。试寻高处 ,携手蹑屐上崔嵬。放目苍岩千仞。云护晓霜成阵。知我与君来。古寺倚修竹 ,飞槛绝纤埃。

笑谈间 ,风满座 ,酒盈杯。仙人跨海 ,休问随处是蓬莱。落日平原西望。鼓角秋深悲壮。戏马但荒台。细把茱萸看 ,一醉且徘徊。

又 雨花台

泽国又秋晚 ,天际有飞鸿。中原何在 ,极目千里暮云重。今古长干桥下 ,遗恨都随流水 ,西去几时东。斜日动歌管 ,萸菊舞西风。

江南岸 ,淮南渡 ,草连空。石城潮落 ,寂寞烟树锁离宫。且斗尊前酒美 ,莫问楼头佳丽 ,往事有无中。却笑东山老 ,拥鼻与谁同。

又 和庞祐甫见寄

落日澹芳草 ,烟际一鸥浮。西湖好处 ,君去千里为谁留。坐想敬亭山下 ,竹映一溪寒水 ,飞盖共追游。况有尊前客 ,相对两诗流。

笑谈间 ,风满座 ,气横秋。平生壮志 ,长啸起舞看吴钩。红白山花开谢 ,半醉半醒时节 ,

春去子规愁。梦绕水西寺,回首谢公楼。

醉蓬莱 次韵张子永同饮谢德舆家

听清歌初转,翠岭云横,乍飞还驻。水落秋明,正千岩呈露。况有宾朋,飘然才调,尽凌空鹞鹭。步绕西畴,同寻南涧,郊原新雨。

好客声名,郑庄风韵,松菊栽成,故侯瓜圃。燕去鸿来,笑人生离聚。老子偷闲,爱君三径,共一尊芳醕。待约梅仙,他年丹就,骑鲸飞去。

念奴娇 中秋携儿辈步月至极目亭,寄怀子云兄

去年秋半,正都门结束,相将离别。潏潏双溪新雁过,重见当时明月。步转高楼。凄凉看镜,绿鬓纷成雪。晚晴烟树,傍人飞下红叶。

还记江浦潮生,云涛天际,涌金波一色。千里相望浑似梦,极目空山围碧。醉拍朱阑,满簷丹桂,细与姮娥说。倚风孤啸,恍然身在瑶阙。

又 再用韵答韩子师

定交最早,叹西津几度,匆匆论别。世事浮云山万变,只有沧江横月。长忆追随,湖山好处,醉帽敲风雪。竹阴花径,兴来题尽桐叶。

谁忆此地相逢,鬓毛君未白,眉添黄色。屈指烟霄归诏近,路入龙楼金碧。千载功名,一尊欢笑,会作他年说。倚天长剑,夜寒光透银阙。

又

次陆务观见贻念奴娇韵

湖山泥影 ,弄晴丝、目送天涯鸿鹄。春水移船花似雾 ,醉里题诗刻烛。离别经年 ,相逢犹健 ,底恨光阴速。壮怀浑在 ,浩然起舞相属。

长记入洛声名 ,风流觞咏 ,有兰亭修竹。绝唱人间知不知零落金貂谁续。北固烟钟 ,西州雪岸 ,且共杯中绿。紫台青琐 ,看君归上群玉。

又 次韵

春来离思 ,正楼台灯火、香凝金戟。扬子江头嘶骑拥 ,杨柳花飞留客。枚乘声名 ,谪仙风韵 ,更赋长相忆。酒阑相顾 ,起看月堕寒壁。

尊前谁唱新词 ,平林真有恨、寒烟如织。燕雁横空梅蕊乱 ,醉里隔江闻笛。白发逢春 ,湖山好在 ,一笑千金直。待君归诏 ,买船重话畴昔。

水龙吟 溪中有浣衣石

乱山深处逢春 ,断魂更入桃源路。双双翠羽 ,溅溅流水 ,蒙蒙香雾。花里莺啼 ,水边人去 ,落红无数。恨刘郎鬓点 ,星星华发。空回首、伤春暮。

寂寞云间洞户。问当年、佳期何处。虹桥望断 ,琼楼深锁 ,如今谁住。绿满千岩 ,浣衣石上 ,倚风凝伫。料多情好在 ,也应笑我 ,却匆匆去。

又

夜宿化城，得张安国长短句，戏用其韵

五溪深锁烟霞，定知不是人间世。轩然九老，排云一笑，苍颜相对。星斗垂空，月华随步，酒醒无寐。□广寒已近，嫦娥起舞，天风动、摇丹桂。

极目层霄如洗。正千岩、棱棱霜气。飞泉半落，苍岸百仞，珠翻玉碎。金衲松成，葛洪丹就，如今千载。叹谪仙诗在，骑驴未远，且留君醉。

瑞鹤仙 送王季夷

西风吹暮雨。正碧树凉生，送君南浦。蝉声带残暑。满高林斜照，暝烟横渚。故乡路阻。更秋入、江城雁渡。怅天涯、几许闲愁，对酒共成羁旅。

休问功名何在，绿鬓吴霜，素衣尘土。离觞缓举。收玉箸。听金缕。叹凌云才调，乌丝阑上，省把清诗漫与。见洛阳、年少交游。倩君寄语。

薄幸 送安伯弟

送君南浦。对烟柳、青青万缕。更满眼、残红吹尽，叶底黄鹂自语。甚动人、多少离情，楼头水阔山无数。记竹里题诗，花边载酒，魂断江干春暮。

都莫问、功名事，白发渐、星星如许。任鸡

全宋词 韩元吉

鸣起舞，乡关何在，凭高目尽孤鸿去。漫留君住。趁酴醾香暖，持杯且醉瑶台露。相思记取，愁绝西窗夜雨。

### 临江仙

不恨绿阴桃李过，酴醾正向人开。一尊清夜月徘徊。花如人意好，月为此花来。

未信人间香有许，却疑同往瑶台。纷纷残雪堕深杯。直教攀折尽，犹胜酒醒回。

### 南柯子

五月炎州路，千重扑地开。只疑标韵是江梅。不道薰风庭院、雪成堆。宝髻琼瑶缀，仙衣翡翠裁。一枝长伴荔枝来。付与玉人和笑、插鸾钗。

### 醉落魄

霓裳弄月。冰肌不受人间热。分明密露枝枝结。碧树珊瑚。容易与君折。玉环旧事谁能说。迢迢驿路香风彻。故人莫恨东南别。不寄梅花，千里寄红雪。

### 水龙吟 题三峰阁咏英华女子

雨余叠嶂浮空，望中秀色仙都是。洞天未锁，人间春老，玉妃曾坠。锦瑟繁弦，凤箫清

全宋词 韩元吉

响九霄歌吹。问分香旧事，刘郎去后，知谁伴、风前醉。

回首暝烟千里。但纷纷、落红如泪。多情易老，青鸾何许，诗成谁寄。斗转参横，半帘花影，一溪寒水。怅飞凫路杳，行云梦断，有三峰翠。

好事近 汴京赐宴闻教坊乐有感

凝碧旧池头，一听管弦凄切。多少梨园声在，总不堪华发。

杏花无处避春愁。也傍野烟发。惟有御沟声断，似知人呜咽。

永遇乐 为张安国赋

池馆春归，帘栊昼静，清漏移箭。山下孤城，水边翠竹，鶺鴒声千转。记得年时，绮窗人去，尚有唾茸遗线。照珠筵、歌檀舞扇，寂寞旧家排遍。

青云赋客，多情多病，西掖桐阴满院。飞絮随风，马头月在，翡翠帷空卷。平湖烟远，斜桥雨暗，欲寄短书双燕。算犹忆、兰房画烛，醉时共翦。

六州歌头 桃花

东风著意。先上小桃枝。红粉腻。娇如醉。倚朱扉。记年时。隐映新妆。面临水岸。

全宋词 韩元吉

春将半。云日暖。斜桥转。夹城西。草软莎平  
跋马,垂杨渡、玉勒争嘶。认蛾眉凝笑,脸薄  
拂燕支。绣户曾窥。恨依依。

共携手处。香如雾。红随步。怨春迟。  
销瘦损。凭谁问。只花知。泪空垂。旧日堂  
前燕,和烟雨,又双飞。人自老。春长好。梦  
佳期。前度刘郎,几许风流地,花也应悲。但  
茫茫暮霭,目断武陵溪。往事难追。

水龙吟 寿辛侍郎

南风五月江波,使君莫袖平戎手。燕然未  
勒,渡泸声在,宸衷怀旧。卧占湖山,楼横百  
尺,诗成千首。正菖蒲叶老,芙渠香嫩,高门  
瑞、人知否。

凉夜光躔牛斗。梦初回、长庚如昼。明年  
看取,锋旗南下,六羸西走。功画凌烟,万钉宝  
带,百壶清酒。便留公剩馥,蟠桃分我,作归来  
寿。

蓦山溪 叶尚书生朝避客三洞

双龙古洞,领略千岩秀。福地有真仙,来  
一试,调元□手。青春绿野,月转最高峰,星斗  
润,柳梅新,五夜收灯后。

诏飞天上,人倚经纶旧。重入辅升平,更  
赢得、千龄眉寿。功成未晚,归伴赤松游,金印  
重,羽衣轻,会见丹砂就。

### 鹊桥仙

菊花黄后。山茶红透。南国小春时候。  
蓬山高处绿云间,有一个、仙官诞秀。精神龟  
媚,骨毛鹤瘦。落落人中星斗。殷勤自折早梅  
芳,调一鼎、和羹为寿。

### 朝中措 寿十八兄

清霜著柳夜来寒。新月印湖山。共喜今  
年称寿,一尊还在长安。

人间千载。从教鹤发,且驻朱颜。看取烟  
霄平步,何须九转神丹。

### 南乡子 寿廿一弟

新笋旋成林。梅子枝头雨更深。织就彩  
丝犹十日,登临。人似江心百炼金。功业会相  
寻,好挹薰风和舜琴。鹤住千年丹九转,如今。  
门外梧桐长翠阴。

### 鹧鸪天

子云弟生日

甲子今年甫一周。人间聊住八千秋。依  
依梅蕊看如雪,恰恰蟾华未上钩。分玉节,共  
南州。台城辇路记重游。相期一品归来健,兄  
弟华颠自献酬。

瑞鹤仙 自寿

好山横翠幕。更一水流烟，嫩阴成幄。薰风转林薄。笑劳生底事，漫嗟离索。霞觞细酌。尽流年、青镜易觉。算芙蓉、玉井香翻，不减旧阶红药。

寂寞。草玄空老问字人稀，也胜投阁。骑鲸后约。追汗漫，记寥廊。便风帆高挂。云涛千里，谁道蓬壶水弱。任蟠桃、满路千花，自开自落。

醉落魄 乙未自寿

红渠漾月。薰风特地生梧叶。一年风月今宵别。隐隐笙鸾，何处有炎热。凤凰山下榴花发。一杯香露融春雪。幔亭有路通瑶阙。知我丹成，容我醉时节。

又 生日自戏

相看半百。劳生等是乾坤客。功成一笑惊头白。惟有榴花，相对似颜色。蓬莱水浅何曾隔。也应待得蟠桃摘。我歌欲和君须拍。风月年年，常恨酒杯窄。

韩 准

浣溪沙

潇洒梧桐几度秋。凤凰飞去旧山幽。风景不殊人物换，恨悠悠。

衰草远从烟际合。夕阳空趁水西流。恰好凭楼便回首，怕生愁。

韩 绛

踏莎行

嵩峯云高，洛川波暖。举头乔木森无断。  
□□□雨绝风尘，小桥频过春渠满。  
□□离宫，□棱斗焕。万家罗绮多游伴。  
□□□□自风□，□□是处喧弦管。

## 韩 缜

### 凤箫吟

锁离愁，连绵无际，来时陌上初熏。绣  
帟人念远，暗垂珠泪，泣送征轮。长亭长在  
眼，更重重、远水孤云。但望极楼高，尽日  
目断王孙。

消魂。池塘别后，曾行处、绿妒轻裙。  
恁时携素手，乱花飞絮里，缓步香裊。朱颜  
空自改，向年年、芳意长新。遍绿野，嬉游  
醉眠，莫负青春。

## 韩缜姬

### 蝶恋花

香作风光浓著露。正恁双栖，又遣分飞去。密诉东君应不许。泪波一洒奴衷素。

## 韩 滂

### 临江仙 为顾致尧生日

难老一杯春酒美，主人玉鉴清秋。九华山下共追游。朝来多爽气，都向笔端收。

台阁功名归去好，便应袞袞公侯。未妨含笑看吴钩。当年佳梦日，和气瑞光浮。

### 满江红 和赵公明

五老峰前，九江上、曾生仙客。相邂逅，贵池亭下，定交金石。我辈风流宜啸咏，官曹尘冗从煎逼。且簿书、丛里举清觞，偷闲日。

同一笑，当今夕。梅正好，香浮白。便相忘尔汝，醉巾沾湿。已向琼楼夸意态，似闻金殿传消息。想君今，归去际风云，应相忆。

### 柳梢青

云淡秋空。一江流水，烟雨濛濛。岸转溪回，野平山远，几点征鸿。

全宋词 韩 澆

行人独倚孤篷。算此景、如图画中。莫问功名，且寻诗酒，一棹西风。

### 醉蓬莱 寿潘漕

问西湖好处，楼上薰风，有谁称寿。十里荷香，对槐阴清昼。细浪揉蓝，远山凝黛，更管弦初奏。醉舞傞傞，欢声沸沸，生申时候。

膝下婆娑，老莱儿戏，帝所辉光，使衣呈绣。眷倚方隆，赐金章华绶。自此飞腾，凤阁鸾台，好满斟醇酎。道骨仙风，朱颜青鬓，年年依旧。

### 水调歌头

晁子应三十八丈见过，因□张德广对木犀小饮，次德广韵

明月到花影，把酒对香红。此情飘洒，但觉清景满帘栊。人被好花相恼，花亦知人幽韵，佳处本同风。挥手谢尘网，举袂步蟾宫。

秋已半，幽涧侧，乱山中，故人过我，终夕乘兴可千钟。赖有曲江才子，坐上平章花月，不管老英雄。心事将何寄，醉语又匆匆。

### 贺新郎

坐上有举昔人贺新郎一词，极壮，酒半用其韵

万事佯休去。漫栖迟、灵山起雾，玉溪流渚。击楫凄凉千古意，怅快衣冠南渡。泪暗洒、神州沉处。多少胸中经济略，气□□，郁郁愁金鼓。空自笑，听鸡舞。

天关九虎寻无路。叹都把、生民膏血，尚交胡虏。吴蜀江山元自好，形势何能尽语。但目尽、东南风土。赤壁楼船应似旧，问子瑜、公瑾今安否。割舍了，对君举。

又

病起情怀恶。小帘栊、杨花坠絮，木阴成幄。试问春光今几许，都把年华忘却。更多少、从前盟约。拟待莺边寻好语，恍残红、零乱风回薄。思往事，信如昨。

清明寒食须行乐。算人生、何时富贵，自徒萧索。试著春衫从酒伴，乱插繁英嫩萼。信莫被、功名担阁。随分溪山供笑傲，这一身、闲处谁能缚。琴剑外，尽杯酌。

清平乐 七月十三日潘令生朝

鸣琴单父。鳧鷖宜飞去。不比河阳花满树。此意直高千古。

清秋诞日相逢。乃同涧上村依。笑指壶山为寿，仁心静处加功。

水龙吟 七月二十六日信守生朝 王道夫

从来江左夷吾，大名迥诸出公右。金堂玉室，瑶林琼树，龙麟蟠走。志在神皋，气

全宋词 韩 滉

雄云梦，十吞八九。问三槐盛事，当年初度，人应羨、青毡旧。

说与文章太守。庆千秋、好为亲寿。冰桃雪藕，霞裾月佩，莺鸾歌奏。雨熟西畴，星躔南极，宝香凝昼。趁新凉，便约乘云绕日，饮天浆酒。

清平乐 次韵

萧然在涧。景色秋来冠。几缕明霞红未断。矫首时时遐观。

回思五马清游。分明前辈风流。留作山间佳话，更谁愁上眉头。

踏莎行 七夕词

雨意生凉，云容催暮。画楼人倚栏干处。柳边新月已微明，银潢隐隐疏星渡。

今古佳期，漫传牛女。一杯试与寻新句。幽怀冷眼是青山，旧欢往恨浑无据。

清平乐 寿潘文叔

常思高致。又见凉风起。欢喜年时为寿意。快写山歌重寄。

愿公好德康宁。青云收取功名。莫道而今官小，吾儒正要仁民。

柳梢青 雨洗元宵

雨洗元宵。楼台烟锁，隐隐笙箫。且插梅花，自烧银烛，沉水香飘。

软红尘里星桥。想霁色、皇都绛霄。屏掩潇湘，醉和衣倒，春梦迢迢。

菩萨蛮 同仲明饮山隐

雪云收尽晴风软。小山春浪晴波远。梅花已飞香。海棠红试妆。

人言诗易与。酒盏谁分付。不是没心情。夕阳啼鸟声。

一剪梅 送冯德英

说著相思梦亦愁。芳草斜阳，春满秦楼。楼前新绿水西流。一曲阳关，分付眉头。

多少风流事已休。纷薄香浓，怕见绸缪。淡云笼月小庭幽。明日山长，清恨悠悠。

海月谣 送赵永兴宰

晚秋烟渚。更舟倚、萧萧雨。水痕清泚，迤迤渐整，云帆西去。三叠阳关，留下别离情绪。

溪南一坞。对风月，谁为主。酒徒诗社，自此冷落，胸怀尘土。目送鸿飞，莫听数声

柔橹。

好事近 红梅

春色入芳梢，点缀万枝红玉。莫道怕愁贪睡，倚新妆如束。

纷纷桃李太妖绕，相对夜阑烛。记取疏花横处，有暗香飘馥。

菩萨蛮 野趣观海

平生常为梅花醉。数枝滴滴香沾袂。雪后月华明。胆瓶无限清。

夜深灯影瘦。饮尽杯中酒。明日景尤新。人间都是春。

西江月 走笔因宋九韵示黄六

春色著人多少，溪头桃杏舒红。杖藜相与过桥东。往事旧欢如梦。

花底醉眠芳草，柳边嘶入骄骢。如今憔悴坐诗穷。莫问醯鸡舞瓮。

浣溪沙 夜饮仲明小轩

一曲青山映小池。林疏人静月明时。相逢杯酒也相宜。

醉眼不知春事少，欢情犹得漏声迟。神仙何处梦魂飞。

又 仲明命作艳曲

宝鸭香消酒未醒。锦衾春暖梦初惊。鬓云撩乱玉钗横。

半怯夜寒褰绣幌，尚馀娇困剔银灯。粉痕微褪脸霞生。

西江月 次韵

风暖晨光寂寂，月明夜气沉沉。山间林下步轻阴。花柳飞绵布锦。

酒病向谁能遣，春愁惟我难禁。尊前一曲断肠声。梦破晓窗敲枕。

朝中措 次韵

池塘春草燕飞飞。人醉牡丹时。多少姚黄魏紫，搦成腻粉燕支。

谪仙醉把平章看，晴影度帘迟。花外一声鶗鴂，柳边几个黄鹂。

水调歌头 清明严濂

今古钓台下，行客系扁舟。扁舟何似，云山千叠亦东游。我欲停桡一醉，与写平生幽愤，横管更清讴。小上客星阁，短鬓独搔头。

风乍起，烟未敛，雨初收。一年花事，数声鶗鴂欲春休。吊古怀贤情味，只有浮名如故，谁复识羊裘。赖得玄英隐，相望此溪

流。

西江月 四叔生朝

梅蕊小春天气，橘林良月风光。五云边  
近九霞觞。美景初无尽藏。

老矣相逢湖海，年来游遍潇湘。诗情满  
眼兴何长。赢得烟霄直上。

卜算子 生朝次坐客韵呈四叔

花底醉东风，好景宜同寿。海角天涯今  
几春，邂逅新丰酒。

内集记高阳，南渡闲回首。但愿长年饱  
饭休，一笑风尘表。

浣溪沙 夜饮潘舍人家，有客携家妓来歌

小雨收晴作社寒。月桥花院篆香残。杏  
腮桃脸黛眉弯。

歌拂燕梁牵客恨，醉临鸾镜怕人看。良  
宵春梦绕屏山。

菩萨蛮 小词

海棠欲谢绵飞柳。柳丝自拂行人首。上  
巳是清明。新烟带粥饧。

轻阴帘幕冷。闲却秋千影。曲水兴无涯。  
丽人花半遮。

浣溪沙 寿晁元默

湖海相逢更日边。槐风莲雨寿杯前。琴书图画水沈烟。

共指金盞当瀑直，不应彭泽尚回旋。今年初度想超然。

恋绣衾 晁仲一将到滁阳，新买妾

欢浓两点笑靥儿。雪初消、梅欲放时。不信道、伤春瘦，怕人猜、犹待皱眉。

香浓翠被屏山曲，把珊枕、侧过又移。试与伴、江头去，但醉翁、亭上要诗。

浣溪沙 题美人画卷

一曲霓裳舞未终。玉钗垂额鬓云松。梦回金殿月华东。

燕子莺儿情脉脉，柳枝桃叶恨匆匆。罗襟空惹御香浓。

步蟾宫 钓台词

三年重到严滩路。叹须鬓、衣冠尘土。倚孤篷、闲自濯清风，见一片、飞鸿归去。

人间何用论今古。漫赢得、个般情绪。雨吹来云、乱处水东流，但只有、青山如故。

水调歌头 次韵载叔

一枕暑风外，事事且随缘。随缘何处琴剑，闲泊此层巅。日绕九天楼殿，烟抹四山林薄，尘土市声前。老眼醉还醒，犹得到诗边。

桥南院，双桂隐，有名言。江湖人物，好在收拾付书帘。回首吾庐无恙，寄卧僧窗何事，鸿鹄本高骞。水调赋明月，谁道更超然。

鹧鸪天 兰溪舟中

雨湿西风水面烟。一巾华发上溪船。帆迎山色来还去，橹破滩痕散复圆。

寻浊酒，试吟篇。避人鸥鹭更翩翩。五更犹作钱塘梦，睡觉方知过眼前。

水调歌头 次宋侔韵

嘉节已吹帽，谁复见南山。南山佳处，台上云绕一溪环。犹记使君同醉，化鹤千年何在，今古自应慳。胜事漫陈迹，风物只高寒。

都莫问，归酒畔，集毫端。等闲吟笑而已，赖有孔融尊。伟矣广平心致，赢得相遭淡泊，感旧唱酬闲。且看小斋菊，抵掌共凭阑。

减字木兰花 次昌甫韵

年光虚度。能得几多消散处。莫恨归迟。  
得见新词不自持。

山中酒里。笑语喧哗知有弟。此意谁如。  
世事纷纷一任渠。

生查子 梅溪橘阁词

霜叶柳塘风，烟蕊梅溪渡。茅店问村醪，  
未许空归去。

倚杖小徘徊，写我吟边句。醉眼复何之，  
落日孤鸿处。

西江月 晚春时候

闻道晚春时候，暖风是处花飘。游人争  
渡水南桥。多少池塘春草。

跃马谁联玉勒，钓鱼应泛兰桡。韶光何  
限不逍遥。输与溪鸥野鸟。

朝中措 和吴子似

春浓人静倦游嬉。烟雨战棠梨。翠径乱  
红无数，频啼枝上黄鹂。

小园流水溅溅处，绿遍谢家池。怨月恨  
花滋味，泪痕犹染罗衣。

小重山 和吴子似

云影收晴雨外明。碧溪春滟滟，落花平。  
莺声催我过桥行。人何在，诗酒淡心情。

闲里兴还生。锦鳞题尺素，有谁能。草  
边芳径柳边城。归来也，清梦绕山屏。

临江仙 闺怨

脆管繁弦无觅处，小楼空掩遥山。柳丝  
直下曲阑干。海棠红欲褪，玉钏怯春衫

殢酒不成芳信断，社寒新燕呢喃。雕盘  
慵整宝香残。绮疏明薄暮，帘外雨潺潺。

朝中措 平江施倅生朝

五湖烟水百花洲。别乘最风流。人道紫  
枢家世，清时衮衮公侯。

名园绿水春无价，蜀锦舞缠头。眉寿年  
年今日，宝杯香霭飞浮。

月宫春 和吴尉

柳娇花妒燕莺喧。断肠空眼穿。一春风  
雨夜厌厌。不闻钟鼓传。

香冷曲屏罗帐掩，园林谁与上秋千。忆  
得年时凤枕，日高犹醉眠。

全宋词 韩 洵

浣溪沙 满院春

芍药酴醾满院春。门前杨柳媚晴曛。重帘双燕语沉沉。

花映绿娇初日嫩，叶栖红小晚烟昏。轻雷不觉送微阴。

鹧鸪天 禁烟

烟禁荒荒雨湿云。近郊争出满城人。儿童藉草几成市，杯酒沾花不觉村。

身又老，眼增明。回头一任是红尘。山中谁信无寒食，涧上何如且采萍。

一丛花 次韵斯远

翻空雪浪送飞花。春晓媚霜华。风回点点迷人处，峭寒轻、诗思殊佳。双燕未来，断鸿何在，微雨又天涯。

绮窗明暗是谁家。雕槛馥兰芽。画檐帘幕黄昏后，试倾杯、笑语喧哗。聚散人生，吾侪老矣，醉墨任横斜。

眼儿媚

东风拂槛露犹寒。花重湿阑干。淡云殢日，晨光微透，帘幕香残。

阴晴不定瑶阶润，新恨觉心阑。凭高望

全宋词 韩 滉

断，绿杨南陌，无限关山。

青玉案 西湖路

苏公堤上西湖路。柳外跃、青骢去。多少韶华惊暗度。南山游遍，北山归后，总是题诗处。

如今老矣伤春暮。泽畔行吟漫寻句。落拓情怀空自许。小园芳草，短篱修竹，点点飞花雨。

浣溪沙 和辛卿壁间韵

只恐山灵俗驾回。海鸥飞下莫惊猜。机心消尽重徘徊。

宿雨乍晴千涧落，晓云微露两山排。新苗时翼好风来。

朝中措 戏赠郑干

扁舟撑月转江湖。烟水湛金铺。篷底晓凉歌罢，肌肤冰雪初扶。

诗人自是风尘表，佳处句能摹。属玉一双飞去，荷花香动菰蒲。

明月棹孤舟 逢子似清河坊市中客楼小饮

忽得相逢惊似旧。问山中、酒徒诗友。闲倚晴楼，长安市人，华发为君搔首。

全宋词 韩 滂

绿竹疏梅今在否。对西湖、夕阳烟岫。  
鸿雁声中，人间今古，还是醉醒时候。

江城子 德久同醉，子似出新置佐酒，和德久词

天孙应为织云裳。试宫妆。问刘郎。湖  
上波寒，依旧远山苍。自是老来心事懒，空  
落拓，少年场。

挥豪闲与细端相。记严扬。陋苏张。兴  
到一杯，微醉亦成章。回首片帆西去也，何  
日更，共清狂。

冉冉云 弄花雨

倚遍阑干弄花雨。卷珠帘、草迷芳树。  
山崦里、几许云烟来去。画不就、人家院宇。

社寒梁燕呢喃舞。小桃红、海棠初吐。  
谁信道、午醉醒时情绪。闲整春衫自语。

谒金门 东风吹酒面

花影半。晴色乍开云卷。择胜寻春愁日  
短。雨馀山路晚。

涧底桃深红满。人意不禁闲远。胡蝶绕  
枝啼鸟怨。东风吹酒面。

满庭芳 王寺簿生朝

点点淮山，迢迢江水，分明别是风光。

地灵人杰，星斗烂文章。初度充闾佳气，当年瑞、应弄珪璋。薰弦奏，凉宵宝月，玉井藕花香。

清真，如逸少，兰亭修竹，曲水流觞。想醉乡日永，地久天长。小驻屏星怀玉，飞鳧舄、元在鹓行。功名事，云龙风虎，行矣佩金章。

浣溪沙 醉木犀

一曲西风醉木犀。天香吹梦入瑶池。钗横犹记未开枝。

花重嫩舒红笑脸，叶稀轻拂翠颦眉。酒醒残月雁声迟。

又 次韵昌甫

山气吹云宝月凉。园英承露菊花黄。吾生只合醉为乡。

怅望佳人因共赋，分明佳节是重阳。酒边犹发少年狂。

又 次韵昌甫

莫问星星鬓染霜。一杯同看月昏黄。放歌渔父濯沧浪。

却忆手栽双柳句，真成云汉挾天章。苏仙何在立苍茫。

又 霜菊黄

霜后黄花尚自开。老年情绪为何哉。株株浑是手亲栽。

秋际有言挥玉麈，冬来无梦绕金钗。相

思一夜发窗梅。

### 江城子

雪消霜入小溪舟。试浮游。上山头。薄薄寒烟，依旧未全收。问道梅花开也未，吟不尽，一春愁。

襟怀如此老还休。懒凝眸。转深幽。诗罢一眉，新月又如钩。腊后春前村意远，回棹稳，水西流。

### 浣溪沙

野色轩看玉色木犀（紫芝漫抄本调作广寒枝）

月角珠庭映伏犀。扶摇当上凤凰池。广寒曾折最高枝。

壮志还同诸葛膝，清名还似紫芝眉。梅花春寿酒行迟。

### 鹧鸪天 次韵昌甫

老去情怀酒味中。水边林下古人风。岁云暮矣江空晚，谁识儋州秃鬓翁。

人易远，语难工。春时犹记一尊同。苦心未免皆如此，只合挥弦目送鸿。

### 风入松 远山横

小楼春映远山横。绿遍高城。望中一片

全宋词 韩 滂

斜阳静，更萋萋、芳草还生。疏雨冷烟寒食，  
落花飞絮清明。

数声弦管忍重听。犹带微醒。问春何事  
春将老，春不语、春恨难平。莫把风流时节，  
都归闲淡心情。

菩萨蛮 花间意

小园红入春无际。新声休写花间意。一  
笑唤真真。香腮酒未醒。

惜芳追胜事。畅饮馀诗思。无处说衷情。  
暗尘罗帐生。

谒金门 和昌甫

花肃肃。杨柳三眠未足。一棹溪山新涨  
绿。旧欢无梦续。

莫问杜鹃啼蜀。只有江南水竹。北客凄  
凉无伴独。春山生草木。

又 又

幽意熟。吟啸春风自足。爽气初生晴未  
燠。相逢休问卜。

画出高山盘谷。岩上飞云相逐。他日江  
东思渭北。断弦谁为续。

卜算子 中秋前一日和昌甫所寄

一雨已秋深，月色寒而静。夜半披衣草  
树间，玉露团清影。

长笛倚楼声，听彻还重省。手启柴门倦  
复关，云卧衣裳冷。

醉蓬莱 上太守（紫芝漫抄本题作冰玉风月）

庆文章太守，燕寝凝香，诞弥佳节。庾  
岭归来，又经年梅发。棋酒心情，笙歌滋味，  
便合朝天阙。玉作山前，冰为水际，几多风  
月。

绿鬓朱颜，浩然相对，自是中原，旧家  
人物。鹓鹭班回，尚记陪清切。好把胸蟠万  
卷，谈笑了、济时勋业。锦幄初温，宝杯深  
劝，舞回香雪。

朝中措 梅月圆

为兹春酒寿诗翁。我辈一尊同。香动梅  
梢圆月，年年先得东风。

冰溪清浅流环玉，莲幕漫从容。但愿人  
生长久，挥弦目送飞鸿。

太常引 腊前梅

小春时候腊前梅。还知道、为谁开。应  
绕百千回。夜色转、参横斗魁。

十分孤静，替伊愁绝，片月共徘徊。一  
阵暗香来。便觉得、诗情有涯。

朝中措 次韵昌甫见寄

谁翻新曲玉溪滨。何日得为邻。醉里行歌  
歌相答，步随泉石松云。

如今又是梅时候，只有眼中人。魂断幽  
香孤影，花前闲整衣巾。

恋绣衾 泪珠弹

溪风吹雨晚打窗。把心情、阑入醉乡。  
记取在、山深处，我如今、双鬓已苍。

夜阑寒影灯花淡，梦难成、清漏更长。  
宝瑟断、鸾胶续，泪珠弹、犹带粉香。

一翦梅 腊前梅（永乐大典卷二千八百十一作蜡梅春）

一朵梅花百和香。浅色春风，别样宫妆。  
西湖衣钵更难忘。雪意江天，浑断人肠。

清夜横斜竹影窗。赢得相思，魂梦悠扬。  
玉溪山外水云乡。茅舍疏篱，不换金章。

蝶恋花 三十日归途村店市酒，成季、子任同酌而歌

道上疏梅花一树。人去人来，不管流年  
度。闲过南谿同散步。东风为我吹香去。

试问青春今几许。明日新正，溪影横山  
暮。遮莫攀翻君且住。心儿却在题诗处。

又 细雨吹池沼

尽道今年春较早。梅与人情，觉得梅偏好。一树南虢香未老。春风已自生芳草。  
来自城中犹带晓。行到君家，细雨吹池沼。怅望沙坑须会到。玉溪此意年时少。

生查子 梅和柳

山意入春晴，都是梅和柳。白白与青青，日映风前酒。

归去也如何，路上休回首。各自做新年，柳袅梅枝瘦。

探春令 景龙灯

暗尘明月小桃枝，旧家时情味。问而今，风转蛾儿底。有谁把、春衫试。

景龙灯火升平世。动长安歌吹。这山城、不道人能记。甚村酒、偏教醉。

临江仙 画屏春

罗帐画屏新梦悄，绿窗慵起香残。重帘生怕倚阑干。春风吹玉水，春雪满灵山。

梁燕未来归雁动，海棠才带红酣。酒愁花恨霎时间。烟云催薄暮，丝雨湿轻寒。

眼儿媚 社日

风回香雪到梨花。山影是谁家。小窗未晚，重檐初霁，玉倚蒹葭。

社寒不管人如此，依旧在天涯。碧云暮合，芳心撩乱，醉眼横斜。

临江仙 六月二日病差出门散适

竹树阴阴流涧水，黄鹂飞去飞还。蓬门篱落小桥湾。更无尘迹到，我自爱其闲。

雨又随风催薄暮，轻雷时动云斑。归来凉意一窗间。病馀真倦矣，睡熟簟纹宽。

蝶恋花 野趣轩看玉色木犀

斜日清霜山薄暮。行到桥东，林竹疑无路。小院横窗香噀雾。胆屏曲几花如雨。

细酌心情因少驻。九万刚风，寒影吹琼素。不是月宫那有许。霓裳舞彻凌波步。

柳梢青 玉水明沙

玉水明沙。峰回路转，城倚桥斜。老我登临，同谁酩酊，一望还赊。

飞鸿杳霭天涯。但拚取、心情酒家。紫菊枝枝，红茱颗颗，休问年华。

### 满庭芳

玉水灵山，霜天清晓，非烟非雾琴堂，  
载临初度，圭璧记煌煌。百里民安抚字。欢  
呼处、禾黍登场。今年好，为兹春酒，莫惜  
醉淋浪。

神仙，□领袖，山河勋业，星斗文章。  
便黄扉青琐，会遇明良。愿赐尚方之剑，攀  
槛折、於古辉光。飞凫去，甘棠遗爱，留与  
话桐乡。

### 菩萨蛮 梅花句

风前觅得梅花句。香来自是相分付。片  
月动黄昏。一枝横酒尊。

人间何处有。又到春时候。莫负此诗家。  
将心吟好花。

贺新郎 十三日，小园梅枝微红点缀，便觉可句

梅蕊依稀矣。岁华深、倏然但把，杖藜  
闲倚。山绕荒林红叶下，落日孤城烟水。意  
兴寄、云何则是。底事疏枝横绝峭，未吹香、  
便与花相似。不忍折，为之喜。

寒鸦万点霜风起。正人家、园收芋栗，  
小槽初美。欲醉阿谁同一饮，拟赋才成又止。  
老态度、浑侵发齿。摸索孤根春在否。任红  
红、白白皆桃李。空烂漫，岂能尔。

百字令 寿南枝

诏飞天上，看金猊系马，西湖风月。朝罢香烟携满袖，身在琼楼玉阙。锦绣肝肠，珠玑欵唾，绿鬓非华发。与谁经济，河山应笑吴越。

且把春酒寻梅，年年眉寿，坐对南枝发。兵卫朱门森画戟，醉舞尘生罗袜。山面高堂，溪浮新舫，留取邦人说。等闲馀事，一时如此奇绝。

菩萨蛮 赵昌甫折黄岩梅来，且寄菩萨蛮，次韵赋之

陇头无驿奚为朵。岩前有折宜来堕。风急雪云溪。诗清满意携。

竹炉良夜饮。饮竟煎僧茗。梅以句深长。得花情未忘。

小重山 柳色新

点染烟浓柳色新。小桃红映水，日初匀。露收芳径草铺茵。凝情久，风淡起轻尘。

梁燕已争春。折花闲伴酒，试濡唇。流莺何处语声频。阑干曲，蜂蝶更随人。

感皇恩 和吴推官

急管度青枝，醉眠芳草。云断巫阳梦能

到。乍醒馀困，晴影暗移纱帽。旧时闲意思，都忘了。

今岁春迟，去年春早。点点繁红又多少。惜春归去，酒病翻成花恼。数声鸣鸟唤，人惊老。

又 又

诗社酒徒闲，村村花柳。月榭风亭更霞牖。临春结绮，又是那回时候。不禁中夜雨，相偃傺。

弄蕊攀条，为寻芳酒。一斗谁能问千首。江南云梦，空说气吞八九。持杯人共我，能吟否。

瑞鹧鸪 辛镇江有长短句，因韵偶成，愧非禹步尔

南兰陵郡鹧鸪词。底用登临更赋诗。贵不能淫非一日，老当益壮未多时。

人间天上风云会，眼底眉前岁月知。只有海门横北固，宦情随蹀想推移。

浣溪沙 同昌甫饮南池

屋上青山列晚云。水边红袂映斜曛。柳阴荷气簟湘纹。

酒以歌长谁乐事，诗成杯滯我离群。香消凉意有南薰。

又 次韵昌甫

作意如何和好歌。细翻重看得长哦。晓

全宋词 韩 滂

梧吹雨露明荷。

老我从他琴下爨，故人元自笛亭柯。北  
山烟岫郁嵯峨。

又 又

鸦矫荒寒燕复低。门前长草与人齐。长  
桥南岸小桥西。

安得有诗同尔句，可教无酒泛其杯。相  
思常苦易离携。

鹧鸪天 离歌一叠

只唱离歌一叠休。玉溪浮动木兰舟。如  
何又对云烟晚，不道难禁草树秋。

空脉脉，忍悠悠。绸缪终是转绸缪。相  
思相见知何处，记取新欢说旧游。

满江红 陈玉局生朝

归锦堂成，云汉上、天垂新画。有朱颜  
绿鬓，禁林仙客。玉局暂从香火社，金龟未  
报文章力。看彤庭、赐第别承恩，居君侧。

斑衣戏，蟠桃摘。翠袖倚，歌檀拍。正  
祥开初度，颂声千百。又是腊前梅态度，几  
多春近花消息。想明年、今日醉西湖，光辉  
赫。

好事近 翠圆枝

一涧水南山，腊尽春生梅雪。行过小桥

全宋词 韩 滂

深处，带疏钟横月。

征衫闲著指东吴，休怕与人别。吟到翠圆枝上，是归来时节。

菩萨蛮 胡教生朝

南枝已见春消息。今年为寿方知得。俾尔炽而昌。流霞浮暗香。

蓬壶清浅水。笑指云阶喜。高论有规模。平戎赋两都。

浣溪沙 试香罗

风软湖光远荡磨。春衫初试薄香罗。踏青无计奈君何。

莫笑老来多岁月，肯教闲去少诗歌。长安陌上有铜驼。

谒金门 春早湖山

春尚早。春入湖山渐好。人去人来虽未老。酒徒犹恨少。

梅落桃开烟岛。日日更吹香草。一片芳心拚醉倒。冷云藏落照。

祝英台近 寒食词

馆娃宫，采香径，范蠡五湖侧。子夜吴歌，声缓不须拍。崇桃积李花闲，芳洲绿遍，

更冉冉、柳丝无力。

试思忆。老去一片身心，孤负好春色。  
古往今来，时序恼行客。去年今日山中，如何知得。却又在、他乡寒食。

浣溪沙 过卢申之

梅叶阴阴占晚春。博山香尽玉嶙峋。茶  
瓯酒碗试濡唇。

闲里常愁无伴侣，老来不是有情人。牡  
丹天气惜芳辰。

洞仙歌 次韵斯远所赋清溪一曲

溪山好处，赢得题新曲。待足人生甚时  
足。问临流情味，倚遍斜晖，应似画、小景  
生绡一幅。

渔舟声欸乃，岩上云飞，杳杳归鸦去鸿  
逐。任当年伊吕，谈笑兴王，争敌恁、闲眠  
野宿。待雪天、月夜我还来，醉潇洒清幽，  
那些儿屋。

点绛唇 寻瑶草

山凹春生，探梅只道今年早。暗香迎晓。  
入与花能好。

岁岁持杯，天地同难老。须吟啸。放开  
怀抱。更约寻瑶草。

减字木兰花 梅词

菊花开了。待得梅梢来索笑。雪色江波。  
看尽千林未觉多。

一丘缓步。只恐朝来有新句。岁岁年年。  
白发催人到酒边。

采桑子 又一首

萧萧两鬓吹华发，老眼全昏。徙倚衡门。  
岁晚寒消涧水痕。

含情更觉沧洲远，欲语谁论。窈窕孤村。  
细雨梅花只断魂。

又 十四日

华灯自是年年好，月淡烟空。依旧东风。  
箫鼓吹香醉脸融。

谢他诗侣还相见，雨迹云踪。不分情浓。  
柳浅梅深鬓影松。

好事近 次韵昌甫

北客过江来，赢得家家都老。屈指中兴  
人物，到如今谁好。

散庵常是爱山林，健笔胜挥扫。我则临  
风三叹，信儿曹惊倒。

减字木兰花

昌甫以嵇叔夜语作曲，戏用杜子美诗和韵

全宋词 韩 滂

一杯易足。自断此生犹杜曲。词客哀时。  
不敢愁来赋别离。

孤城麦秀。常愧葛洪丹未就。诗罢长吟。  
衰晚迟回违寸心。

鹧鸪天 次韵赵路分生朝所赋

便把山林寄此身。也须诗酒属吾人。仙  
家旧是金堂士，吏隐新收玉局名。

惟自乐，不忧贫。渊明谈笑更清真。年  
年眉寿登高后，醉帽常留菊满簪。

好事近 郑倅生朝

腊雪映江梅，冰玉更分风月。袞袞紫枢  
家世，庆诞弥时节。

烘堂赢得戏莱衣，春酒宝杯凸。籍籍郑  
庄人物，要汉廷勋业。

太常引 呈昌甫

随风和雨带烟开。更清冷、照崔巍。片  
片亦佳哉。细看得、花如翦裁。

茅檐出没，水浮桥外，人自两峰来。吟  
到涧泉梅。问何似、山阴道回。

西江月 次韵赵路分

脉脉蜂黄蝶粉，盈盈水秀山明。卖花声

里听吹箫。佳丽芳华韵胜。

下上休看舞燕，惺忪一任啼莺。枕痕屏  
曲梦关情。酒醒春宵漏尽。

谒金门 次韵郑婺源

行又住。水远山遥村路。把酒问春春几  
许。老年花似雾。

坐上风流张绪。留我我还难去。却忆章  
台飞柳絮。只愁萦暮雨。

绕池游慢 赵倅游濠，作绕池游慢，约同赋

荷花好处，是红酣落照，翠藓馀凉。绕  
郭从前无此乐，空浮动、山影林篁。几度薰  
风晚，留望眼、立尽濠梁。谁知好事，初移  
画舫，特地相将。

惊起双飞属玉，萦小楫冲岸，犹带生香。  
莫问西湖西畔□，□九里、松下侯王。且举  
觞寄兴，看闲人，来伴吟章。寸折柏枝，蓬  
分莲实，徒系柔肠。

鹧鸪天 寿福国陈夫人

静乐堂中禅悦身。相家庆袭两家春。瑶  
池云气冲霄鹤，兰砌风标瑞世麟。

华屋邃，宝杯新。年年秋与月常明。笙  
箫且奏长生曲，宣劝还看送喜频。

忆秦娥 茉莉香滴滴。

肌肤冰雪娇无力。娇无力。秋风凉冷，  
有谁消得。

洗妆不奈云鬟侧。璧堂珠院空相忆。空  
相忆。轻颦浅笑，小梅标格。

朝中措 寄元立

薰风两节照稽山。三百里湖间。镜上谁  
为贺老，棹船能伴官闲。

今年寿日，不妨吟啸，还上清班。为寄  
长生新曲，齐眉想见酡颜。

醉落魄 次韵斯远

风高木落。壮心万里空回薄。振衣待把  
尘埃濯。声里斜阳，孤起戍楼角。

人生谁会谁为错。年来但觉多离索。黄  
花照地浑开却。华发如斯，同和醉落魄。

朝中措 约和卿、敬之持醪为文叔生朝

山林钟鼎似无同。舒卷有穷通。洗出壶  
中三峡，帝城赢得从容。

黄流乱注，狂澜既倒，砥柱能东。此际  
诞弥杯酒，宜歌风虎云龙。

西江月 十一月初六日夜偶成

日日山迷水癖，年年书恼诗痴。寻思那里要他知。试比古人犹未。

往往眼甜口苦，常常心是身非。如何则甚破他疑。只学今人足矣。

阮郎归 客有举词者，因以其韵赋之

小楼秋霁碧阑干。中人初薄寒。霜风吹我到湖山。平林斜照残。

空阔里，有无间。牵萝翠袖闲。篮舆兴尽却愁还。断肠歌未阑。

好事近 同仲至和探梅

湖上有孤山，合把探梅词刻。清浅黄昏时候，冷疏枝寒色。

窗前忽到又如何，一夜足相忆。信道收香藏白，报春风消息。

浣溪沙 清和风

买得船儿去下湖。这些天气近来无。清和风里绿阴初。

酒不为渠闲放荡，诗应嫌我太粗疏。酒徒诗社复何如。

又 寄文叔生朝

江上新凉入酒杯。瑞芝堂祝寿筵开。五  
楼百雉更崔嵬。

劳来流离施菽麦，作成丰稔到田莱。便  
朝天去也徘徊。

醉桃源 昌甫有曲，名之濯纓，因和

残春风雨绕檐声。山空分外鸣。闲来落  
佩倒冠纓。尚馀新旧情。

人不见，句还成。又听求友莺。濯纓一  
曲可流行。何须观我生。

浣溪沙 徐倅生朝

留得菖蒲酒一杯。与公今日寿筵开。灵  
山排闥送青来。

须信南州高士后，持荷持节照苏台。瑞  
云深处是三台。

醉桃源 和昌甫

固穷斋里语吾生。言之必可行。扶疏夏  
木既啼莺。更逢鱼计成。

多雅尚，少时情。沧浪渔父纓。高歌宁  
与俗争鸣。朱弦疏越声。

减字木兰花 初五日昌甫生朝，因庆七十

从心所欲。高蹈祠官惟见独。其寿伊何。  
古井章泉水不波。

腊前梅好。玉洁日光香耐老。才大三千。  
首首清诗得自编。

菩萨蛮 和昌甫见招

归来又喜山中约。菊枝桂树真宜酌。兴  
尽只观山。秋深方闭关。

会须追雅步。策蹇或肩舆。少待必能治。  
膏肓泉石医。

百字令 杨民瞻索古梅曲，次其韵

园居好处，是古梅飞动、欺霜凌雪。底  
问纷华桃李态，自倚天姿明洁。城外灵山，  
桥头玉水，多少佳风月。岁寒时候，南枝尤  
与清绝。

几回唤酒寻诗，诗成小醉，絮帽浑敲侧。  
领略不辞身跌宕，一洗群儿啁哳。太始遗音，  
元和新样，到了都难说。草玄经在，对花何  
闷孤寂。

一翦梅 醉中

醉倒城中不过溪。溪外无尘，惟掩柴扉。

水浮桥漾翠烟霏。一片闲情，能几人知。

留饮君家絮帽敲。爆竹声中，万事如斯。  
梅催春动已熏微。尔既能来，我亦何疑。

贺新郎 次韵昌甫雪梅曲

又见年年雪。水浮桥、南岸幽处，周遭  
森列。横碧轩中空旧话，独钓寒江愁绝。更  
一段、冰霜高洁。忽得两篇强健曲，倚回风、  
洒急凭谁说。嗟巩雒，乃闽浙。

何当醉酒扬雄宅。问避人避地，其如楚  
之舆接。览德已而歌凤去，千仞辉翔难蹑。  
我和句、却愁狂辄。折尽梅花伤岁暮，□撒  
盐、起絮分才劣。鸡犬静，涧篱闲。

点绛唇 五月二日，和昌甫所寄，并简叔通

竹隐高深，夏凉日有清风度。芑衣绳屨。  
鹤发空相顾。

翠扑流烟，又向溪翁去。青山路。要当  
同住。长占无尘处。

菩萨蛮 酒半戏成

秋林只共秋风老。秋山却笑秋吟少。恰  
恨有秋香。青岩秋夜凉。

清秋须是酒。结客秋知否。醉笔写成秋。  
一秋无复愁。

祝英台近 燕莺语

海棠开，春已半，桃李又如许。一朵梨花，院落阑干雨。不禁中酒情怀，爱闲懊恼，都忘却、旧题诗处。

燕莺语。溪岸点点飞绵，杨柳无重数。带得愁来，莫恁空休去。断肠芳草天涯，行云荏苒，和好梦，有谁分付。

谒金门 醉花春

人已醉。溪北溪南春意。击鼓吹箫花落未。杏梅桃共李。

水底鱼龙惊起。推枕月明千里。伊吕衰翁徒尔耳。我怀犹未是。

虞美人 代儿寿黄靖州

晓来一阵催花雨。正桃李、横塘处。笙歌帘幕燕莺喧。春在人间不老、谷城仙。

潇湘图画迎千骑。襦袴欢声起。功名风虎庆云龙。更看万钉横带、系金猊。

朝中措 昌甫作长短句呈朱卿、余倅，因和韵

水南何事兴偏浓。花草小园中。山气静分馀霭，泉声幽转流淙。

午桥坐上英豪客，今昔为谁容。不是倚

楼人在，登临无复携筇。

卜算子 初十日海棠宋十一哥家饮

烟雨海棠花，春夜沈沈酌。寒食清明数  
日间，人也须行乐。

不怕笛声长，只怕风儿恶。烛影红酣宝  
篆香，楼上黄昏角。

谒金门 方斋小集，有琴者，昌甫作词，和韵

闲度日。愁里费人辞辟。榆火新烟还熟  
食。小墙花槛直。

锦字玉徽清集。何用主人留客。相赏暂  
时谁画得。庞公非浪出。

浣溪沙 怨啼鹃

锦瑟瑶琴续断弦。璧堂初过牡丹天。玉  
钩斜压小珠帘。

睡鸭炉温吟散后，双鸳屏掩酒醒前。一  
番春事怨啼鹃。

菩萨蛮 花溪碧

丝丝柳色清愁织。山城望断花谿碧。回  
首仲宣楼。登临无计愁。

雨声吹海立。流转韶光急。九万有鹏程。  
沈香天上亭。

好事近 次韵昌甫

梅雨快晴风，苔竹定翻新箨。相望得寻幽调，把陈言都略。

大江东去更飞云，心事共回薄。仿佛散庵佳处，一声声猿鹤。

又 又

黄发享颐期，兄弟此时宜告。见说对床夜雨，世间尘都扫。

青毡堂外瑞峰高，云气拂晴昊。老大中原人物，在江湖乡保。

又 又

三叠古藤阴，自笑无能为役。千载和陶新曲，了非仙非释。

影徒随我月徘徊，风叶露华湿。瓮下是真逸，醉令人思毕。

朝中措 述旧曲

霓裳霞佩淡丰容。云冷露华浓。唤起石丁归去，冥冥仙仗崆峒。

人间秋老花饶笑，清映小帘栊。记取五城深处，凤箫吹下天风。

水调歌头 坐间有伤仲至，且怀昌甫，因呈张宰

新月已如许，我向带湖梅。人闲题句，

全宋词 韩 滉

赢得浮湊酒盈杯。落拓豪英满坐，烂漫风骚连纸，天外凤凰来，只怕轻孤负，莫待巧安排。

空翠滴，寒爽矣，晚佳哉。为君绝倒，折尽千树玉蓓堆。渺渺章泉好在，寂寂卢泉仙去，今古付尊罍。拍手见花木，放眼记莓苔。

鹧鸪天 看瑞香

看了香梅看瑞香。月桥花槛更云窗。不知是有春多少，玉水灵山醉几场。

闲蝶梦，褪蜂黄。尽温柔处尽端相。珠帘十里扬州路，赢得潘郎两鬓霜。

菩萨蛮 寿昌甫生朝

今年是处梅花早。分时开到章泉好。兄弟寿杯同。暗香明月风。

风流文物旧。春意枝枝透。儿姪定飞轩。衣冠与世传。

又 十五夜，昌甫约赋，寄刘簿

聚星亭下书堂水。冬来欲问梅花使。圭撮是何官。人间有底难。

章泉词和去。交道元如故。转眼岁将穷。溪头鹤发翁。

朝中措 九日周国正席间赋长短句

年年羞插菊花游。华发不禁秋。此日遨

全宋词 韩 滉

头寻胜，消除万斛清愁。

湿云凉雨南台上，歌动玉溪流。俯仰人间今古，多情破帽飕飕。

点绛唇 席间和昌甫

银笔金花，断肠有句闲挥扫。又还落了。梅片阳春小。

古住今来，风味须才调。山林少。这些襟抱。输与江东老。

菩萨蛮 张饶县以一枝梅来，和韵

的皪南枝横县宇。空山无此新花吐。手种几多梅。迎霜今已开。

簪屏聊隐几。诗与君应喜。更报晏斋翁。相将索笑同。

鹧鸪天 冲雨小舟上南港

莫笑闲身老态多。避人避世欲如何。分明画出山阴道，太息吟成宁戚歌。

穿木石，泛烟波。从前魑魅喜人过。灵山西畔高溪上，一棹归来舞短蓑。

浣溪沙 又

系得船儿柳岸头。夹江灯火雨飕飕。寻诗家醉更绸缪。

全宋词 韩 滂

待腊未教寒事少，小春搀取暗香浮。夜  
长飞梦失清愁。

又 至日带湖

爱日回春一线长。氛氲谁忆御炉香。孤  
城岁晚卧沧江。

花底千官迎淑气，湖阴十里写晴光。剩  
拚华发醉为乡。

又 又

春入疏弦调外声。雪云初霁带湖清。屏  
温香软绮窗深。

山倚虚窗情淡淡，水流清浅韵泠泠。断  
魂醒处梦难凭。

谒金门 带湖新月

云外月。画出一痕清绝。梅已飘零桃未  
发。带湖烟水阔。

汀渚尚留微雪。不恨酒融歌歇。老我多  
情胶漫结。半醒空自说。

临江仙 和答昌甫见寄生朝

满眼春生梅柳意，山居清听风泉。又因  
初度说今年。华颠相望处，新曲忽来前。

自笑一周闲甲子，何为佞佛贪仙。如翁  
辈行敢随肩。徒知言语妙，欢喜向谁传。

谒金门 不怕醉

不怕醉。记取吟边滋味。幽草绿阴花絮里。莺啼双燕起。

老去是何乡里。漠漠吴头楚尾。一曲荒山清照水。殢渠杯酒旨。

霜天晓角 又

雨收云薄。有底情怀恶。一段春风花事，吟得就、又忘却。

海棠红未落。细细流霞酌。选甚蝇营狗苟，皆现定、有何错。

临江仙 周国正生朝

寒食清明春事好，公家霁月光风。年时犹记雨声中。州侯陈乐舞，法从酒杯同。

坐上王杨虽自散，醅醱依旧香浓。待将诗易寿无穷。鸢飞鱼跃矣，风虎更云龙。

鹧鸪天 昌甫同明叔饮赵崇公家

莫道庞公不入州。为谁歌酒也迟留。襟期别乘真难事，领略同游岂易谋。

他扰扰，自悠悠。香浮茉莉笑花头。一帘云影催诗雨，唤起佳人无限愁。

鹊桥仙

闲举“金风玉露相逢”之曲，因赋  
诗非漫与，酒非无算，都是悲秋兴在。  
与君觞咏欲如何，画不就、新凉境界。  
微云抹月，斜河回斗，隐隐奇奇怪怪。  
刚风九万舞瑶林，甚些少、人间利害。

浣溪沙 润上昌甫有词

闲里相看两鬓秋。酒能沾醉雨能幽。吾  
庐何幸得翁留。

世路尽教终易与，山林佳话恐难酬。人  
来人去亦知不。

又 元夕

分付心情作上元。不知投老在林泉。谁  
将村酒劝觥船。

月影静摇风柳外，霜华寒浸雪梅边。醉  
敲乌帽忽醒然。

又 生朝和昌甫韵

老觉空生易得年。闲居那复问旌旃。一  
丘春静自回旋。

翁善於人知美矣，我行於世转乖然。清  
词俾寿喜言传。

鹊桥仙 红梅已谢

红梅已谢，杏花开也，一片海棠犹未。  
春风吹我带湖烟，甚恰限、新晴天气。

黄昏楼上，烛花影里，拚得那回滋味。  
暗尘弦索拂纤纤，梦留取、巫山十二。

生查子 晴色入青山

晴色入青山，更见飞花晚。不是不登临，  
自是心情懒。

试褰小红笺，与写天涯怨。杜宇一声春，  
楼下沧波远。

一翦梅 闻笙篴

缥缈神仙云雾窗。说与苏州，未断人肠。  
带湖烟月堕苍茫。唤醒嫦娥，春笋纤长。

马上琵琶半额妆。拨尽相思，十二巫阳。  
疏□清梦入潇湘。佩玉鸣鸾，吹下天香。

眼儿媚 下郭赵园

西溪回合小青苍。梅雨弄残阳。意行陇  
亩，景分庭院，乳燕春长。

酒深不用人歌啸，锄圃试商量。细唏菜  
甲，旋寻蔬笋，一梦黄粱。

水调歌头 次韵倅车寿守

一曲笙歌外，四座笑谈清。使君秋霁领客，别乘更宗英。想像亲闱称寿，写就通家情分，相与庆恩荣。欢动桂花发，香雾扑帘旌。

功名事，台阁路，好同登。只今报政归诏，舆论正蜚声。以我文章学术，与国和平安靖，冠剑入明庭。应顾棠阴下，野老鬓星星。

鹧鸪天 十二月二十二日

云到春飞若素期。柳条吹送落梅枝。冰壶表里谁能赋，玉鉴圆明且屈卮。

村舍北，郡楼西。治中风调只心知。不堪野老关门醉，想见山翁倒载时。

桃源忆故人 杏花风

杏花雨里东风峭。不比寻常开了。枝上飞来多少。人与春将老。

山城灯火笙箫杳。梦到十洲三岛。睡觉绮窗清晓。绿遍池塘草。

浣溪沙 十六夜

荆楚谁言镜听词。烛花影动画檐低。烧

灯天气醉为期。

雨湿杏腮疑淡淡，风迷柳眼半昏昏。小山西路板桥西。

菩萨蛮 次韵昌甫见贻生朝

春来晴雨常相半。水光风力花撩乱。山北与山南。行歌或再三。

诵君诗过日。才大真盘屈。寿我敢言酬。相望亦饮不。

浣溪沙 十四日

百花丛里试新妆。不许巫山枉断肠。牡丹风飏曲声长。

寒食清明闲节序，绮窗朱户少年场。燕泥香润落空梁。

虞美人 姑苏画莲

西湖十里孤山路。犹记荷花处。翠茎红蕊最关情。不是薰风、吹得晚来晴。

而今老去丹青底。醉腻娇相倚。棹歌声缓采香归。如梦如醒、新月照涟漪。

又 赵倅酌别灵山阁

送君报最登朝路。初整曹装处。又因杯酒见馀情。凉雨灵山阁上、月初晴。

醺然领客襟怀底。消得栏干倚。风流别乘我依归。清誉冰溪棠荫、绿漪漪。

朝中措 赵倅约玉楼溪小集，不及往，因寄一曲

一番风月已平分。留得玉溪云。蔼蔼宾僚如故，东楼北海清尊。

荷香凉透，柳阴深锁，翠袂珠裙。□到九重城里，才华好覩吾君。

浣溪沙 秋思

宋玉悲秋合反骚。陶潜把菊任持醪。山遥遥外水萧萧。

梦不到时诗自在，兴难忘处恨全消。香沈沈里蕊飘飘。

朝中措 赵伊一哥回侍

君之竹隐是章泉。只要世家传。莫道闲诗浪句，风花雪月云烟。

一杯我醉，百年人事，乾转坤旋。直与唤回兴替，羲皇留下遗编。

浣溪沙 沙溪小饮

一抹青山拍岸溪。麦云将过笋初齐。不知何处水流西。

小阁路头吾欲醉，短篷船尾客同携。酒边华发更题诗。

又 次韵伊一

水绕孤村客路赊。一楼风雨角巾斜。举觞无复问煎茶。

夜静曲声初喷竹，酒深烛影细吹花。明朝飞鹭起圆沙。

又 又

忆把兰桡系柳堤。斜风细雨一蓑衣。夕阳回照断霞飞。

洛浦佩寒如隔日，高唐梦到又何时。背人挑□独心知。

水调歌头 和石倅寿汤守

玉水灵山地，燕寝亦书功。邦人耆老，诞弥佳节以词通。尔岂知吾恺悌，我乃因君谈笑，祝寿酒杯同。箫鼓少人会，歌舞为谁容。

观坐客，惊野老，笔如风。个般酬唱，诏回应上玉华东。多少家传经济，留与孙谋持守，出处信何穷。唤起千年调，分付一车公。

菩萨蛮 次韵

人间多少闲风度。薄情失记相逢处。绿鬓画鸦儿。旧巢双燕栖。

舞衫回素玉。檀板声何蹙。一抹晚霞飞。泪痕无脸啼。

浣溪沙 戏成寄李叔谦

彩笔新题字字香。雁来时候燕空梁。芙蓉无处著秋光。

人远山长言外意，曲传书恨醉时妆。倩谁闲寄水云乡。

菩萨蛮 晚云烘日

晚云烘日枝南北。一杯未尽梅花曲。城郭小春回。暗香开未开。

留连吾欲醉。醉眼红尘外。多少老心情。景清人亦清。

少年游 玉腊梅枝

闲寻杯酒，清翻曲语，相与送残冬。天地推移，古今兴替，斯道岂雷同。

明窗玉蜡梅枝好，人情淡、物华浓。个样风光，别般滋味，无梦听飞鸿。

蝶恋花 次韵伊一

未就丹砂须九转。谁把新词，歌绕梁尘遍。拍拍韶华春意满。揆予初度文何健。

恰是山花汀草远。独乐园林，不梦笙歌殿。灵气仙才非小见。霞杯漫道蟠桃献。

又 次韵郑一

千叶香梅春在手。日薄帘栊，花影遮前后。小立徐行还易久。微吟莫厌伤多酒。  
拾翠流红弦管透。望断青青，休问行人柳。往事如云如梦否。连天芳草惊依旧。

点绛唇 王园

南陌柔桑，粉墙低见谁家女。燕飞莺语。依约提篮去。  
老觉多情，梦也无分付。君知否。楚襄何处。一段阳台雨。

浣溪沙 为仲如赋茉莉

滴滴琼英发翠绡。江梅标韵木香娇。乍凉时候漏声遥。  
欲绾鬢丝妆未了，半回身分曲初招。霓裳依约梦魂飘。

又 小集润亭

雨阁云流小院秋。半醺凉意不关愁。一番相见一番休。  
淡伫乍持杯未浅，懒歌浑罢笑初收。主宾无处著绸缪。

摊破浣溪沙 杨梅

生与真妃姓氏同。家随西子苧萝东。谁

全宋词 韩 滉

道玉肌寒起粟，酒能红。

火齐烧空来上苑，冰浆凝露在西宫。不似荔枝生处远，恨薰风。

## 韩 轆

### 高阳台 除夜

频听银签，重燃绛蜡，年华袞袞惊心。  
钱旧迎新，能消几刻光阴。老来可惯通宵饮，  
待不眠、还怕寒侵。掩清尊。多谢梅花，伴  
我微吟。

邻娃已试春妆了，更蜂腰簇翠，燕股横  
金。勾引东风，也知芳思难禁。朱颜那有年  
年好，逞艳游、赢取如今。恣登临。残雪楼  
台，迟日园林。

### 浪淘沙

莫上玉楼看。花雨斑斑。四垂罗幕护朝  
寒。燕子不知人去也，飞认阑干。

回首几关山。后会应难。相逢只有梦魂  
间。可奈梦随春漏短，不到江南。

### 又 丰乐楼

裙色草初青。鸭绿波轻。试花霏雨湿春  
晴。三十六梯人不到，独唤瑶箏。

艇子忆逢迎。依旧多情。朱门只合锁娉

婷。却逐彩鸾归去路，香陌春城。

### 长相思

郎恩深。妾思深。只为恩深便有今。回纹辜旧吟。

云沈沈。水沈沈。一点坚如百炼金。郎应知妾心。

又

杜娘家。谢娘家。楼压官桥柳半遮。帘波漾彩霞。

拾飞花。怨飞花。望断郎来日又斜。东风吹鬓鸦。

又

夜萧萧。梦萧萧。又趁杨花到谢桥。凤沈明月箫。

来迢迢。去迢迢。枉把吟笺寄寂寥。飞鸿不受招。

## 和 岷

### 开宝元年南郊鼓吹歌曲三首

#### 导 引

气和玉烛，睿化著鸿明。缙管一阳生。  
郊禋盛礼燔柴毕，旋轸凤凰城。森罗仪卫振  
华缨。载路溢欢声。皇图大业超前古，垂象  
泰阶平。岁时丰衍，九土乐升平。睹寰海澄  
清。道高尧舜垂衣治，日月并文明。嘉禾甘  
露登歌荐，云物焕祥经。兢兢惕惕持谦德，  
未许禅云亭。

#### 六 州

严夜警，铜莲漏迟迟。清禁肃，森陛戟，  
羽卫俨皇闱。角声励，钲鼓攸宜。金管成雅  
奏，逐吹逶迤。荐苍璧，郊祀神祇。属景运  
纯禧。京坻丰衍，群材乐育，诸侯述职，盛  
德服蛮夷。殊祥萃，九苞丹凤来仪。膏露降，  
和气洽，三秀焕灵芝。鸿猷播，史册相辉。  
张四维。卜世永固丕基。敷玄化，荡荡无为。  
合尧舜文思。混并寰宇，休牛归马，销金偃

革，蹈咏庆昌期。

## 十二时

承宝运，驯致隆平。鸿庆被寰瀛。时清俗阜，治定功成。遐迩咏由庚。严郊祀，文物声明。会天正、星拱奏严更。布羽仪簪纓。宸心虔洁，明德播惟馨。动苍冥。神降享精诚。燔柴半，万乘移天仗，肃銮辂旋衡。千官云拥，群后葵倾。玉帛旅明庭。韶濩荐，金奏谐声。集休亨。皇泽浹黎庶，普率洽恩荣。仰钦元后，睿圣贯三灵。万邦宁。景祝福千龄。

## 何钜翁

### 满庭芳

二气旋还，三宫升降，往来于是无穷。  
透关神水，铅汞过三峰。返复周流八脉，戊  
己炼、阴虎阳龙。凝情处，金光朗朗，身外  
见形容。

灵光，真造化，天机深远，推测难通。  
算利名酒色，恰似秋风。大道玄炉进火，三  
田内养出神功。功成后，金书来诏，平步赴  
瑶宫。

## 何大圭

### 小重山 惜别

绿树莺啼春正浓。钗头青杏小，绿成丛。  
玉船风动酒鳞红。歌声咽，相见几时重。  
车马去匆匆。路随芳草远，恨无穷。相思  
只在梦魂中。今宵月，偏照小楼东。

### 水调歌头

今夕出佳月，银汉泻高寒。风缠云卷，转  
觉天陛玉楼宽。疑是金华仙子，又喜经年药  
就，倾出玉团团。收拾江河影，都向镜中蟠。  
横霜笛，吹明影，到中天。要令四海瞻望，  
千古此轮安。何岁何年无月，唯有谪仙著语，  
高绝不能攀。我欲唤空起，云海路漫漫。

### 蝶恋花

鱼尾霞收明远树。翠色黏天，一叶迎风  
举。一笑相逢蓬海路。人间风月如尘土。  
翦水双眸云鬓吐。醉到天瓢，笑语生香  
雾。此会未阑须记取。蟠桃几度吹红雨。

# 何 光 大

## 谒金门

天似水。池上藕花风起。隔岸垂杨青到地。乱萤飞又止。

露湿玉阑闲倚。人静自生凉意。泛碧沈朱供晚醉。月斜才去睡。

## 何令修

### 望江南

登龙脊，抚剑一长歌。巫峡峰高腾凤鹤，夔门波阔失蛟鼉。东望意如何。

## 何 梦 桂

### 声声慢 寿何思院母夫人

人间六月。好是王母瑶池，吹下冰雪。一片清凉，仙界蕊宫珠阙。金猊水沈未冷，看瑶阶、九开蓂荚。尚记得，那年时手种，蟠桃千叶。

庭下阿儿痴绝。争戏舞、绿袍环玦。笑捧金卮，满砌兰芽初茁。七十古来稀有，且高歌、万事休说。天未老，尚看他、儿辈事业。

### 八声甘州 寿徐信甫母夫人七秩

对芙蓉峰晓，雪初消、云□霭烟霏。是阿谁寿母，紫鸾笙里，玉液琼枝。元是云翘仙子，珥节度瑶池。手种碧莲子，长记年时。

此地神仙宫阙，几花封玉诰，金帔霞衣。但寿星堂上，七十古来稀。捧寿觞、莫辞满饮，愿年年、对鹤发蛾眉。年年有，麻姑麟脯，王母玄梨。

又

送王野塘北归。东鲁王君野塘，以均房招讨经

全宋词 何梦桂

历按涖严陵，至且再期矣。夹谷按察签事行部，识拔于稠众人中，使下六邑，按问脏状，阅实以闻，自此声誉猎猎如日起。壬午秋，省台檄交至，君奉命以往，阅岁而后归，归则诸公已列剡交荐矣。旂麾载道，凡六七年间，蒙被休泽，而歌颂勋德于祖帐之下，骈肩累迹，不特如老书生一人而已。酌钓濑之泉，磨锦峰之石，固不足以形容伟绩。濡毫染茧，为赋八声甘州，姑记其际遇之私、依恋之情云尔。试使善歌者为我歌之，当使送君短长亭下者，皆为君堕泪也。

对千峰未晓，听西风、吹角下谯楼。拥貔貅千骑，旌旄十里，送客芳洲。曾是灯棋月柝，赞画坐清油。折尽长亭柳，莫系行舟。

忆昔相逢何处，看飞鸿雪迹，休更回头。百年心事，长逐水东流。愿君如游龙万里，我如云、终泊此林丘。相思梦，明年雁到，尚讯南州。

满庭芳 初夏

燕子芹乾，龙孙箨老，绿阴深锁林塘。午风庭院，人试薄罗裳。数尽落红飞絮，摘青梅、煮酒初尝。重门静，一帘疏雨，消尽水沈香。

把当年团扇，恩情犹在，未是相记。笑衰翁鬓发，早已苍苍。说与乘鸾彩女，看世间、多少炎凉。都休怨，百年一梦，且共醉霞觞。

踏莎行

夜月楼台，夕阳庭院。都将前事思量遍。

当初识面待寻常，争知识后情如线。

只怕梅梢，参横斗转。催人归去天涯远。  
断肠当在别离时，未曾说著肠先断。

### 摸鱼儿

记年时、人人何处，长亭曾共尊酒。酒  
阑归去行人远，折不尽长亭柳。渐白首。待  
把酒送君，恰又清明后。青条似旧。问江北  
江南，离愁如我，还更有人否。

留不住，强把蔬盘澹韭。行舟又报潮候。  
风急岸花飞尽也，一曲啼红满袖。春波皱。  
青草外，人间此恨年年有。留连握手。叹人  
世相逢，百年欢笑，能得几回又。

又

把人间、古今勋业，一时都付杯酒。青  
山行遍人华发，老尽门前青柳。试回首。记  
晓雨征衫，又过年时后。相逢故旧。浪说南  
楼北，亭花纵好、能似少年否。

还自笑，应是山林厌韭。忘却儿童迎候。  
兴来谩学长沙舞，要舞更无长袖。眉休皱。  
欢笑外，风涛世上时时有。共君握手。且尽  
日尊前，相拌一醉，醉后明朝又。

### 意难忘

避暑林塘。数元戎小队，一簇红妆。旌  
旛云影动，帘幕水沈香。金缕彻，玉肌凉。  
慢拍舞轻扬。更一般，轻弦细管，孤竹空桑。

风姨昨夜痴狂。向华峰吹落，云锦天裳。  
波神藏不得，散作满池芳。移彩鹢，柳阴傍。  
拚一醉淋漓。向晚来、歌阑饮散，月在纱窗。

### 喜迁莺

留春不住。又早是清明，杨花飞絮。杜  
宇声声，黄昏庭院，那更半帘风雨。劝春且  
休归去。芳草天涯无路。悄无语。倚阑干立  
尽，落红无数。

谁诉。长门事，记得当年，曾趁梨园舞。  
霓羽香消，梁州声歇，昨梦转头今古。金屋  
玉楼何在，尚有花钿尘土。君不顾。怕伤心，  
休上危楼高处。

### 临江仙 和毅斋见寿

十月江南风信早，梅枝早鬣先春。田园  
剩得老来身。浪言陶处士，犹是晋朝臣。

人道革爻居四九，谁知数在遭迍。明年  
五十志当伸。低头羞老妇，且结会稽盟。

### 满江红

春色三分，怎禁得、几番风力。又早见、  
亭台绿水，柳摇金色。满眼春愁无著处，知  
心惟有幽禽识。望青山、目断夕阳边，孤云  
隔。

琴酒我，成三一。湖外舫，山头屐。且

全宋词 何梦桂

莫教春去，乱红堆积。记得年时陪宴赏，重  
门深处桃花碧。待修书、欲寄楚天遥，无行  
客。

### 忆秦娥

伤离别。江南雁断音书绝。音书绝。两  
行珠泪，寸肠千结。

伤心长记中秋节。今年还似前年月。前  
年月。那知今夜，月圆人缺。

### 西江月

犹记春风庭院，柳阴深锁帘帷。东君去  
后雨丝丝。空认紫骝嘶处。

梦断箫台无据，十年往事休追。忽然拈  
起旧来书。依旧长亭双泪。

### 小重山

吹断笙箫春梦寒。倚楼思往事，泪偷弹。  
别时容易见时难。相看处，惟有玉连环。

人在万重山。近来应不似，旧时颜。重  
门深院柳阴间。曾携手，休去倚危阑。

### 沁园春 寿夹谷书隐

光岳储精，宇宙呈祥，钟英俊材。想春  
秋夹谷，前生夫子，婆娑南赡，见在如来。

全宋词 何梦桂

龙角标辰，蟾胎煊丙，好是生朝华宴开。笙歌里，看儿童拜舞，春满行台。

重重好事相催。便对把黄封酌寿罍。更愿公殿上，早纡袞绣，愿公堂下，长戏衣莱。昨夜瑶池，亲逢阿母，欲寄蟠桃桃始栽。三千岁，待开花结子，岁岁衔杯。

满江红 和王伟翁上巳

睡起纱窗，问春信、几番风候。待去做、踏青鞋履，懒拈纤手。尘满翠微低鬣叶，离愁推去来还又。把菱花、独对泪阑干，羞蓬首。

回鸾字，空怀袖。金缕曲，无心奏。记碧桃花下，夜参横斗。六幅罗裙香凝处，痕痕都是尊前酒。到如今、肠断怕回头，长门柳。

沁园春

江淮等处行尚书省参知政事高公，以至元二十七年庚寅春提兵繇歙之淳，入长乐境，平诸盗、越两旬肃清，八月朔师还。山人何某谨拜手歌沁园春持献，以尾凯歌之后尘。词曰

袞衣绣裳，彤弓卢矢，山西将门。自雪岭蓬婆，夷成坦道，炎州蜒獠，划去连营。吴越儿童，江淮草木，七见元戎识姓名。争知道，这一隅斗大，尚借麾旌。

西风吹下无声。看万骑貔貅入井陉。彼山棚颯颯，雷霆震击，海濒赤子，天日开明。

全宋词 何梦桂

事业方来，乾坤无尽，千古英雄不偶生。从  
兹去，看云台翼轸，麟阁丹青。

水龙吟 和何逢原见寿

倚窗闲嗅梅花，霜风入袖寒初透。吾年  
如此，年年十月，见梅如旧。白发青衫，苍  
头玄鹤，花前尊酒。问梅花与我，是谁瘦绝，  
正风雨、年时候。

不怕参横月落，怕人生、芳盟难又。高  
楼何处，寒英吹落，玉龙休奏。前日花魁，  
后来羹鼎，总归岩岫。但逋仙流落，诗香留  
与，孤山同寿。

酹江月 和江南惜春

三分春色，更消得风雨，几番零落。年  
少不来春老去，空负省微阶药。燕子飞忙，  
杜鹃啼杀，总为谁悲乐。临春结绮，旧家何  
处楼阁。

一任年去年来，怅歌阑舞断，尘生帘幕。  
千古雷塘浑一梦，人世到头俱错。百岁心期，  
一春光景，付与闲杯酌。青蛇犹在，莫教雷  
雨飞却。

又 感旧再和前韵

问春何去，乱随风飞堕，杨花篱落。罗  
袜香囊无觅处，谁有返魂灵药。细柳重门，  
碧桃深巷，回首曾行乐。玉龙吟断，夜深人  
在江阁。

全宋词 何梦桂

因念璧月琼枝，对玉人何处，绣帘珠幕。  
一半青铜尘满匣，空抚鸾刀金错。微露烟销，  
莲膏花凝，不寐还孤酌。一春心事，总将愁里  
消却。

沁园春 和何逢原见寿

老去无心，看尽青山，山前暮云。问重来  
海燕，乌衣安在，乍归辽鹤，华表空存。世路  
悠悠，风尘渺渺，白发相催乌兔频。浮生事，  
算天涯海角，谁是闲人。

几番甲子庚申。看青草年年秋又春。笑  
武陵源上，桃花未实，昆仑山下，瑶树长新。  
霓羽飘零，蛾眉萧飒，欲觅神仙隔两尘。草  
堂在，但休教山鬼，夜半移文。

摸鱼儿 邵清溪赋，效顰谩作

把心期、半生辜负。玉堂元在何处。朱  
弦弹绝无人听，空操离鸾烈女。遇不遇。休  
更问、悠悠世事都如许。人生草露。看百岁  
勋名，青铜鬓影，抚剑泪如雨。

知谁语。落落江空岁暮。人间一梦今古。  
雷塘十里斜阳外，野草寒鸦无数。身世寓。  
聊尔耳、江山有恨谁堪付。冰心更苦。都说  
与梅花，参横月落，一醉且归去。

洞仙歌 答何君元寿词

天涯何处，望苍江渺渺。纵算解飞人不

到。笑双丸乌兔，两鬓霜蓬，聊尔耳，那是人间三岛。

黄梁初梦觉，起看孤云，还自长歌自长啸。不记桃源何地，橘渚何年，生涯事、惟有炉烟茶灶。问先生谁友，有白石青松，共成三老。

### 喜迁莺 感春

东君别后。见说道花枝，也成消瘦。夜雨帘栊，柳边庭院，烦恼有谁拊就。犹记旧看承处，梅子枝头如豆。最苦是，向重门人静，月明时候。

知否。人不见，纵有音书，争似重携手。旧日沈腰，如今潘鬓，怎奈许多僝僽。极目万山深处，肠断不堪回首。情寸寸，到如今，只在长亭烟柳。

### 沁园春 寿毅斋思院五十二岁

尚书当年，蓬矢桑弧，初度佳期。是词林老虎，文场威凤，人中祥瑞，天下英奇。太守买臣中书坡老，五十二年回首非。人间事，且开眉一笑，醉倒金卮。

阿婆还忆年时。也曾趁鸿胪拜玉墀。念青衫荷叶，嫁衣尚在，青铜菱影，破镜犹遗。半席寒毡，一官俯首，造物还应戏小儿。问天道，看是他谁戏我，我戏他谁。

八声甘州 伤春

倚阑干立尽，看东风、吹度柳绵飞。怕杜鹃啼杀，江南雁杳，游子何之。梦断扬州芍药，落尽簇红丝。歌吹今何在，一曲沾衣。

往事不堪重省，记柳边深巷，花外幽墀。把菱花独照，脂粉总慵施。怅春归、留春未住，奈春归、不管玉颜衰。伤心事，都将分付，榆砌苔矶。

又 再用韵述怀

自辽东鹤去，算何人、插得翅能飞。笑平生错铸，儒冠误识，者也焉之。谩道寒蚕冰底，瓮茧解成丝。何许丝千丈，补得龙衣。

镜里不堪勋业，纵梦中八翼，不到天墀。看播间富贵，妻妾笑施施。对青山、千年不老，但梅花、头白伴人衰。严陵路，年年潮水，不上渔矶。

贺新郎 和邵清溪自寿

世事浑无定。问人间、翻来覆去，阿谁能忍。海怒惊涛山相拍，选甚鱼龙不任。看今古、英雄销尽。坐对青山闲白日，付长江、流送千年恨。天有意，唯何甚。

待将洗耳泉边枕。正梅花、霜寒月白，斗回西柄。自寿一觞花前醉，醉弹彩幡金胜。笑儿辈、汾阳中令。倚遍层楼阑干曲，慨乾坤、渺渺青云影。无限事，尊前兴。

又 再用韵伤春

花落风初定。倚危阑、衷情欲诉，踌躇不忍。把酒问春春无语，吹落游尘怎任。待泪雨、红妆蔫尽。不道燕衔春将去，误啼鹃、唤起年年恨。芳草路，人愁甚。

浮生一梦黄粱枕。且不妨、狂歌醉舞，麈谈挥柄。金谷平泉俱尘土，谁是当年豪胜。但五柳、依然陶令。千古兴亡东流水，望孤鸿、没处残阳影。无限意，伤春兴。

又 三用韵寄旧宫怨

更静钟初定。卷珠帘、人人独立，怨怀难忍。欲拨金猊添沈水，病力厌厌不任。任蝶粉、蜂黄消尽。亭北海棠还开否，纵金钗、犹在成长恨。花似我，瘦应甚。

凄凉无寐闲衾枕。看夜深、紫垣华盖，低摇杠柄。重拂罗裳蹙金线，尘满双鸳花胜。孤负我、花期春令。不怕镜中羞华发，怕镜中、舞断孤鸾影。天尽处，悠悠兴。

八声甘州 感兴

叹人生聊尔，便晨风、翼倦也回飞。况自骑款段，欲追骐驎，千里安之。种得玄芝瑶草，不染满头丝。一醉梅花下，笑舞青衣。

说甚封侯万里，待朱门画戟，大第崇墀。人世何时□足，造物任隆施。怪周公、如今不梦，意周公、政自怪吾衰。归来去，夕阳牛陇，夜月鸥矶。

洞仙歌 和何逢原见寿

青衫白发，独倚江楼小。待欲题诗压崔颢。慨凤台今在否，白鹭沙洲，芳草外、剩得闲身江表。

醉来疑梦里，梦入梅花，歌彻青衣听清窈。起看飞鸿没尽，白鸟玄驹，谁能数、曹瞒袁绍。待明年、七十问何如，笑只是今朝，浣花堂老。

玉漏迟 和何君元寿梅

问春先开未，江南野水，得春初小。独殿群芳，却道花前开早。长苦冰霜压尽，更说甚、风标清窈。些子好。孤香冷艳，有谁知道。

年年吹落还开，听画角楼头，送他昏晓。何处玉堂，满地苍苔不扫。谁是肝肠铁石，与共说、岁寒怀抱。花未老。无奈酒阑情好。

蓦山溪 和雪

飞仙欲下，水殿严妆早。娇涩怕春知，跨白虬、天门未晓。霓裳零乱，肌骨自清妍，梅檐月，柳桥风，世上红尘杳。

重门深闭，忘却山阴道。呼酒嚼琼花，任醉来、玉山倾倒。无言相对，这岁暮心期，茅舍外，玉堂前，处处风流好。

又 再用韵

春工未觉，何处琼英早。夜半翦银河，到人间、楼台初晓。霏霏脉脉，不是不多情，金帐暖，玉堂深，却怪音尘杳。

天公谪下，暂落红尘道。颜色自还怜，怕轻狂、随风颠倒。冰心谁诉，但吹入梅花，明月地，白云阶，相照天寒好。

又 三用韵

蓬蓬窈窕，睡梦惊回早。谁为散天花，遍人间、夜深分晓。虚空幻出，富贵照乾坤，琼万顷，玉千株，莫道壶天杳。

平明三尺，不拣江南道。只怕不坚牢，被天工、小儿翻倒。凝冰泮水，世态总无凭，明日事，昨朝人，谁丑还谁好。

沁园春 寿何逢原北堂

孔盖霓旌，月佩云裳，人间女仙。问韶光九十，何如今待，明朝最处，好是明年。戏舞称觞，一堂家庆，眼见儿孙曾又玄。奇绝处，看菱花白发，不改朱颜。

当年。手种红莲。笑几度桑田沧海干。想蟾胎炼就，紫皇灵药，龙髯飞堕，玉女云骈。青鸟重来，红霞俨在，一曲云和犹未闲。羞尘世，把蛾眉蝉鬓，空为谁妍。

浣溪沙 寄刘总管

细柳连营绿荫重。暖风旗影扬蛇龙。昼

全宋词 何梦桂

闲吟思入千峰。

紫绶金牌人绿发，绣鞞丝辔马青骢。会将三箭取侯封。

又 再用韵并简二千户

金紫山前山万重。山高云密下苍龙。春来好雨遍三峰。

芳草郊原眠茧犊，垂杨营垒系花骢。趣归行有紫泥封。

蝶恋花 即景

风信花残吹柳絮。柳外池塘，乳燕时飞度。漠漠轻云山约住。半村烟树鸠呼雨。

竹院深深深几许。深处人闲，谁识闲中趣。弹彻瑶琴移玉柱。苍苔满地花阴午。

大江东去 自寿

半生习气，被风霜、销尽头颅如许。七十年来都铸错，回首邯郸何处。杜曲桑麻，柴桑松菊，归计成迟暮。一樽自寿，不妨沈醉狂舞。

休问沧海桑田，看朱颜白发，转次全故。乌兔相催天也老，千古英雄坏土。汾水悲歌，雍江苦调，堕泪真儿女。兴亡一梦，大江依旧东注。

玉漏迟 自寿

青衫华发，对风霜、倚遍危楼孤啸。恶

全宋词 何梦桂

浪平波，看尽世间多少。忘却金闺故步，都付与、野花啼鸟。只自笑。悠悠心事，无人知道。

扰扰世路红尘，看销尽英雄，青山亦老。宇宙无穷，事业到头谁了。高楼一声画角，把千古、梦中吹觉。天欲晓。起看蕊梅春小。

又 和

自怜翠袖，向天寒、独倚孤篁吟啸。半世虚名，孤负白云多少。欲问梅翁旧约，怕误我、沙头鸥鸟。时一笑。行行且止，人间蜀道。

休怪岁月无情，叹尘世浮生，闲忙闲老。待趁黑头，万里封侯都了。今古勋名一梦，听未彻、钧天还觉。羌管晓。楼角曙星稀小。

水龙吟 和邵清溪咏梅见寿

分知白首天寒，千林摇落寻真隐。天工付与，冰肌雪骨，暗香寒凝。自许贞心，肯教色界，软红尘近。怅绿衣舞断，参横梦觉，依稀旧家犹认。

不为角声吹落，向花前、为伊悲恨。玉堂茅舍，风流随处，年年孤另。不是人间，肝肠铁石，相逢休问。算知心、只许东风，漏泄一分春信。

八声甘州 送吕总管

恨公来较晚，早归朝、骢马去难留。是

朱轮华毂，联珪叠组，家世公侯。今在玉堂深处，借重护偏州。好把青毡拂，奕世勋猷。

明日东津归路，正梅花霜暖，春上枝头。看连旗列鼓，送客下江楼。对云山、千年不老，向楼前、阅尽几行舟。留名在，严陵滩下，日夜东流。

传言玉女 寿何逢原母夫人九十一

阿母今朝，飞下琼楼金阙。先教玉女，为传言细说。蟠桃手种，尚记此春时节。三千春后，开花初结。

宴罢瑶池，洗娥眉、已半雪。九旬偷度，笑韶光一映。仙翁日月。算与人间全别。从今一岁，年年三月。

最高楼 寿南山弟七旬

南山老，还记少陵诗。七十古来稀。清池拥出红蕖坠，西风吹上碧梧枝。趁今朝，斟寿酒，记生时。

也不羨、鲲鹏飞击水。也不羨、蛟龙行得雨。人世事，总危机。扶床正好看孙戏，舞衫不要笑儿痴。更损簪，三老子，鬓如丝。

## 何师心

### 满江红

按郡志，涪溪侧十里有瀑布，泻出两峰间，垂数十丈，号水帘洞。其侧有亭，山谷榜曰奇观

一水飞空，揭起珠帘全幅。不须人卷，不须人轴。一点不容飞燕入，些儿未许游鱼宿。向山头、款步听疏音，清如玉。

三峡水，堪人掬。三汲浪，堪龙浴。更两边潇洒，数竿修竹。晓倩碧烟为绳束夜凭新月为钩曲。问当年、题品是何人，黄山谷。

## 何蓑衣道人

### 临江仙

在世为仙须有分，不须素食持斋。寸丝不著挂形骸。蓑衣为伴侣，箬笠作家怀。

行满三千上界，奉敕宣至金台。传言问汝有何哉。人生长富贵，阴鹭种将来。

## 何仙姑

### 八声甘州

千门万户 ,尽七颠八倒 ,掘地寻天。真个  
玄妙 ,返作笑胡言。无为大道人行少 ,向捏怪  
途中有万千。伤感。蜨转却做灵丹。无奈伤  
嗟最苦 ,又不知端的 ,枉弃了家缘。

时间清静 ,岂解汞收铅。心思意想 ,何曾  
遣暂合眼。阴魔作睡缠。展转。越思深返作  
仇冤。谁信无中生有 ,有中生无 ,万派归源。

## 何作善

### 浣溪沙

草草杯盘访玉人。灯花呈喜座添春，邀郎  
觅句要奇新。

黛浅波娇情脉脉，云轻柳弱意真真。从今  
风月属闲人。

## 何 澹

### 鹧鸪天 绕花台

庾岭移来傍桂丛。绕花安敢望凌风。癯  
儒合作孤芳伴，四面相看一笑同。冰照座，  
玉横空。雪花零落暗香中。有人醉倚阑干畔，  
付与江南老画工。

### 桃源忆故人

拍堤芳草随人去。洞口山无重数。剪朝  
露成树。争晚渔翁住。  
今人忍听秦人语。只有花无今古。欲饮  
仙家寿醕。记取桥边路。

### 满江红 和陈郎中元夕

灯夕筵开，人物共、英词三绝。环坐处、  
袖中珠玉，郢中春雪。红烛星繁销夜漏，紫  
霞香满催歌拍。算新年、何处不风光，三山  
别。

云表殿，千层结。花藉锦，添明月。更  
浮屠七塔，万枝争发。多谢一天驱宿霭，故

教三日成佳节。更何须、海上觅蓬莱，真仙阙。

又 再和诸人元夕新赋

乐禁初开，平地耸、海山清绝。千里内、欢声和气，可融霜雪。盛事总将椽笔记，新歌翻入梨园拍。道古来、南国做元宵，今宵别。

灯万碗，花千结。星斗上，天浮月。向玉绳低处，笙箫高发。人物尽夸长乐郡，儿童争庆烧灯节。疑此身、清梦到华胥，朝金阙。

鹧鸪天 灯夕雨雪

好景良辰造物悭。一年灯火遽摧残。雨淋夹道星千点，雪阻游人路九盘。

停社舞，撤宾筵。谩烧银烛照金莲。不如我入香山社，一盏青灯说夜禅。

## 何籀

### 宴清都

细草沿阶软。迟日薄，蕙风轻蔼微暖。  
春工靳惜，桃红尚小，柳芽犹短。罗帏绣幕  
高卷。又早是、歌慵笑懒。凭画楼，那更天  
远，山远，水远，人远。

堪叹。傅粉疏狂，窃香俊雅，无计拘管。  
青丝绊马，红巾寄泪，甚处迷恋。无言泪珠  
零乱。翠袖滴、重重渍遍。故要知、别后思  
量。归时觑见。

### 菩萨蛮 春闺

南园满地堆轻絮。愁闻一霎清明雨。雨  
后却斜阳。杏花零落香。

无言匀睡脸。枕上屏山掩。时节欲黄昏。  
无聊独倚门。

## 何棹

### 采桑子

百花丛里花君子，取信东君。取信东君。  
名策花中第一勋。

结成宝鼎和羹味，多谢东君。多谢东君。  
香遍还应号令春。

### 虞美人

分香帕子揉蓝腻。欲去殷勤惠。重来直  
待牡丹时。只恐花知、知后故开迟。

别来看尽闲桃李。日日阑干倚。催花无  
计问东风。梦作一双蝴蝶、绕芳丛。

### 失调名

便饶你、漫天索价，待我略地酬伊。

又

细雨共斜风，作轻寒。

## 贺怜怜

### 长相思

朝相思。暮相思。朝暮相思无尽时。奉  
君肠断词。

生相思。死相思。生死相思两处辞。何  
由得见之。

### 南乡子

勉强赠行装。原尔长驱扫夏凉。威镇雷  
霆传号令，轩昂。万里封侯相自当。

功绩载旗常。恩宠朝端谁比方。衣锦归  
来携两袖，天香。散作春风满洛阳。

## 贺 铸

### 天宁乐 铜人捧露盘引

斗储祥，虹流祉，兆黄虞。未□□、□  
圣真符。千龄叶应，九河清、神物出龟图。  
□□□□，□盛时、朝野欢娱。

靡不覆，旋穹□，□□□，□坤舆。致  
万国、一变华胥。霞觞□□，□□□、  
□□□宸趋。五云长在，望子□、□□□□。

### □□□ 七娘子

□波飞□□□向。□□□、□□□□样。  
拥鼻微吟，捋须遐想。□□□□□□上。

会须加数□□酿。□□□、□□□□涨。  
美满孤帆，轻便双桨。中分□□□□往。

### 鸳鸯语 同前

京江抵、海边吴楚。铁瓮城、形胜无今  
古。北固陵高，西津横渡。几人携手分襟处。

凄凉绿水桥南路。奈玉壶、难叩鸳鸯语。  
行雨行云，非花非雾。为谁来为谁还去。

全宋词 贺 铸

璧月堂 小重山

梦草池南璧月堂。绿阴深蔽日，啜鹂黄。  
淡蛾轻鬓似宜妆。歌扇小，烟雨画潇湘。  
薄晚具兰汤。雪肌英粉膩，更生香。簟  
纹如水竟檀床。雕枕并，得意两鸳鸯。

群玉轩 同前

群玉轩中迹已陈。江南重喜见，广陵春。  
纤秾合度好腰身。歌水调，清啜□□□。  
团扇掩樱唇。七双胡蝶子，表□□。  
□□□复旧东邻。风月夜，怜取眼前人。

□□□ 同前

隔水桃花□□□。□□□□□，□□□。  
□妆飞鹊镜台前。□□□，□□□□□。  
□首已依然。断云疏雨后，更闻蝉。  
□□□叶付漪涟。驰寄与，人住玉溪边。

辨弦声 迎春乐

琼琼绝艺真无价。指尖纤、态闲暇。几  
多方寸关情话。都付与、弦声写。  
三月十三寒食夜。映花月、絮风台榭。  
明月待欢来，久背面、秋千下。

攀鞍态 同前

逢迎一笑金难买。小樱唇、浅蛾黛。玉  
环风调依然在。想花下、攀鞍态。

伫倚碧云如有待。望新月、为谁双拜。  
细语人不闻，微风动、罗裙带。

辟寒金 同前

六华应腊妆吴苑。小山堂、晚张燕。赏  
心不厌杯行缓。待月度、银河半。

缥缈郢人歌已断。归路指、玉溪南馆。  
谁似辟寒金，聊借与、空床暖。

尔汝歌 清商怨

劳生羁宦未易处。赖醉□□□。白眼青  
天，忘形相尔汝。

□□□□□□。□□□、送君南浦。雪  
暗沧江，□□□□□。

□□□ 同前

扬州商女□□□。□□□□□。□寄扁  
舟，江南湖北道。

津头龙祠屡□。□信指、半春前到。笑  
倚危樯，朝来风色好。

半死桐 思越人，亦名鹧鸪天

重过阊门万事非。同来何事不同归。梧桐半死清霜后，头白鸳鸯失伴飞。

原上草，露初晞。旧栖新垅两依依。空床卧听南窗雨，谁复挑灯夜补衣。

剪朝霞 牡丹 同前

云弄轻阴谷雨乾。半垂油幕护残寒。化工著意呈新巧，剪刻朝霞钉露盘。

辉锦绣，掩芝兰。开元天宝盛长安。沈香亭子钩阑畔，偏得三郎带笑看。

避少年 同前

谁爱松陵水似天。画船听雨奈无眠。清风明月休论价，卖与愁人直几钱。

挥醉笔，扫吟笺。一时朋辈饮中仙。白头□□江湖上，袖手低回避少年。

□□□ 同前

留落吴门□□□。□□□□□□□。扁舟更入毗陵道，却□□□□□□。

□□念，付清觞。樵青与我和沧浪。浮云□是无根物，南北东西不碍狂。

千叶莲 同前

闻你依嗟我更嗟。春霜一夜扫秣华。永  
无清啜欺头管，赖有浓香著臂纱。

侵海角，抵天涯。行云谁为不知家。秋  
风想见西湖上，化出白莲千叶花。

第一花 同前

豆蔻梢头莫漫夸。春风十里旧繁华。金  
楼玉蕊皆殊艳，别有倾城第一花。

青雀舫，紫云车。暗期归路指烟霞。无  
端却似堂前燕，飞入寻常百姓家。

花想容 武陵春

南国佳人推阿秀，歌醉几相逢。云想衣  
裳花想容。春未抵情浓。

津亭回首青楼远。帘箔更重重。今夜扁  
舟泪不供。犹听隔江钟。

□□□ 古捣练子

楼上鼓，转□□。□□□□□□□。思  
妇想无肠可断，□□□□□□□。

夜捣衣 同前

收锦字，下鸳机。净拂床砧夜捣衣。马

全宋词 贺 铸

上少年今健否，过瓜时见雁南归。

杵声齐 同前

砧面莹，杵声齐。捣就征衣泪墨题。寄到玉关应万里，戍人犹在玉关西。

夜如年 同前

斜月下，北风前。万杵千砧捣欲穿。不为捣衣勤不睡，破除今夜夜如年。

翦征袍 同前

抛练杵，傍窗纱。巧翦征袍斗出花。想见陇头长戍客，授衣时节也思家。

望书归 同前

边堠远，置邮稀。附与征衣衬铁衣。连夜不妨频梦见，过年惟望得书归。

醉厌厌 南歌子

紫陌青丝鞵，红尘白纈衫。谁怜绣户闭香奁。分付一春心事、两眉尖。

怯冷重熏被，羞明半卷帘。欢归斜□□□□。□□□□□□、醉厌厌。



疏雨池塘见，微风襟袖知。阴阴夏木啭  
黄鹂。何处飞来白鹭、立移时。

易醉扶头酒，难逢敌手棋。日长偏与睡  
相宜。睡起芭蕉叶上、自题诗。

窗下绣 一落索

初见碧纱窗下绣。寸波频溜。错将黄晕  
压檀花，翠袖掩、纤纤手。

金缕一双红豆。情通色授。不应学舞爱  
垂杨，甚长为、春风瘦。

艳声歌 太平时七首（案实有八首）

蜀锦尘香生袜罗。小婆娑。个侬无赖动  
人多。是横波。

楼角云开风卷幕，月侵河。纤纤持酒艳  
声歌。奈情何。

唤春愁

天与多情不自由。占风流。云闲草远絮  
悠悠。唤春愁。

试作小妆窥晚镜，淡蛾羞。夕阳独倚水  
边楼。认归舟。

### 花幕暗

绿绮新声隔坐闻。认殷勤。尊前为舞郁金裙。酒微醺。

月转参横花幕暗。夜初分。阳台拚作不归云。任郎瞋。

### 晚云高

秋尽江南叶未凋。晚云高。青山隐隐水迢迢。接亭皋。

二十四桥明月夜，弭兰橈。玉人何处教吹箫。可怜宵。

### 钓船归

绿净春深好染衣。际柴扉。溶溶漾漾白鸥飞。两忘机。

南去北来徒自老，故人稀。夕阳长送钓船归。鳊鱼肥。

### 爱弧云

闲爱孤云静爱僧。得良朋。清时有味是无能。矫聋丞。

况复早年豪纵过，病婴仍。如今痴钝似寒蝇。醉懵腾。

替人愁

风紧云轻欲变秋。雨初收。江城水路漫悠悠。带汀洲。

正是客心孤迥处，转归舟。谁家红袖倚津楼。替人愁。

梦江南

九曲池头三月三。柳毵毵。香尘扑马喷金衔。浣春衫。

苦笋鲋鱼乡味美，梦江南。阊门烟水晚风恬。落归帆。

愁风月 生查子三首

风清月正圆，信是佳时节。不会长年来，处处愁风月。

心将熏麝焦，吟伴寒虫切。欲遽就床眠，解带翻成结。

绿罗裙

东风柳陌长，闭月花房小。应念画眉人，拂镜啼新晓。

伤心南浦波，回首青门道。记得绿罗裙，处处怜芳草。

陌上郎

西津海鹢舟，径度沧江雨。双舻本无情，  
鸦轧如人语。

挥金陌上郎，化石山头妇。何物系君心，  
三岁扶床女。

卷春空 定风波

墙上天挑簌簌红。巧随轻絮入帘栊。自  
是芳心贪结子。翻使。惜花人恨五更风。

露萼鲜浓妆脸靓。相映。隔年情事此门  
中。粉面不知何处去。无奈。武陵流水卷春  
空。

桃源行 风栖梧三首

流水长烟何缥缈。诘□□□，□逗渔舟  
小。夹岸桃花烂□□。□□□□□□□。

箫闲村落田畴好。避地移家，  
□□□□□。□□殷勤送归棹。闲边勿为他  
人道。

西笑吟

桃叶园林风日好。曲径珍丛，处处闻啼  
鸟。翠珥金丸委芳草。袜罗尘动香裙扫。

片帆乘兴东流早。每话长安，引领犹西

笑。离索年多故人少。江南有雁无书到。

### 望长安

排办张灯春事早。十二都门，物色宜新  
晓。金犊车轻玉骢小。拂头杨柳穿驰道。

莼羹鲈脍非吾好。去国讴吟，半落江南  
调。满眼青山恨西照。长安不见令人老。

### 呈纤手 木兰花三首

秦弦络络呈纤手。宝雁斜飞三十九。徵  
韶新谱日边来，倾耳吴娃惊未有。

文园老令难堪酒。蜜炬垂花知夜久。更  
须妩媚做腰肢，细学永丰坊畔柳。

### 归风便

津亭薄晚张离燕。红粉□歌持酒劝。歌  
声煎泪欲沾襟，酒色□□□□□。

□□会有归风便。休道相忘秋后□。  
□□□抵故人心，惆怅故人心不见。

### 续渔歌

中年多办收身具。投老归来无著处。四  
肢安稳一渔舟，只许樵青相伴去。

沧州大胜黄尘路。万顷月波难滓污。阿  
侬原是个中人，非谓鲈鱼留不住。

惜馀春 踏莎行七首

急雨收春，斜风约水。浮红涨绿鱼文起。  
年年游子惜馀春，春归不解招游子。

留恨城隅，关情纸尾。阑干长对西曛倚。  
鸳鸯俱是白头时，江南渭北三千里。

题醉袖

浅黛宜颦，明波欲溜。逢迎宛似平生旧。  
低鬟促坐认弦声，霞觞滟滟持为寿。

浓染吟毫，偷题醉袖。寸心百意分携后，  
不胜风月两厌厌，年来一样伤春瘦。

阳羨歌

山秀芙蓉，溪明罨画。真游洞穴沧波下。  
临风慨想斩蛟灵，长桥千载犹横跨。

解组投簪，求田问舍。黄鸡白酒渔樵社。  
元龙非复少时豪，耳根清净功名话。

芳心苦

杨柳回塘，鸳鸯别浦。绿萍涨断莲舟路。  
断无蜂蝶慕幽香，红衣脱尽芳心苦。

返照迎潮，行云带雨。依依似与骚人语。  
当年不肯嫁春风，无端却被秋风误。

平阳兴

凉叶辞风，流云卷雨。寥寥夜色沈钟鼓。  
谁调清管度新声，有人高卧平阳坞。

草暖沧洲，潮平别浦。双凫乘雁方容与。  
深藏花屋锁雕笼。此生乍可输鹦鹉。

晕眉山

镜晕眉山，囊熏水麝。凝然风度长闲暇。  
归来定解鹔鹕裘，换时应倍骅骝价。

殢酒伤春，添香惜夜。依稀待月西厢下。  
梨花庭院雪玲珑，微吟独倚秋千架。

思牛女

楼角参横，庭心月午。侵阶夜色凉经雨。  
轻罗小扇扑流萤，微云度汉思牛女。

拥髻柔情，扶肩匿语。可怜分破□□□。  
□□□□有佳期，人间底事长如许。

负心期 浣溪沙

节物侵寻迫暮迟。可胜摇落长年悲。回首五湖乘兴地。负心期。

惊雁失行风翦翦，冷云成阵雪垂垂。不拚尊前泥样醉，个能痴。

醉中真 减字浣溪沙七首

不信芳春厌老人。老人几度送馀春。惜  
春行乐莫辞频。

巧笑艳歌皆我意，恼花颠酒拚君瞋。物  
情惟有醉中真。

频载酒

金斗城南载酒频。东西飞观跨通津。漾  
舟聊送雨馀春。

桃李趣行无算酌，桑榆收得自由身。酣  
歌一曲太平人。

掩箫斋

落日逢迎朱雀街。共乘青舫度秦淮。笑  
拈飞絮罥金钗。

洞户华灯归别馆。碧梧红药掩箫斋。愿  
随明月入君怀。

杨柳陌

兴庆宫池整月开。□□□□缕金鞋。后  
庭芳草绿缘阶。

袂褰归□杨柳陌，□□□落凤凰钗。细  
风抛絮入人怀。

### 换追风

掌上香罗六寸弓。雍容胡旋一盘中。目成心许两匆匆。

别夜可怜长共月，当时曾约换追风。草生金埒画堂空。

### 最多宜

半解香绡扑粉肌。避风长下绛纱帷。碧琉璃水浸琼枝。

不学寿阳窥晓镜，何烦京兆画新眉。可人风调最多宜。

### 锦缠头

旧说山阴禊事修。漫书茧纸叙清游。吴门千载更风流。

绕郭烟花连茂苑，满船丝竹载凉州。一标争胜锦缠头。

### 将进酒 小梅花二首

城下路。凄风露。今人犁田古人墓。岸头沙。带蒹葭。漫漫昔时，流水今人家。黄埃赤日长安道。倦客无浆马无草。开函关。掩函关。千古如何，不见一人闲。

六国扰。三秦扫。初谓商山遗四老。驰

全宋词 贺 铸

单车。致缄书。裂荷焚芰，接武曳长裾。高流端得酒中趣。深入醉乡安稳处。生忘形。死忘名。谁论二豪，初不数刘伶。

行路难

缚虎手。悬河口。车如鸡栖马如狗。白纶巾。扑黄尘。不知我辈，可是蓬蒿人。衰兰送客咸阳道。天若有情天亦老。作雷颠。不论钱。谁问旗亭，美酒斗十千。

酌大斗。更为寿。青鬓常青古无有。笑嫣然。舞翩然。当垆秦女，十五语如弦。遗音能记秋风曲。事去千年犹恨促。揽流光。系扶桑。争奈愁来，一日却为长。

东邻妙 木兰花

张灯结绮笼驰道。六六洞天连夜到。昭华吹断紫云回，怳怅人间新梦觉。

倾城犹记东邻妙。尊酒相逢留一笑。卢郎任老也多才，不数五陵狂侠少。

问歌颦 雨中花令

清滑京江人物秀。富美发、丰肌素手。宝子馀妍，阿娇馀韵，独步秋娘后。

奈倦客襟怀先怯酒。问何意、歌颦易皱。弱柳飞绵，繁花结子，做弄伤春瘦。

画楼空 诉衷情三首

吴门春水雪初融。触处小桡通。满城弄  
黄杨柳，著意恼春风。

弦管闹，绮罗丛。月明中。不堪回首，  
双板桥东，罨画楼空。

偶相逢

彩山涌起翠楼空。箫鼓沸春风。桂娥唤  
回清昼，夹路宝芙蓉。

长步障，小纱笼。偶相逢。艳妆宜笑，  
隐语传情，半醉醒中。

步花间

凭陵残醉步花间。风绰佩珊珊。踏青解  
红人散，不耐日长闲。

纤手指，小金环。拥云鬟。一声水调，  
两点春愁，先占眉山。

醉梦迷 丑奴儿二首

深坊别馆兰闺小，障掩金泥。灯映玻璃。  
一枕浓香醉梦迷。

醒来拟作清晨散，草草分携。柳巷鸦啼。  
又是明朝日向西。

忍泪吟

十年一觉扬州梦，雨散云沈。隔水登临。  
扬子湾西夕照深。

当时玉管朱弦句，忍泪重吟。辨取沾襟。  
短竹西风□□□。

凌歊 铜人捧露盘引

控沧江。排青嶂，燕台凉。驻彩仗、乐  
未渠央。岩花磴蔓，妒千门、珠翠倚新妆。  
舞闲歌悄，恨风流、不管馀香。

繁华梦，惊俄顷，佳丽地，指苍茫。寄  
一笑、何与兴亡。量船载酒，赖使君、相对  
两胡床。缓调清管，更为侬、三弄斜阳。

秋风叹 燕瑶池

琼钩褰幔。秋风观。漫漫。白云联度河  
汉。长宵半。参旗烂烂。何时旦。

命闺人、金徽重按。商歌弹。依稀广陵  
清散。低眉叹。危弦未断。肠先断。

断湘弦 万年欢

淑质柔情，靓妆艳笑，未容桃李争妍。  
红粉墙东，曾记窥宋三年。不间云朝雨暮，  
向西楼、南馆留连。何尝信，美景良辰，赏

心乐事难全。

青门解袂，画桥回首，初沈汉佩，永断湘弦。漫写浓愁幽恨，封寄鱼笺。拟话当时旧好，问同谁、与醉尊前。除非是，明月清风，向人今夜依然。

子夜歌 忆秦娥

三更月。中庭恰照梨花雪。梨花雪。不胜凄断，杜鹃啼血。

王孙何许音尘绝。柔桑陌上吞声别。吞声别。陇头流水，替人呜咽。

独倚楼 更漏子三首

上东门，门外柳。赠别每烦纤手。一叶落，几番秋。江南独倚楼。

曲阑干，凝伫久。薄暮更堪搔首。无际恨，见闲愁。侵寻天尽头。

翻翠袖

绣罗垂，花蜡换。问夜何其将半。侵舄履，促杯盘。留欢不作难。

令随阍，歌应弹。舞按霓裳前段。翻翠袖，怯春寒。玉阑风牡丹。

付金钗

付金钗，平斗酒。未许解携纤手。吟警

全宋词 贺 铸

句，写清愁。浮骖为少留。

旧游踪。新梦后。月映隔窗疏柳。闲砚席，剩衾裯。今秋似去秋。

伴登临 中吕宫丑奴儿

中吴茂苑繁华地。冠盖如林。桃李成阴。若个芳心、真个会琴心。

高秋霁色清於水。月榭风襟。且伴登临。留与他年、尊酒话而今。

苗而秀

吴都佳丽苗而秀。燕样腰身。按舞华茵。促遍凉州、罗袜未生尘。

□□□□□透。歌怨眉颦。张燕宜频。□□□□、□□□□□。

东吴乐 尉迟杯

胜游地。信东吴绝景饶佳丽。平湖底，见层岚，凉月下，闻清吹。人如秣李。泛襟袂、香润苹风起。喜凌波、素袜逢迎，领略当歌深意。

鄂君被。双鸳绮。垂杨荫，夷犹画舸相舫。宝瑟弦调，明珠佩委。回首碧云千里。归鸿后、芳音谁寄。念怀县、青鬓今无几。枉分将、镜里华年，付与楼前流水。

台城游 水调歌头

南国本潇洒。六代浸豪奢。台城游冶。鬢笺能赋属宫娃。云观登临清夏。璧月留连长夜。吟醉送年华。回首飞鸳瓦。却羨井中蛙。

访乌衣，成白社。不容车。旧时王谢。堂前双燕过谁家。楼外河横斗挂。淮上潮平霜下。檣影落寒沙。商女篷窗罅。犹唱后庭花。

潇湘雨 满庭芳

一阙离歌，满尊红泪，解携十里长亭。木兰归棹，犹倚彩苹汀。鸦噪黄陵庙掩，因想像、鼓瑟湘灵。渔村远，烟昏雨淡，灯火两三星。

愁听，檣影外，繁声骤点，□□□□。□□□□□，浓睡香屏。入梦难留□□，□□□、□□□□。□窗晓，云容四敛，江上数峰青。

念离群 沁园春

宫烛分烟，禁池开锁，凤城暮春。向落花香里，澄波影外，笙歌迟日，罗绮芳尘。载酒追游，联镳归晚，灯火平康寻梦云。逢迎处，最多才自负，巧笑相亲。

全宋词 贺 铸

离群。客宦漳滨。但惊见、来鸿归燕频。  
念日边消耗，天涯怅望，楼台清晓，帘幕黄昏。  
无限悲凉，不胜憔悴，断尽危肠销尽魂。  
方年少，恨浮名误我，乐事输人。

宛溪柳 六么令

梦云萧散，帘卷画堂晓。残薰尽烛隐映，  
绮席金壶倒。尘送行鞭袅袅。醉指长安道。  
波平天渺。兰舟欲上，回首离愁满芳草。

已恨归期不早。枉负狂年少。无奈风月  
多情，此去应相笑。心记新声缥缈。翻是相  
思调。明年春杪。宛溪杨柳，依旧青春为谁  
好。

伤春曲 满江红

火禁初开，深深院、尽重帘箔。人自起、  
翠衾寒梦，夜来风恶。肠断残红和泪落。半  
随经雨飘池角。记彩兰、携手曲江游，年时  
约。

芳物大，都如昨。自怨别，疏行乐。被  
无情欢燕，短封难托。谁念东阳销瘦骨。更  
堪白纻衣衫薄。向小窗、题满杏花笺，伤春  
作。

横塘路 青玉案

凌波不过横塘路。但目送、芳尘去。锦

全宋词 贺 铸

瑟华年谁与度。月桥花院，琐窗朱户。只有春知处。

飞云冉冉蘅皋暮。彩笔新题断肠句。若问闲情都几许。一川烟草，满城风絮。梅子黄时雨。

人南渡 感皇恩

兰芷满芳洲，游丝横路。罗袜尘生步。迎顾。整鬟颦黛，脉脉两情难语。细风吹柳絮。人南渡。

回首旧游，山无重数。花底深朱户。何处。半黄梅子，向晚一帘疏雨。断魂分付与。春将去。

薄 幸

艳真多态。更的的、频回眄睐。便认得、琴心相许，与写宜男双带。记画堂、斜月朦胧，轻颦微笑娇无奈。便翡翠屏开，芙蓉帐掩，与把香罗偷解。

自过了收灯后，都不见、踏青挑菜。几回凭双燕，丁宁深意，往来翻恨重帘碍。约何时再。正春浓酒暖，人闲昼永无聊赖。厌厌睡起，犹有花梢日在。

伴云来 天香

烟络横林，山沈远照，迢迢黄昏钟鼓。

全宋词 贺 铸

烛映帘栊，蛩催机杼，共苦清秋风露。不眠思妇，齐应和、几声砧杵。惊动天涯倦宦，  
衮衮岁华行暮。

当年酒狂自负。谓东君、以春相付。流浪征骖北道，客樯南浦。幽恨无人晤语。赖  
明月曾知旧游处。好伴云来，还将梦去。

念良游 满江红

山缭平湖。寒飏扬、六英纷泊。清镜晓、倚岩琪树，挠云珠阁。窈窕缁窗褰翠幕，尊  
前皓齿歌梅落。信醉乡、绝境待名流，供行  
乐。

时易失，今犹昨。欢莫再，情何薄。扁  
舟幸不系，会寻佳约。想见徘徊华表下，个  
身似是辽东鹤。访旧游、人与物俱非，空城  
郭。

寒松叹 胜胜慢二首

鹤惊桥断，凤怨箫闲，彩云薄晚苍凉。  
难致祖洲灵草，方士神香。寒松半敲涧底，  
恨女萝、先委冰霜。宝琴尘网，□□□□，  
□□□□。

依□履綦行处，酸心□，□□□□□□。  
□□帘垂翠地，簟竟空床。伤春燕归洞户，  
更悲秋、月皎回廊。同谁消遣，一年年夜夜  
长。

### 凤求凰

园林霁翠，燕寝凝香。华池缭绕飞廊。坐按吴娃清丽，楚调圆长。歌阑横流美眇，乍疑生、绮席辉光。文园属意，玉觞交劝，宝瑟高张。

南薰难销幽恨，金徽上，殷勤彩凤求凰。便许卷收行雨，不恋高唐。东山胜游在眼，待纫兰、撷菊相将。双栖安稳，五云溪是故乡。

### 国门东 好女儿 [四] 首

车马匆匆。会国门东。信人间、自古销魂处，指红尘北道，碧波南浦，黄叶西风。

堠馆娟娟新月，从今夜、与谁同。想深闺、独守空床思，但频占镜鹊，悔分钗燕，长望书鸿。

### 九回肠

削玉销香。不喜浓妆。倚高楼、望断章台路，但垂杨永巷，落花微雨，芳草斜阳。

赖有雕梁新燕，试寻访、五陵狂。小华笺、付与西飞去，印一双愁黛，再三归字，□九回肠。

### 月先圆

才色相怜。难偶当年。屡逢迎、几许缠绵意，记秋千架底，擗蒲局上，袂褰池边。

收贮一春幽恨，细书遍、研绫笺。算蓬山、未抵屏山远，奈碧云易合，彩霞深闭，明月先圆。

### 绮筵张

绮绣张筵。粉黛争妍。记六朝、旧数闺房秀，有长圆璧月，永新琼树，随步金莲。

不减丽华标韵，更能唱、想夫怜。认情通、色受缠绵处，似灵犀一点，吴蚕八茧，汉柳三眠。

### 舞迎春 迎春乐

云鲜日嫩东风软。雪初融、水清浅。粉□舞按迎春遍。似飞动、钗头燕。

深折梅花曾寄远。问谁为、倚楼凄怨。身伴未归鸿，犹顾恋、江南暖。

### 城里钟 菩萨蛮

厌厌别酒商歌送。萧萧凉叶秋声动。小泊画桥东。孤舟月满篷。

高城遮短梦。衾藉馀香拥。多谢五更风。

犹闻城里钟。

望西飞 清商怨三首

十分持酒每□□。□□□□□。□计留  
春，春随人去远。

东流□□□□。□□□、好凭双燕。望  
断西风，高楼帘暮卷。

东阳叹

流连狂乐恨景短。奈夕阳送晚。醉未成  
欢，醒来愁满眼。

东阳销瘦带展。望日下、旧游天远。泪  
洒春风，春风谁复管。

要销凝

雕梁寻巢旧燕侣。似向人欲语。试问来  
时，逢郎郎健否。

春风深闭绣户。尽便旅、一庭花絮。要  
自销凝，吟郎长短句。

想车音 兀令

盘马楼前风日好。雪销尘扫。楼上宫妆  
早。认帘箔微开，一面嫣妍笑。携手别院重  
廊，窈窕花房小。任碧罗窗晓。

间阔时多书问少。镜鸾空老。身寄吴云

全宋词 贺 铸

杳。想辘轳车音，几度青门道。占得春色年年，随处随人到。恨不如芳草。

荆溪咏 渔家傲

南岳去天才尺五。荆溪笠泽相吞吐。十日一风仍再雨。宜禾黍。秋成处处宜禾黍。

坊市万家连岛屿。长杨□□□□□。  
□□□□□□□。能歌舞。刘郎不□□□□。

吹柳絮 鹧鸪词

月痕依约到西厢。曾羡花枝拂短墙。初未识愁那得泪，每浑凝梦奈馀香。

歌逢袅处眉先妩，酒半酣时眼更狂。闲倚绣帘吹柳絮，问何人似冶游郎。

江如练 蝶恋花

睡鸭炉寒熏麝煎。寂寂歌梁，无计留归燕。十二曲阑闲倚遍。一杯长待何人劝。

不识当年桃叶面。吟咏佳词，想像犹曾见。两桨往来风与便。潮平月上江如练。

宴齐云 南歌子

境跨三千里，楼侵尺五天。碧鸳鸯瓦昼生烟。未信西山台观、压当年。

野色分禾黍，秋声入管弦。闲挥谈麈裊

全宋词 贺 铸

吟笺。三十万家风月、共流连。

醉琼枝 定风波

槛外雨波新涨，门前烟柳浑青。寂寞文园淹卧久，推枕援琴涕自零。无人著意听。

绪绪风披芸幌，骎骎月到萱庭。长记合欢东馆夜，与解香罗掩绣屏。琼枝半醉醒。

□□□ 更漏子

酒三行，琴再弄。宛是和鸣双凤。罗斗帐，绣屏风。浓香夜夜同。

去年欢，今夕梦。怱怱晓钟初动。休道梦，觉来空。当时亦梦中。

弄珠英 蓦山溪

楚乡新岁。不放残寒退。月晓桂娥闲，弄珠英、因风委坠。清淮铺练，十二玉峰前，上帘栊，招佳丽。置酒成高会。

江南芳信，目断何人寄。应占镜边春，想晨妆、膏浓压翠。此时乘兴，半道忍回桡，五云溪，门深闭。璧月长相对。

梦相亲 木兰花

清琴再鼓求凰弄。紫陌屡盘骄马鞚。远山眉样认心期，流水车音牵目送。

全宋词 贺 铸

归来翠被和衣拥。醉解寒生钟鼓动。此欢只许梦相亲，每向梦中还说梦。

罗敷歌 采桑子

高楼帘卷秋风里，目送斜阳。衾枕遗香。今夜还如昨夜长。

玉人望月销凝处，应在西厢。半掩兰堂。惟有纱灯伴绣床。

二

河阳官罢文园病，触绪萧然。犀麝流连。喜见清蟾似旧圆。

人生聚散浮云似，回首明年。何处尊前。怅望星河共一天。

三

东南自古繁华地，歌吹扬州。十二青楼。最数秦娘第一流。

季鹰久负鲈鱼兴，不住今秋。已办归舟。伴我江湖作胜游。

四

自怜楚客悲秋思，难写丝桐。目断书鸿。平淡江山落照中。

谁家水调声声怨，黄叶西风。罨画桥东。十二玉楼空更空。

五

东亭南馆逢迎地，几醉红裙。凄怨临分。四叠阳关忍泪闻。

谁怜今夜蓬窗雨，何处渔村。酒冷灯昏。  
不许愁人不断魂。

### 小重山

玉指金徽一再弹。亲声传访戴，雪溪寒。  
两行墨妙破冰纨。牵情处，幽恨寄毫端。

昵语强羞难。相逢真许似，镜中鸾。小  
梅疏影近杯盘。东风里，谁共倚栏干。

### 二

帘影新妆一破颜。玳筵回雪舞，小云鬟。  
琼枝擢秀望难攀。凝情处，千里望蓬山。

歌断酒阑珊。画船箫鼓转，绿杨湾。坠  
钿残燎水堂关。斜阳里，双燕伴人闲。

### 三

枕上闾门五报更。蜡灯香炷冷，恨天明。  
青苹风转彩帆轻。檣头燕，多谢伴人行。

临镜想倾城。两尖愁黛浅，泪波横。艳  
歌重记遣离情。缠绵处，翻是断肠声。

### 四

月月相逢只旧圆。迢迢三十夜，夜如年。  
伤心水照绮罗筵。孤舟里，单枕若为眠。

茂苑想依然。花楼连苑起，压漪涟。玉  
人千里共婵娟。清琴怨，肠断亦如弦。

### 河 传

华堂张燕。向尊前妙选，舞裙歌扇。彼

美个人，的的风流心眼。恨寻芳来晚。

曲街灯火香尘散。犹约晨妆，一觐春风面。惆怅善和坊里，平桥南岸。小青楼、帘不卷。

二

华堂重厦，向尊前更听，碧云新怨。玉指钿徽，总是挑人心眼。恨随红蜡短。

彩旗影动船头转。双桨凌波，惟念人留恋。江上暮潮，隐隐山横南岸。奈离愁、分不断。

侍香金童

楚梦方回，翠被寒如水。尚想见、扬州桃季。姿秀韵闲何物比。玉管秋风，漫声流美。

燕堂开，双按秦弦呈素指。宝雁参差飞不起。三五彩蟾明夜是。屈曲栏干，断肠千里。

凤栖梧

独立江东人婉变。粉本花真，千里依稀见。闲弄彩毫濡玉砚。缠绵春思□歌扇。

爱我竹窗新句炼。小研绫笺、偷寄西飞燕。乍可问名賒识面。十年多病风情浅。

更漏子

芳草斜曛。映画桥□□，翠阁临津。数

阕清歌，两行红粉，厌厌别酒初醺。芳意赠我殷勤。罗巾双黛痕。便兰舟独上，洞府人间，素手轻分。

十里绮陌香尘。望紫云车远，已掩青门。迤迳黄昏，景阳钟动，临风隐隐犹闻。明朝水馆渔村。凭谁招断魂。恨不如今夜，明月多情，应待归云。

### 玉京秋

陇首霜晴，泗滨云晚，乍摇落。废榭苍苔，破台荒草，西楚霸图冥漠。记登临事，九日胜游，千载如昨。更想像，晋客□归，谢生能赋继高作。

飘泊。尘埃倦客，风月羁心，潘鬓晓来清镜觉。蜡屐纶巾，羽觞象管，且追随、隼旂行乐。东山□，应笑个侬风味薄。念故园黄花，自有年年约。

### 蕙清风

何许最悲秋，凄风残照。临水复登山，莞然西笑。车马几番尘，自古长安道。问谁是、后来年少。

飞集两悠悠，江滨海岛。乘雁与双凫，强分多少。传语酒家胡，岁晚从吾好。待做个、醉乡遗老。

### 虞美人

粉娥齐敛千金笑。愁结眉峰小。渭城才

全宋词 贺 铸

唱浥轻尘。无奈两行红泪、湿香巾。

伤心风月南城道。几纵朱幡到。明年载酒洛阳春。还念淮山楼上、倚阑人。

下水船

芳草青门路。还拂京尘东去。回想当年离绪。送君南浦。愁几许。尊酒流连薄暮。帘卷津楼风雨。

凭阑语。草草蘅皋赋。分首惊鸿不驻。灯火虹桥，难寻弄波微步。漫凝伫。莫怨无情流水，明月扁舟何处。

点绛唇

见面无多，坐来百媚生馀态。后庭春在。折取残红戴。

小小兰舟，荡桨东风快。和愁载。缠绵难解。不似罗裙带。

渔家傲

莫厌香醪斟绣履。吐茵也是风流事。今夜寒愁不睡。披衣起。挑灯开卷花生纸。

倩问尊前桃与李。重来若个犹相记。前度刘郎应老矣。行乐地。兔葵燕麦春风里。

感皇恩

歌笑见余妍，情生眇睐。拥髻扬蛾黛。

多态。小花深院，漏促离襟将解。恼人红蜡泪。啼相对。

芳草唤愁，愁来难奈。兰叶犹堪向谁采。小楼妆晚，应念斑骓何在。碧云长有待。斜阳外。

### 菩萨蛮

彩舟载得离愁动。无端更借樵风送。波渺夕阳迟。销魂不自持。

良宵谁与共。赖有窗间梦。可奈梦回时。一番新别离。

#### 二

章台游冶金龟婿。归来犹带醺醺醉。花漏怯春宵。云屏无限娇。

绛纱灯影背。玉枕钗声碎。不待宿醒销。马嘶催早期。

#### 三

曲门南与鸣珂接。小园绿径飞胡蝶。下马访婵娟。笑迎妆阁前。

鹧鸪声几叠。滟滟金蕉叶。未许被香鞮。月生楼外天。

#### 四

绿窗残梦闻鶉鴂。曲屏映枕春山叠。梳□发如蝉。镜生波上莲。

绛裙金缕摺。学舞腰肢怯。帘下小凭肩。与人双翠钿。

五

绿杨眠后拖烟穗，日长扫尽青苔地。香  
断入帘风。炉心檀炷红。

兰溪修祓禊。上巳明朝是。不许放春慵。  
景阳临晓钟。

六

粉香映叶花羞日。窗间宛转蜂寻蜜。欢  
罢卷帘时。玉纤匀面脂。

舞裙金斗熨。绛襖鸳鸯密。翠带一双垂。  
索人题艳诗。

七

子规啼梦罗窗晓。开奁拂镜严妆早。彩  
碧画丁香。背垂裙带长。

钿筝寻旧曲。愁结眉心绿。犹恨夜来时。  
酒狂归太迟。

八

虚堂向壁青灯灭。觉来惊见横窗月。起  
看月平西。城头乌夜啼。

兰衾羞更入。敲枕偷声泣。肠断数残更。  
望明天未明。

九

芭蕉衬雨秋声动。罗窗恼破鸳鸯梦。愁  
倚□帘栊。灯花落地红。

枕横衾浪拥。好夜无人共。莫道粉墙东。  
蓬山千万重。

十

朱萼碧树莺声晓。残醺残梦犹相恼。薄

雨隔轻帘。寒侵白纻衫。

锦屏人起早。惟见馀妆好。眉样学新蟾。  
春愁入翠尖。

十一

炉烟微度流苏帐。孤衾冷叠芙蓉浪。蟋  
蟀不离床。伴人愁夜长。

玉人飞阁上。见月还相望。相望莫相忘。  
应无未断肠。

于飞乐

日薄云融。满城罗绮芳丛。一枝粉淡香  
浓。几销魂，偏健美、紫蝶黄蜂。繁华梦断，  
酒醒来、扫地春空。

武陵原、回头何处，情随流水无穷。寄  
两行清泪，想几许残红。惜花人老，年年奈、  
依旧东风。

浣溪沙

双鹤横桥阿那边。静坊深院闭婵娟。五  
度花开三处见，两依然。

水晒难禁频领□，歌云犹许小流连。破  
得尊前何限恨，不论钱。

品 令

怀彼美。愁与泪。分占眉丛眼尾。求好  
梦、闲拥鸳鸯绮。恨啼乌、唤人起。

目断清淮楼上，心寄长洲坊里。迢迢地。  
七百三十里。几重山，几重水。

### 海月谣

楼平叠嶂。瞰瀛海、波三面。碧云扫尽，  
桂轮滉玉，鲸波张练。化出无边宝界，是名  
壮观。

追游汗漫。愿少借、长风便。麻姑相顾，  
□然笑指，寒潮清浅。顿觉蓬莱方丈，去人  
不远。

### 风流子

何处最难忘。方豪健，放乐五云乡。彩  
笔赋诗，禁池芳草，香鞞调马，鞦路垂杨。  
绮筵上，扇偎歌黛浅，汗浥舞罗香。兰烛伴  
归，绣轮同载，闭花别馆，隔水深坊。

零落少年场。琴心漫流怨，带眼偷长。  
无奈占床燕月，侵鬓吴霜。念北里音尘，鱼  
封永断，便桥烟雨，鹤表相望。好在后庭桃  
李，应记刘郎。

### 鹧鸪天

轰醉王孙玳瑁筵。渴虹垂地吸长川。侧  
商调里清歌送，破尽穷愁直几钱。孤棹舫，  
小江边。爱而不见酒中仙。伤心两岸官杨柳，  
已带斜阳又带蝉。

## 忆仙姿

白纻春衫新制。准拟采兰修禊。遮日走京尘，何啻分阴如岁。留滞。留滞。不似行云难系。

### 二

日日春风楼上。不见石城双桨。鸳枕梦回时，烛泪屏山相向。流荡。流荡。门外白苹溪涨。

### 三

相见时难别易。何限玉琴心意。眉黛只供愁，羞见双鸳鸯字。憔悴。憔悴。蜡烛销成红泪。

### 四

罗绮丛中初见。理鬓横波流转。半醉不胜情，帘影犹招歌扇。留恋。留恋。秋夜辞巢双燕。

### 五

雨后一分春减。深院落红如糝。柳外出秋千，度日彩旗风飏。销黯。销黯。门共宝奁长掩。

### 六

柳下玉骢双鞚。蝉鬓宝钿浮动。半醉倚迷楼，聊送斜阳三弄。豪纵。豪纵。一觉扬州春梦。

七

何处偷谐心赏。促坐绮罗筵上。不记下  
楼时，醉□月侵书幌。怀想。怀想。清丽歌  
声妆样。

八

江上潮回风细。红袖倚楼凝睇。天际认  
归舟，但见平林如荠。迢递。迢递。人更远  
於天际。

九

梦想山阴游冶。深径碧桃花谢。曲水稳  
流觞，暖絮芳兰堪藉。萧洒。萧洒。月棹烟  
蓑东下。

凤栖梧

挑菜踏青都过却。杨柳风轻，摆动秋千  
索。啼鸟自惊花自落。有人同在真珠箔。  
淡净衣裳妆□薄。闲凭银筝，睡鬓慵梳  
掠。试问为谁添瘦弱。娇羞只把眉颦著。

琴调相思引 送范殿监赴黄冈

终日怀归翻送客。春风祖席。南城陌。  
便莫惜。离觞频卷白。动管色。催行色。动  
管色。催行色。

何处投鞍风雨夕。临水驿。空山驿。临  
水驿。空山驿。纵明月相思千里隔。梦咫尺。  
勤书尺。梦咫尺。勤书尺。

### 芳草渡

留征辔，送离杯。羞泪下，捻青梅。低声问道几时回。秦筝雁促，此夜为谁排。

君去也，远蓬莱。千里地，信音乖。相思成病底情怀。和烦恼，寻个便，送将来。

### 雨中花

回首扬州，猖狂十载，依然一梦归来。但觉安仁愁鬓，几点尘埃。醉墨碧纱犹锁，春衫白纻新裁。认鸣珂曲里，旧日朱扉，闲闭青苔。

人非物是，半晌鸾肠易断，宝勒空回。徒怅望、碧云销散，明月徘徊。忍过阳台折柳，难凭陇驿传梅。一翻桃李，迎风无语，谁是怜才。

### 花心动

西郭园林，远尘烦，门临绿杨堤路。画  
□簾长，水馆帘空，竟日素襟销暑。小湾红  
芰清香里，深隐映、风标鹭鹭。指□□，相  
将故故，背人飞去。

翻念多情自苦。当置酒徵歌，梦云难驻。醉眼渐迷，花拂墙低，误认宋邻偷顾。彩阑倚遍平桥晚，空相望、凌波仙步。断魂处，黄昏翠荷□雨。

### 浪淘沙

把酒欲歌骊。浓醉何辞。玉京烟柳欲黄时。明日景阳门外路，相背春归。  
敛泪复牵衣。私语迟迟。可怜谁会两心期。惟有画帘斜月见，应共人知。

#### 二

一十二都门。梦想能频。无言桃李几经春。艳粉鲜香开自落，还为何人。  
白纈别时新。苒苒征尘。镜中销瘦老於真。赖有天涯风月在，依旧相亲。

#### 三

潮涨湛芳桥。难渡兰桡。卷帘红袖莫相招。十二阑干今夜月，谁伴吹箫。  
烟草接亭皋。归思迢迢。兰成老去转无憀。偏恨秋风添鬓雪，不共魂销。

#### 四

雨过碧云秋。烟草汀洲。远山相对一眉愁。可惜芳年桥畔柳，不系兰舟。  
为问木兰舟。何处淹留。相思今夜忍登楼。楼下谁家歌水调，明月扬州。

### 夜游宫

江面波纹皱縠。江南岸、草和烟绿。初过寒食一百六。采苹游，□香裙，鸣佩玉。  
心事偷相属。赋春恨、彩笺双幅。今夜

小楼吹凤竹。谢东风，寄情人，肠断曲。

### 忆仙姿

莲叶初生南浦。两岸绿杨飞絮。向晚鲤鱼风，断送彩帆何处。凝伫。凝伫。楼外一江烟雨。

### 二

彩舫解维官柳。楼上谁家红袖。团扇弄微风，如为行人招手。回首。回首。云断武陵溪口。

### 菱花怨

叠鼓嘲喧，彩旗挥霍，苹汀薄晚，兰舟催解。别浦潮平，小山云断，十幅饱帆风快。回想牵衣，愁掩啼妆，一襟香在。纨扇惊秋，菱花怨晚，谁共蛾黛。

何处玉尊空，对松陵正美，鲈鱼菰菜。露洗凉蟾，潦吞平野，三万顷非尘界。览胜情无奈。恨难招、越人同载。会凭紫燕西飞，更约黄鹂相待。

### 望扬州

铁瓮城高，蒜山渡阔，干云十二层楼。开尊待月，卷箔披风，依然灯火扬州。绣陌南头。记歌名宛转，乡号温柔。曲槛俯清流。想花阴、谁系兰舟。

全宋词 贺 铸

念凄绝秦弦，感深荆赋，相望几许凝愁。  
殷勤裁尺素，奈双鱼、难渡瓜洲。晓鉴堪羞。  
潘鬓点、吴霜渐稠。幸于飞、鸳鸯未老，不  
应同是悲秋。

定情曲 春愁

沈水浓熏，梅粉淡妆，露华鲜映春晓。  
浅颦轻笑。真物外，一种闲花风调。可待合  
欢翠被，不见忘忧芳草。拥膝浑忘羞，回身  
就郎抱。两点灵犀心颠倒。

念乐事稀逢，归期须早。五云闻道。星  
桥畔、油壁车迎苏小。引领西陵自远，携手  
东山偕老。殷勤制、双凤新声，定情永为好。

拥鼻吟 吴音子

别酒初销，恍然弭棹蒹葭浦。回首不见  
高城，青楼更何许。大艑轳峨，越商巴贾。  
万恨龙钟，篷下对话。

指征路。山缺处，孤烟起，历历闻津鼓。  
江豚吹浪，晚来风转夜深雨。拥鼻微吟，断  
肠新句。粉碧罗笺，封泪寄与。

思越人

京口瓜洲记梦间。朱扉犹想映花关。东  
风太是无情思，不许扁舟兴尽还。

春水漫，夕阳闲。乌桕几转绿杨湾。红

尘十里扬州过，更上迷楼一借山。

### 清平乐

吴波不动。四际晴山拥。载酒一尊谁与共。回首江湖旧梦。

长艚珠箔青篷。橹声鸦轧征鸿。泪□镂檀香枕，醉眠摇□春风。

### 二

宋邻东畔。明月关深院。玉指金徽调旧怨。楚客归心欲断。

城隅芳草初春。佳期重约临分。丽句漫题双带，也愁系住行云。

### 三

厌厌别酒。更执纤纤手。指似归期庭下柳。一叶西风前后。

无端不系孤舟。载将多少离愁。又是十分明月，照人两处登楼。

### 木兰花

嫣然何啻千金价。意远态闲难入画。更无方便只尊前，说尽牵情多少话。

别来乐事经春罢。枉度佳春抛好夜。如今触绪易销魂，最是不堪风月下。

### 二

朝来著眼沙头认。五两竿摇风色顺。佳期学取弄潮儿，人纵无情潮有信。

纷纷花雨红成阵。冷酒青梅寒食近。漫  
将江水比闲愁，水尽江头愁不尽。

### 减字木兰花

春容秀润。二十四番花有信。鸾镜佳人。  
得得浓妆样样新。

情无远近。水阔山长分不尽。一断音尘。  
泪眼花前只见春。

### 二

闲情减旧。无奈伤春能作瘦。桂楫兰舟。  
几送人归我滞留。

西门官柳。满把青青临别手。谁共登楼。  
分取烟波一段愁。

### 三

南园清夜。临水朱阑垂柳下。从坐莲花。  
潋滟觥船泛露华。

酒阑歌罢。双□前愁东去也。回想人家。  
芳草平桥一径斜。

### 四

多情多病。万斛闲愁量有剩。一顾倾城。  
惟觉尊前笑不成。

探香幽径。好住东风谁主领。多谢流莺。  
欲别频啼四五声。

### 摊破木兰花

南浦东风落暮潮。袂褰人归，相并兰桡。

回身昵语不胜娇。犹碍华灯，扇影频摇。

重泛青翰顿寂寥。魂断高城手漫招。佳期应待鹊成桥。为问行云，谁伴朝朝。

二

芳草裙腰一尺围。粉郎香润，轻洒蔷薇。为嫌风日下楼稀。杨柳青阴，深闭朱扉。

枉是尊前调玉徽。彩鸾何事逐鸡飞。楚台赋客莫相违。留住行云，好待郎归。

### 南乡子

秋半雨凉天。望后清蟾未破圆。二十四桥游冶处，留连。携手娇饶步步莲。

眉字有馀妍。初破瓜时正妙年。玉局弹棋无限意，缠绵。肠断吴蚕两处眠。

二

柳岸舫兰舟。更结东山谢氏游。红泪清歌催落景，回头。□出尊前一段愁。

东水漫西流。谁道行云肯驻留。无限鲜飙吹芷若，汀洲。生羡鸳鸯得自由。

### 临江仙

暂假临淮东道主，每逃歌舞华筵。经年未辨买山钱。筋骸难强，久坐沐猴禅。

行拥一舟称浪士，五湖春水如天。越人相顾足嫣然。何须绣被，来伴拥蓑眠。

罗敷歌 丑奴儿

东山未办终焉计，聊尔西来。花苑平台。  
倦客登临第几回。

连延复道通驰道，十二门开。车马尘埃。  
怅望江南雪后梅。

点绛唇

一幅霜绡，麝煤熏膩纹丝缕，掩妆无语。  
的是销凝处。

薄暮兰桡，漾下苹花渚。风留住。绿杨  
归路。燕子西飞去。

南歌子

绣幕深朱户，熏炉小象床。扶肩醉被冒  
明珰。绣履可怜分破、两鸳鸯。

梦枕初回雨、啼钿半□妆。一钩新月渡  
横塘。谁认凌波微步、袜尘香。

二

心蹙黄金缕，梢垂白玉团。孤芳不怕雪  
霜寒。行向百花头上、探春□。

傍水添情韵，横墙露粉颜。夜来和月起  
凭阑。认得暗香微度、有无间。

### 小重山

一叶西风生嫩凉。彩舟旗影动，背斜阳。  
溪流几曲似回肠。高城远，今夜为谁长。

正节号清狂。苧萝标韵美，倚新妆。月  
华歌调转清商。尊酒畔，好住伴刘郎。

### 清平乐

林皋叶脱。楼下清江阔。船里琵琶金捍  
拨。弹断么弦再抹。

夜潮洲渚生寒。城头星斗阑干。忍话旧  
游新梦，三千里外长安。

### 二

沈侯销瘦。八咏新题就。惆怅酒醒兼梦  
后。带眼如何复旧。

几时一叶兰舟。画桡鸦轧东流。新市小  
桥西畔，有人长倚妆楼。

### 木兰花

罗襟粉汗和香浥。纤指留痕红一捻。离  
亭再卜合欢期，寻见石榴双翠叶。

危楼欲上危肠怯。纵得鸾胶难寸接。西  
风燕子会来时，好付小笺封泪帖。

玉连环 一落索

别酒更添红粉泪。促成愁醉。相逢浅笑  
合微吟，撩惹到、缠绵地。

花下解携重附耳。佳期深记。青翰舟稳  
绣衾香，谁禁断、东流水。

惜奴娇

玉立佳人，韵不减、吴苏小。赋深情、  
华年韶妙。叠鼓新歌，最能作、江南调。缥  
缈。似阳台、娇云弄晓。

有客临风，梦后拟、池塘草。竟装怀、  
□愁多少。绿绮芳尊，映花月、东山道。正  
要。个卿卿、嫣然一笑。

蓦山溪

画桥流水，宛是南州路。转柁绿杨湾，  
恍然间、青楼旧处。回肠断尽，犹剩尔多愁，  
记新声，怀昵语。依约对眉宇。

袜罗香在，只欠莲随步。无物比朝云，  
恨难续、高唐后赋。迢迢此夜，泪枕不成眠，  
月侵窗，灯映户。应见可怜许。

西江月

携手看花深径，扶肩待月斜廊。临分少

伫已恹恹。此段不堪回想。

欲寄书如天远，难销夜似年长。小窗风雨碎人肠，更在孤舟枕上。

### 摊破木兰花

桂叶眉丛恨自成。锦瑟弦调，双凤和鸣。  
钗梁玉胜挂兰缨。帘影沈沈，月堕参横。

屏护文茵翠织成。摘佩牵裾，燕样腰轻。  
清溪百曲可怜生。大抵新欢，此夜□情。

### 点绛唇

十二层楼，梦回缥缈非烟里。此情何寄。  
赖尔荆江水。

莫谓东君，触处逢桃李。留深意。温柔乡里。自有终焉计。

### 诉衷情

不堪回首卧云乡。羈宦负清狂。年来镜湖风月，鱼鸟两相忘。

秦塞险，楚山苍。更斜阳。画桥流水，  
曾见扁舟，几度刘郎。

### 二

半销檀粉睡痕新。背镜照樱唇。临风再歌团扇。深意属何人。

轻调笑，浅凝颦。认情亲。最难堪酒，似不胜情，依样伤春。

### 怨三三

玉津春水如蓝。宫柳毵毵。桥上东风侧帽檐。记佳节、约是重三。

飞楼十二珠帘。恨不贮、当年彩蟾。对梦雨廉纤。愁随芳草，绿遍江南。

### 醉春风

楼外屏山秀。凭阑新梦后。归云何许误心期，候候候。到陇梅花，渡江桃叶，断魂招手。

楚制汗衫旧。啼妆曾枕袖。东阳咏罢不胜情，瘦瘦瘦。隋岸伤离，渭城怀远，一枝烟柳。

### 忆秦娥

晓朦胧。前溪百鸟啼匆匆。啼匆匆。凌波人去，拜月楼空。

去年今日东门东。鲜妆辉映桃花红。桃花红。吹开吹落，一任东风。

### 二

风惊幕。灯前细雨檐花落。檐花落。玉台清镜，泪淹妆薄。

良时不再须行乐。王孙莫负东城约。东城约。一分春色，为君留著。

三

著春衫。玉鞭鞭马南城南。南城南。柔条芳草，留驻金銜。

粉娥采叶供新蚕。蚕饥略许携纤纤。携纤纤。湔裙淇上，更待初三。

河满子

每恨相逢薄处，可怜欲去迟回。犹记新声团扇□，殷勤再引馀杯。为问依依杨柳，秋风好住章台。

疏雨忽随云断，斜阳却送潮回。桃叶青山长在眼，几时双楫迎来，如待碧阑红药，一年两度花开。

御街行 别东山

松门石路秋风扫。似不许、飞尘到。双携纤手别烟萝，红粉清泉相照。几声歌管，正须陶写，翻作伤心调。

岩阴暝色归云悄。恨易失、千金笑。更逢何物可忘忧，为谢江南芳草。断桥孤驿，冷云黄叶，相见长安道。

连理枝

绣幌闲眠晓。处处闻啼鸟。枕上无情，斜风横雨，落花多少。想灞桥、春色老於人，恁江南梦杳。

全宋词 贺 铸

往事今何道。聊咏池塘草。怀县年来，  
萧萧壮发，可堪频照。赖醉乡、佳境许徜徉，  
惜归欵不早。

金凤钩

江南又叹流寓。指芳物、伴人迟暮。揽  
晴风絮。弄寒烟雨。春去更无寻处。

石城楼观青霞举。想艇子、寄谁容与。  
断云荆渚。限潮溢浦。不见莫愁归路。

芳洲泊 踏莎行

露叶栖萤，风枝袅鹊。水堂离燕褰珠箔。  
一声横玉吹流云，厌厌凉月西南落。

江际吴边，山侵楚角。兰桡明夜芳洲泊。  
殷勤留语采香人，清尊不负黄花约。

水调歌头

彼美吴姝唱，繁会阖闾邦。千坊万井、  
斜桥曲水小轩窗。缥缈关山台观。罗绮云烟  
相半。金石压拏撞。痴信东归虏，黑自死心  
降。

范夫子，高标韵，秀眉庞。功成长往、  
有人同载世无双。物外聊从吾好。赖尔工鞞  
妍笑。伴醉玉连缸。尽任扁舟路，风雨卷秋  
江。

### 摊破浣溪沙

曲蹬斜阑出翠微。西州回首思依依。风物宛然长在眼，只人非。

绿树隔巢黄鸟并，沧洲带雨白鸥飞。多谢子规啼劝我，不如归。

### 江南曲 踏莎行

蝉韵清弦，溪横翠縠。翩翩彩鹢帆开幅。黄帘绛幕掩香风，当筵粲粲人如玉。

浅黛凝愁，明波转瞩。兰情似怨临行促。不辞寸断九回肠，殷勤更唱江南曲。

#### 二 潇潇雨

鸦轧齐桡，□冬叠鼓。浮骖晚下金牛渚。莫愁应自有愁时，篷窗今夜潇潇雨。

杜若芳洲。芙蓉别浦。依依艳笑逢迎处。随潮风自石城来，潮回好寄人传语。

#### 三 度新声

小苑浴兰，微波寄叶。石城回首山重沓。绮窗烟雨梦佳期，飞霞艇子雕檀楫。

楼迥披襟，廊长响屐。供愁麝月眉心帖。紫箫闲捻度新声，有人偷倚阑干搦。

### 楼下柳 天香

满马京□，装怀春思，翩然笑度江南。

全宋词 贺 铸

白鹭芳洲，青蟾雕舰，胜游三月初三。舞裙  
溅水，浴兰佩、绿染纤纤。归路要同步障，  
迎风会卷珠帘。

离觞未容半酣。恨乌檣、已张轻帆。秋  
鬓重来淮上，几换新蟾。楼下会看细柳，正  
摇落清霜拂画檐。树犹如此，人何以堪。

吴门柳 渔家傲

窈窕盘门西转路。残阳映带青山暮。最  
是长杨攀折苦。堪怜许。清霜剪断和烟缕。

春水归期端不负。依依照影临南浦。留  
取木兰舟少住。无风雨。黄昏月上潮平去。

二 游仙咏

啸度万松千步岭。钱湖门外非尘境。见  
底碧漪如眼净。岚光映。镜屏百曲新磨莹。

好月为人重破暝。云头艳艳开金饼。传  
话桂娥应耐静。堪乘兴。尊前听我游仙咏。

雁后归 临江仙 人日席上作

巧翦合欢罗胜子，钗头春意翩翩。艳歌  
浅拜笑嫣然。愿郎宜此酒，行乐驻华年。

未是文园多病客，幽襟凄断堪怜。旧游  
梦挂碧云边。人归落雁后，思发在花前。

二 想娉婷

鸦背夕阳山映断，绿杨风扫津亭。月生  
河影带疏星。青松巢白鸟，深竹逗流萤。

全宋词 贺 铸

隔水彩舟然绛蜡，碧窗想见娉婷。浴兰熏麝助芳馨。湘弦弹未半，凄怨不堪听。

三 采莲回

翡翠楼高帘幕薄，温家小玉妆台。画眉难称怯人催。羞从面色起，娇逐语声来。

门外木兰花艇子，垂杨风扫纤埃。平湖一镜绿萍开。缓歌轻调笑，薄暮采莲回。

鸳鸯梦 临江仙

午醉厌厌醒自晚，鸳鸯春梦初惊。闲花深院听啼莺。斜阳如有意，偏旁小窗明。

莫倚雕阑怀往事，吴山楚水纵横。多情人奈物无情。闲愁朝复暮，相应两潮生。

念彩云 夜游宫

流水苍山带郭。寻尘迹、宛然如昨。犹记黄花携手约。误重来，小庭花，空自落。

不怨兰情薄。可怜许、彩云漂泊。紫燕西飞书漫托。碧城中，几青楼，垂画幕。

烛影摇红

波影翻帘，泪痕凝蜡青山馆。故人千里念佳期，襟佩如相款。

惆怅更长梦短。但衾枕、馀芬剩暖。半窗斜月，照人肠断，啼鸟不管。

### 小重山

花院深疑无路通。碧纱窗影下，玉芙蓉。  
当时偏恨五更钟。分携处，斜月小帘栊。

楚梦冷沈踪。一双金缕枕，半床空。画  
桥临水凤城东。楼前柳，憔悴几秋风。

### 绿头鸭

玉人家，画楼珠箔临津。托微风、彩箫  
流怨，断肠马上曾闻。燕堂开、艳妆丛里，  
调琴思、认歌颦。麝蜡烟浓，玉莲漏短，更  
衣不待酒初醺。绣屏掩、枕鸳相就，香气渐  
嗽嗽。回廊影，疏钟淡月，几许销魂。

翠钗分、银笺封泪，舞鞋从此生尘。住  
兰舟、载将离恨，转南浦、背西曛。记取明  
年，蔷薇谢后，佳期应未误行云。凤城运，  
楚梅香嫩，先寄一枝春。青门外，只凭芳草，  
寻访郎君。

### 减字浣溪沙

秋水斜阳演漾金。远山隐隐隔平林。几  
家村落几声砧。

记得西楼凝醉眼，昔年风物似如今。只  
无人与共登临。

二

三扇屏山匝象床。背灯偷解素罗裳。粉

肌和汗自生香。

易失旧欢劳蝶梦，难禁新恨费鸾肠。今宵风月两相忘。

三

鼓动城头啼暮鸦。过云时送雨些些。嫩凉如水透窗纱。

弄影西厢侵户月，分香东畔拂墙花。此时相望抵天涯。

四

烟柳春梢蘸晕黄。井阑风绰小桃香。觉时帘幕又斜阳。

望处定无千里眼，断来能有几回肠。少年禁取恁凄凉。

五

梦想西池辇路边。玉鞍骄马小鞦韆。春风十里斗婵娟。

临水登山漂泊地，落花中酒寂寥天。个般情味已三年。

六

莲烛啼痕怨漏长。吟蛩随月到回廊。一屏烟景画潇湘。

连夜断无行雨梦，隔年犹有著人香。此情须信是难忘。

七

闲把琵琶旧谱寻。四弦声怨却沈吟。燕飞人静画堂深。

敲枕有时成雨梦，隔帘无处说春心。一

从灯夜到如今。

八

鸚鵡无言理翠襟。杏花零落昼阴阴。画  
桥流水半篙深。

芳径与谁寻斗草，绣床终日罢拈针。小  
笺香管写春心。

九

鸚鵡惊人促下帘。碧纱如雾隔香奁。雪  
儿窥镜晚蛾纤。

乌鹊桥边河络角，鸳鸯楼外月西南。门  
前嘶马弄金衔。

十

宫锦袍熏水麝香。越纱裙染郁金黄。薄  
罗依约见明妆。

绣陌不逢携手伴，绿窗谁是画眉郎。春  
风十里断人肠。

十一

青翰舟中裊袂筵。粉娥窥影两神仙。酒  
阑飞去作非烟。

重访旧游人不见，雨荷风蓼夕阳天。折  
花临水思茫然。

十二

浮动花钗影鬢烟。浅妆浓笑有馀妍。酒  
醺檀点语凭肩。

留不住时分钿镜，旧曾行处失金莲。碧  
云芳草恨年年。

十三

两点春山一寸波。当筵娇甚不成歌。动人情态可须多。

金井露寒风下叶，画桥云断月侵河。厌厌此夜奈愁何。

十四

清浅陂塘藕叶乾。细风疏雨鹭鸶寒。半垂帘幕倚阑干。

惆怅窃香人不见，几回憔悴后庭兰。行云可是渡江难。

十五

楼角初销一缕霞。淡黄杨柳暗栖鸦。玉人和月摘梅花。

笑捻粉香归洞户，更垂帘幕护窗纱。东风寒似夜来些。

琴调相思引

团扇单衣杨柳陌。花似春风□无迹。赖白玉香奁供粉泽。借秀色。添春色。借秀色。添春色。

云幕华灯张绮席。半醉客。留醒客。半醉客。留醒客。渐促膝倾鬟琴差拍。问此夕。知何夕。问此夕。知何夕。

天门谣

牛渚天门险。限南北、七雄豪占。清雾

敛。与闲人登览。

待月上潮平波滟滟。塞管轻吹新阿滥。  
风满槛。历历数、西州更点。

### 献金杯

风软香迟，花深漏短。可怜宵、画堂春半。  
碧纱窗影，卷帐蜡灯红，鸳枕畔。密写乌丝一段。

采苹溪晚。拾翠沙空。尽愁倚、梦云飞观。  
木兰艇子，几时渡江来，心目断。桃叶青山隔岸。

### 清平乐

阴晴未定。薄日烘云影。临水朱门花一径。  
尽日鸟啼人静。

厌厌几许春情。可怜老去兰成。看取镊残双鬓，  
不随芳草重生。

又

小桃初谢。双燕还来也。记得年时寒食下。  
紫陌青门游冶。

楚城满目春华。可堪游子思家。惟有夜来归梦，  
不知身在天涯。

### 摊破浣溪沙

湖上秋深藕叶黄。清霜销瘦损垂杨。洲嘴嫩沙斜照暖，睡鸳鸯。

红粉莲娃何处，西风不为管馀香。今夜月明闻水调，断人肠。

又

双凤箫声隔彩霞。朱门深闭七香车。何处探春寻旧约，谢娘家。

旖旎细风飘水麝，玲珑残雪浸山茶。饮罢西厢帘影外，玉蟾斜。

### 惜双双

皎镜平湖三十里。碧玉山围四际。莲荡香风里。彩鸳鸯觉双飞起。

明月多情随柁尾。偏照空床翠被。回首笙歌地。醉更衣处长相记。

### 思越人

紫府东风放夜时。步莲秣李伴人归。五更钟动笙歌散，十里月明灯火稀。

香苒苒，梦依依。天涯寒尽减春衣。凤凰城阙知何处，寥落星河一雁飞。

又

惆怅离亭断彩襟。碧云明月两关心。几行书尾情何限，一尺裙腰瘦不禁。

遥夜半，曲房深。有时昵语话如今。侵窗冷雨灯生晕，泪湿罗笺楚调吟。

### 鹤冲天

冬冬鼓动，花外沈残漏。华月万枝灯，还清昼。广陌衣香度，飞盖影、相先后。个处频回首。锦坊西去，期约武陵溪口。

当时早恨欢难偶。可堪流浪远，分携久。小畹兰英在，轻付与、何人手。不似长亭柳。舞风眠雨，伴我一春销瘦。

### 小重山

飘径梅英雪未融。芳菲消息到，杏梢红。隔年欢事水西东。凝思久，不语坐书空。

回想夹城中。彩山箫鼓沸，绮罗丛。钿轮珠网玉花骢。香陌上，谁与斗春风。

### 六州歌头

少年侠气，交结五都雄。肝胆洞。毛发耸。立谈中。死生同。一诺千金重。推翘勇。矜豪纵。轻盖拥。联飞鞚。斗城东。轰饮酒垆，春色浮寒瓮。吸海垂虹。闲呼鹰犬，白羽摘雕弓。狡穴俄空。乐匆匆。

似黄梁梦。辞丹凤。明月共。漾孤篷。官冗从。怀空惚。落尘笼。簿书丛。鸱弁如云众。供粗用。忽奇功。笳鼓动。渔阳弄。思悲翁。不请长缨，系取天骄种。剑吼西风。恨登山临水，手寄七弦桐。目送归鸿。

### 浣溪沙

翠縠参差拂水风。暖云如絮扑低空。丽人波脸觉春融。

纓挂宝钗初促席，檀膏微注玉杯红。芳醪何似此情浓。

又

云母窗前歇绣针。低鬟凝思坐调琴。玉纤纤按十三金。

归卧文园犹带酒，柳花飞度画堂阴。只凭双燕话春心。

又

叠鼓新歌百样娇。铜丸玉腕促云谣。揭帘飞瓦雹声焦。

九曲池边杨柳陌，香轮轧轧马萧萧。细风妆面酒痕销。

### 江城子

麝熏微度绣芙蓉。翠衾重。画堂空。前夜偷期，相见却匆匆。心事两知何处问，依约是，梦中逢。

坐疑行听竹窗风。出帘栊。杳无踪。已过黄昏，才动寺楼钟。暮雨不来春又去，花满地，月朦胧。

### 浪淘沙

一叶忽惊秋。分付东流。殷勤为过白苹洲。洲上小楼帘半卷，应认归舟。

回首恋朋游。迹去心留。歌尘萧散梦云收。惟有尊前曾见月，相伴人愁。

### 木兰花

佩环声认腰肢软。风里麝熏知近远。此身常羨玉妆台，得见晓来梳画面。

回廊几步通深院，一桁绣衣帘不卷。酒阑歌罢欲黄昏，肠断归巢双燕燕。

又

银簧雁柱香檀拨。镂板三声催细抹。舞腰轻怯绛裙长，羞按筑球花十八。

东城柳岸匆匆发。画舫一篙烟水阔。可怜单枕欲眠时，还见尊前前夜月。

### 蝶恋花

小院朱扉开一扇。内样新妆，镜里分明见。眉晕半深唇注浅。朵云冠子偏宜面。

被掩芙蓉熏麝煎。帘影沈沈，只有双飞燕。心事向人犹忖腆。强来窗下寻针线。

石州引

薄雨初寒，斜照弄晴，春意空阔。长亭柳色才黄，远客一枝先折。烟横水际，映带几点归鸦，东风销尽龙沙雪。还记出关来，恰而今时节。

将发。画楼芳酒，红泪清歌，顿成轻别。已是经年，杳杳音尘多绝。欲知方寸，共有几许清愁，芭蕉不展丁香结。枉望断天涯，两厌厌风月。

失调名

罗帷映月，玉研生冰。

又

风头梦、吹无迹。

减字木兰花

簪花照镜。客鬓萧萧都不整。拟倩东邻。化作尊前入梦云。

风香月影。信是瑶台清夜永。深闭重门。牵绊刘郎别后魂。

凤栖梧

为问宛溪桥畔柳。拂水倡条，几赠行人

全宋词 贺 铸

手。一样叶眉偏解皱。白绵飞尽因谁瘦。  
今日离亭还对酒。唱断青青，好去休回首。  
美荫向人疏似旧。何须更待秋风后。

南柯子 别恨

斗酒才供泪。扁舟只载愁。画桥青柳小朱楼。  
犹记出城车马、为迟留。  
有恨花空委，无情水自流，河阳新鬓尽禁秋。  
萧散楚云巫雨、此生休。

望湘人 春思

厌莺声到枕，花气动帘，醉魂愁梦相半。  
被惜馀薰，带惊剩眼。几许伤春春晚。泪竹痕鲜，  
佩兰香老，湘天浓暖。记小江、风月佳时，屡约非烟游伴。  
须信鸾弦易断。奈云和再鼓，曲终人远。认罗袜无踪，  
旧处弄波清浅。青翰棹舫，白苹洲畔。尽目临皋飞观。  
不解寄、一字相思，幸有归来双燕。

谒金门

李黄门梦得一曲，前遍二十言，后遍二十二言，而无其声。余采其前遍，润一横字，已续二十五字写之云

杨花落。燕子横穿朱阁。常恨春醪如水薄。闲愁无处著。  
绿野带江山络角。桃叶参差前约。历历

短檣沙外泊。东风晚来恶。

蝶恋花 改徐冠卿词

几许伤春春复暮。杨柳清阴，偏碍游丝度。天际小山桃叶步。白苹花满湔裙处。  
竟日微吟长短句。帘影灯昏，心寄胡琴语。数点雨声风约住。朦胧淡月云来去。

小梅花

思前别。记时节。美人颜色如花发。美人归。天一涯。娟娟姮娥，三五满还亏。翠眉蝉鬓生离诀。遥望青楼心欲绝。梦中寻。卧巫云。觉来珠泪，滴向湘水深。

愁无已。奏绿绮。历历高山与流水。妙通神。绝知音。不知暮雨朝云、何山岑。相思无计堪相比。珠箔雕阑几千里。漏将分。月窗明。一夜梅花忽开、疑是君。

乌啼月

牛女相望处，星桥不碍东西。重墙未抵蓬山远，却恨画楼低。

细字频传幽怨，凝缸长照单栖。城乌可是知人意，偏向月明啼。

簇水近

一笛清风弄袖，新月梳云缕。澄凉夜色，

全宋词 贺 铸

才过几点黄昏雨。侠少朋游，正喜九陌消尘土。鞭穗袅、紫骝花步。

过朱户。认得宫妆，为谁重扫新眉妩。徘徊片向难问，桃李都无语。十二青楼下，指灯火章台路。不念人、肠断归去。

画眉郎 好女儿

雪絮雕章。梅粉华妆。小芒台、榼机罗缃素，古铜蟾砚滴，金雕琴荐，玉燕钗梁。

五马徘徊长路，漫非意、凤求凰。认兰情、自有怜才处，似题桥贵客，栽花潘令，真画眉郎。

试周郎 诉衷情

乔家深闭郁金堂。朝镜事梅妆。云鬟翠钿浮动，微步拥钗梁。

情尚秘，色犹庄。递瞻相。弄丝调管，时误新声，翻试周郎。

新念别

湖上兰舟暮发。扬州梦断灯明灭。想见琼花开似雪。帽檐香。玉纤纤，曾为折。

渔管吹还咽。问何意、煎人愁绝。江北江南新念别。掩芳尊，与谁同，今夜月。

### 谒金门

溪声急。无数落花漂出。燕子分泥蜂酿蜜。迟迟艳风日。

须信芳菲随失。况复佳期难必。拟把此情书万一。愁多翻阁笔。

### 减字木兰花

冷香浮动。望处欲生胡蝶梦。晓日曛红。愁见凝酥暖渐融。

鼓催歌送。芳酒一尊谁与共。寂寞墙东。门掩黄昏满院风。

### 摊破浣溪沙

锦鞞朱弦瑟瑟徽。玉纤新拟凤双飞。缥缈烛烟花暮暗，就更衣。

约略整环钗影动，迟回顾步佩声微。宛是春风胡蝶舞，带香归。

## 洪惠英

### 减字木兰花

梅花似雪。刚被雪来相挫折。雪里梅花。  
无限精神总属他。

梅花无语。只有东君来作主。传语东君。  
且与梅花作主人。

## 洪迈

### 满江红 立夏前一日借坡公韵

雨涩风悭 ,双溪闷、几曾洋溢。长长是、非霞散绮 ,岫云凝碧。修禊欢游今不讲 ,流觞故事何从觅。待它时、水到却寻盟 ,筹输一。

燕舞倦 ,莺吟毕。春肯住 ,才明日。池塘波绿皱 ,小荷争出。童子舞雩浑怅望 ,吾人提笔谁飘逸。记去年、修竹暮天寒 ,舞踪迹。

### 临江仙

绮席流欢欢正洽 ,高楼佳气重重。钗头小篆烛花红。直须将喜事 ,来报主人公。

桂月十分春正半 ,广寒宫殿葱葱。姮娥相对曲阑东。云梯知不远 ,平步蹑东风。

### 导引

寒日短 ,草露朝晞。仙鹤下 ,梦云归。大椿亭畔苍苍柳 ,怅无由、挽住天衣。昭阳深 ,暝鸦飞。愁带箭、恋恩栖。笳箫三叠奏 ,都人悲泪袂成帷。

## 六州

尧传舜 ,盛事千古难并。回龙驭 ,辞凤掖 ,  
北内别有蓬瀛。为天子父 ,册鸿名。万年千岁  
福康宁。春秋不说楚冥灵。莱衣彩戏 ,汉殿玉  
卮轻。宸游今不见 ,烟外落霞明。前回丁未 ,  
雾塞神京。正同符、光武中兴。擎天独力扶  
倾。定宗庙 ,保河山 ,乾坤整顿庚庚。功成了 ,  
脱屣遗荣。访崆峒、容与丹庭。笑挹尘寰、不  
留行。吾皇哀恋 ,泪血洒神旌。肠断涛江渡 ,  
明日稽山暮云 ,东望元陵。

## 十二时

璧门双阙转苍龙。德寿俨祇宫。轩屏正  
坐 ,天子亲拜天公。仪绅笏 ,罗鹓鹭 ,粲庭中。  
仙家欢不尽 ,人世寿无穷。谁知云路 ,玉京成  
就 ,催返璇穹。转手万缘空。见说烟霄好处 ,  
不与下方同。尘合雾迷蒙。笙箫寥寂 ,楼阁玲  
珑。中兴大业 ,巍巍稽古成功。事去孤鸿。忍  
听宵柝晨钟。灵輿驾 ,素帟低 ,杳庞茸。浙江  
潮 ,万神护 ,川后滋恭。因山祇事 ,崔嵬禹穴 ,  
此日重逢。柏城封。愁长夜、起悲风。歌清  
庙、千古诵高宗。

## 踏莎行

院落深沈 ,池塘寂静。帘钩卷上梨花影。

全宋词 洪迈

宝箏拈得雁难寻，篆香消尽山空冷。钗凤斜  
敲，鬓蝉不整。残红立褪慵看镜。杜鹃啼月一  
声声，等闲又是三春尽。

## 洪适

### 番禺调笑

#### 句队

盖闻五岭分疆 ,说番禺之大府 ;一尊属客 ,见南伯之高情 ,揆遗事于前闻 ,度新词而屡舞。宫商递奏 ,调笑入场。

#### 羊仙

黄木湾头声哄然。碧云深处起非烟。骑羊执穗衣分锦 ,快睹浮空五列仙。腾空昔日持铜虎。嘉瑞能名灼前古。羽人叱石会重来 ,治行于今最南土。

南土。贤铜虎。黄木湾头腾好语。骑羊执穗神仙五。拭目摩肩争睹。无双治行今犹古。嘉瑞流传乐府。

#### 药洲

传闻南汉学飞仙。炼药名洲雉堞边。炉寒灶毁无踪迹 ,古木闲花不计年。惟余九曜嶙岩石。寸寸沦漪湛天碧。画桥彩舫列歌亭 ,长与邦人作寒食。

寒食。人如织。藉草临流罗饮席。阳春有脚森双戟。和气欢声洋溢。洲边药灶成陈

迹。九曜摩挲奇石。

### 海山楼

高楼百尺迓严城。披拂雄风襟袂清。云气笼山朝雨急，海涛侵岸暮潮生。楼前箫鼓声相和。戢戢归樯排几柁。须信官廉蚌蛤回，望中山积皆奇货。

奇货。归帆过，击鼓吹箫相应和。楼前高浪风掀簸。渔唱一声山左。胡床邀月轻云破。玉麈飞谈惊座。

### 素馨巷

南国英华赋众芳。素馨声价独无双。未知蟾桂能相比，不是人间草木香。轻丝结蕊长盈穗。一片瑞云萦宝髻。水沈为骨麝为衣，剩馥三熏亦名世。

名世。花无二。高压阁提倾未利。素丝缕缕联芳蕊。一片瑞云宝髻。屑沈碎麝香肌细。剩馥熏成心字。

### 朝汉台

尉佗怒臂帝番禺。远屈王人陆大夫。只用一言回倔强，遂令魑魅结襟裾。使归已实千金囊。朝汉心倾比葵藿。高台突兀切星辰，后代登临奏音乐。

音乐。传佳作。盖海旌幢开观阁。绮霞飞渡青油幕。好是登临行乐。当时朝汉心倾藿。望断长安城郭。

### 浴日亭

扶胥之口控南溟。谁凿山尖筑此亭。俯窥贝阙蛟龙跃，远见扶桑朝日升。蜃楼缥缈擎天际。鹏翼缤纷借风势。蓬莱可望不可亲，安得轻舟凌弱水。

弱水。天无际。相去扶胥知几里。高亭东望阳乌起。杲杲晨光初洗。蓬莱欲往宁无计。一展弥天鹏翅。

### 蒲涧

古涧清泉不歇声。昌蒲多节四时青。安期驾鹤丹灶去，万古相传此化城。依然丹灶留岩穴。桃竹连山仙境别。年年正月扫松关，飞盖倾城赏佳节。

佳节。初春月。飞盖倾城尊俎列。安期驾鹤朝金阙。丹灶分留岩穴。山中花笑秦皇拙。祠殿荒凉虚设。

### 贪泉

桄榔色暗芭蕉繁。中有贪泉涌石门。一杯便使人心改。属意金珠万事昏。晋时贤牧夷齐比。酌水题诗心转厉。只今方伯擅真清，日日取泉供饮器。

饮器。贪泉水。山乳涓涓甘似醴。怀金嗜宝随人意。枉受恶名难洗。真情方伯端无比。未使吴君专美。

### 沈香浦

炎区万国侈奇香。捆载归来有巨航。谁人不作芳馨观，巾篋宁无一片藏。饮泉太守回瓜戍。搜索越装舟未去。蕙苳何从起谤言，沈香不惜投深浦。

深浦。停舟处。只恐越装相染污。奇香一见如泥土。投著水中归去。令公早晚回朝著。无物迟留鸣橹。

### 清远峡

腰支尺六代难双。雾鬓风鬟巧作妆。人间不似山间乐，身在帝乡思故乡。南来万里舟初歇。三峡重过惊久别。玉环留著缀相思，归向青山啸明月。

明月。舟初歇。三峡重过惊久别。玉环留与人间说。诗罢离肠千结。相思朝暮流泉咽。雾锁青山愁绝。

### 破子

南海。繁华最。城郭山川雄岭外。遗踪  
嘉话垂千载。竹帛班班俱在。元戎好古新声  
改。调笑花前分队。高会。尊罍对。笑眼茸  
茸回盼睐。蹋筵低唱眉弯黛。翔凤惊鸾多态。  
清风不用一钱卖。醉客何妨倒载。

### 遣队

十眉争艳眼波横。霓袖回风曲已成。绛蜡飘花  
香卷穗 ,月林乌鹊两三声。歌舞既终 相将好去。

### 句降黄龙舞

伏以玳席接欢 ,杯滌东西之玉 ,锦裯唤舞 ,钗横十  
二之金。咸驻目于垂螺 ,将应声而曳茧。岂无本事 ,  
愿吐妍辞。

### 答

眇流席上 ,发水调于歌唇 ,色授裾边 ,属河东之才  
子。未满飞鹤之愿 ,已成别鹄之悲。折荷柄而愁缕无  
穷 ,翦蛟绡而泪珠难贯。因成绝唱 ,少相清欢。

### 遣

情随杯酒滴郎心。不忍重开翡翠衾。封却软绡  
看锦水 ,水痕不似泪痕深。歌罢舞停 相将好去。

### 句南吕薄媚舞

羽觞棋布 ,洽主礼于良辰 ,翠袖弓弯 ,奏女妖之妍  
唱。游丝可倩 本事愿闻。

## 答

蹋软尘之陌 ,倾一见于月肤 ;会采苹之洲 ,迷千娇于雨梦。且蛾眉有伐性之戒 ,而狐媚无伤人之心。既吐艳于幽闺 ,能齐芳于节妇。果六尺之躯不庇其伉俪 ,非三寸之舌可脱于艰难。尚播遗声 ,得尘高会。

## 遣

兽质人心冰雪肤。名齐节妇古来无。纤罗不蜕西州路 ,争得人知是艳孤。歌舞既阑 ,相将好去。

## 渔家傲引

伏以黄童白叟 ,皆是烟波之钓徒 ;青笠绿蓑 ,不识衣冠之盛事。长浮家而醉月 ,更辍棹以吟风。乐哉生涯 ,翻在乐府。相烦女伴 ,渔父分行。

## 词

正月东风初解冻。渔人撒网波纹动 ,不识雕梁并绮栋。扁舟重。眠鸥浴雁相迎送。

溪北画桥弯蟒蛟。溪南古岸添青葙。长把鱼钱寻酒瓮。春一梦。起来拈笛成三弄。

二月垂杨花糝地。荻芽迸绿春无际。细雨斜风浑不避。青笠底。三三两两鸣榔起。

新妇矶边云接袂。女儿浦口山堆髻。一拥河豚千百尾。摇食指。城中虚却鱼虾市。

三月愁霖多急雨。桃江绿浪迷洲渚。西塞山边飞白鹭。烟横素。一声欸乃山深处。

红雨缤纷因水去。行行寻得神仙侣。楼

阁五云心不住。分凤侣。重来翻恨花相误。

四月圆荷钱学铸。鳞鳞波暖鸳鸯语。无数燕雏来又去。鱼未取。钓丝直上蜻蜓聚。

风弄碧漪摇岛屿。奇云蘸影千峰舞。骑马官人江上驻。天且暮。借舟送过沧浪渡。

五月河中菱苒遍。丝纶欲下相萦绊。却掉船来芳草岸。呼侣伴。蓑衣不把金章换。

碧落云高星烂烂。波心举网星光乱。跃出鲤鱼长尺半。回首看。孤灯一点风吹散。

六月长江无暑气。怒涛漱壑侵沙嘴。飏飏轻舟随浪起。何不畏。从来惯作风波计。

别渚藕花舒锦绮。采莲三五谁家子。问我买鱼相调戏。飘芰制。笑声咭咭花香里。

七月凜秋飞叶响。长吟杳杳澄江上。秃尾槎头添一网。丝自纺。新炊菰饭更相饷。

渡口青烟藏叠嶂。岸旁红蓼翻轻浪。鸂鶒沈浮双漾漾。闻鸣桨。高飞拍拍穿林莽。

八月紫莼浮绿水。细鳞巨口鲈鱼美。画舫问渔篙暂舫。欣然喜。金盞顷刻尝珍味。

涌雾驱云天似洗。静看星斗迎蟾桂。枕棹眠蓑清不睡。无名利。谁人分得逍遥意。

九月芦香霜旦旦。丹枫落尽吴江岸。长濑黄昏张蟹断。灯火乱。圆沙惊起行行雁。

半夜系船桥北岸。三杯睡著无人唤。睡觉只疑桥不见。风已变。缆绳吹断船头转。

十月橘洲长鼓枻。潇湘一片尘纓洗。斩得钓竿斑染泪。中夜里。时闻鼓瑟湘妃至。

白发垂纶孙又子。得钱沽酒长长醉。小艇短篷真活计。家云水。更无王役并田税。

子月水寒风又烈。巨鱼漏网成虚设。圉

圉从它归丙穴。谋自拙。空归不管旁人说。  
昨夜醉眠西浦月。今宵独钓南溪雪。妻子一船衣百结。长欢悦。不知人世多离别。  
腊月行舟冰凿罅。潜鳞透暖偏堪射。岁岁年年篷作舍。三冬夜。牛衣自暖何须借。  
滕六晚来方命驾。千山绝影飞禽怕。江上雪如花片下。宜入画。一蓑披著归来也。

### 破子

渔父饮时花作荫。羹鱼煮蟹无它品。世代太平除酒禁。渔父饮。绿蓑藉地胜如锦。  
渔父醉时收钓饵。鱼梁嗽翅闲乌鬼。白浪撼船眠不起。渔父醉。滩声无尽清双耳。  
渔父醒时清夜永。澄澜过尽征鸿影。略略风来敲舴艋。渔父醒。月高露下衣裳冷。  
渔父笑时莺未老。提鱼入市归来早。一叶浮家生计了。渔父笑。笑中起舞渔家傲。

### 遣队

春留冬及一年中。杜若洲边西又东。舞散曲终人不见，一天明月一溪风。水绿山青，持竿好去。

### 鹧鸪天 次李举之见寄韵

报答风光思更新。安排好语续阳春。罗胸玉藻英华别，信手银钩点画匀。歌妙曲，想光尘。相望尺五叹参辰。曲终强对红颜笑，欠我高谈惊座人。

### 生查子 收灯日次李举之韵

帘纤小雨来，噤瘳轻寒乍。丝竹送迎时，

灯火阑珊夜。

铜壶漏故迟 ,银烛花频炷。怀我独醒人 ,  
健笔方飞洒。

### 蝶恋花

漠漠水田飞白鹭。夏木阴阴 ,巧啭黄鹂  
语。金匱诗人新得句。江山应道来何暮。

好向金门联步武。何事双旌 ,却为丹丘  
驻。琼巵十分须一举。看看紫诏催归去。

### 减字木兰花

曾欲父落成小阁 ,次其韵

藩车容裔。挺挺风流追两地。粲斗分星。  
诗句当年汗简青。

疏帘披绣。共看横云晴出岫。新月如钩。  
来照琼彝醉小楼。

### 好事近

东湖席上次曾守韵 ,时幕曹同集

风细晚轩凉 ,妙句初挥新墨。绿水池中宾  
佐 ,对嫩荷擎绿。

坐看微月上云头 ,清臂映寒玉。只恐朝来  
酒醒 ,有文书羈束。

### 虞美人

芭蕉滴滴窗前雨。望断江南路。乱云重

全宋词 洪适

叠几多山。不似倦飞鸥鹭、便知还。角声更听  
谯门弄。夜夜思归梦。鄱江楼下水含漪。孤  
负钓滩烟艇、绿蓑衣。

卜算子 席上赠瞻明

修竹拂疏棂，淡月侵凉榭。四畔青山进好  
风，金鸭香煤炷。

宝唾粲珠玑，长袖飘兰麝。莫问更楼夜若  
何，且结高阳社。

江城子 赠举之

冥冥云屿两经秋。落霞收。断烟留。小  
阁凉生，清馥凝金虬。乘兴开颜那草草，烦玉  
腕，举琼舟。

明年此日楚江头。极层楼。望丹丘。只  
恐溪山，千里碍凝眸。重倚阑干相忆处，寻过  
雁，作书邮。

减字木兰花

太守移具饯行县偶作

使君情素。念我明朝行县去。一醉相留。  
和气欢声到小楼。

暂时南北。莫唱渭城朝雨曲。此去农郊。  
收拾童儿五裤谣。

### 浣溪沙

邦伯今推第一流。几因歌席负诗筹。一时文采说台州。

雨脚渐收风入牖，云心初破月窥楼。翠眉相映晚山秋。

### 望海潮 题双岩堂

重溟倒影，五芝含笑，神仙今古台州。山拥黄堂，烟披画戟，双岩瑞气长浮。前事记鳌头。有百年台榭，千室嬉游。墨宝凄凉，风凌雨蠹尽悠悠。

规恢共仰贤侯。当政成五月，景对三秋。飞栋干云，虚檐受露，放怀不减南楼。宾燕奉觥筹。妙绮笺琼藻，声度歌喉。只恐棠阴成后，趣去侍凝旒。

### 好事近

小阁过重阳，愁对轻篁团色。喜得蛮笺新唱，似夜光明月。

萸房菊蕊定相怜，酩酊误蕉叶。犹记去年今夜，听歌声清切。

### 清平乐 次曾守韵

风鬟飞乱。寒入秦筝雁。情似云阴浑未

展。雨脚更飘银线。

横枝有意先开。玉尘欲伴金罍。何日舞  
裯歌扇,后堂重到惟梅

### 选冠子

雨脚报晴,云容呈瑞,夜雪萦盈连昼。千  
岩曳缟,万瓦堆琼,稍稍冷侵怀袖。鹤警神仙,  
兔园宾客,高会坐移清漏。想灞陵桥畔,苦吟  
缓辔,耸肩寒瘦。

向此际、色映棠阴,香传梅影,寒力更欺尊  
酒。左符词伯,蛮笺巧思,不道起风飞柳。舞  
态弓弯,一声低唱,蛾笑绿分烟岫。任杯行湫  
澹,为公沈醉,莫教停手。

### 好事近 为钱处和寿

缥酒颂青春,不减宜城桑落。楼下玉人凝  
笑,散万英千萼。

绣衣当日帝王州,横飞看雕鹗。闻道赐环  
书下,向金门持橐。

### 鹧鸪天 次曾守游梅园韵

领客携尊花底开。薄寒初送雨声来。一  
声未弄林间笛,几片低飞阁下梅。酬的哂,少  
迟回,不妨春雪撒银杯。玉肌莫放清香散,更  
待晴时赏一回。

浣溪沙 钱范子芬行

整顿春衫欲跨鞍。一杯相属少开颜。愁眉不似旧时弯。

未见两星添柳宿，忍教三叠唱阳关。相思空望会稽山。

又 以鸳鸯梅送曾守，是日，曾守携家游南园

报道倾城出洞房。水边疏影弄清香。风流更有小鸳鸯。

蝉鬓半含花下笑，蛾眉相映醉时妆。梦魂不到白云乡。

又 以鸳鸯梅送钱漕

玉颊微醺怯晚寒。可怜凝笑整双翰。枝头一点为谁酸。

只恐轻飞烟树里，好教斜插鬓云边。淡妆仍向醉中看。

又 席中答钱漕

忆得熙春晓立班。使星曾入紫微垣。归来小饮友芝兰。

投辖风流今复见，开尊礼数自来宽。更看宝唾写乌阑。

清平乐 以千叶粉红牡丹送曾守

轻红淡白。蓬阁神仙谪。魏紫姚黄夸异色。到得海边初识。

玉阑不语如颦。虚教春尽三分。却问檀

心谁向 ,多情更属东君。

### 生查子

桃疏蝶惜香 ,柳困莺惊絮。日影过帘旌 ,  
多少愁情绪。

红惨武陵溪 ,绿暗章台路。春色似行人 ,  
无意花间住。

### 思佳客 次韵蔡文同集钱漕池亭

花信今无一半风。芙蓉出水几时红。看  
成弱柳阴阴绿 ,自在迁莺巧语中。风傍户 ,月  
留空。金尊相对醉珠栊。归鞭欲指江南去 ,回  
首霞标忆旧峰。

### 朝中措 曾守生辰

当年召父治南阳。千室颂慈祥。今代天  
台太守 ,声名已达岩廊。

风流闲暇 ,胡床乘兴 ,燕寝凝香。好去花  
砖视草 ,珠庭喜见微黄。

又

江西文派有新图。诗律嗣东湖。十首齐  
安书事 ,君王曾问相如。

牙签缥架 ,银钩落纸 ,美玉明珠。见说诏  
岁金匱 ,后来天下浑无。

又 邓盐生日

青云垂下不争程。绣斧记澄清。黄木湾

头人闹 , 耳边都是欢声。

仙家咫尺 , 波涵渤澥 , 路挹蓬瀛。十日东君不老 , 一星南极长明。

又 帅生日

斗南楼阁舞祥云。为寿几多人。有酒恰如东海 , 年年为满金尊。

无双治行 , 儿童咏德 , 草木沾仁。只把空虚三院 , 亦须笑傲千春。

又 苏少连母生日

西昆当日下云骈。彩藻奉苏仙。玉节荣看棠棣 , 斑衣笑俯芝兰。

寿觞争举 , 歌萦蛾绿 , 香袅龙涎。须与寄声鸾鹤 , 飞来岁岁年年。

又 黄帅宪侍儿倩奴

嘉禾一别十经春。清泚记垂纶。今日天涯沦落 , 蹙然一见佳人。

酒浮重碧 , 声低云叶 , 香趁霞裙。准拟魁星归去 , 它时相会金门。

### 浣溪沙 寿方稚川

占得登高一日先。跨云来作地行仙。天将黄菊助长年。

健笔已凌枚叟赋 , 高怀欲著祖生鞭。骎骎彩组向甘泉。

### 临江仙 邓盐生日

向日鹇行瞻凤彩 , 共期直上金銮。却来持

节海云边。身兼三使者，名是一仙官。  
汉室中兴高密冠，千年苗裔蝉联。左弧嘉  
庆舞祥烟。橘中招四老，同醉酒如泉。

又 会黄魁

北斗南头云送喜，人间快睹魁星。向来平  
步到蓬瀛。如何天上客，来佐海边城。  
方伯娱宾香作穗，风随歌扇凉生。且须滟  
滟引瑶觥。十年迟凤诏，万里寄鹏程。

又 稚川生日

钓濑怀珠山韞玉，谪仙至自蓬莱。它年勋  
业上云台，棣华开幕府，莲沼屈英才。  
南极逢秋光烂烂，门阑香雾萦回。须将寿  
卉荐琼杯。篱东明日菊，借取一枝来。

又

烟凑横岗霞抱日，望中衰草稠稠。西风吹  
恨著扁舟。马卿多病后，方寸不禁秋。  
颇念银壶行绿醕，共听渔子清讴。梦魂飞  
过海山楼。人随秋易老，情寄水东流。

又 傅丈生日

干吕青云垂宝露，结邻恰挂初弦。瑞光腾  
踊杂非烟。骑箕瞻鼻祖，孕昴控胎仙。  
勋业子卿全汉节，壮怀久寄林泉。举觞低  
唱脸舒莲。寿高人七十，果熟岁三千。

又 寿周材

瓜瓞绵绵储庆远，闲平代有名人。一襦五  
裤说朱轮。云逵鸳缀近，雷社虎符新。  
正是泗滨浮磬日，潘舆一粲欣欣。鸾歌飞

起杏梁尘。巢莲龟问岁，介寿酒融春。

又 送罗倅伟卿权新州

远驾星屏临百粤，康沂户户歌功，使君五马去乘骢。卖刀无旷土，赠扇有仁风。

莫唱渭城朝雨曲，片帆时暂西东。促归行拜紫泥封。九霄先步武，三接未央宫。

江城子 钱黄魁

当年提笔上词坛。琢琅玕。涌波澜。晁董声名，一日满人间。底事远烦骐驎足，梅岭外，砚台边。

元戎倾盖有余欢。酒杯宽。语离难。只恐江边，明日起青翰。暂去平分风与月，迎细札，步金銮。

又 黄宪生日代作

江如罗带抱山青。好风轻。五云横。北斗南边，烨烨使华星。两路平反多少事，培吉德，赉长生。

当年乌府振冠缨。稔英声。起鹏程。垂上丹青，回首志澄清。雪片深深梅著子，归路近，看和羹。

醉蓬莱 代上陈帅生日

正中秋初过，重阳相近，金茎多露。玉燕开祥，喜气浮庭户。览凤千峰，骖鸾八桂，未展青云步。碧玉簪边，红莲池上，羽仙旁午。

少日声名 ,珠玑黼黻 ,晔煜分符 ,喧轰持斧。带缓裘轻 ,足远人襦裤。唇注樱桃 ,腰欺杨柳 ,歌舞新蛮素。满酌金船 ,寿公千岁 ,东台西府。

满庭芳 代上陈帅生日

昴宿光芒 ,德星家世 ,当时飞舞华旗。风清玉宇 ,珠露缀瑶枝。八桂苍苍耸壑 ,问椿木、同数秋期。黄堂上 ,油幢转影 ,美酒注金卮。

英躔 ,名誉早 ,青箱传学 ,黄绢摘辞。说江东治行 ,召杜肩齐。畏爱双行五管 ,收绣斧、却把旌麾。欢声沸 ,明年此日 ,公在凤凰池。

千秋岁 代上帅宅生日

颜朱鬓绿。天与穰穰福。旄钺贵 ,崇汤沐。华轩鱼映锦 ,紫诰鸾回幅。为寿处 ,玻璃凿落斟醽醑。

瑞雾蟠华屋。露浥秋兰馥。香篆起 ,歌裾簇。衣斑丹穴凤 ,色润东床玉。鸾共鹤 ,年年来听神仙曲。

眼儿媚

黄堂风转碧幢开。笙鹤九天来。三冬爱日 ,一方惠露 ,人在春台。

持杯多赞松乔喜 ,低唱列金钗。明年此日 ,紫微垣里 ,光应中台。

鹧鸪天 胡提舶生日

月上初弦映左弧。葭吹六琯转璇枢。日边远近瞻新渥，天下中庸系两都。犀献角，蚌回珠。皇皇星节烛扶胥。满斟北海尊中酒，请寿安期涧底蒲。

长相思

朝思归。暮思归。塞雁三年不见飞。断肠天一涯。

千思归。万思归。梦到窗前拂淡眉。觉来双泪垂。

又

柳青青。酒清清。雨脚涔涔忆渭城。一尊和泪倾。

山青青。水清清。水阔山重不计程。愁堆长短亭。

好事近 别傅丈

柳岸碧漪深，底事催人行色。无计曲留情话，只别愁如织。

小蛮樊素两倾城，几度醉狂客。明日扁舟西去，听歌声不得。

全宋词 洪适

点绛唇 别帅宪

天末相逢 ,醉中不讶车茵污。一声鸣橹。  
惊散眠沙鹭。

我是行人 ,却送行人去。听金缕。莫辞甘  
醕。别泪飞寒雨。

南歌子 童岭作

云拂山腰过 ,风吹雨点来。田园好处有池  
台。记著相逢时节、海棠开。蝴蝶那无梦 ,鸳  
鸯亦有媒。藏钩解佩两三杯。明日水边沙际、  
首空回。

好事近

烂漫海棠花 ,多谢东君留得。眉寿堂边风  
景 ,与蓬瀛咫尺。

桃红李白竞争妍 ,绿野尽春色。只欠樱唇  
清唱 ,怕行云南北。

生查子 盘洲曲

带郭得盘洲 ,胜处双溪水。月榭间风亭 ,  
叠嶂横空翠。

团栾情话时 ,三径参差是。听我一年词 ,  
对景休辞醉。

又

正月到盘洲 ,解冻东风至。便有浴鸥飞 ,  
时见潜鳞起。

高柳送青来 ,春在长林里。绿萼一枝梅 ,  
端是花中瑞。

又

二月到盘洲 ,繁缣盈千萼。恰恰早莺啼 ,  
一羽黄金落。

花边自在行 ,临水还寻壑。步步肯相随 ,  
独有苍梧鹤。

又

三月到盘洲 ,九曲清波聚。修竹荫流觞 ,  
秀叶题佳句。

红紫渐阑珊 ,恋恋莺花主。芍药拥芳蹊 ,  
未放春归去。

又

四月到盘洲 ,长是黄梅雨。屐齿满莓苔 ,  
避湿开新路。

极望绿阴成 ,不见乌飞处。云采列奇峰 ,  
绝胜看庐阜。

又

五月到盘洲 ,照眼红巾蹙。句引石榴裙 ,  
一唱仙翁曲。

藕步进新船 ,斗楫飞云速。此际独醒难 ,  
一一金钟覆。

又

六月到盘洲 ,水阁盟鸥鹭。面面纳清风 ,

不受人间暑。

彩舫下垂杨，深入荷花去。浅笑擘莲蓬，  
去却中心苦。

又

七月到盘洲，枕簟新凉早。岸曲侧黄葵，  
沙际排红蓼。

团团歌扇疏，整整炉烟袅。环坐待横参，  
要乞蛛丝巧。

又

八月到盘洲，柳外寒蝉懒。一掬木犀花，  
泛泛玻璃盏。

蟾桂十分明，远近秋毫见。举酒劝嫦娥，  
长使清光满。

又

九月到盘洲，华发惊霜叶。缓步绕东篱，  
香蕊金重叠。

橘绿又橙黄，四老相迎接。好处不宜休，  
莫放清尊歇。

又

十月到盘洲，小小阳春节。晚菊自争妍，  
谁管人心别。

木末簇芙蓉，禁得霜如雪。心赏四时同，  
不与痴人说。

又

子月到盘洲，日影长添线。水退露溪痕，  
风急寒芦战。

终日倚枯藤，细看浮云变。洲畔有圆沙，

招尽云边雁。

又

腊月到盘洲 ,寒重层冰结。试去探梅花 ,  
休把南枝折。

顷刻暗同云 ,不觉红炉热。隐隐绿蓑翁 ,  
独钓寒江雪。

又

一岁会盘洲 ,月月生查子。弟劝复兄酬 ,  
举案灯花喜。

曲终人半酣 ,添酒留罗绮。车马不须喧 ,  
且听三更未。

### 阮郎归

澄清阁下藕如船。扁舟曾采莲。向来辛苦叠青钱。而今知几年。

人去也 客凄然。酒泉添泪泉。一杯今夜且留连。断肠芳草边。

### 浣溪沙

席上别王巨济。先是 ,两姬免冠 ,王夺两秩 ,继以章罢

丹桂飘香已四番。杖藜携手自今难。黯然离恨满江干。

壁上两冠元是讖 ,花前双韵几时弹。中秋后夜与谁看。

### 满江红

暮雨萧萧，飞败叶、增添秋色。登高会、痴风吹散，山居嘉客。人世难逢开口笑，老来更觉流年迫。到如今、黄菊满园开，无人摘。

珠履凑，铢衣窄。萦翠袖，催牙拍。索松儿添半，战酣相吓。橘绿橙黄时节好，舞停歌罢门墙隔。酒醒时、枕上一声鸡，东方白。

又 郑宪席上再赋

累月愁霖，知今夕、是何天色。秋老矣、芙蓉遮道，黄花留客。长有霜螯来左右，谁言枥马能煎迫。眄高穹、重叠起顽云，星难摘。

罗绮盛，轩窗窄。心已醉，肩须拍。更十分行酒，再三相吓。凤诏十行归路近，桂华千里明年隔。趁闲时、楼上共凝眸，芦花白。

### 临江仙 盘洲饯汉章

两载绣衣频驻节，金莲曾印青苔。匆匆归去寿琼杯。曲终挥别泪，江上片帆开。

记得秋宵山吐月。酒酣同上层台。杖藜何日解重来。相思凭过雁，飞送一枝梅。

### 浣溪沙

景卢以米书眉间一点黄之曲饯送郑宪，因用其韵  
举目霜林叶叶黄。使星归骑未须忙。烟鬟千叠弄残妆。

内殿恩光承雨露。外台风力挟冰霜。应  
怀三径杂花香。

又 席上再作

不见丹丘三十年。青山碧水想依然。自  
惊绿鬓已苍颜。

月在柳梢曾径醉，雨荒院菊有谁怜。绣衣  
归与古人言。

### 生查子

姚母寿席，以龟游莲叶杯酌酒

碧涧有神龟，千岁游莲叶。七十古来稀，  
寿母杯频接。

绣衣牵彩衣，喜庆相重叠。龟紫看孙曾，  
鹤发何须镊。

又 枕上作

贪看端木花，难办销金帐。庭下舞琼瑶，  
飞到须眉上。

衰病不禁寒，对景频惆怅。梦寐到凌风，  
倚著青藜杖。

### 鹧鸪天 席上赏牡丹用景裴韵

莫问甘醪浊与清。试将一酌破愁城。海  
棠过后荼蘼发，堪叹人间不再生。心已老，眼  
重明。嫣然国色带朝醒。耳边听得兰亭曲，一  
咏流觞已有名。

又 十九孙入学，因作小集。景裴有作，次其韵

两塾弦歌日日春。不容坐席更凝尘。常

思芳桂攀燕窠,未见童乌继子云。流庆泽,仰家尊。救荒阴德过于门。从师已是平原客,毛遂怀绷作弄孙。

### 好事近

春意渐盈盈,窗外小桃堪折。若问得人怜处,是轻颦时节。

主人特地出红妆,不要云心月。三径虽然冷淡,有采莲舟楫。

### 满江红

春色匆匆,三分过、二分光景。吾老矣,坡轮西下,可堪弄影。曲水流觞时节好,茂林修竹池台永。望前村、绿柳荫茅檐,云封岭。

蜂蝶闹,烟花整。百年梦,如俄顷。这回头陈迹,漫劳深省。吹竹弹丝谁不爱,焚琴煮鹤人何肯。尽三觥、歌罢酒来时,风吹醒。

又 和徐守三月十六日

雨过春深,溪水涨、绿波溶溢。年年是、杨花吹絮,草茵凝碧。驹隙光阴身易老,槐安梦幻醒难觅。算六分、春色五分休,才留一。

雁鹜静,文书毕。尘外趣,壶中日。喜兰亭修禊,郊垆炊出。合璧连珠同啸咏,怒猊渴骥尤清逸。酒酣时、梁上暗尘飞,无痕迹。

又 答景卢

衰老贪春,春又老、尊罍交溢。凝目处、清

漪拍岸 ,四山堆碧。白也论文情最厚 ,维摩示病心难觅。到盘洲、车骑太匆匆 ,觴浮一。

春再见 ,官期毕。归路近 ,长安日。奉清时明诏 ,迭回更出。上殿风霜生颊齿 ,元龟献替图无逸。记而今、杖策过溪桥 ,留行迹。

又 黄堂席上答太守

燕寝香凝 ,官事了、诗情充溢。归后院、花容争媚 ,柳眉添碧。老子胡床常自叹 ,轻裾长袖从何觅。探城楼、此际夜如何 ,更筹一。

人已老、春将毕。临曲水 ,才旬日。快朝来雨过 ,鱼儿争出。淡酒一杯空酩酊 ,黄堂千骑真安逸。问朱幡、何日到丘园 ,联綦迹。

又 席上答叶宪

百计留春 ,春不住、愁怀填溢。争如对、宝梳压鬓 ,翠环铺碧。紫绶金章都是梦 ,云庐花坞如何觅。劝金杯、浅笑傍宾筵 ,须均一。

前夜月 新离毕 ,收涩雨 ,呈红日。荷主人情厚 ,五云齐出。一颗樱桃天付与 ,数声水调人飘逸。叹荒园、三月百花残 ,无踪迹。

南歌子 雪中和景裴韵

闰岁饶光景 ,中旬始打春。拥护看雪酒催人。梁上不曾飞落、去年尘。未暇巾车出 ,何妨举盞频。斜川日月已成陈。想得前村仙子、晚妆匀。

又 呈叶宪

多病都缘老 ,寒阴可惜春。栽桃种竹怕因

循。移转篮舆藤杖、未开门。真率须如约，安排欲效颦。莫特箏笛损精神。自有啼莺舞鹤、解随人。

又 示景裴弟 时叶宪明日真率

顽健输村老，嬉游付后生。七旬才有五清明。须趁良辰美景、绕园行。云意将飞雪，天心未肯晴。难将性命作人情。只合拥炉清坐、阅医经。

又 喜晴用前韵

住得如筛雪，方欣有脚春。谁云三尺不须循。若是诗僧月下、许敲门。钜竹多中断，残梅竞小颦。畦丁说与主林神。扫洒板桥前径、待吾人。

又 示裴弟

强作千年调，难逾五度春。脊令继踵漫相循。休要关心药裹、也扃门。  
蕙帐银杯化，纱窗翠黛颦。  
烧香试问紫姑神。一岁四并三乐、几多人。

又 寄景庐

南浦山罗列，东湖水渺漪。主人好客过当时。斗转参横时候、醉如泥。莫管莺声老，从它柳絮飞。野园春色别无奇。船上有花多酒、未须归。

好事近 席上用景裴咏黄海棠韵

睡足淡梳妆，喜见诗人元白。不学艳红妖

紫 坏花仙标格。

须知玉骨本天然 ,不是借人力。准拟小春  
重看 ,望秋灰无射。

卜算子 太守席上作

五凤望中仙 ,五马人间贵。舞态歌声尽出  
群 ,乌鹊巡檐喜。

昨夜值狂风 ,痛饮全无味。说与谯门漫打  
更 ,却怕催归骑。

满庭芳 辛丑春日作

华发苍头 ,年年更变 ,白雪轻犯双眉。六  
旬过四 ,七十古来稀。问柳寻花兴懒 ,拈筇杖、  
闲绕园池。尊中有 ,青州从事 ,无意唤琼彝。

人生 ,何处乐 ,楼台院落 ,吹竹弹丝。奈壮  
怀销铄 ,病费医治。漫道琴弦绿绮 ,游鱼听、山  
水谁知。盘洲怨 ,盟鸥闲阔 ,瘞鹤立新碑。

又 酬徐守

风搅花间 ,雨擘柳下 ,人人懒拂愁眉。年  
荒省事。投辖井中稀。架上舞衣尘积 ,弦索断、  
箏雁差池。南柯梦 ,转头陈迹 ,饥鼠穴空  
彝。

新年 ,官事少 ,秋蛇春蚓 ,重叠乌丝。更出  
奇花判 ,百病都治。报道行厨办也 ,乌鹊喜、龟  
鹤前知。更书近 ,鹓行浸远 ,长对去思碑。

又 酬叶宪

殢酒销愁 ,逢场作戏 ,何曾择地伸眉。诗

筒来往 ,如我与君稀。喜得青春有闰 ,添日月、  
款曲临池。洲盘有 ,山肴野蔌 ,安用设鸡彝。

老来 ,空自笑 ,一头梳雪 ,两鬓吹丝。便常  
逢社饮 ,聳不堪治。曾就新年真率 ,花神报、蜂  
蝶皆知。东风恶 ,江梅欲尽 ,荐福莫轰碑。

又 和叶宪韵

柳径花台 ,熙熙春动 ,游人珥堕簪遗。枯  
藤到处 ,绿刺惹冠衣。雪后园林更好 ,琼作佩、  
香满横枝。巡檐久 ,留连一笑 ,不管午阴移。

盘洲 ,今雅集 ,皇华飞盖 ,挥麈迟迟。觉龟  
鱼增价 ,草木生辉。梁上不教尘落 ,谈文字、酒  
散星稀。明年好 ,玉津随驾 ,回首记襟期。

又 再赠叶宪

同病相怜 ,冻吟谁伴 ,漫怀举案齐眉。槐  
安梦境 ,一笑自来稀。未到斜川雪 ,春欲半、尚  
压铜池。今思古 ,拊盆击筑 ,蛩鼎闲夔彝。

何时。天意解 ,并游花坞 ,旋扫蛛丝。对  
壶中闲日 ,冗牒休治。四坐同盟情话 ,飞玉麈、  
万事多知。杯盘省 ,浅斟随意 ,真率视前碑。

又 答景庐遣怀

蝴蝶梦魂 ,芭蕉身世 ,几人得到庞眉。十  
分如意 ,天赋古今稀。昼日猥叨三接 ,摩鹏翼、  
曾化鲲池。槐阴下 ,深惭房魏 ,那敢作封彝。

雁行 ,争接翅 ,北门炬烛 ,西掖纶丝。幸归  
来半世 ,园路先治。渔唱樵歌不到 ,莺燕语、何  
畏人知。编花史 ,修篁千亩 ,封植具穹碑。

又 酬赵泉

春入花畦 ,雪迷筠坞 ,柳梢未肯低眉。泥

深路滑 车马往来稀。平地琼琚盈尺 冰冻解、檐水如池。皇华喜 增添泉货 不铸尚方彝。

光阴 驹过隙 髭髯如戟 容易成丝。把诗盟长讲 酒病休治。两两垂螺舞彻 藏羌管、人已潜知。檣乌转 钱流地上 褒诏便刊碑。

又 酬赵宪

当国无功 归田有分 四山浓抹烟眉。春云多变 清昼惠风稀。欲踵兰亭故事 溪水涨、簪盍鹅池。临修竹 一觴一咏 考古到辛彝。

当时 龙袞侧 亲闻胪句 天语如丝。谩三年博士 局冗争治。底事绣衣留滞 青天瑞、奴隶皆知。迎归诏 鸾台凤阁 名记壁间碑。

又 再作

草阁烟横 花溪雨润 伤春谁画鸦眉。药囊未减 尊酒自然稀。堪叹云和挂壁 弦半绝、鼠啮龙池。投壶罢 凭阑玩古 罗列父丁彝。

龟巢 添绿皱 残梅片片 新柳丝丝。恨风狂折竹 鹤病谁治。自信年衰景短 甘冷淡、应也无知。坝簾奏 清歌醉墨 一一上圭碑。

又 景庐有南昌之行 用韵惜别 兼简司马汉章

雨洗花林 春回柳岸 窗间列岫横眉。老来光景 生怕聚谈稀。何事扁舟西去 收杖屨、契阔鱼池。流觴近 诗筒暂歇 焉用虎文彝。

良辰 怀旧事 海棠花下 笑摘垂丝。叹五年一别 万病难治。几处绣衣尘迹 歌舞地、乌鹊曾知。君今去 珠帘暮卷 山雨拂崇碑。

又 再作寄景庐

旧日盘洲 藏钩卜夜 松儿笑拣双眉。老

人好静 ,此乐数年稀。尚记乘舟西湖 楼卷雪、  
曾到雷池。今非昔 ,畏寒闭户 ,弃掷夏商彝。

入春 逾两月 ,轻烟非雾 细雨如丝。任风  
颓花架 ,不惮装治。想得醉吟滕阁 ,家园事、争  
解详知。归来好 ,猿惊鹤怨 ,孤负辋川碑。

### 望江南 答徐守韵

嗟故岁 ,夏旱复秋阳。十雨五风皆定数 ,  
千方百计为灾伤。小郡怎禁当。劳拊字 ,惠露  
洽丁黄。田舍炊烟常蔽野 ,居民安堵不离乡。  
祖道免赍粮。

又 再作

倾盖侣 ,古语诵邹阳。曲水一觞今意懒 ,  
阳关三叠重情伤。离恨落花当。人截镫 ,归骑  
莫仓黄。谁肯甘心迷簿领 ,不如袖手傲家乡。  
高枕熟黄粱。

### 西江月 雪中

小室坐毡重叠 红炉兽炭交加。一卮村酒  
吸流霞。窗外寒威可怕。

心在盘洲种柳 眼看密雪飞花。银杯缟带  
不随车。江上渔蓑难画。

又 再作

席上酒杯难减 鼎中药味频加。老人争得  
脸如霞。镜里衰容人怕。

檐溜尽成冰柱 前村变却梅花。琼瑶破碎

为行车。冻雀盈枝堪画。

### 眼儿媚

瀛仙好客过当时。锦幌出蛾眉。体轻飞燕，歌欺樊素，压尽芳菲。

花前一盼嫣然媚，滟滟举金卮。断肠狂客，只愁径醉，银漏催归。

### 六州歌头

严更永，今夕是何年。玉衡正，钩陈灿，天宇起祥烟。协风应、江海安澜。重规仍叠矩，圣主乘乾。尧授舜、盛事光前。称寿玉卮边。三年亲祀，一阳回律，八乡承宇，觚陛紫为坛。

仰天颜。斋居寂，诚心肃，礼容专。存钟石，约舆卫，五辂不求全。听金钥、虎旅无眠。俨千官。须期显。相嘉筮。一人俭德动天渊。费减大农钱。神示格，宗祧燕。人民悦，祉福正绵绵。

### 十二时

庭有燎，叠鼓鸣鼙。更问夜如何。信星彪列，天象森罗。虞旦闋宫毕，觴清庙，浆柘尊牺继猗那。嘉颂可同科。扈圣万肩摩。飭躬三宿，泰畤缛仪多。丘泽合，岳读从曦娥。神光烛、云车风马，芝作盖，玉为珂。奉瑄成礼，爇柴竣事，休嘉砰，隐丹阙，湛恩波。共愿乾坤隤

祉 边鄙投戈。覆盂连瀚海 ,洗甲挽天河。欣  
欣喜色 ,长遇六龙过。奏云和。三春荐嘉禾。

### 奉禋歌

吹葭缙籥气潜分。云采宜书壤效珍。长  
日至 ,一阳新。四时玉烛和匀。物欣欣。造化  
转洪钧。郊之祭 ,孤竹管 ,六变舞云门。自古  
严禋。牺牲具 ,粢盛洁、豆笾陈。袞龙陟降 ,币  
玉纷纶。彻高阍。灵之游 ,神哉沛 ,排历昆仑。  
九歌毕 ,盈郊瞻樯燎 ,斗转参横将旦 ,天开地辟  
如春。清跸移轮。阗然鼓吹相闻。祭祥云 骧  
肱八陛 ,厘逆三神。圣矣吾君。华封祝、慈宫  
万寿 椒掖多男 ,六合同文。

### 降仙台

漏残柝静鸡声远 ,到高燎。入层霄。云裘  
蟠瑞霭 ,天步下嘉坛 ,旗旒飘摇。黄麾列仗貔  
貅整 ,气压江潮。导前从后盛官僚。玉佩间金  
貂。望扶桑 ,日渐高。阴霾霜雪 ,底处不潜消。  
辇路祥飏。披拂绛纱袍。云间瑞阙仰岩峤。  
播春泽、喜浹黎苗。礼成大庆 ,鳌三抃、受昕  
朝。

### 正宫导引

重华天子 ,长至奉神虞。九奏会轩朱。星  
晖云润东方晓 ,拜祝竹宫初。归来千乘护皇

全宋词 洪适

輿。瑞景集金铺。鸡竿高唱恩书下，惠露匝中  
区。

## 洪咨夔

### 沁园春 寿命紫薇

诗不云乎，蒹葭苍苍，白露为霜。看高山乔木，青云老干，英华滋液，亦敛而藏。匠石操斤游林下，便一举采之充栋梁。须知道，是天将大任，翕处还张。

薇郎玉佩丁当。问何事午桥花竹庄。又星回岁换，腊残春浅，锦熏笼紫，栗玉杯黄。唤起东风，吹醒宿酒，把甲子从头重数将。明朝去，趁传柑宴近，满袖天香。

### 又 次黄宰韵

归去来兮，杜宇声声，道不如归。正新烟百五，雨留酒病，落红一尺，风妒花期，睡起绿窗，销残香篆，手板榰颐还倒持。无人解，自追游仙梦，作送春诗。

风流不似年时。把别墅江山供弈棋。空一川芳草，半池晴絮，歌翻长恨，赋续怀离。桃叶渡头，沈香亭北，往事悠悠难重思。徘徊处，看鸣鸠唤妇，乳燕将儿。

### 又 寿淮东制置

饮马咸池。总辔昆仑，横鹜九州。庆中

兴机会，天生山甫，非常事业，天授留侯。  
左搏龙蛇，右驯虎兕，万里中原谈笑收。功名早，便貂蝉猎猎，飞出兜牟。

新甿无限欢讴。尽卖剑卖刀归买牛。正  
麦摇熏吹，黄迷断垄，秧涵朝雨，绿遍平畴。  
眼底太平，不图再见，罗拜焚香青海头。从  
今去，愿君王万岁，元帅千秋。

又 用周潜夫韵

秋气悲哉，薄寒中人，皇皇何之。更黄  
花吹雨，苍苔滑屐，栏空斗鸭，床老支龟。  
静里跂音，明边眉睫，蹴踏星河天脱鞵。清  
谈久，顿两忘妍丑，嫫姆西施。

濂溪家住江湄。爱出水芙蓉清绝姿。好  
光风霁月，一团和气，尸居龙见，神动天随。  
著察工夫，诚存体段。个里语言文字非。君  
家事，莫空将太极。散打图碑。

风流子 和杨帅芍

锦幄醉茶麝。狻猊暖、银蒜压烟霏。正  
韩范安边，欧苏领客，红芳庭院，绿荫窗扉。  
著句挽春春肯住，更判羽觞挥。金系花腰，  
玉匀人面，娇慵无力，娅姹相依。

繁华都能几，青油幕、好与遮护晴晖。  
寄语东君，莫教一片轻飞。向温馨深处，留  
欢卜夜，月移花影，露裊人衣。只恐明朝西  
垣，有诏催归。

贺新郎 寿成都孙宰

露洗秋光透。指岷峨、无边峭碧，与君

为寿。万里同随琴鹤到。只愿人情长久。尽头白、眼青如旧。从叟功名三尺剑，倚函关、风雨蛟龙吼。谈笑取，印如斗。

从今尽展眉峰皱。看诸郎、翩翩黄甲，班班蓝绶。一簇孙枝扶膝下，翠竹碧梧争秀。便嘉庆、图中都有。花影婆娑清昼永，护新凉、更著丝簧手。欢未尽，剩添酒。

又 寿程于潜

风软帘花约。玉壶天、芙蓉欲盖，篔簹初掣。宿霭收阴晴色定，一点星明碧落。光拍满、浮溪岑崿。银栉铁冠风物古，更秧青、麦熟蚕登箔。欢取酒，为君酌。

华堂袞绣今如昨。长官清、水晶灯照，珊瑚钩琢。富贵功名知有样，晨起一声檐鹊。便好趁。六更宫钥。龙尾朝回长燕喜，宝香深、醉引莱衣著。吹紫凤，舞黄鹤。

又 咏梅用甄龙友韵

放了孤山鹤。向西湖、问讯水边，嫩寒篱落。试粉盈盈微见面，一点芳心先著。正日暮、烟轻云薄。欲揽清香和月咽，倩冯夷、为洗黄金杓。花向我，劝多酌。

单于吹彻今成昨。未甘渠、琢玉为堂，把春留却。倚遍黄昏栏十二，知被儿曹先觉，更笑杀。卢仝赤脚。但得东风先手在，管绿阴、好践青青约。方寸事，两眉角。

又

谁识昂昂鹤。且随缘、剩水残山，东村西落。世事几番新局面，看底却高三著。况

全宋词 洪咨夔

转首、西山日薄。雪意压檐梅索笑，任柄长、柄短邻家杓。斲小瓮，动孤酌。

见花忆得年时昨。正微醺、独步黄昏，被花迷却。冷月吹香春弄影，么凤梢头先觉。恍梦断、罗浮山脚。欲寄心期无驿使，想凌寒、不奈腰肢约。空凭暖，画栏角。

汉宫春 老人庆七十

南极仙翁，占太微元盖，洞府为家。身骑若木倒景，手弄青霞。芙蓉飞旆，映一川、新绿平沙。好与问，东风结子，几回开遍桃花。

况是初元玉历，更循环数起，希有年华。长把清明夜气，养就丹砂。麻姑送酒，安期生、遗枣如瓜。欢醉后，呼儿烹试，头纲小凤团茶。

夏初临

铁瓮栽荷，铜彝种菊，胆瓶萱草榴花。庭户深沈，画图低映窗纱。数枝奇石谿飏。染宣和、瑞露明霞。手菟长啸，风林未鸣，霜草先斜。

雪丝香里，冰粉光中，兴来进酒，睡起分茶。轻雷急雨，银篁迸插檐牙。凉入琵琶。枕帙开、又送蟾华。问生涯。山林朝市，取次人家。

## 满江红

送雨迎晴，花事过、一庭芳草。帘影动、归来双燕，似悲还笑。笑我不知人意变，悲人空为韶华老。满天涯、都是别离愁，无人扫。

海棠晚，荼蘼早。飞絮急，青梅小。把风流酝藉，向谁倾倒。秋水盈盈魂梦远，春云漠漠音期悄。最关情、鹧鸪一声催，窗纱晓。

又 老人游东山，追和俞贰卿词，谨用韵

把酒西风，浑莫问、主宾谁恶。千古事、几□遇合，几人流落。肝胆轮囷溟渤小，精神浩荡蓬莱薄。望拒霜、红处是东山，长如昨。

苍苔迹。何曾削。黄叶梦，何难觉。等春云出岫，秋波归壑。老子婆娑风度远，佳人缥缈腰肢约。况登高、节过又登高，须多酌。

## 天香 寿朱尚书

云母屏开，博山炉熨，人间南极星现。酥篆千秋，灯图百子，洒浪花光照面。堂深戏彩，任父老、儿童争劝。耆艾相将潞国，精明恰如清献。

春风飘香合殿。仗云齐、漏迟宫箭。正好簪荷入侍，帕柑传宴。日月华虫茜绚。便

与试、胸中五纹线。寿域长开，洪钧长转。

水调歌头 送曹侍郎归永嘉

四海止斋老，百世水心翁。都将不尽事业，付与道俱东。气脉中庸大学，体统采薇天保，几疏柘袍红，千仞倚寥碧，一点驾归鸿。

扈江篱，贯薜荔，制芙蓉。午桥绿野深处，心与境俱融。搏控乾坤龙马，簸弄坎离日月，苍鬓映方瞳。只恐又催诏，飞度橘花风。

又 中夏望前一夕步月

如此好明月，梅里自来无。炎云溽雾收尽，宇宙一冰壶。浅濑乍分随合，清影欲连还断。滉漾玉浮图。风物庾楼似，秋思欠菰蒲。

醉魂醒，尘骨换，我非吾。琼箫紫凤何许，风露足清都。君看流光多处，缥缈澹澹人立，白与藕花俱。只恐姮娥妒，凉透粟生肤。

念奴娇 老人用僧仲殊韵咏荷花谨和

香山老矣，正商量不下，去留蛮素。独立踌躇肠欲断，一段若耶溪女。水底新妆，空中香袖，斜日疏风浦。向人欲语，垂杨清荫多处。

便好花里唤船，碧筒白酒，微吸荷心苦。

佳月一钩天四碧，隐约明波横注。雪藕逢丝，擘莲见蕙，枕簟凉如雨。一双宿鹭，伴人永夜翘伫。

又 敬借老人灯韵为寿

光风霁月，信行窝到处。人间天上。一笑唤回新造化，满眼翠舒红放。脑后功名，脚跟富贵，梦断春旗仗。幅巾萧散，任他虬虱龙象。

正是杨柳初眠，海棠半睡，锦绣天开障。鹤骨松筋年望八，得醉不妨澜浪。节过烧灯，时催修禊，迎面韶华荡。宗文扶著，问翁马首何向。

更漏子 次黄宰夜闻桂香

眼生花，灯缀粟。人在黄金列屋。金缕细，道冠明。胆瓶凉意生。

缓歌弦，停酒斝。待得香风吹下，斜月转，断云回。风流不让梅。

好事近 次曹提管春行

二十四番风，才见一番花鸟。已是有人春瘦，正远山横峭。

踏青底用十分晴，半阴晴方好。深院日长睡起，又海棠开了。

朝中措 送同官满归

荷花香里藕丝风。人在水晶宫。天上桥

成喜鹊，云边帆认归鸿。

去天尺五城南杜，趣对柘袍红。若问安边长策，莫须浪说和戎。

又 次杨仲禹韵

翠盆红药护觥筹。风物似扬州。春事一声杜宇，人生能几孤裘。

有山可买，有书可读，不愿封留。一任东风犇路，群公苍佩鸣璆。

又 寿章君举

滂葩七十二滩春。钟瑞石麒麟。流水行云才思，光风霁月精神。

金蕉进酒，斑衣起舞，喜气津津。群玉峰头环佩，紫薇花底丝纶。

点绛唇 次张伯修韵

花事无多，笙歌缩取东风住。玉彝雕俎，楼外更筹屡。

醉唤骊驹，催上天梯去。君知否。半边铜虎。邓艾经行路。

西江月 寿章叔厚

庭下宜男萱草，墙头结子榴花。非烟非雾富平家。人物风流如画。

宝月曾修玉斧，银河欲泛仙槎。美人睡起绿云斜。一笑扶将寿斝。

浣溪沙 寿子有

苍鹤飞来水竹幽。初弦凉月一帘秋。木犀花底试新篳。

风味砚供无尽藏，友飞榜占最高头。慈闱洗眼看封侯。

又 用吴叔永韵

细雨斜风寂寞秋。黄花压鬓替人羞。归舟云树负箜篌。

燕子楼寒迷楚梦，凤皇池暖愜秦讴。暮云凝碧可禁愁。

又 寿蔡子及

小雨轻霜作嫩寒。蜡梅开尽菊花干。清香收拾贮诗肝。

文武两魁前样在，功名四谏后来看。麻姑进酒斗阑干。

又

六曲屏山似去年。雪花欺得怕寒肩。小窗和月照无眠。

笔点轻澌心欲折，烛摇斜吹泪空煎。伴人梅影更堪怜。

菩萨蛮 和子有韵

翠翘花艾年时昨。斗新五采同心索。含笑祝千秋。长眉如莫愁。

流光旋磨蚁。换调重拈起。深院竹和丝。

皱红裁舞衣。

鹧鸪天 为老人寿

天理从来屈有信。东风到处物皆春。门前  
驄马权奇种。台上慈乌反哺心。

花岛履，柳湖尊。好将长健傲长贫。诸  
孙认取翁翁意，插架诗书不负人。

蝶恋花

画斛黄花寒更好。人爱花繁，却被花催  
老。旧恨新愁谁酿造。带围暗减知多少。

开眼万般浑是恼。只仗微醺，假寐宽怀  
抱。隔屋愁眉春思早。数声啼破池塘草。

临江仙

万紫千红鬓上粉，聚成一撮精神。宣和  
宫样太清真。韶风摇斗帐，芳露湿纶巾。

消得流莺花底滑。一声惊起梁尘。扶将  
芍药牡丹春。光浮金盏面，香到玉池津。

南乡子 原作行香子，误，兹从汲古阁本平斋词

风雨过芳晨。多少愁红恨紫尘。两点眉  
尖凝远碧，纷纷。又被杨花误一春。

金凤压娇云。睡起纱窗背欠伸。心事欲  
言言不尽。沈沈。乳燕雏莺触拨人。

眼儿媚

平沙芳草渡头村。绿遍去年痕。游丝下上，流莺来往，无限销魂。

绮窗深静人归晚，金鸭水沈温。海棠影下，子规声里，立尽黄昏。

又 寿钱德成

花光灯影浸帘栊。蓬岛现仙翁。瑶裾织翠，诗瞳点碧，酒脸潮红。

窦郎阴德知多少，万卷奏新功。前庭梧竹，后园桃李，无限春风。

南乡子 德清舟中和老人韵

霜月冷婷婷。夹岸芦花雪点成。短艇水晶宫里系，闲情。谁道芙蓉更有城。

阿鹊数归程。人倚低窗小画屏。莫恨年华飞上鬓，堪凭。一度春风一度莺。

祝英台近 为老人寿

脸长红，眉半白，老鹤饱风露。岁换星移，禄运又交午。须知命带将来，福推不去，稳做个、荣华彭祖。

记初度。谢他紫燕黄鹂，争先送好语。春满湖山，历历旧游处。管教柳外行厨，花边步履，长占断、好晴奇雨。

谒金门 寺梦祥

春正美。满眼万红千紫。收拾群香归瓮蚁。长年花信里。

深院帘栊如水。双燕呢喃芳垒。唾碧轻衫人送喜。梅梢新结子。

又 九日

开笑口。又是茱萸重九。好水佳山长似旧。健如黄犊走。

菊蕊峥峥如豆。风雨轻寒初透。檐外鹊声谁送酒。莫闲金碗手。

卜算子

簸弄柳梢春，呼吸花心露。倦粉娇黄扇底风，尽向眉心度。

唤醒海棠红，约住樱桃素。上到瑶台最上层，共跨青鸾去。

又

芍药打团红，萱草成窝绿。帘卷疏风燕子归，依旧卢仝屋。

贫放曲生疏，闲到青奴熟。扫地焚香伴老仙，人胜连环玉。

柳梢青 老人生日

野服纶巾。白须红颊，无限阳春。二满

全宋词 洪咨夔

三平，粗衣淡饭，钟鼎山林。

尊前喜气轮囷，道蚕麦、今朝甲申。天放新晴，人占一饱，老子宽心。

天仙子 寿陈倅八月十五

风月分将秋一半。昨夜月明今夜满。有人笙鹤御风来，玉绳转。银河淡。凉入天孙云锦段。

笑捻桂枝香婉婉。十字金书光照眼。看看细札促归来，漏声缓，珂声远。夜宿玉堂谁是伴。

# 洪子大

## 浪淘沙

上苑又春残。樱颗如丹。明光宫里水晶盘。想得退朝花底散。宣赐千官。  
往事记金銮。荔子难攀。多情更有酪浆寒。蜀客筠笼相赠处，愁忆长安。

## 洪皓

### 点绛唇 咏梅

不假施朱，鹤翎初试轻红亚。为栽堂下。  
更咏樵人画。

绿叶青枝，辨认诗亏价。休催也。忍寒  
郊野。留待东坡马。

### 又 腊梅

耐久芳馨，拟将蜂蜡龙涎亚。化工裁下。  
风韵胜如画。

鼻观先通，顿减沈檀价。思量也。梦游  
吴野。凭仗神为马。

### 减字木兰花 和腊梅

蜂房余液。写就南枝凌正色。折干垂芳。  
点缀如生秘暗香。

寿阳妆样。纤手拈来簪髻上。恍若还家。  
暂睹真花压百花。

### 蓦山溪 和赵粹文元宵

鳌山凤阙，多少飞琼侣。颺俟翠华临，

庆新春、金波盈五。莲灯开遍，侍从尽登楼，簪花赴。传柑处。咫尺聆天语。

厌厌欲罢，宣劝犹旁午。扶上玉花骢，更踟蹰、梨园四部。追思往事，一夕九回肠，皇恩溥。归期阻。引领江南路。

### 木兰花慢 中秋

属三秋正半，暮云敛、月舒圆。误警鹤鸣皋，栖乌绕树，魑魅惊旋。寻常对三五夜，纵清光、皎洁未精妍。须是风高气爽，一轮绝后光前。

无偏。故国迢迢，千万里、共婵娟。但陟岵瞻驰，高楼念远，宁不凄然。天涯更新雁过，□哀嗷、出塞影联翩。空俾骚人叹羨，向隅耿耿无眠。

### 又 重阳

对金商暮节，此时客、意难忘。正卉木雕零，蛩蛩韵切，宾雁南翔。东篱有黄蕊绽，是幽人、最爱折浮觞。须信凌霜可赏，任他落帽清狂。

茫茫。去国三年，行万里、过重阳。奈眷恋庭闱，矜怜幼稚，堕泪回肠。凭栏处空引领，望江南、不见转凄凉。羁旅登高易感，况于留滞殊方。

### 浣溪沙 排闷

丧乱佳辰不易攀。四逢寒食尽投闲。踏

青无处想家山。

麟殿阻趋陪内宴，萱堂遥忆侍慈颜。感时双泪滴潺潺。

又

闻王侍郎复命

南北渝盟久未和。斯民涂炭死亡多。不知何日戢干戈。

赖有兴王如世祖，况闻谋帅得廉颇。藿卿全璧我蹉跎。

### 临江仙 怀归

冷落天涯今一纪，谁怜万里无家。三闾憔悴赋怀沙。思亲增怅望，吊影觉敲斜。

兀坐书堂真可怪，销忧殢酒难赊。因人成事耻矜夸。何时还使节，踏雪看梅花。

### 江梅引

顷留金国，四经除馆。十有四年，复馆于燕。岁在壬戌，甫临长至，张总侍御邀饮。众宾皆退，独留少款。侍婢歌江梅引，有“念此情、家万里”之句，仆曰：此词殆为我作也。又闻本朝使命将至，感慨久之。既归，不寝，追和四章，多用古人诗赋，各有一笑字，聊以自宽。如暗香、疏影、相思等语，虽甚奇，经前人用者众，嫌其一律，故辄略之。卒押吹字，非风即笛，不可易也。此方无梅花，士人罕有知梅事者，故皆注所

出。

### 忆江梅

天涯除馆忆江梅。几枝开。使南来。还带余杭、春信到燕台。准拟寒英聊慰远，隔山水，应销落，赴诉谁。

空恁遐想笑摘蕊。断回肠，思故里。漫弹绿绮。引三弄、不觉魂飞。更听胡笳、哀怨泪沾衣。乱插繁花须异日，待孤讽，怕东风，一夜吹。

### 访寒梅

春还消息访寒梅。赏初开。梦吟来。映雪衔霜、清绝绕风台。可怕长洲桃李妒，度香远，惊愁眼，欲媚谁。

曾动诗兴笑冷蕊。效少陵，惭下里。万株连绮。叹金谷、人坠莺飞。引领罗浮、翠羽幻青衣。月下花神言极丽，且同醉，休先愁，玉笛吹。

### 怜落梅

重闺佳丽最怜梅。牖春开。学妆来。争粉翻光、何遽落梳台。笑坐雕鞍歌古曲，催玉柱，金卮满，劝阿谁。

贪为结子藏暗蕊。敛蛾眉，隔千里。旧时罗绮。已零散、沈谢双飞。不见娇姿、真

悔著单衣。若作和羹休讶晚，堕烟雨，任春风，片片吹。去年湖上雪欺梅。片云开。月飞来。雪月光中、无处认楼台。今岁梅开依旧雪，人如月，对花笑，还有谁。

一枝两枝三四蕊。想西湖，今帝里。彩笺烂绮。孤山外、目断云飞。坐久花寒、香露湿人衣。谁作叫云横短玉，三弄彻，对东风，和泪吹。

### 渔家傲

重九良辰，翻成感怆，因用前韵，少豁旅情  
臂上萸囊悬已满。杯中菊蕊浮无限。纵使登高宁忍看。昏复旦。心肠似铁还须断。  
岁月川流难把玩。平生万事思量遍。但对割愁山似剑。聊自劝。东坡海岛犹三见。

又

圃蕙庭桐雕大半。西风不借行人便。不用留题明月观。西园宴。颜酡浪说觞无算。  
万斛羁愁推不远。千杯鲁酒何曾见。却羨南宾鳧与雁。行不乱。哀鸣直到翻江岸。

又

□□□□□□□。□□□□□□□。  
□□□□□□□。□□□。□□□□□□□。

正念当筵人已换。疏砧又捣谁家练。独坐愁吟搔首乱。肠欲断。凭高不见吴宫殿。

又

侍宴乐游游赏惯。今兹吊影难呼伴。欲

上望乡台复倦。愁满眼。琵琶莫写昭君怨。  
满目平芜无足玩。南冠未税徒增叹。万里庭闱安否断。形魄散。此身何暇穷游观。

### 忆仙姿

游汪德邵园池，在饶州作

试问春归何处。蜂懒蝶忙来去。婉婉倦寻芳，偶遂涉园成趣。莺语。莺语。唤起小鱼吹絮。

又

乍到园亭清处。面面此君忘去。把酒挹幽人，仰止七贤高趣。吴语。吴语。弗见满城风絮。

又

小憩书斋胡处。闲取响泉调去。是事不关心，自得曲中深趣。无语。无语。回首暮云飞絮。

又

燕敞画堂深处。夜艾不知归去。忍醉作歌词，要引遏云奇趣。娇语。娇语。似劝老人休絮。

## 洪 璚

### 月华清 春夜对月

花影摇春，虫声吟暮，九霄云幕初卷。  
谁驾冰蟾，拥出桂轮天半。素魄映、青琐窗  
前，皓彩散、画阑干畔。凝眄。见金波滟漾，  
分辉鹊殿。

况是风柔夜暖。正燕子新来，海棠微绽。  
不似秋光，只照离人肠断。恨无奈、利锁名  
缰，谁为唤、舞裙歌扇。吟玩。怕铜壶催晓，  
玉绳低转。

### 水龙吟 追和晁次膺

经年不见书来，后期杳杳从谁问。柳英  
蜡小，柳枝金嫩，艳阳春近。罗幕风柔，泛  
红浮绿，连朝花信。念平生多少，情条恨叶，  
镇长使、芳心困。

可是风流薄命。镜台前、松松蝉鬓。茜  
桃凝粉，薰兰涨腻，翠愁红损。纵使归来，  
灯前月下，恐难相认。卷重帘憔悴，残妆泪  
洗，把罗襟搵。

蓦山溪 忆中都

潮平风稳，行色催津鼓。回首望重城，  
但满眼、红云紫雾。分香解佩，空记小楼东，  
银烛暗，绣帘垂，昵昵凭肩语。

关山千里，垂柳河桥路。燕子又归来，  
但惹得、满身花雨。彩笺不寄，兰梦更无凭，  
灯影下，月明中，魂断金钗股。

齐天乐 闺思

辘轳声破银床冻，霜寒又侵鸳被。皓月  
疏钟，悲风断漏，惊起画楼人睡。银屏十二。  
叹尘满丝簧，暗消金翠。可恨风流，故人迢  
递隔千里。

相思情绪最苦，旧欢无续处，魂梦空费。  
断雁无情，离鸾有恨，空想吴山越水。花憔  
玉悴。但翠黛愁横，红铅泪洗。待剪江梅，  
倩人传此意。

菩萨蛮 宿水口

断虹远饮横江水。万山紫翠斜阳里。系  
马短亭西。丹枫明酒旗。

浮生长客路。事逐孤鸿去。又是月黄昏。  
寒灯人闭门。

又 湖上

吴姬压酒浮红蚁。少年未饮心先醉。驻

全宋词 洪 璚

马绿杨阴。酒楼三月春。

相看成一笑。遗恨知多少。回首欲魂销。  
长桥连断桥。

踏莎行 别意

满满金杯，垂垂玉箸。离歌不放行人去。  
醉中扶上木兰船，醒来忘却桃源路。

带绶同心，钗分一股。断魂空草高唐赋。  
秋山万叠水云深，茫茫无著相思处。

瑞鹤仙 离筵代意

听梅花吹动，凉夜何其，明星有烂。相看泪如霰。问而今去也，何时会面。匆匆聚散。恐便作、秋鸿社燕。最伤情、夜来枕上，断云零雨何限。

因念。人生万事，回首悲凉，都成梦幻。芳心缱绻。空惆怅，巫阳馆。况船头一转，三千馀里，隐隐高城不见。恨无情、春水连天，片帆似箭。

浪淘沙 别意

花雾涨冥冥。欲雨还晴。薄罗衫子正宜春。无奈今宵鸳帐里，身是行人。

别酒不须斟。难洗离情。丝鞞如电紫骝鸣。肠断画桥芳草路，月晓风清。

全宋词 洪 璚

南柯子 新月

柳浪摇晴沼，荷风度晚檐。碧天如水印新蟾。一罇清光斜露、玉纤纤。

宝镜微开匣，金钩半押帘。西楼今夜有人忺。应傍妆台低照、画眉尖。

永遇乐 送春

歌雪徘徊，梦云溶曳，欲劝春住。薄幸杨花，无端杜宇，抵死催教去。参差烟岫，千回百匝，不解禁春归路。病厌厌，那堪更听，小楼一夜风雨。

金钗斗草，玉盘行菜，往事了无凭据。合数松儿，分香帕子，总是牵情处。小桃朱户，题诗在否，尚忆去年崔护。绿阴中，莺莺燕燕，也应解语。

谒金门 春晚

风共雨。催尽乱红飞絮。百计留春春不住。杜鹃声更苦。

细柳官河狭路。几被婵娟相误。空忆坠鞭遗扇处。碧窗眉语度。

菩萨蛮 春感

玉琴不疗文园病。对花长抱深深恨。恨

入鬓霜边。才情输少年。

蛾眉梳堕马。翠袖薰兰麝。醉梦未全醒。  
绿窗啼晓莺。

阮郎归 壬辰邵武试灯夕

东风吹破藻池冰。晴光开五云。绿情红  
意两逢迎。扶春来远林。

花艳艳，玉英英。罗衣金缕明。闹蛾儿  
簇小蜻蜓。相呼看试灯。

行香子 代赠

楚楚精神。杨柳腰身。是风流、天上飞  
琼。凌波微步，罗袜生尘。有许多娇，许多  
韵，许多情。

十年心事，两字眉婚。问何时、真个行  
云。秋衾半冷，窗月窥人。想为人愁，为人  
瘦，为人颦。

鹧鸪天 情景

意态婵娟画不如。莹然初日照芙蕖。笑  
捐琼佩遗交甫，肯把文梭掷幼舆。

花上蝶，水中鳧。芳心密意两相于。情  
知不作庭前柳，到得秋来日日疏。

侯 蒙

临江仙

未遇行藏谁肯信，如今方表名踪。无端  
良匠画形容。当风轻借力，一举入高空。

才得吹嘘身渐稳，只疑远赴蟾宫。雨余  
时候夕阳红。几人平地上，看我碧霄中。

## 侯彭老

### 踏莎行

十二封章，三千里路。当年走遍东西府。  
时人莫讶出都忙，官家送我归乡去。

三诏出山，一言悟主。古人料得皆虚语。  
太平朝野总多欢，江湖幸有宽闲处。

## 侯置

### 水调歌头 题岳麓法华台

晓雾散晴渚 ,秋色满湘山。青鞋黄帽 ,欣  
与名士共跻攀。窈窕深林幽谷 ,诘曲危亭飞  
观 ,俯首视尘寰。长啸望天末 ,馀响下云端。

白鹤去 ,荒井在 ,汲清寒。醒然毛骨 ,浮丘  
招我御风还。拂拭苍崖苔藓 ,一写胸中豪气 ,  
渺渺洞庭宽。山鬼善呵护 ,千载照层峦。

### 又 上饶送程伯禹尚书

凉吹送溪雨 ,落日散汀鸥。暮天空阔无  
际 ,层巘绿蛾浮。上印初辞藩寄 ,拂袖欣还故  
里 ,归骑及中秋。倚仗饱山阁 ,回首翠微楼。

一区宅 ,千里客 ,旧从游。甘棠空有馀荫 ,  
谁解挽公留。翰墨文章独步 ,富贵功名馀事 ,  
当代仰风流。暂蜡登山屐 ,终作济川舟。

### 又 为郑子礼提刑寿

湘水照秋碧 ,衡岳际天高。绣衣玉节、清  
晓欢颂拥旌旄。本是紫庭梁栋 ,暂借云台耳  
目 ,驿传小游遨。五莞与三楚 ,馥爱胜春醪。

扫欃枪 ,苏耄倪 ,载弓囊。远民流恋、须信  
寰海待甄陶。坐享龟龄鹤算 ,稳佩金鱼玉带 ,

常近赭黄袍。岁岁秋月底，沈醉紫檀槽。

又 为张敬夫直阁寿

天地孕冲气，霜雪实嘉平。粹然经世材具，应为圣时生。妙处为仁受用。颠倒纵横无壅。一笑泮春冰。袖手无一语，四海已倾情。

紫岩老，游戏事，悟诚明。当年夷夏高仰，玉振更金声。家有渊骞高第。可但闻诗闻礼。衣钵要相承。周宸绚馀彩，商鼎味新羹。

瑞鹤仙 送张丞罢官归柯山

楚山无际碧。湛一溪晴绿，四郊寒色。霜华弄初日。看玉明遥草，金铺平碛。天涯倦翼。更何堪、临歧送客。念飞蓬、断梗无踪，把酒后期难觅。

愁寂。梅花憔悴，茅舍萧疏，倍添凄恻。维舟岩侧。留君饮，醉休惜。想柯山春晚，还家应对，菊老松坚旧宅。叹宦游、索寞情怀，甚时去得。

又 为刘信叔大尉寿

溥天氛祲廓。看庆绵鸿祚，勋昭麟阁。蕃宣换符钥。占西南襟带，遍□油幕。湘流绕郭。蔼一城、和气雾薄。听嘈嘈、比屋欢声，共说吏闲民乐。

遥想芻皂暖，翠拥屏深，晓风传乐。琼腴缓酌。花阴淡，柳丝弱。任松凋鹤瘦，莲敲龟老，丹颊常如旧渥。趁天申、去押西班，奉觞御幄。

又 咏含笑

春风无检束。放倡条冶叶，恣情丹绿。□  
莺喧燕宿。似东邻北里，都无贞淑。高情恨  
蹙。叹何时、重见桂菊。又谁知、天上黄姑，扫  
尽晚春馀俗。

幽独。铅华不御，翡翠帷深，郁金裙黻。  
长眉了目。嫣然态，倚修竹。纵青门瓜美，江  
陵橘老，怎比无穷剩馥。最难禁、扇底横枝，恼  
人睡足。

满江红 中秋上刘恭甫舍人

天阔江南，秋未老、空江澄碧。江外月、飞  
来千丈，水天同色。万屋覆银清不寐，一城踏  
雪寒无迹。况楚风、连陌竞张灯，如元夕。

山獠静，棠阴寂。秋稼盛，香醪直。听子  
城吹角，青楼横笛。君不见、苏仙翻醉墨，一篇  
水调锵金石。念良辰美景赏心时，诚难得。

又

困顿春眠，无情思、梦魂飘泊。檐外雨、霏  
霏冉冉，乍晴还落。山黛四围频入眼，柳丝一  
缕低萦阁。念沈郎、多感更伤春，腰如削。

风入户，香穿箔。花似旧，人非昨。任游  
蜂双燕，经营拂掠。海阔锦鱼传不到，洞深紫  
凤期难约。谩彩笺、牙管倚西窗，题红叶。

又 和徐叔至御带

重到西湖，春拆信、露花酥滴。倚危栏、湖  
山佳处，短屏著色。拟泛一舟苍莽岸，恐伤万

里羈游客。赖款门、修竹有高人，留狂迹。

倾盖意，真相得。诗句里，曾相识。看戛然飞动，笔端金石。照眼光浮琼液满，断肠翠拥宫靴窄。问多情、还肯借青鸾，通消息。

又 再用韵

老矣何堪，随处是、春衫酒滴。醉狂时，一挥千字，贝光玉色。失意险为湘岸鬼，浩歌又作长安客。且乘流、除却五侯门，无车迹。

惊人句，天外得。医国手，尘中识。问鼎槐何似，卧云敲石。梦里略无轩冕念，眼前岂是江湖窄。拚蝇头、蜗角去来休，休姑息。

又 和江亮采

甚矣吾衰，徒是苦、饥肠为孽。嗟寸禄、区区留恋，形疲心竭。江海一生真可羨，尘埃永昼何堪说。似钝刀、终岁斫空山，宁无缺。

拚放浪，休豪杰。秋水涨，归期决。尽凫长鹤短，任渠分别。芒屨夜寻溪上酒，葛巾晓挂松间月。向丹青、传语旧交游，慵非拙。

水龙吟 老人寿词

夜来霜拂帘旌，淡云丽日开清晓。香猊金暖，冰壶玉嫩，佳辰寒早。橘绿橙黄，袖红裙翠，一堂欢笑。正梅妃月姊，雪肌粉面，争妆点、潇湘好。

莫惜芳尊屡倒。拥群仙、醉游蓬岛。东床俊选，南溟归信，一时俱到。鬢影摇春，命书纡锦，子孙环绕。看他时归去，飞觞石涧，侍甘泉老。

### 多丽

帝城春,玉堂深处飞烟。想圣人、恩隆内  
职,左珰押赐传宣。彩衣明、瑶觞膝下,花昼  
永、锦瑟尊前。富贵从来,功名馀事,鼎彝勒遍  
笔如椽。向中禁、琐窗偷觑,王母语当年。清  
平世,衣冠是谁,三世甘泉。

记年时、翘才献寿,小诗曾浣苔笺。望三  
槐、云霞交映,照五彩、袞绣相鲜。当日非谗,  
如今方信,门人称颂是师言。况自有、两宫醞  
眷,卜梦亦徒然。看指日,鼎新化炉,一气陶  
甄。

### 念奴娇 和王圣俞

沧浪万顷,厌尘缨、手掬清流频洗。落日  
孤云烟渚净,鸥没澄波心里。一舸横秋,两桡  
开浪,霜竹醒烦耳。萧萧风露,梦回月照船尾。

须信闲少忙多,壶觞并赋咏,莫辜云水。  
乘兴前溪溪转□,隐约归帆天际。红蓼丹枫,  
黄芦白竹,总胜春桃李。浮丘何在,与君共跨  
琴鲤。

又

竞春台榭,媚东风、迤迳繁红成簇。方霁  
溪南帘绣卷,和气充盈华屋。金暖香彝,玉鸣  
舞佩,春笋调丝竹。乌衣宴会,远追王谢高躅。

籍甚四海声名,林泉活计,未许翁知足。  
日日江边沙露静,人溪东来雕毂。八锦行持,

五禽游戏 ,已受长生篆。袞衣蝉冕 ,最宜双鬓凝绿。

又 探梅

衰翁憨甚 ,向尊前、手拈一枝寒玉。想见梅台花更好 ,一片琼田栖绿。短辔轻舆 ,大家同去 ,取酒偿醲馥。元来春晚 ,万包空间黄竹。

休恨雪小云娇 ,出群风韵 ,已觉桃花俗。羯鼓声高回笑脸 ,怎得天公来促。江上风平 ,岭南人远 ,谁度单于曲。明朝酒醒 ,但馀诗兴天北。

风入松 西湖戏作

少年心醉杜韦娘。曾格外疏狂。锦笺预约西湖上 ,共幽深、竹院松窗。愁夜黛眉颦翠 ,惜归罗帕分香。

重来一梦觉黄梁。空烟水微茫。如今眼底无姚魏 ,记旧游、凝伫凄凉。入扇柳风残酒 ,点衣花雨斜阳。

又

东楼烟重暗山光。春意堕微芒。小红嫩绿匀如剪 ,黯无言、云渡澄江。没处与人消遣 ,倚阑情寄斜阳。

共君今夜举清觞。投老各殊方。痴儿官事何时了 ,恨花时、潘鬓先霜。唤取客帆聊住 ,将予同下潇湘。

又 再用韵

霏霏小雨恼春光。烟水更迷茫。昨宵把

酒高歌处 ,任一声、鸡唱清江。憔悴杏花如许 ,  
情怀应似东阳。

宿醒犹在莫传觞。消闷若无方。几时玉  
杵蓝桥路 ,约云英、同捣玄霜。冷落黄昏庭院 ,  
梦回家在三湘。

### 遥天奉翠华引

雪消楼外山。正秦淮、翠溢回澜。香梢豆  
蔻 ,红轻犹怕春寒。晓光浮画戟 ,卷绣帘、风暖  
玉钩闲。紫府仙人 ,花围羽帔星冠。

蓬莱阆苑 ,意倦游、常戏世间。佩麟旧都 ,  
江左襦裤歌欢。只恐催归觐 ,剩宴都、休诉酒  
杯宽。明岁应看钧容舞袖歌鬟。

### 蓦山溪 建康郡圃赏芍药

玉麟春晚 ,绿遍甘棠荫。可是惜花深 ,旋  
移得、翻阶红影。朱帘卷处 ,如在古扬州 ,宝瓔  
珞 ,玉盘盂 ,娇艳交相映。

蓬莱殿里 ,几样春风鬢。生怕逐朝云 ,更  
罗幕、重重遮定。多情绛蜡 ,常见醉时容 ,萦舞  
袖 ,蘸歌尘 ,莫负良宵永。

### 凤凰台上忆吹箫 耒阳至节戏呈同官

玉管灰飞 ,云台珥笔 ,东君飏馭将还。又  
正是、霜花□剪 ,梅粉初乾。窈窕红窗髻影 ,添  
一线、组绣工闲。潇湘好 ,雪意尚遥 ,绿占群

山。

应思少年壮气 ,贪游乐、追随玉勒雕鞍。  
更化日舒长 ,赢得觅醉谋欢。老去桑榆趁暖 ,  
任从教、潘鬓先斑。犹狂在 ,挥翰快写春寒。

又 再用韵赠黄宰

尘暗双凫 ,菊明山径 ,何妨倦羽知还。最好是 ,诗翁醉后 ,瓶罄罍乾。一笑东风打耳 ,心  
无竞、远与春闲。时时地 ,觅伴访梅 ,寻胜登山。

清时俊材定用 ,看捧诏春郊 ,月露濡鞍。  
况表识、买臣贵骨 ,琴瑟逾欢。好向玉堂视草 ,  
金章映、莱子衣斑。山人去 ,蕙帐夜雨空寒。

又 再用韵咏梅

浴雪精神 ,倚风情态 ,百端邀勒春还。记  
旧隐、溪桥日暮 ,驿路泥乾。曾伴先生蕙帐 ,香  
细细、粉瘦琼闲。伤牢落 ,一夜梦回 ,肠断家  
山。

空教映溪带月 ,供游客无情 ,折满雕鞍。  
便忘了、明窗静几 ,笔研同欢。莫向高楼喷笛 ,  
花似我、蓬鬓霜斑。都休说 ,今夜倍觉清寒。

又 蜡梅用前韵

浅染霓裳 ,轻匀汉额 ,巫山行雨方还。最好是、肌香蜡莹 ,萼嫩红乾。曾见金钟在列 ,钧  
天罢、荀罍都闲。妖饶似 ,晓镜乍开 ,绿沁眉  
山。

休夸瘦枝疏影 ,湘裙窄、一钩龙麝随鞍。  
便更做、山人倦赏 ,畏冷无欢。争奈冰瓯彩笔 ,  
题诗处、珠鬢斓斑。清宵永 ,相对莫放杯寒。

蝶恋花 次韵张子原寻梅

雪压小桥溪路断。独立无言，雾鬓风鬟乱。拂拭冰霜君试看。一枝堪寄天涯远。  
拟向南邻寻酒伴。折得花归，醉著歌声缓。姑射梦回星斗转。依然月下重相见。

清平乐 咏橄榄灯球儿

缕金剪彩。茸绾同心带。整整云鬟宜簇戴。雪柳闹蛾难赛。  
休夸结实炎州。且看指面纤柔。试问苦人滋味，何如插鬓风流。

又

忍寒情味。枝染蔷薇水。揽照清溪花影碎。笑杀小桃秣李。  
一生占断春妍。偏宜月露娟娟。欲寄江南春去，乱鸦点破云笺。

玉楼春

市桥灯火春星碎。街鼓催归人未醉。半嗔还笑眼回波，欲去更留眉敛翠。归来短烛馀红泪。月淡天高梅影细。北风休遣雁南来，断送不成今夜睡。

又

次中秋闰月表舅晁仲如韵

今秋仲月逢馀闰。月姊重来风露静。未  
劳玉斧整蟾宫,又见冰轮浮桂影。寻常经岁睽  
佳景。阅月那知还赏咏。庾楼江阔碧天高,遥  
想飞觞清夜永。

秦楼月 与杨君孜月夜泛舟

天一色。玉盘冷浸潇湘碧。潇湘碧。短  
亭系缆,隔江闻笛。

胡床对坐凉生腋。通宵说尽狂踪迹。狂  
踪迹。少年心事,老来难得。

新荷叶 金陵府会鼓子词

柳幄飞绵,风池暖泛新萍。燕垒泥香,玉  
麟堂外春深。晴云丽日,花浓处、蜂蝶纷纷。  
赏春一醉,管弦声里欢声。

况是清时,锦衣重到台城。故国江山,向  
人依旧多情。趁闲行乐,休辜负、冶叶繁英。  
彤庭归覲,恁时难驻前旌。

菩萨蛮 湖上即事

楼前曲浪归桡急。楼中细雨春风湿。终  
日倚危阑。故人湖上山。

高情浑似旧。只枉东阳瘦。薄晚去来休。  
装成一段愁。

又

小女淑君索赋晚春词

东风吹梦春醒恶。琐窗淡淡花阴薄。一夜曲池平。小窗云样明。

绿轻眉懒晕。香浅罗衣润。未见海棠开。卷帘双燕来。

又 钱田莘老

江风漠漠寒山碧。孤鸿声里霜花白。画舸且停桡。有人魂欲销。

相从能几日。总是天涯客。尺素好频裁。休言无雁来。

又 荼蘼

东君管尽闲花草。红红白白知多少。末后一奩香。绿庭春昼长。

道人心似海。梦冷屏山里。莫剪最长条。从教玉步摇。

又

东风卷尽欺花雨。月明皎纸庭前路。月底且论诗。从教露湿衣。

明朝愁入绪。各自东归去。后夜月明中，绿尊谁与同。

又 木犀十咏带月

绿帷剪剪黄金碎。西风庭院清如水。月姊更多情。与人无际明。

浓阴遮玉砌。桂影冰壶里。灭烛且徜徉。夜深应更香。

又 披风

靓妆金翠盈盈晚。凝情有恨无人管。何处一帘风。故人天际逢。

从教香扑鬓。只怕繁华尽。牢落正悲秋。  
非□谁解愁。

又 照溪

江梅占尽江头雪。忍寒玉骨夸清绝。不  
似杜秋娘。婆娑秋水傍。

波光涵晚日。照影从教密。隐隐认遥黄。  
隔溪十里香。

又 浥露

黄昏曾见凌波步。无端暝色催人去。一  
夜露华浓。香销兰菊丛。

缕金衣易湿。莫对西风泣。洗尽夜来妆。  
温泉初赐汤。

又 命觞

休文多病疏杯酌。被花恼得心情恶。碧  
树又惊秋。追欢怀旧游。

与君聊一醉。醉倒花阴里。斜日下阑干。  
满身金屑寒。

又 簪髻

交刀剪碎琉璃碧。深黄一穗珑松色。玉  
蕊纵妖娆。恐无能样娇。

绿窗初睡起。堕马慵梳髻。斜插紫鸾钗。  
香从鬓底来。

又 熏沈

黄姑青女交相忌。眼看尘土占芳蕊。急  
埽满阑金。小奁熏水沈。

博山银叶透。浓馥穿罗袖。犹欲问鸿都。  
太真安稳无。

又 来梦

午庭栩栩花间蝶。翅添金粉穿琼叶。曾见羽衣黄。琼台淡薄妆。

醒来魂欲断。掺掺芳英满。梦里尚偷香。何堪秋夜长。

又 写真

霓裳舞罢难留住。湘裙缓若轻烟去。动是隔年期。生绡傅精神浑似旧。碧暗黄金瘦。永夜对西窗。何缘襟袖香。

又 怨别

揉香嗅蕊朝还暮。无端却被西风误。底死欲留伊。金尘蔌蔌飞。

茂陵头已白。新聘谁相得。耐久莫相思。年年秋与期。

西江月

金鼎香销沈麝 碧梧影转阑干。可庭明月绮窗闲。帘幕低垂不卷。

一自高唐人去。秋风几许摧残。拂檐修竹韵珊珊。梦断山长水远。

又 赠蔡仲常侍儿初娇

豆蔻梢头年纪 芙蓉水上精神。幼云娇玉两眉春。京洛当时风韵。

金缕深深劝客 雕梁蔌蔌飞尘。主人从得董双成。应忘瑶池宴饮。

青玉案 东园饯母舅晁阁学镇临川

东风一夜吹晴雨。小园里、春如许。桃李无言情难诉。阳关车马，灞桥风月，移入江天暮。

双旌明日留难住。今夕清觞且频举。咫尺清明三月暮。寻芳宾客，对花杯酌，回首西江路。

又 为外大父林下老人寿

年年寓屋称觞处。陪彩绶、尊前舞。牢落潇湘归去未。腊梅开遍，冰蟾圆后，梦断灵溪路。

长年厚福天分付。算四海、今独步。润竹岩花如旧否。与翁相伴，岁寒庭户，尽占闲中趣。

又

戏用贺方回韵饯别朱少章

三年牢落荒江路。忍明日、轻帆去。冉冉年光真暗度。江山无助，风波有险，不是留君处。

梅花万里伤迟暮。驿使来时望佳句。我拚归休心已许。短篷孤棹，绿蓑青笠，稳泛潇湘雨。

昭君怨 亦名宴西园

晴日烘香花睡。花艳浮杯人醉。杨柳绿

丝风。水溶溶。

留恋芳丛深处。懒上锦鞦归去。待得牡丹开。更同来。

### 四犯令

月破轻云天淡注。夜悄花无语。莫听阳关牵离绪。拚酩酊、花深处。

明日江郊芳草路。春逐行人去。不似酴醾开独步。能著意、留春住。鸂鶒天县圃约同官赏海棠万点胭脂落日烘。坐间酒面散微红。谁教艳质撩潘鬓，生怕朝云逐楚风。

寻画烛 照芳容。夜深两行锦灯笼。朱唇翠袖休凝伫，几许春情睡思中。

又

蜀锦吴绫剪染成。东皇花令一番新。风帘不碍寻巢燕，雨叶偏禁斗草人。非病酒，不关春。恨如芳草思连云。西楼角畔双桃树，几许浓苞等露匀。

又 赏芍药

梦想当年姚魏家。尊前重见旧时花。双擎分焰交红影。四座春回粲晚霞。杯潋潋，帽敲斜。夜深绝艳愈清佳。天明恐逐行云去，更著重重翠幕遮。

又 送田簿秩满还雪川

只有梅花是故人。岁寒情分更相亲。红鸾跨碧江头路，紫府分香月下身。君既去，我离群。天涯白发怕逢春。西湖苍莽烟波里，来

岁梅时痛忆君。

朝中措 双头芍药

翻阶红药竞芬芳。著意巧成双。须信扬州国艳,旧时曾在昭阳。

盈盈背立,同心对绾,联萼飞香。牢贮深沈金屋,任教蝶困蜂忙。

又

建康大雪,戏呈母舅晁留守

漏云初见六花开。惊巧妒江梅。飘洒元戎小队,玉妆旌旗归来。

恩同化手,春回陇亩,欢到尊罍。记取明朝登览,绿漪惟有秦淮。

又

谢郭道深惠菊,有二小鬟

露英云萼一般清。揉雪更雕琼。预喜重阳登览,大家插帽浮觥。

分香减翠,殷勤远寄,珍重多情。不似绮窗双艳,向人解语倾城。

又

依微春绿遍江干。烟水小屏寒。惆怅雁行南北,新词不忍拈看。

从今寄取,临风把酒,役梦忘飧。飞絮落花时候,扁舟也到孤山。

又

风帘交翠篆香飘。却暑卷轻绡。最好佳辰相近,寿觞对饮连宵。

仙翁未老 ,云中跨凤 ,台上吹箫。看取他  
年荣事 ,鱼轩入侍涂椒。

又

无夕潭(帅)师)刘共甫舍人

年来玉帐罢兵筹。灯市小迟留。花外香  
随金勒 ,酒边人倚红楼。

沙堤此去 ,传柑侍宴 ,天上风流。还记月  
华小队 ,春风十里潭州。

又 为云庵寿

年年重午近佳辰。符艾一番新。满酌九  
霞奇酝 ,寿君两鬓长春。

闺中秀美 ,何如赋得 ,林下精神。早办荆  
钗布袖 ,共为云水闲人。

点绛唇 金陵府会鼓子词

春日迟迟 ,柳丝金淡东风软。绿娇红浅。  
帘幕飞新燕。

玉帐优游 ,赢得花间宴。得尘远。暂停歌  
扇。□醉深深院。

又

约莫香来 ,倚阑低瞰花如雪。怨深愁绝。  
瘦似年时节。

岁一相逢 ,常是匆匆别。歌壶缺。又还吹  
彻。笛里关山月。

苏武慢 湖州赵守席上作

晴雨收梅 ,晴波摇柳 ,万顷水精宫冷。桥

森画栋 ,岸列红楼 ,两岸翠帘交映。天上行舟 ,  
鉴中开户 ,人在蕊珠仙境。况吟烟啸月 ,弹丝  
吹竹 ,太平歌咏。

人尽说、铜虎分贤 ,银潢储秀 ,巩固行都藩  
屏。棠阴散暑 ,鼎篆凝香 ,永日一庭虚静。红  
袖持觞 ,彩笺挥翰 ,适意酒豪诗俊。看飞云丹  
诏 ,行沙金勒 ,待公归覲。

阮郎归 和邢公昭

莫斯骑省鬓边华。曾眠苏小家。彩丝萦  
腕剪轻霞。昌蒲酒更嘉。

人别后 ,叹飞花。云山和梦遮。吴笺小字  
写流沙。几行秋雁斜。

又 为邢鲁仲小鬟赋

美人小字称春娇。云鬟玉步摇。淡妆浓  
态楚宫腰。梅枝雪未消。

拚恼乱。尽妖娆。微窝生脸潮。算来虚  
度可怜宵。醉魂谁与招。

又 为张丞寿

薰风吹尽不多云。晓天如水清。哦松庭  
院忽闻笙。帘疏香篆明。

兰玉盛 ,凤和鸣。家声留汉庭。狨鞍长傍  
九重城。年年双鬓青。

浪淘沙

晓日掠轻云。霜瓦鳞鳞。六朝山色俨如

新。家在洞庭南畔住 ,身在江滨。华发照乌巾。无意寻春。空将两袖拂飞尘。可惜梅花开近路 ,恼尽行人。

踏莎行 壬午元宵戏呈元汝功参议

元夕风光 ,中兴时候。东风著意催梅柳。谁家银字小笙簧 ,倚阑度曲黄昏后。拨雪张灯 ,解衣贳酒。觚棱金碧闻依旧。明年何处看升平 ,景龙门下灯如昼。

又 约云庵寻梅

雪意初浓 ,云情已厚。黄昏散尽扶头酒。不知墙外夜来梅 ,忍寒添得疏花否。休更熏香 ,且同携手。从教策策轻寒透。亭儿直下玉生烟 ,暗香归去沾襟袖。

浣溪沙 三衢陈签上作

客里匆匆梦帝州。故人相遇一杯休。疏梅些子最清幽。

双绾香螺春意浅 ,缓歌金缕楚云留。不知妆镜若为俦。

又 次韵王子弁红梅

倚醉怀春翠黛长。肉红衫子半窥墙。兰汤浴困懒匀妆。

应为长年餐绛雪 ,故教丹颊耐清霜。弄晴飞馥笑冯唐。

又 次韵杜唐佐秋怀

春梦惊回谢氏塘。篋中消尽旧家香。休

文多病怯秋光。

空对金盘承瑞露 , 竟无玉杵碎玄霜。醉魂  
飞度月宫凉。

眼儿媚 效易安体

花信风高雨又收。风雨互迟留。无端燕  
子 , 怯寒归晚 , 闲损帘钩。

弹棋打马心都懒 , 擗掇上春愁。推书就  
枕 , 皂烟淡淡 , 蝶梦悠悠。

渔家傲

过尽百花芳草满。柳丝舞困阑干暖。柳  
外秋千裙影乱。人逐伴。旧家心性如今懒。

斗帐宝香凝不散。黄昏院落莺声晚。红  
叶不来音信断。疏酒盏。东阳瘦损无人管。

又 小舟发临安

本是潇湘渔艇客。钱塘江上铺帆席。两  
处烟波天一色。云幂幂。吴山不似湘山碧。

休费精神劳梦役。鸥鳧难上铜驼陌。扰  
扰红尘人似织。山头石。潮生月落今如昔。

临江仙 约同官出郊

一抹烟林屏样展 , 轻花岸柳无边。连朝春  
雨涨平川。冬冬迎社鼓 , 渺渺下陂船。

同事多才饶我懒 , 乘闲纵饮郊园。髻花敲  
侧醉巾偏。时丰容卒岁 , 游乐更明年。

全宋词 侯置

又 同官招饮席上作

失脚青云何所往 ,故山松竹应秋。痴儿官事几时休。可怜双白鬓 ,斗粟尚迟留。

尊酒偷闲聊放旷 ,夜凉河汉西流。从教孤笛喷高楼。与君同一醉 ,明日旋分愁。

柳梢青 赠张丞

小院轻寒 ,酒浓香软 ,深沈帘幕。我辈相逢 ,欢然一笑 ,春在杯酌。

家山辜负猿鹤。轩冕意、秋云似薄。我自西风 ,扁舟归去 ,看君寥廓。

又 送吕子绍守峡

楚天清绝。苇岸兰汀 ,素秋时节。帘卷湘鬟 ,香飞云篆 ,叵看轻别。

明朝底处关山 ,算总是、愁花恨月。白马江寒 ,黄牛峡静 ,小梅初彻。

杏花天 豫章重午

宝钗整鬓双鸾斗。睡未醒、熏风襟袖。彩丝皓腕宜清昼。更艾虎、衫儿新就。玉杯共饮菖蒲酒。愿耐夏、宜春厮守。榴花故意红添皱。映得人来越瘦。

江城子 萍乡王圣俞席上作

萍蓬踪迹几时休。尽飘浮。为君留。共

全宋词 侯置

话当年 ,年少气横秋。莫叹两翁俱白发 ,今古事 尽悠悠。

西风吹梦入江楼。故山幽。谩回头。又是手遮 ,西日望皇州。欲向西湖重载酒 ,君不去 ,与谁游。

南歌子 为吕圣俞寿

菊润初经雨 ,橙香独占秋。碧琳仙酿试新篘。内集熙熙休试、蚁浮瓯。家世传黄阁 ,功名起黑头。双凫聊傍故人舟。咫尺青云岐路、看英游。

瑞鹧鸪 送晁伯如舅席上作

遥天拍水共空明。玉镜开奁特地晴。极目秋容无限好 ,举头醉眼暂须醒。白眉公子催行急 ,碧落仙人著句清。后夜萧萧葭苇岸 ,一尊独酌见离情。

天仙子 宴五侯席上作

暖日丽晴春正好。杨柳池塘风弄晓。露桃云杏一番新 ,花窈窕。香飘缈。玉帐靓深闻语笑。

新赐绣鞞花映照。须信浓恩春共到。汉家飞将久宣劳 ,迎禁诏。瞻天表。入卫帝庭常不老。

醉落魄 夜静闻琴

铜壶漏歇。纱窗倒挂梅梢月。玉人酒晕  
消香雪。促轸调弦,弹个古离别。雏莺小凤交  
飞说。嘈嘈软语丁宁切。相如敲枕推红氎。  
脉脉无言,还记旧时节。

又

梅花似雪。雪花却似梅清绝。小窗低映  
梅梢月。常记良宵,吹酒共攀折。如今客里都  
休说。潇潇洒洒情怀别。夜阑火冷孤灯灭。  
雪意梅情,分付漆园蝶。

又

玉钩珠箔。夜凉庭院天垂幕。好风吹动  
纶巾角。羽扇休挥。已怯絺衣薄。扁舟明日  
清溪泊。归来依旧情怀恶。为君唤月骖鸾鹤。  
天近多寒,满引金觥落。

减字木兰花

春醒拚却。鶗鴂一声花雨落。蜜炬红残。  
人在青罗步障间。

天公薄相。惯得柳绵高百丈。彩笔题诗。  
休诵骚人九辨词。

鹊桥仙 和蔡子周

鹤发萧森,玉颜腴润,养就黄芽金鼎。一

全宋词 侯置

区松菊老湘滨 ,但心远、何妨人境。袞衣家世 ,  
鸣鸾歌舞 ,到了春冰消尽。不须惆怅梦中身 ,  
这彩选、输赢谁省。

## 胡德芳

水调歌 寿黄邦彦 四月初八

湛湛玉清水，矗矗炼丹山。秀环侯泮，广文分得括苍仙。虞殿薰风初入。尧陛祥蓂七叶，此际诞真贤。学术瑞王国，声誉蔼人寰。

绿槐宫，丹桂殿，杏花坛。英华粲发，聊将文教布龙藩。我亦执经北面，喜见发祥南斗，再拜祝长年。丹诏烂鸦墨，绿发映貂蝉。

## 胡夫人

### 采桑子

与君别后愁无限，永远团圞。间阻多方。  
水远山遥寸断肠。

终朝等候郎音耗，捱过春光。烟水茫茫。  
梅子青青又待黄。

## 胡浩然

### 万年欢 上元

灯月交光 ,渐轻风布暖 ,先到南国。罗绮娇容 ,十里绛纱笼烛。花艳惊郎醉目。有多少、佳人如玉。春衫袂 ,整整齐齐 ,内家新样妆束。

欢情未足。更阑谩勾牵旧恨 ,萦乱心曲。怅望归期 ,应是紫姑频卜。暗想双眉对蹙。断弦待、鸾胶重续。休迷恋 ,野草闲花 ,凤箫人在金谷。

### 东风齐著力 除夕

残腊收寒 ,三阳初转 ,已换年华。东君律管 ,迤邐到山家。处处笙簧鼎沸 ,会佳宴、坐列仙娃。花丛里 ,金炉满爇 ,龙麝烟斜。

此景转堪夸。深意祝、寿山福海增加。玉觥满泛 ,且莫厌流霞。幸有迎春寿酒 ,银瓶浸、几朵梅花。休辞醉 ,园林秀色 ,百草萌芽。

### 送入我门来 除夕

茶垒安扉 ,灵馗挂户 ,神雉烈竹轰雷。动

全宋词 胡浩然

念流光 ,四序式周回。须知今岁今宵尽 ,似顿觉明年明日催。向今夕 ,是处迎春送腊 ,罗绮筵开。

今古遍同此夜 ,贤愚共添一岁 ,贵贱仍偕。互祝遐龄 ,山海固难摧。石崇富贵篋铿寿 ,更潘岳仪容子建才。仗东风尽力 ,一齐吹送 ,入此门来。

春霁 春晴

迟日融和 ,乍雨歇东郊 ,嫩草凝碧。紫燕双飞 ,海棠相衬 ,妆点上林春色。黯然望极。困人天气浑无力。又听得。园苑 ,数声莺啭柳阴直。

当此暗想 ,故国繁华 ,俨然游人 ,依旧南陌。院深沈、梨花乱落 ,那堪如练点衣白。酒量顿宽洪量窄。算此情景 ,除非殢酒狂欢 ,恣歌沈醉 ,有谁知得。

满庭芳 吉席

潇洒佳人 ,风流才子 ,天然分付成双。兰堂绮席 ,烛影耀荧煌。数辐红罗绣帐 ,宝妆篆、金鸭焚香。分明是 ,芙蓉浪里 ,一对浴鸳鸯。

欢娱 ,当此际 ,山盟海誓 ,地久天长。愿五男二女 ,七子成行。男作公卿将相 ,女须嫁、君宰侯王。从兹去 ,荣华富贵 ,福禄寿无疆。

## 胡惠斋

### 百字令 几上凝尘戏画梅一枝

小斋幽僻，久无人到此，满地狼藉。几案尘生多少憾，把玉指亲传踪迹。画出南枝，正开侧面，花蕊俱端的。可怜风韵，故人难寄消息。

非共雪月交光，这般造化，岂费东君力。只欠清香来扑鼻，亦有天然标格。不上寒窗，不随流水，应不钿宫额。不愁三弄，只愁罗袖轻拂。

### 满江红 灯花

暝靄黄昏，灯檠上，荧荧初爇。银焰袅、孤光分夜，寸心凝碧。留照娇颜欢笑偶，上元庆赏嬉游夕。笑聚萤、积雪与偷光，寒儒忆。

蝶眷恋，成何得。花传喜，知何日。听邻家昨夜，扣阁谁觅。焰短始知新月上，摇红孤馆因风急。恨那人、别后不成眠，时时别。

## 胡平仲

### 减字木兰花 咏梅

东坡咏梅成三十篇，红梅诗有云：“诗老不知梅格在，更看绿叶与青枝。”谓石曼卿有“认桃无绿叶，辨杏有青枝”之句也。夫梅红与艳杏、夭桃固异，不待观枝叶，而辨已明矣。然人常言所不能到，予甚爱之，乃集其诗句作减字木兰花二曲，一咏红梅，一咏江梅，仍同韵，以贻好事者。

天然标格。不问青枝和绿叶。仿佛吴姬。酒晕无端上玉肌。

怕愁贪睡。谁会伤春无限意。乞与徐熙。画出横斜竹外枝。

又

兰凋蕙歇。野店酒初尝竹叶。绝艳幽姿。洗出铅华见雪肌。

云阶月地。凭仗幽人须着意。一夜花飞。一点微酸已著枝。

## 胡铨

### 浣溪沙

忽忽春归没计遮。百年都似散余霞。持杯聊听浣溪沙。

但觉暗添双鬓雪，不知落尽一番花。东风寒似夜来些。

### 转调定风波 和答海南统领陈康时

从古将军自有真。引杯看剑坐生春。扰扰介鳞何足扫。谈笑。纶巾羽扇典刑新。

试问天山何日定。伫听。雅歌长啸静烟尘。解道汾阳是人杰。见说。如今也有谪仙人。

### 菩萨蛮 辛未七夕戏答张庆符

银河牛女年年渡。相逢未款还忧去。珠斗欲阑干。盈盈一水间。

玉人偷拜月。苦恨匆匆别。此意愿天怜。今宵长似年。

## 减字木兰花

庆符引赦自便,已脱去,至东界,又遭郡中勾回,遂有弄璋之喜。庆符云:尝梦舅氏如梦窗也。予尝占庆符当弄瓦,赌主人。庆符来督,故词中具之。

渭阳佳梦。瓦变成璋真妙弄。不是勾回。汤饼冤家唤得来。

不分利市。要我开尊真倒置。试问坡翁。此事如何著得侬。

## 醉落魄 辛未九月望和答庆符

百年强半。高秋犹在天南畔。幽怀已被黄花乱。更恨银蟾,故向愁人满。

招呼诗酒颠狂伴。羽觞到手判无算。浩歌箕踞巾聊岸。酒欲醒时,兴在卢仝碗。

## 又 和答陈景卫望湖楼见忆

千岩竞秀。西湖好是春时候,谁知梅雪飘零久。岁白收香,空袖和羹手。

天涯万里情难逗。眉峰岂为伤春皱。片愁未信花能绣。若说相思,只恐天应瘦。

## 鹧鸪天 癸酉吉阳用山谷韵

梦绕松江属玉飞。秋风莼美更鲈肥。不因入海求诗句,万里投荒亦岂宜。

青箬笠,绿荷衣。斜风细雨也须归。崖州险似风波海,海里风波有定时。

又 和陈景卫忆西湖

一忆西湖太瘦生。十年不到梦曾行。空  
蒙山色烟霏晚，淡沓湖光雾縠轻。

芳草远 暮云平。雨余空翠入帘明。梦回  
一饷难存济，这错都因自打成。

朝中措 黄守座上用六一先生韵

崖州何有水连空。人在浪花中，月屿一声  
横竹，云帆万里雄风。

多情太守，三千珠履，二肆歌钟。日下即  
归黄霸，海南长想文翁。

采桑子 甲戌和陈景卫韵

山浮海上青螺远，决眦归鸿。闲倚东风。  
叠叠层云欲荡胸。

弄琴细写清江引，一洗愁容。木杪黄封。  
贤圣都堪日日中。

临江仙 和陈景卫忆梅

我与梅花真莫逆，别来长恐因循。几年不  
见岭头春。栩然蝴蝶梦，魂梦竟非真。

浪蕊浮花空满眼，愁眉不展长颦。此君还  
似不羁人。月边风畔，千里淡相亲。

如梦令

谁念新州人老。几度斜阳芳草。眼雨欲晴时，梅雨故来相恼。休恼。休恼。今岁荔枝能好。

玉楼春 赠李都监侍儿，是夕歌六么

十年目断鲸波阔。万里相逢歌怨咽。髻鬟春雾翠微重，眉黛秋山烟雨抹。

小槽旋滴真珠滑。断送一生花十八。醉中扶上木肠儿，酒醒梦回空对月。

清平乐 和曾检法海棠

深深花院。雨虐风饕遍。只欠画屏并羽扇。谁领略春风面。

愁须诗酒相禁。少陵底事慵吟。不是为梅牵兴，怕渠恼乱春心。

青玉案 乙酉重九葛守坐上作

宜霜开尽秋光老。感节物、愁多少。尘世难逢开口笑。满林风雨，一江烟水，飒爽惊吹帽。

玉堂金马何须道。且斗取、尊前玉山倒。燕寝香清官事了。紫萸黄菊，皂罗红袂，花与人俱好。

全宋词 胡铨

### 好事近

富贵本无心 ,何事故乡轻别。空使猿惊鹤  
怨 ,误薜萝风月。

囊锥刚要出头来 ,不道甚时节。欲驾巾车  
归去 ,有豺狼当辙。

## 胡世将

### 酹江月

秋夕兴元使院作，用东坡赤壁韵

神州沈陆，问谁是、一范一韩人物。北望长安应不见，抛却关西半壁。塞马晨嘶，胡笳夕引，赢得头如雪。三秦往事，只数汉家三杰。

试看百二山河，奈君门万里，六师不发。阃外何人回首处，铁骑千群都灭。拜将台敲，怀贤阁杳，空指冲冠发。阑干拍遍，独对中天明月。

## 胡舜陟

### 感皇恩 丐祠居射村作

乞得梦中身，归栖云水。始觉精神自家底。峭帆轻棹，时与白鸥游戏。畏途都不管，风波起。

光景如梭，人生浮脆。百岁何妨尽沈醉。卧龙多事，谩说三分奇计。算来争似我，长昏睡。

### 渔家傲 江行阻风

几日北风江海立。千车万马麈声急。短棹峭寒斯酒力。飞雨息。琼花细细穿窗隙。

我本绿蓑青箬笠。浮家泛宅烟波逸。渚鹭沙鸥多旧识。行未得。高歌与尔相寻觅。

## 胡松年

### 石州词

月上疏帘，风射小窗，孤馆岑寂。一杯强洗愁怀，万里堪嗟行客。乱山无数，晚秋云物苍然，何如轻抹淮山碧。喜气拂征衣，作眉间黄色。

役役。马头尘暗斜阳，陇首路回飞翼。梦里姑苏城外，钱塘江北。故人应念我，负吹帽佳时、同把金英摘。归路且加鞭，看梅花消息。

又

歌阕阳关，肠断短亭，惟有离别。画船送我薰风，瘦马迎人飞雪。平生幽梦，岂知塞北江南，而今真叹河山阔。屈指数分携，早许多时节。

愁绝，雁行点点云垂，木叶霏霏霜滑。正是荒城落日，空山残月。一尊谁念我，苦憔悴天涯、陡觉生华发。赖有紫枢人，共扬鞭丹阙。

## 胡 翼 龙

### 宴清都

梦雨随春远。征衫薄、短篷犹逗寒浅。  
裁芳付叶，书愁沁壁，水窗竹院。别来被篝  
梅润，暗尘积、旧题纨扇。许多时，闲了阑  
干，放得藓痕青满。

谁念。杜若还生，苹花又绿，不堪重□。  
山程水记，茶经砚谱，共谁闲展。湖山旧曾  
游遍。不怪得、近番心懒。恰今朝、水落洲  
平，江上楚帆风转。

### 徵招

苹花又绿江南岸，宾鸿带将寒去。几许  
落梅愁，渺暗香何处。一春长是雨。剩费却、  
翠篝沈炷。冷隔帘旌，润销窗纸，有人吟苦。

燕垒渍芹香，画堂永、关心去年情绪。  
愁压曲屏深，更小山无数。溅裙前事误。  
□□□、□□□□。□朱阑，不了销凝，移  
损秦筝柱。

## 八声甘州

甚年年、心事占秋多，芳洲乱芜生。正小山已桂，东篱又菊，秋为人清。肠断洞庭叶下，倚西风、谁可寄芳蘅。袅袅愁予处，欲醉还醒。

为问素娥饮否，自谪仙去后，知与谁明。耿盈盈如此，分影落瑶觥。步高台、夜深人静，有飞仙、同跨海山鲸。归来也，远游歌罢，失却秋声。

## 洞仙歌

半栏花雨。是夜来凭处。梦过溪桥逢柳住。乱莺声残酒醒，正是关情，山枕上、吟就回纹锦句。

归鸿应别浦。绿涨弥茫，早近湖阴唤船路。览芳菲，歌窈窕，独立莎根，剩一掬、闲情凄楚。欲待折、微馨寄相思，又生怕相思，带将春去。

## 满庭芳

秋彻檐花，吟苦砚海，日长多费茶烟。怀芳心苦，持此过年年。雨外飞红何许，应流到、采绿洲边。销凝处，别离情绪，正是海棠天。

吹花题叶事，如今梦里，记得依然。料

归来、莺居春后，燕占人先。谁念文园倦客，  
琴空在、懒向人弹。愁何极，楚天老月，偏  
是到窗前。

### 鹧鸪天

六曲银屏梦隔云。半分鸾影匣生尘。别  
来可是春愁觉，试著轻衫不贴身。

风月夜，短长亭。也须闻得子规声。归  
时莫看花梢上，但看芳洲绿浅深。

### 少年游

晓莺声脆雨花干。倦枕梦初残。衣渍香  
留，窗深纸暗，把镜近檐看。

断云压损溪桥柳，花迳雪阑斑。深倚屏  
根，闲敲诗字，酒醒倍春寒。

### 霓裳中序第一

江郊雨正歇。燕子飞来人忆别。未了残  
梅怨结。渺野色波光，春与天接。相思辽阔。  
怕柳风、吹老吟发。关情处，满汀芳草，遮  
莫是鸚鵡。

时节。一饷愁绝。谩料理、新翻几阕。  
山尊堪共谁设。梦到断桥，飞絮仍雪。岁华  
休省阅。早霍地、小园花发。已办著、海棠  
开后，独立半廊月。

### 夜飞鹊

星桥度情处，地久天长。尘世无此匆忙。  
纤云淡荡凉蟾小，家家瓜果钱唐。愁人独无那，叹紫箫易断，青翼难将。返魂何在，漫空留、荀令馀香。

忍记穿针儿女，篝尘想都暗，叠损衣裳。  
谁念才情未减，老来何逊，少日卢郎。柳风荷露，黯销凝、罗扇练囊。更银河曲曲，玉签点点，都是凄凉。

### 西江月

水霁芹香燕觜，林深风暖莺吭。一春心事锦机傍。  
忘却寻芳模样。

柳絮池塘昼午，梨花院落昏黄。阑干曲曲是回肠。  
倚到西厢月上。

### 踏莎行

合数冰莲，注情金叶。臂痕犹记嗔时迹。  
小楼几个月黄昏，荷香柳影都知得。

问字灯深，学书窗黑。衣襟诗卷留残墨。  
想思不抵藕丝长，梦云断处吴山碧。

### 南歌子

山枕莺声晓，羽觞花片飞。昨朝犹道未

全宋词 胡翼龙

成归。不记春衫襟上、旧题诗。

愁眼垂杨见，苦心红烛知。翻成怕见别离时。只寄一声将息、当相思。

长相思 题甘楼

南山钟。北山钟。一听钟声百念空。古今昏晓中。

望秋风。数秋风。等得秋来等过鸿。灯前书一封。

## 胡寅

### 水调歌头

不见严夫子，寂寞富春山。空留千丈危石，高出暮云端。想象羊裘披了，一笑两忘身世，来插钓鱼竿。肯似林间翮，飞倦始知还。

中兴主，功业就，鬓毛斑。驱驰一世人物，相与济时艰。独委狂奴心事，未羨痴儿鼎足，放去任疏顽。爽气动星斗，终古照林峦。

## 胡幼黄

水调歌头 寿段知事。时方旱 ,祈雨大作

有喜君初度 ,风雨作秋声。连旬烈日 ,稻  
畦麦垅欲扬尘。好是天瓢在手 ,笑把群龙呵  
叱 ,四野注如倾。勃勃生意满 ,翠浪涌纵横。

君知否 ,仁者寿 ,寿斯仁。自从三代而下 ,  
民命寄苍旻。满目桑麻谷粟 ,满目簿书期会 ,  
试说与仁人。小试作霖手 ,苏醒永新民。

胡 仲 弓

谒金门

蛾黛浅。只为晚寒妆懒。润逼镜鸾红雾满。额花留半面。

渐次梅花开遍。花外行人已远。欲寄一枝嫌梦短。湿云和恨翦。

## 胡仔

### 满江红

泛宅浮家 ,何处好、苕溪清境。占云山万叠 ,烟波千顷。茶灶笔床浑不用 ,雪蓑月笛偏相称。争不教、二纪赋归来 ,甘幽屏。

红尘事 ,谁能省。青霞志 ,方高引。任家风舴艋 ,生涯苓箬。三尺鲈鱼真好脍 ,一瓢春酒宜闲饮。问此时、怀抱向谁论 ,惟箕颖。

### 水龙吟 以李长吉美人梳头歌填

梦寒绡帐春风晓 ,檀枕半堆香髻。辘轳初转 ,阑干鸣玉 ,咿哑惊起。眠鸭凝烟 ,舞鸾翻镜 ,影开秋水。解低鬟试整 ,牙床对立 ,香丝乱、云撒地。

纤手犀梳落处 ,腻无声、重盘鸦翠。兰膏匀渍 ,冷光欲溜 ,鸾钗易坠。年少偏娇 ,髻多无力 ,恼人风味。理云裾下阶 ,含情不语 ,笑折花枝戏。

## 花仲胤

### 南乡子

顿首起情人。即日恭维问好音。接得彩笺词一首，堪惊。题起词名恨转生。展转意多情。寄与音书不志诚。不写伊川题尹字，无心。料想伊家不要人。

## 花仲胤妻

伊川令 寄外

西风昨夜穿帘幕。闺院添消索。最是梧桐零落。迢迢秋光过却。

人情音信难托。鱼雁成耽阁，教奴独自守空房，泪珠与、灯花共落。

失调名 答外

奴启情人勿见罪。闲将小书作尹字。情人不解其中意。问伊间别几多时。身边少个人儿。

## 华 清 淑

### 望江南

燕塞雪，片片大如拳。蓟上酒楼喧鼓吹，  
帝城车马走骅骝。霸馆独凄然。

燕塞月，缺了又还圆。万里妾心愁更苦，  
十春和泪看婵娟。何日是归年。

## 淮 上 女

### 减字木兰花

淮山隐隐。千里云峰千里恨。淮水悠悠。  
万顷烟波万顷愁。

山长水远。遮住行人东望眼。恨旧愁新。  
有泪无言对晚春。

## 黄诚之

满江红 寿韩尚书(案调名原误作念奴娇)

五岳三光 ,钟秀气、笃生人杰。天付与、心肠锦绣 ,精神冰雪。姓字早登龙虎榜 ,文书夜直丝纶阁。谢君王、特地掇鸾坡 ,来闽粤。

几千顷 ,恩波阔。十万户 ,欢声浹。看致君尧舜 ,归班夔契。谈笑扫清沙漠净 ,弥缝补就苍天缺。愿年年、长醉腊前春 ,梅梢月。

## 黄大临

### 青玉案

行人欲上来时路。破晓雾、轻寒去。隔  
叶子规声暗度。十分酒满，舞裯歌袖，沾夜  
无寻处。

故人近送旌旗暮。但听阳关第三句。欲  
断离肠馀几许。满天星月，看人憔悴，烛泪  
垂如雨。

又 和贺方回韵，送山谷弟贬宜州

千峰百嶂宜州路。天黯淡、知人去。晓  
别吾家黄叔度。弟兄华发，远山修水，异日  
同归处。

樽罍饮散长亭暮。别语缠绵不成句，已  
断离肠能几许。水村山馆，夜阑无寐，听尽  
空阶雨。

### 七娘子

画堂银烛明如昼。见林宗、巾垫羞蓬首。  
针指花枝，线踪罗袖。须臾两带还依旧。

全宋词 黄大临

劝君倒戴休令后。也不须、更漉渊明酒。  
宝篋深藏，浓香熏透。为经十指如葱手。

## 黄大舆

### 更漏子

怜宋玉、许王昌。东西邻短墙。

### 虞美人

世间离恨何时了。不为英雄少。楚歌声起霸图休。玉帐佳人血泪满东流。

葛荒葵老芜城暮。玉貌知何处。至今芳草解婆娑。只有当时魂魄、未消磨。

## 黄定

### 鹧鸪天 寿熊左史

间世文章万选钱。清时平步八花砖。大开紫府瑶池宴，正是橙黄橘绿天。

金烛里，玉堂前。翰林元是武夷仙。雍容草罢明堂诏，留取天香馥寿筵。

## 黄夫人

### 鹧鸪天

先自春光似酒浓。时听莺语透帘栊。小  
桥杨柳飘香絮，山寺绯桃散落红。莺渐老，蝶  
西东。春归难觅恨无穷。侵阶草色迷朝雨，满  
地梨花逐晓风。

## 黄革

酹江月 寿太守母八十 正月初一

堂堂卿月 ,奉君恩来作 ,潜藩贤守。喜遇  
慈闈年八十 ,特向新正称寿。千里春风 ,满堂  
和气 ,是处歌声奏。荷衣紫绶 ,捧觞齐上春酒。

人道彭祖高年 ,寿高八百 ,管从来稀有。  
似此遐龄 ,屈指算、犹有十分之九。惠满梅山 ,  
宠新芝检 ,归展调羹手。疏封国号 ,天教富贵  
长久。

## 黄格

### 水调歌头 寿留守刘枢密

富贵不难致，名节几人全。渡江龙化，於今五十有三年。历数朝堂诸老，谁似武夷仙伯，操行老弥坚。吾道适中否，一柱独擎天。

湖南北，江左右，屡藩宣。韩公城下，烽火静、米斗三钱。人愿公归台鼎，我愿公归中隐，九老要齐肩。岁岁祝公寿，风月伴梅仙。

## 黄公度

### 点绛唇

汪藻彦章出守泉南，移知宣城，内不自得，乃赋词云：新月娟娟，夜寒江净山含斗。起来搔首。梅影横窗瘦。好个霜天，闲却传杯手。君知否。乱鸦啼后。归思浓如酒。公时在泉南签幕，依韵作此送之。又有送汪内翰移镇宣城长篇，见集中。比有能改斋漫录载汪在翰苑，姿致言者，尝作点绛唇云云。最末句，晚鸦啼后，归梦浓如酒。或问曰：归梦浓如酒，何以在晚鸦啼后。汪曰：无奈这一队畜生何。不惟事失其实，而改窜二字，殊乖本义。

嫩绿娇红，砌成别恨千千斗。短亭回首。不是缘春瘦。

一曲阳关，杯送纤纤手。还知否。凤池归后。无路陪尊酒。

### 千秋岁

贺莆守汪待举怀忠生日，汪报政将归，因以送之。郁葱佳气。天降麒麟瑞。回首处，江城外。一麾遗爱在，万口欢声沸。人乍远，危楼目断天无际。

五马徘徊地。春色随归旆。寿水绿，壶山

翠。风轻香篆直,日暖歌喉脆。椒觞举,人人  
尽祝千秋岁。

### 菩萨蛮

公时在泉幕,有怀汪彦章而作。以当路多忌,故  
托玉人以见意。

高楼目断南来翼。玉人依旧无消息。愁  
绪促眉端。不随衣带宽。

萋萋天外草。何处春归早。无语凭栏杆。  
竹声生暮寒。

### 青玉案

公之初登第也,赵丞相鼎延见款密,别后以书来  
往。秦益公闻而憾之。及泉幕任满,始以故事召赴行  
在,公虽知非当路意,而迫于君命,不敢俟驾,故寓意  
此词。道过分水岭,复题诗云。谁知不作多时别。又  
题崇安驿诗云。睡美生憎晓色催。皆此意也。既而罢  
归,离临安有词云。湖上送残春,已负别时归约。则公  
之去就,盖蚤定矣。

邻鸡不管离怀苦。又还是、催人去。回首  
高城音信阻。霜桥月馆,水村烟市,总是思君  
处。

衰残别袖燕支雨。谩留得、愁千缕。欲倩  
归鸿分付与。鸿飞不住。倚栏无语。独立长  
天暮。

### 卜算子

公赴召命,道过延平,郡宴有歌妓,追诵旧事,即

席赋此。

寒透小窗纱 ,漏断人初醒。悲翠屏间拾落钗 ,背立残缸影。

欲去更踟蹰 ,离恨终难整。陇首流泉不忍闻 ,月落双溪冷。

### 好事近

公到阙 ,除秘书省正字。未几 ,言者迎合秦益公意 ,腾章于上 ,谓公尝贻书台官 ,欲著私史以谤时政。盖“盖”原作“益”,从集本改)公之在泉幕也 ,尝有启贺李侍御文会云 ,虽莫(陪)(倍)宾客后尘 ,为大厦之贺 ,固将续山林野史 ,记朝阳之鸣。因是罢归。将离临安 ,作此词 ,所谓故园桃李 ,盖指二侍儿也。

湖上送残春 ,已负别时归约。好在故园桃李 ,为谁开谁落。

还家应是荔支天 ,浮蚁要人酌。莫把舞裙歌扇 ,便等闲抛却。

### 菩萨蛮

公罢归抵家 ,赋此词。先是公有二侍儿 ,曰倩倩 ,曰盼盼 ,在五羊时 ,尝出以侑觞。洪丞相适景伯为赋眼儿媚词云。瀛仙好客过当时。锦幌出蛾眉。体轻飞燕 ,歌欺樊素 ,压尽芳菲。花前一盼嫣然媚。滟滟举金卮。断肠狂客 ,只愁径醉 ,银漏催归。倩倩先公而卒 ,四印居士有悼侍儿倩倩诗 ,其一曰 ,兰质蕙心何所在 ,风魂云魄去难招。子规叫断黄昏月 ,疑是佳人恨未消。其二曰 ,含怨衔辛情脉脉 ,家人强遣试春衫。也知不作坚牢玉 ,祇向人间三十三。四印于公为兄行 ,名泳 ,字宋永 ,徽庙时以童子召见 ,赐五经及第 ,官

止郢州通守。

眉尖早识愁滋味。娇羞未解论心事。试问忆人不。无言但点头。

嗔人归不早。故把金杯恼。醉看舞时腰。还如旧日娇。

### 卜算子 别士季弟之官

公之从弟童,士季其字也。以绍兴戊午同榜乙科及第。有和章云,不忍更回头,别泪多于雨。肺腑相看四十秋,奚止朝朝暮暮。何事值花时,又是匆匆去。过了阳关更向西,总是思兄处。

薄宦各东西,往事随风雨。先自离歌不忍闻,又何况、春将暮。

愁共落花多,人逐征鸿去。君向潇湘我向秦,后会知何处。

### 眼儿媚 梅词二首 和傅参议韵

公时为高要倅,傅参议雱彦济寓居五羊,尝遗示梅词。公依韵和之。初公被召命而西过分水岭,有诗云,呜咽泉流万仞峰,断肠从此各西东。谁知不作多时别,依旧相逢沧海中。及公遭谤归莆,赵丞相鼎先已谪居潮阳,逸者傅会其说,谓公此诗指赵而言,将不久复偕还中都也。秦益公愈怒,至以岭南荒恶之地处之,此词盖以自况也。

一枝雪里冷光浮。空自许清流。如今憔悴,蛮烟瘴雨,谁肯寻搜。

昔年曾共孤芳醉,争插玉钗头。天涯幸

有 ,惜花人在 ,杯酒相酬。

### 朝中措

幽香冷艳缀疏枝。横影卧霜溪。清楚浑如南郭 ,孤高胜似东篱。

岁寒风味 ,黄花尽处 ,密雪飞时。不比三春桃李 ,芳菲急在人知。

又

梅词二首 ,贺方帅生朝 ,并序。方务德滋时帅广东 ,以启谢云 ,俾尔黄发 ,欲三寿之作朋 ,遗我绿琴 ,顾双金之何报。尝邀公至五羊 ,特为开宴 ,令洪丞相适代为乐语云 ,云外神仙 ,何拘弱水。海隅老稚 ,始识魁星。又寄调临江仙以侑觞云 ,北斗南头云送喜 ,人间快睹魁星。向来平步到蓬瀛。如何天上客 ,来佐海边城。方伯娱宾香作穗 ,风随歌扇凉生。且须滟滟引瑶觥。十年迟凤沼 ,万里寄鹏程。及高要倅满 ,权帅置酒 ,令洪内相景卢迈作乐语 ,有云 ,三山宫阙 ,早窥云外之游 ;五岭烟花 ,行送日边之去。小驻南州之别业 ,肯临东道之初筵。时二洪迭居帅幕下 ,又云 ,欲远方歆艳于大名 ,故高会勤渠于缟礼。洪时摄帅司机宜。

玄冥司柄 ,雪敷南亩之丰登 ;庾岭生辉 ,梅报东君之消息。当一阳之来复 ,庆维岳之降神。某官节莹冰霜 ,家传清白。遐荒草木之细 ,皆知威名 ;调和鼎鼐之功 ,终归妙手。愿乘谷旦 ,即奉芝函。某望柴戟以趋风 ,适桑蓬之纪瑞。自惟弱植 ,方沾雨露之深恩 ;强缀芜辞 ,用祝椿松之遐算。敢靳采览 ,第切兢惶。

屑瑶飘絮满层空。人在广寒宫。已觉楼台改观 ,渐看桃李春融。

一城和气 ,宾筵不夜 ,舞态回风。正是为霖手段 ,南来先做年丰。

### 一翦梅

冷艳幽香冰玉姿。占断孤高,压尽芳菲。  
东君先暖向南枝。要使天涯,管领春归。

不受人间莺蝶知。长是年年,雪约霜期。  
嫣然一笑百花迟。调鼎行看,结子黄时。

### 满庭芳

公自高要倅摄恩平郡事,郡有西园,乃退食游息之地,先尝赋诗,其一曰,清樾才十亩,炎暵别一天。华堂依怪石,老木插飞烟。长夏绝无暑,乘风几欲仙。心闲境自胜,底处觅林泉。其二曰,意得壶觞外,心清杖屨间。簿书休吏早,花鸟向人闲。旧隐在何许,倦游殊未还。天涯赖有此,退食一开颜。和者甚多。

一径又分,三亭鼎峙,小园别是清幽。曲栏低槛,春色四时留。怪石参差卧虎,长松偃蹇拿虬。携筇晚,风来万里,冷撼一天秋。

优游。销永昼,琴尊左右,宾主风流。且偷闲,不妨身在南州。故国归帆隐隐,西昆往事悠悠。都休问,金钗十二,满酌听轻讴。

### 浣溪沙 时在西园偶成

风送清香过短墙。烟笼晚色近修篁。夕阳楼外角声长。

欲去还留无限思,轻匀淡抹不成妆。一尊相对月生凉。

## 满庭芳

高要太守章元振重九日为生朝，公以此词贺之。并序。公尝有和章守三咏，所谓包公堂、清心堂、披云楼，诗见集中。

熊罴入梦，当重九之佳辰；贤哲间生，符半千之休运。弧桑纪瑞，篱菊泛金。辄敢取草木之微，以上配君子之德。虽词无作者之妙，而意得诗人之遗。式殚卑悃，仰祝遐寿。

枫岭摇丹，梧阶飘冷，一天风露惊秋。数丛篱下，滴滴晓香浮。不趁桃红李白，堪匹配、梅淡兰幽。孤芳晚，狂蜂戏蝶，长负岁寒愁。

年年重九日，龙山高会，彭泽清流。向尊前一笑，未觉淹留。况有甘滋玉铉，佳名算、合在金瓯。功成后，夕英饱饵，相伴赤松游。

## 黄公绍

### 潇湘神 端午竞渡棹歌

望湖天。望湖天。绿杨深处鼓鼙鼙。好是年年三二月，湖边日日看划船。

又

斗轻桡。斗轻桡。雪中花卷棹声摇。天与玻璃三万顷。尽教看得几吴舳。

又

看龙舟。看龙舟。两堤未斗水悠悠。一片笙歌催闹晚，忽然鼓棹起中流。

又

贺灵鼉。贺灵鼉。几年翠舞与珠歌。看到日斜犹未足，涌金门外涌金波。

又

马如龙。马如龙。飞过苏堤健斗风。柳下系船青作缆，湖边荐酒碧为筒。

又

绣周张。绣周张。楼台帘幕絮高扬。谁赋珠宫并贝阙，怀王去后去沈湘。

又

棹如飞。棹如飞。水中万鼓起潜螭。最是玉莲堂上好，跃来夺锦看吴儿。

又

建云旂。建云旂。土风到处总相犹。朝了霍山朝岳帝。十分打扮是杭州。

又

踏青青。踏青青。西泠桥畔草连汀。扑得龙船儿一对，画阑倚遍看游人。

又

月明中。月明中。满湖春水望难穷。欲学楚歌歌不得，一场离恨两眉峰。

### 满江红 花朝雨作

客子光阴，又还是、杏花阡陌。敲枕听、一窗夜雨，怎生禁得。银蜡痕消珠凤小，翠衾香冷文鸳拆。叹人生、时序百年心，萍踪迹。

声不断，楼头滴。行不住，街头屐。倩新来双燕，探晴消息。可煞东君多著意，柳丝染出西湖色。待牡丹、开处十分春，催寒食。

### 念奴娇 月

山围宽碧，月十分圆满，十分春暮。匹似涌金门外看，添得绿阴佳树。野阔星垂，天高云敛，不受红尘污。徘徊水影，闲中自有佳处。

乘兴著我扁舟,山阴夜色,渺渺流光溯。  
望美人兮天一角,我欲凌风飞去。世事浮沈,  
人生圆缺,得似烟波趣。兴怀赤壁,大江千古  
东注。

望江南 雨

思晴好,去上竹山窠。自古常言光霁好,  
如今却恨雨声多。奈此坐愁何。

又

思晴好,试卜那朝晴。古木荒村云淦淦,  
孤灯败壁夜冥冥。不寐听檐声。

又

思晴好,小驻岂无因。花上半旬春社雨,  
松间三宿暮山云。转住是愁人。

又

思晴好,春透海棠枝。刻惜许多过时了,  
可怜生是我来迟。不见软红时。

又

思晴好,天运几乘除。只为晴多还又雨,  
谁知雨过是晴初。那得绿阴乎。

又

思晴好,路滑少人行。早信雨能留得住,  
尽教尽日自舟横。直等到清明。

又

思晴好,我欲问花神。刚道社公瞋旧水,

全宋词 黄公绍

一回旧也一回新。不是两般春。

又

思晴好，松路翠光寒。夜夜竹窠常梦到，  
天天后土几时乾。极目雾漫漫。

又

思晴好，日影漏些儿。油菜花间蝴蝶舞，  
刺桐枝上鹁鸪啼。闲坐看春犁。

又

思晴好，晨起望篱东。毕竟阴晴排日子，  
大都行止听天公。且住此山中。

花犯 木芙蓉

翠奁空、红鸾蘸影，嫣然弄妆晚。雾鬟低  
颤。飞嫩藕仙裳，清思无限。象床试锦新翻  
样。金屏连绣展。最好似、阿环娇困，云酣春  
帐暖。

寻思水边赋娟娟，新霜□旧约，西风庭院。  
肠断处，秋江上、彩云轻散。凭谁向、一筝过  
雁。细说与、眉心杨柳怨。且趁此、菊花天气，  
年年寻醉伴。

喜迁莺 荼蘼

乱红飞雨。恨春心一似，腾腾闷暑。密绾  
柔情，暗传芳意，人在垂杨深宇。晓雪一帘幽  
梦，半点檀心知否。春不管，想粉香凝泪，翠颦  
含趣。

谁念芳径小 ,新绿戛戛 ,问讯今何许。玉冷钗头 ,罗宽带眼 ,缥缈青鸾难遇。望断碧云深处 ,倚遍画阑将暮。空惆怅 ,更江头桃叶 ,溜横波渡。

汉宫春 郡圃赏白莲

身到瑶池。正□永芙蓉 ,跼素鸾飞。绿云淡笼波面 ,鸳影差差。青冥世界 ,向龙宫、涌出江妃。凝望久 ,夜凉如水 ,人间惆怅芳时。

池上方壶仙伯 ,是珊珊月佩 ,绰绰冰肌。重来碧环胜处 ,笑引琼卮。谁歌白雪 ,坐中客、赛过玄晖。醉归也 ,玉绳低转 ,晓风轻拂荷衣。

莺啼序 吴江长桥

银云卷晴缥缈 ,卧长龙一带。柳丝蘸、几簇柔烟 ,两市帘栋如画。芳草岸、弯环半玉。鳞鳞曲港双流会。看碧天连水 ,翻成箭样风快。

白露横江 ,一苇万顷 ,问灵槎何在。空翠湿衣不胜寒 ,日华金掌沆漑。鳌花平、绿文衬步 ,琼田涌出神仙界。黛眉修 ,依约雾鬢 ,在秋波外。

阁噓青屋 ,楼啄彩虹。飞盖蹴鳌背。灯火暮 ,相轮倒影 ,偷睇别浦 ,片片归帆 ,远自天际。舞蛟幽壑 ,栖鸦古木 ,有人翦取松江水 ,忆细鳞巨口鱼堪餍。波涵笠泽 ,时见静影浮光 ,霏阴万貌千态。

蒹葭深处 ,应有闲鸥 ,寄语休见怪。倩洗

全宋词 黄公绍

却、香红尘面 ,买个扁舟 ,身世飘萍 ,名利微芥。  
阑干拍遍 ,除东曹掾 ,与天随子是我辈 ,尽胸  
中、著得乾坤大。亭前无限惊涛 ,总把遥吟 ,月  
明满载。

明月棹孤舟 木樨

雁带愁来寒事早。西风把鬓华吹老。猛  
省中秋 ,都来几日 ,先自木樨开了。

淦淦轻阴天弄晓。平白地、被花相恼。一  
枕云间 ,半窗秋晓 ,时有阵香吹到。

踏莎行 同前

蟾苑萧疏 ,云岩芳馥。仙娥寄种来溪曲。  
晓烟薰上古龙涎 ,西风展破黄金粟。

庾岭未梅 ,陶园休菊。天教占取清香独。  
胆瓶枕畔两三枝 ,梦回疑在瑶台宿。

洞仙歌 刘守之任

银菟分竹 ,是君王亲付。州在扶舆最清  
处。紫云楼、记取天语丁宁 ,襦裤手 ,好好为吾  
摩拊。

望公如望月 ,见说郴江 ,父老多时问来暮。  
旌旆试初凉 ,紫马西来 ,青丝络、秋风满路。早  
橘井丹成入仙班 ,有乔木前芳 ,事须公做。

喜迁莺 和老人咏梅

世情冰尽。算耐久只是，陇头芳信。惆怅人间，几千年□，留得陆郎余韵。朔云解识花意，遮断疏狂蝶粉。岁寒了，狂风传香远，月移影近。

清润。无点涴，不曰坚乎，如玉真难尽。除宋广平，与林和靖，肉眼有谁能认。仙丰道骨如许，相对霜髯雪鬓。长健也，好年年管领，春光随分。

## 黄 机

### 沁园春 奉柬章史君再游西园

问讯西园，一春几何，君今再游。记流觞亭北，偷拈酒戏，凌云台上，暗度诗阄。略略花痕，差差柳意，十日不来红绿稠。须重醉，便功名了后，白发争休。

定谁骑鹤扬州。任书放床头盏瓮头。况殷勤莺燕，能歌更舞，轻狂蜂蝶，欲去还留。岁月易忘，姓名须载，笔势翩翩回万牛。归来晚，有烛明金剪，香暖珠篝。

### 又 寿

六月云初，人争议公，公无阻伤。记传飞急羽，舟还海道，弥漫白水，路入沙场。万姓三军，倚公为命，法有逗遛公自当。君还信，似崔嵬砥柱，屹立瞿塘。

此行阴德难量。到论定才知滋味长。看鱼肥蟹健，妻孥共乐，酒炊稻熟，翁媪相将。何以报公，祝公千岁，多少人家烧夜香。凌烟上，更声名凛凛，冠剑堂堂。

### 又 寿

问讯梅梢，小春近也，花应渐开。记华

堂此日，红牙丝竹，欢声昨夜，翠玉樽罍。  
雾节童童，金籀曳曳，人自阆风玄圃来。嬉  
游处，任沧波变陆，劫火成灰。

行天看取龙媒。笑卫霍当年如此哉。有  
笔头文字，何妨挥洒，胸中兵甲，解洗氛埃。  
见说君王，防秋才了，便著芝泥封诏催。功  
名事，付孱颜燕石，突兀云台。

又 次岳总干韵

日过西窗，客枕梦回，庭空放衙。记海  
棠洞里，泥金宝辇，酴醾架下，油壁钿车。  
醉墨题诗，蔷薇露重，满壁飞鸦行整斜。争  
知道，向如今漂泊，望断天涯。

小桃一半蒸霞。更两岸垂杨浑未花。便  
解貂贯酒，消磨春恨，量珠买笑、酬答年华。  
对面青山，招之不至，说与浮云休苦遮。山  
深处，见炊烟又起，知有人家。

又 廖总干席上

暑风清微，梅腮渐红，麦须未黄。恨牡  
丹多病，医治费巧，酴醾易老，点缀无方。  
客里光阴，愁中意绪，想美人兮山水长。销  
凝处，有龙丝坠简，来唤持觞。

华堂。剩贮春光。粲一行珠玑时样妆。  
更燕留轻态，词翻古调，莺娇欲啭，曲度新  
腔。玉漏声沈，银潢影泻，殢酒犹烧心字香。  
归来也，判明虬永日，瑞锦鸳鸯。

又 为潘郴州寿

问讯仙翁，殷勤为底，来万山中。想橘  
边丹井，鹤寻旧约，松间碧洞，鹿养新茸。

雾节亭亭，星籥曳曳，导以浮丘双玉童。嬉游处，尽祥烟瑞雨，霁月光风。

欢声已与天通。更日夜郴江流向东。定催归有谓，泥香芝检，留行无计，路熟花骢。入侍严凝，密陪清燕，吴水欢然相会逢。年年里，对春如酒好，酒似春浓。

又 送徐孟坚秩满还朝

人物眇然，落落晓星，如君几何。有飘摇长袖，工持月斧，寂寥遗韵，妙鼓云和。政事文章，特其余事，英气横空时浩歌。还堪笑，似龙文古鼎，谁复摩挲。

青丝系马庭柯。为小驻寿君金叵罗。说一时伟望，齐高岳麓，二年遗爱，拍满湘波。世事多端，细凭商略，痛处不须言语多。从今去，好经从乌府，躡上銮坡。

又 送赵运使之江西

有美一人，昔在何居，今方见之。俨琼纓翠弁，气清芬只，珠幢绛节，光陆离兮。吾道非耶，世情复尔，天骥昂藏不受羈。还知否，定曲高寡和，才大难施。

行吟湘水之湄。看云卷云舒无定姿。想粲然长笑，物皆有用，时哉易失，我亦奚为。袖手旁观，何如小试，欲脱囊中失利锥。君休叹，正梅花将发，尘满征衣。

八声甘州 为遁斋寿

问仙翁、底事到人间，人间足嬉游。向文边书意，诗边著语，□满南州。逸韵高情

总似，野水荡孤舟。所未能忘者，药鼎茶瓯。

政恐功名相慰，便扶摇直上，龙尾螭头。想尘缘终薄，归去老菟裘。有当年、东邻西舍，办鸡豚、相与燕春秋。阶庭里，儿孙衮衮，飞度骅骝。

乳燕飞 次岳总干韵

击碎珊瑚树。为留春、怕春欲去，驶如风雨。春不留兮君休问，付与流莺自语。但莫赋、绿波南浦。世上功名花梢露。政何如、一笑翻金缕。系白日，莫教暮。

苍头引马城西路。趁池亭、荻芽尚短，梅心未苦。小雨欲晴晴不定，漠漠云飞轻絮。算行乐、春来几度。鞭影不摇鞍小据。过横塘、试把前山数。双白鹭，忽飞去。

又 次徐斯远韵寄稼轩

兴泼元同宇。唤君来、浮君大白，为君起舞。满袖斑斑功名泪，百岁风吹急雨。愁与恨、凭谁分付。醉里狂歌空漫触，且休歌、只倩琵琶诉。人不语，弦自语。

诗成更将君自赋。渺楼头、烟迷碧草，云连芳树。草树那能知人意，怅望关河梦阻。有心事、笺天天许。绣帽轻裘真男子，政何须、纸上分今古。未办得，赋归去。

又

秋意今如许。怪征鞍、底事匆匆，翩然难驻。斗帐屏围山六曲，怕见琐窗欲暮。倩谁伴、梧桐疏雨。路入衡阳天一角，更山环、

水绕无重数。容易□，便难阻。

相思才信相思苦。省疏狂、迷歌殢酒，把人轻误。问取归期何日是，指点庭前幽树。定冷蕊、疏花将吐。此去西风吹雁过，家身心、别后安平否。聊慰我，至诚处。

### 摸鱼儿

惜春归、送春惟有，乱红扑蔌如雨。乱红也怨春狼藉，搵得泪痕无数。肠断翻处。更唤起，琼鹄催发长亭路。征鞍难驻。但脉脉含颦，嗔人底事，刚爱逐春去。

阑干凭。芳草斜阳凝伫。愁连满眼烟树。鬢髮不理金钗溜。鸾镜一奁香雾。花谁主。怅□□、玉容寂寞春知否。单衣懒御。任门外东风，流莺声里，尽日搅飞絮。

### 水龙吟

晴江袞袞东流，为谁流得新愁去。新愁都在，长亭望际，扁舟行处。歌罢香，梦回呵酒，别来无据。恨荼蘼吹尽，樱桃过了，便只恁、成孤负。

须信情钟易感，数良辰、佳期应误。才高自叹，彩云空咏，凌波谩赋。团扇尘生，吟笺泪渍，一觴慵举。但丁宁汉燕，明年还解，寄平安否。

### 喜迁莺 香风亭上

平湖万亩。种满湖莲叶，绕堤杨柳。冉

冉波光，辉辉烟影，空翠湿沾襟袖。静惬邻  
鸡啼午，暖逼沙鸥眠昼。西园路，更红尘不  
断，蝶酣蜂瘦。

知否。堪画处，野荠芜菁，冱地铺茵绣。  
桃李阴边，桑麻丛里，斜矗酒帘夸酒。竹寺  
小依山趾，茅店平窥津口。春又晚，正香风  
有客，倚阑搔首。

木兰花慢 次岳总干韵

叹镜中白发，元不向、酒边栽。奈诗习  
未除，客愁易感，剩要安排。浮名任他有命，  
怕青山、颇怪不归来。出屋长松招鹤，绕渠  
流水行杯。

浪驱羸马踏江淮。幽梦苦相催。甚狭路  
嶮崎，雄心兀兀。谁忍徘徊。此事正烦公等，  
笑曹刘、只合作舆台。我自人间屈曲，青云  
有眼休回。

又 寿

政胡尘满野，问谁与、作坚城。有老子  
行年，平头六十，无限声名。向来试陈大略，  
便群儿、啁哳耳边鸣。争识规模先定，破羌  
终属营平。

吾心惟有忠诚。羞媚妩，做逢迎。谓干  
戈锋镝，动关民命，此不宜轻。听渠自分勇  
怯，奈何他、天理若持衡，只把从前不杀，  
也应换得长生。

又 次岳总干韵

问功名何处，算只合、付悠悠。怕僮仆

揶揄，长为客，楚尾吴头。春来故园渐好，似不应、不醉把春休。剩买菱蒿获笋，河豚已上渔舟。

人间太半足闲愁。蓑笠梦汀洲。向桃杏花边，招邀同社，秉烛来游。连台听渠拗倒，更曲生、元不厌诛求。世事翻云覆雨，满怀何止离忧。

### 满江红

呀鼓声中，又妆点、千红万绿。春试手，银花影粲，雪梅香馥。归梦不知家近远，飞帆正挂天西北。记年时、歌舞绮罗丛，凭谁续。

烟水迥，云山簇。劳怅望，伤追逐。把蛛丝鹊喜，意□占卜。月正圆时羞独照，夜偏长处怜孤宿。悔从前、轻被利名牵，征尘扑。

又

万灶貔貅，便直欲、扫清关洛。长淮路、夜亭警燧，晓营吹角。绿鬓将军思饮马，黄头奴子惊闻鹤。想中原、父老已心知，今非昨。

狂鯢剪，于菟缚。单于命，春冰薄。政人人自勇，翘关还槊。旗帜倚风飞电影，戈铤射月明霜锷。且莫令、榆柳塞门秋，悲摇落。

又

云暗山昏，西风撼、一天悲雨。隐君问、

短墙修竹，故园何处。九月江南无雁到，素书封了谁传与。待从头、拚却把心宽，还如故。

吴姬唱，燕姬舞。持玉斝，温琼醕。怅人生欢会，一年几许。莫上小楼高处望，楼前诘曲来时路。便直须、匹马两苍头，东归去。

### 酹江月

春愁几许，似春云蔼蔼，连空无数。  
□□眉尖偏易得，没个因由分付。杨柳烟浓，海棠花暗，绿涨墙头路。小楼应是，有人和泪凝伫。

长记宝轴妆成，鸳鸯绣懒，轻笑歌金缕。香雪精神依旧否，风月谁怜虚度。带减衣宽。十分憔悴，两下平分取。黄昏可更，子规声碎烟坞。

又

东篱成趣，有西风解事，催开丛菊。碎摺黄金谁试手，一一清香堪掬。露湿凉轻，霞凝寒重，秀发如新沐。宫妆匀就，岂知红紫粗俗。

因念昔日渊明，微官不受，归伴花幽独。弹压秋光三径里，浊酒床头初熟。饮剧肠宽，醉深吻燥，更把纶巾漉。此翁无恙，唤渠同醉船玉。

### 水调歌头 为施少仪作

此日足可惜，心事正崔嵬。江淮踏遍，

经岁相识定谁来。每向酒边长叹，更向花边长笑，意虑叵能猜。邂逅忽相遇，有客在尘埃。

脱儒冠，著武弁，太多才。笔墨争似，钩戟容易到云台。余子何须转手，便把平生胸臆，勇去莫徘徊。事业上金石，人世自欢哀。

又 次下洞流杯亭作

金篆锁岩穴，玉斧凿山湫。飞泉溅沫无数，六月自生秋。天矫长松千岁，上有冷然天籁，清响眇难收。亭屋创新观，客鞅棹还留。

推名利，付飘瓦，寄虚舟。蒸羔酿秫，醅瓮戢戢蚁花浮。唤取能歌能舞。乘兴携将高处，杯酌荐菖球。径醉双股直，白眼视庸流。

六州歌头

岳总干檠括上吴荆州启，以此腔歌之，因次韵  
百年忠愤，无泪洒江滨。曹刘事，埋露草，锁烟榛。哭英魂。此恨谁知者，时把剑，频看镜，徒自苦，拳破裂，眼眇昏。从古时哉去速，鄢人子、反袂伤麟。望家山何在，袞袞已鞶纓。欲划还生。猛堪惊。

膏盲危病，宁有药，针匕具，献无门。荆州启，条旧画，汉将军。已不存。便会囊封去，仓庾地，尚间关。此不用，心漫有，恐无干。人世欢哀数耳，天或者、又假人言。

又一番春尽，高柳暗如云。梦断重闾。

又 次岳总干韵

将军何日，去筑受降城。三万骑，貔貅虎，戮鯢鲸。洗沧溟。试上金山望，中原路，平于掌，百年事，心未语，泪先倾。若若累累印绶，偏安久、大义谁明。倚危栏欲遍，江水亦吞声。目断苹汀。海门青。

停杯与问，焉用此，手虽子，积如京。波神怒，风浩浩，勃然兴。卷龙腥。似把渠忠愤，伸恳请，翠华巡。呼壮士，挽河汉，荡欃枪。长算直须先定，如细故、休苦营营。正清愁清抱，鸥鹭却多情。飞过邮亭。

永遇乐 章史席上

别院春深，华堂昼永。嘉宴初启。翠玉樽罍，红牙丝管，睡鸭沈烟里。弄晴云态，行空絮影，漠漠似飞如坠。最多情，紫绵团就。错落乱星流地。

史君自有，元龙豪气，唤客且休辞醉。蝶困蜂酣，燕娇莺姹，欢意浓如此。侃其笑语，止乎礼义，衣佩细纫兰芷，遥归去，残更欲尽，晓鸦又起。

传言玉女 次岳总干韵

日薄风柔，池面欲平还皱。纹楸玉子，磔磔敲春昼。衾绣半卷，花气浓薰香兽。小团初试，辘轳银甃。

梦断阳台，甚情怀、似病酒。凤衾羞对，  
比年时更瘦。双燕乍归，寄与绿笺红豆。那  
堪又是、牡丹时候。

### 清平乐

西园啼鸟。留得春多少。客里情怀无日  
好。愁损连天芳草。

博山灰冷香残。微风吹满银笺。卓午花  
阴不动，一双蝴蝶团圞。

又 柬邢宰

晓窗晴日。一点黄金橘。万事如毛随日  
出。多少人间头白。

宋春长恨春迟。春来生怕春归。办取揭  
天箫鼓，莫教辜负荼蘼。

又 为缪推官寿 清容，缪之亭名也

烟融雨腻。春去三之二。了却兰亭修禊  
事。判与仙翁一醉。

方壶日月偏长。清容花草吹香。辨取此  
身强健，功名饱看诸郎。

### 眼儿媚

粉墙朱阁映垂阳。晴绿小池塘。东风扬  
暖，单衣初试，昼日偏长。

鬢鬆两鬓飞云影。钿合未梳妆。阑干侧  
畔，闲抛荔子，惊散鸳鸯。

又

东风挟雨苦无端。恻恻送轻寒。那堪更

向，湘湾六六，浅处留船。

诗闾酒戏成孤负，春事已阑珊。离愁都在，落花枝上，杜宇声边。

又

莫嗔日日话思归。归也却便宜。东邻招茗，西邻唤酒，一笑开眉。

人生万事无缘足，待足是何时。妻能纺绩，儿能耕获，未必寒饥。

### 谒金门

风又雨。墙外落红无数。人不归来春不住。佳期还已误。

细细一团愁绪。薄幸疏狂何处。化作青鸾飞得去。问天天亦许。

又

风雨后。枝上绿肥红瘦。乐事参差团不就。一春如病酒。

楼外暖烟杨柳。忆得年时携手。燕子双双来未久。颇知人意否。

又

愁万叠。春在雨条烟叶。翠袖倚风寒霎霎。傍阑看乳鸭。

何处一声啼鴂。架上荼蘼欲雪。绣被薰香香未歇。可怜音信绝。

又 寿何令

冬十月。记取生申时节。梅傍小春融绛

雪。浅寒犹未却。

且醉笙歌蕉叶。富贵不须频说。国太夫人头半白。看君金印烨。

霜天晓角 梅花

玉粲冰寒。月痕侵画栏。客里安愁无地，为徙倚、到更残。

问花花不言。嗅香香欲阑。消得个温存处，山六曲、翠屏间。

又 仪真江上夜泊

寒江夜宿。长啸江之曲。水底鱼龙惊动，风卷地、浪翻屋。

诗情吟未足。酒兴断还续。草草兴亡休问，功名泪、欲盈掬。

又 金山吞海亭

长江千里。中有英雄泪。却笑英雄自苦，兴亡事、类如此。

浪高风又起。歌悲声未止。但愿诸公强健，吞海上、醉而已。

又 夜舟过蛾眉山

江涵落日。风转飞帆急。问讯蛾眉好在，无一语、送行客。

闲情眠未得。倚窗消酒力。却怕鱼龙惊动，且莫要、夜吹笛。

夜行船 京口南园

红溅罗裙三月二。露桃开、柳眠又起。

全宋词 黄 机

百尺游丝，罥莺留燕，判与南园一醉。  
历历斜阳明野水。倚危阑、暮云千里。  
说似游人，直须烧烛，早晚绿阴青子。

### 长相思 娥眉亭

东梁山。西梁山。占断长江相对间。古今双鬓斑。  
天漫漫。水漫漫。人事如潮多往还。浅顰深恨间。

### 乌夜啼

云容晓色相涵。趣征骖。碎点遥山如豆、是淮南。  
路渐远。家渐远。恨难堪。  
□见窗花叶底、鬓毵毵。

### 祝英台近

试单衣，扶短策，沙路净如洗。乍雨还晴，花柳自多丽。争知话别南楼，片帆天际，便孤了、同心连理。  
镇萦系。谩有罗带香囊、殷红斗轻翠。一纸浓愁，无处倩双鲤。可堪飞梦悠悠，春风无赖，时吹过、乱莺声里。

### 鹊桥仙 次韵湖上

黄花似钿，芙蓉如面，秋事凄然向晚。

风流从古记登高，又处处、悲丝急管。

有愁万斛，有才八斗，慷慨时惊俗眼。  
明年一笑复谁同。料天远、争如人远。

### 西江月 泛洞庭青草

漠漠波浮云影。遥遥天接山痕。一声渔  
唱起苹汀。名利缘渠唤醒。

短棹拟携西子，长吟时吊湘灵。白鸥容  
我作同盟。占取两湖清影。

又 垂丝海棠，一名醉美人

捻率低垂嫩萼，匀红倒簇繁英。秣纤消  
得比佳人。酒入香肌成晕。

帘幕阴阴窗牖，阑干曲曲池亭。枝头不  
起梦春醒。莫遣流莺唤醒。

### 忆秦娥

秋萧索。梧桐落尽西风恶。西风恶。数  
声新雁，数声残角。

离愁不管人飘泊。年年孤负黄花约。黄  
花约。几重庭院，几重帘幕。

### 定风波

短策飘飘胜著鞭。携壶与客洗愁颜。兴  
到为君拚剧饮。狂甚。论诗说剑口澜翻。

画烛烧残花影褪。长鲸要使百川乾。醉  
处不知谁氏子。只记。开窗临水便迎山。

虞美人 黄州江上寄王帅

三年万里黄尘路。只吹江湖去。扁舟二月下湘湾。过了洞庭青草、又春残。

□□□□□□□。□□□□□。  
□□□□□□□。□□□□□□、□□□。

踏莎行

云树参差，烟芜平远。沙头只欠飞来雁。西风方做一分秋，凄凉已觉难消遣。

窗底灯寒，帐前香暖。回肠偏学车轮转。剩衾闲枕自无眠，谯门更著梅花怨。

蝶恋花

碧树凉飈惊画扇。窗户齐开，秋意参差满。先自离愁裁不断。蛩蛩更作声声怨。

山绕千重溪百转。隔了溪山，梦也无由见。归计凭谁占近远。银缸昨夜花如糝。

好事近

鸿雁几时来，目断暮山凝碧。别后故园无恙，定芙蓉堪折。

休文多病废吟诗，有酒怕浮白。不是孤他诗酒，更孤他风月。

### 小重山

梧竹因依山尽头。潇潇疏雨后，几分秋。  
轻凉无数入西楼。凭栏久，满眼动离愁。

飞鹭下汀洲。怕知鸿雁到，带书否。诗  
阄酒戏一齐休。人如削，身在水边洲。

### 丑奴儿

绿阴窗几明如拭，纷黛初匀。无限芳心。  
翻动牙签却殢人。

多娇爱学秋来曲，微颤朱唇。别后销魂。  
字底依稀记指痕。

### 更漏子

秋点长，秋梦短。怕见黄昏庭院。风窸  
窣，雨萧骚。倚窗魂欲销。

候蛛丝，占鹊喜。依旧浓愁一纸。红袖  
黥，翠钿蔫。泪痕犹未干。

### 减字木兰花

西风淅淅。满眼芙蓉红欲滴。无限相思。  
百叠青山百曲溪。

凭谁说与。衣带别来宽几许。好片心肠。  
不道秋来早晚凉。

### 临江仙

上巳清明都过了，客愁惟有心知。子规昨夜忽催归。驿程那复记。魂梦已先飞。

回首故园花与柳，枝枝叶叶相思。归来拚得典春衣。绿阴幽远处，不管尽情啼。

又

凤翥鸾飞空燕子，宝香犹惹流苏。旧欢凄断数行书。终山方种玉，合浦忽还珠。

午枕梦圆春寂寂，依然刻雪肌肤。觉来烟雨满平芜。客情殊索莫，肯唤一尊无。

### 南乡子

帘幕闷深沈。灯暗香销夜正深。花落画檐鸣细雨，岑岑。滴破相思万里心。

晓色未平分。翠被寒生不自禁。待得梦成翻恶况，堪颦。飞雁新来也误人。

### 鹧鸪天

细听楼头漏箭移。客床寒枕不胜敲。凄凉夜角偏多恨，吹到梅花第几枝。

人间阔，雁参差。相思惟有梦相知。谢他窗外芭蕉雨，叶叶声声伴别离。

又 元日呈王帅

柳际梅边腊雪干。钗头蝴蝶又成团。飘

零萍梗江湖客，冷落笙箫灯火天。

浇浊酒，惜流年。牙旗夜市几时穿。太平乐事终须在，老去心情恐不然。

又

济楚偏宜淡薄妆。冰涵清润玉生香。只因梦峡成云雨，便拟吹箫跨凤皇。

新间阻，旧思量。多情翻不似垂杨。年年才到春三月，百计飞花入洞房。

### 菩萨蛮

池落开遍莲房老。秋声已入梧桐表。葵扇与桃笙。尚宜相带行。

危亭三百尺。爽气真堪挹。瀹茗且盘旋。翩翩吾欲仙。

又

相思绕遍天涯路。相思不识行人处。多病怕逢春。那堪春正深。

日高梳洗懒。鸾镜香尘掩。双鬓绿鬢鬆。一帘花信风。

又 次杜叔高韵

惜山不厌山行远。山中禽鸟频惊见。小雨似怜春。霏霏容易晴。

青裙田舍妇。馐饷前村去。溪水想平腰。唤船依断桥。

### 浣溪沙

绿锁窗前双凤奁。调朱匀粉玉纤纤。妆

成谁解尽情看。

柳转光风丝袅娜，花明晴日锦斓斑。一  
春心事在眉尖。

又 送杜仲高

绿绮空弹恨未平。可堪执手送行人。碧  
酒谩将珍重意，莫辞斟。

我定忆君吟渭北，君须思我赋停云。未  
信高山流水曲，断知音。

又

流转春光又一年。春愁尽日两眉尖。草  
草幽欢能几许，已天边。

会得音书生羽翼，免教魂梦役关山。帘  
卷落花千万点，雨如烟。

又

日转雕栏午漏分。井梧落尽小窗明。宝  
床丝索懒关心。

愁压春山应脉脉，困凝秋水想沈沈。低  
头时露一湾金。

又

墨绿衫儿窄窄裁。翠荷斜舫领云堆。几  
时踪迹下阳台。

歌罢樱桃和露水。舞余杨柳趁风回。唤  
人休诉十分杯。

又

著破春衫走路尘。子规啼断不禁闻。功  
名似我却羞人。

象板且须歌皓齿，衰蹄何苦惜黄金。尊

前休负此生身。

卜算子 柬赵金

忆自别郎时，数到郎归日。及至郎归郎  
又行，泪脸香红湿。

残梦怕寻思，冱绣慵收拾。夏簟青青白  
昼长，背倚阑干立。

醉蓬莱 寿史帅

政槐云浓翠，榴火殷红，暑风凉细。紫  
府神仙，向人间游戏。瑞节珠幢，琼纓宝佩，  
炯冰壶标致。经济规模，登庸衣钵，家传如  
此。

礼乐醇儒，诗书元帅，尽洗凡踪，平吞  
余子。敬简堂深，且从容一醉。庆祉绵绵，  
功名衮衮，比衡山湘水。更把阳和，从头付  
与，满门桃李。

醉落魄

初藕花发。薰风庭院凉成霎。碧纱金缕  
笼香雪。记得年时，心事凭栏说。

如今陡顿音书绝。夜窗羞见团团月。锦  
囊尘暗黄金玦。留取多情，归趁好时节。

虞美人

十年不作湖湘客。亭堠催行色。浅山荒

草记当时。筱竹篱边羸马、向人嘶。

书生万字平戎策。苦泪风前滴。莫辞衫袖障征尘。自古英雄之楚、又之秦。

又

云情雨意才端的。津鼓催行色。因缘虽浅是因缘。犹胜当初无分、小留连。

刘郎双鬓青堪照。君也方年少。尊前不用苦沾衣。未信桃源别后、路成迷。

清平乐 寿林守

钗头蝴蝶。趁舞梅边雪。酒泻黄滕光夺月。岁岁年年蕉叶。

边城莺唤春归。沙场马到秋肥。□□熊韬虎略，换渠金甲牙旗。

又

风韶烟腻。春事三之二。说与人生行乐耳。富贵古来如此。

西园已有心期。姚黄魏紫开时。纤指金荷潋潋，香唇银竹参差。

江城子 次洪如晦韵

醉来玉树倚风前。举吟鞭。指青帘。乌帽低昂，摇兀似乘船。傍路谁家收束巧，斜映日，半窥帘。

寻欢端合趁芳年。对鹁弦。且陶然。纸上从渠，刘蹶与羸颠。漠漠绿阴春复夏，多

少事，总悬天。

鹊桥仙 寿葛宰

松梢擎雪，竹枝沆露，炯炯照人清韵。  
仙家谱系合长生，元不藉、药炉丹井。

凌云壮志，垂天健翮，九万扶摇路稳。  
发闻政最有公车，定飞下、日边音信。

又

一番雨过，江头绿涨，催唤扁舟解去。  
重来言语是相宽，怎得似、而今且住。

阳关声断，同心未绾，簌簌泪珠无数。  
秋鸿春燕往还时，莫忘了、锦笺分付。

又

薄情也见，多情也见，不似这番著相。  
如何容易买归舟，报南浦、桃花绿涨。

随君无计，留君无计，赢得泪珠两行。  
夕阳明处一回头，有人在、高楼凝望。

诉衷情 宿琴圻江上

子规声老又残春。犹作未归人。天意不能怜客，何事苦教贫。

归去也，莫逡巡。好从今。秧田车水，  
麦陇腰镰，总是关心。

临江仙

寒食清明都过了，客中无计留春。东风

吹雨更愁人。系船芳草岸，始信是官身。

怅望故园烟水阔，几时匹马駸駸。别肠何止似车轮。殢天天不管，转作两眉颦。

### 朝中措

驳云行雨苦无多。晴也快如梭。春思正难拘束，客愁谁为销磨。

寻花觅讖，传杯托意，种种蹉跎。消息不来云锦，泪痕湿满香罗。

又

逢逢船鼓绿杨津。彼此是行人。先自离愁无数，那堪病酒伤春。

岸花樯燕，低飞款语，满面殷勤。后会不知何日，因风时惠嘉音。

### 柳梢青

征路迢迢，征旗猎猎，征袖徘徊。扑簌珠泪，怕闻别语，慵举离杯。

春风花柳齐开。只唤做、愁端恨媒。一片衷肠，十分好事，等待回来。

### 丑奴儿

绮窗拨断琵琶索。一一相思。一一相思。无限柔情说似谁。

银钩欲写回文曲，泪满乌丝。泪满乌丝。薄幸知他知不知。

满庭芳 次仁和韵，时欲之官永兴

二十年间，旧游踪迹，梦飞岳麓湘湾。  
征衫再理，秋老菊花天。为客问君何好，爱  
水光、山色争妍。经行处，旗亭酤酒，曾记  
屋东偏。

噫其，吾甚矣，不惭蹇拙，欲斗婵娟。  
办轻舆短艇，强载衰颜。人道[柳]阳无雁，  
奈情钟、藕断丝联。须相忆，新诗赋就，时  
复寄吴笺。

清平乐 江上重九

西风猎猎。又是登高节。一片情怀无处  
说。秋满江头红叶。

谁怜鬓影凄凉。新来更点吴霜。孤负萸  
囊菊盏，年年客里重阳。

谒金门 秋晚□蕙花为赋

秋向晚。秋晚蕙根犹暖。碧染罗裙湘水  
浅。羞红微到脸。

窈窕绣帘围遍。月薄霜明庭院。妆罢宝  
奁慵不掩。无风香自满。

木兰花慢 为同年赵必达寿

亶文王前子，自不与、世人同。况地望

既华，天资更伟，云骥行空。年少才名蜚动，泛星槎、曾到广寒宫。桂子香浓秋月，桃花浪暖春风。

神仙之说朦胧。铜与汞、亦何功、政磐石规模，维城事业，倚重周宗。休要碧油红旆，趁黑头、时节做三公。堂上双亲未老，稳看金紫重重。

## 黄霁宇

### 水龙吟 青丝木香

丽华一握青丝 ,金珠粟粟香环里。春窥绮阁 ,新妆风舞 ,铢衣如碎。翠凤苍虬 ,骑来下界 ,蝶惊蜂避。甚三生富贵 ,垂垂晓露 ,犹凝满身珠翠。

谁共那人结发 ,问何时、蹇修为理。对花一笑 ,香茸易翦 ,碎金难缀。半点芳心 ,乱愁如织 ,缕丝传意。倩东皇、拂拭新条 ,更与作、来生计。

## 黄 简

### 眼儿媚

画楼濒水翠梧阴。清夜理瑶琴。打窗风雨，逼帘烟月，种种关心。

当时不道春无价，幽梦费重寻。难忘最是，鲛绡晕满，蟫锦香沉。

### 柳梢青

病酒心情。唤愁无限，可奈流莺。又是一年，花惊寒食，柳认清明。

天涯翠巘层层。是多少、长亭短亭。倦倚东风，只凭好梦，飞到银屏。

### 玉楼春

龟纹晓扇堆云母。日上彩阑新过雨。眉心犹带宝觥醒，耳性已通银字谱。

密窗彩索看看午。晕素分红能几许。妆成揆镜问春风，比似庭花谁解语。

## 黄 静 淑

### 望江南

君去也，晓出蓟门西。鲁酒千杯人不醉，  
臂鹰健卒马如飞。回首隔天涯。

云黯黯，万里雪霏霏。料得江南人到早，  
水边篱落忽横枝。清兴少人知。

## 黄妙修

### 浪淘沙

稽首大罗天。法眷姻缘。如花玉貌正当年。帐冷帟空孤枕畔，枉自熬煎。为此建斋筵。追荐心虔。亡魂超度意无牵。急到蓝桥来解渴，同做神仙。

黄 某

浪淘沙 原不著调名，按律似是浪淘沙

八十加三迎九十，还似婴童。

## 黄 判 院

满庭芳 寿黄状元 三月初八

桃浪翻花，柳风飘絮，翠蕙八叶呈芳。  
奎星初度，箕宿耀祥光。元是降神崧岳，生  
英杰、奇伟非常。文章士，青春未老，一鹗  
快飞黄。

登瀛、平步上，鳌头独占，头角轩昂。  
主琼林宴席，荣冠绿衣郎。归侍彩俱庆，逢  
生旦、品上椒觞。从今去，公侯谈笑，福寿  
等天长。

黄仁荣

木兰花

监郡风流欢洽。

## 黄人杰

### 祝英台 自寿

异乡中，行色里，随分庆初度。老子今年，五十又还五。任他坎止流行，吴头楚尾，本来是、乾坤逆旅。

贵和富。此事都付浮云，无必也无固。用即为龙，不用即为鼠。便教老却英雄，草庐烟舍，也须有、著闲人处。

### 酹江月 寿二月初二

年时今日，御双凫曾到、蓬壶方丈。元是王孙生此夕，红紫娇春成行。数曲栏干，一双萸荚，正傍瑶阶长。风帘斜处，有时新燕来往。

犹记不住称觞，挥毫著语，更与书扁榜。转首还逢汤饼客，景物依然和畅。待赋新词，说些消息，教倩飞琼唱。南班虚席，看随丹诏东上。

### 感皇恩 西湖

秋色满西湖，雨添新绿。一派烟光望中

全宋词 黄人杰

足。清香十里，画舸去来相逐。酒酣时听得，渔家曲。

人道似郎，郎还第六。云水相逢未谙熟。晚来风静，闲浸几枝红玉。水神应不禁，江妃浴。

念奴娇 游西湖

西湖胜绝，有栖云楼观，蟠空丘壑。玉鉴光中天不老，人在蓬壶行乐。画舫藏春，垂杨系马，幽处笙箫作。京华狂客，也忘身世飘泊。

行待载酒寻芳，湖湾堤曲，放浪红尘脚。借景留欢排日醉，不负莺花盟约。忍缓东风，耐烦迟日，休恁匆匆著。温存桃李，莫教一顿开却。

浣溪沙 江陵二车席次为江梅腊梅赋

的皪江梅共腊梅。剪金裁玉一时开。黄姑相伴雪儿来。

别驾公余无个事，得将诗酒与栽培。为春留客小徘徊。

生查子

烟雨不多时，肥得梅如许。早有点儿酸，诮没星儿苦。

飞燕恶禁持，又待衔春去。容著水精盐，

觅个调羹处。

柳梢青 黄梅

恰则年时。风前雪底，初见南枝。可噉匆匆，花才清瘦，子已红肥。

安排酒盏相随。看金弹、累累四垂。渴后情怀，鼎中风味，惟有心知。

蓦山溪

翠环惊报，叶底梅如弹。小摘试尝看，齿微酸、生香不断。烟丸露颗，肥得颊儿红，还欲近，浅黄时，风雨摧残半。

何如珍重，剩著冰盘荐。持酒劝飞仙，似江梅、累累子满。饶将风味，成就与东君，随鼎鼐，著形盐，早趁调羹便。

满江红

连帅阁学侍郎章公燕客奕濠，漾舟荷香中，景物满前，索词，因赋。时帅已拜兴元命

小队旌旗，又催送、元戎领客。政十顷、荷香微度，草烟横碧。杨柳参差新合翠，水天上下俱齐色。傍野桥、容与绕重湖，严城侧。

花作阵，舟为宅。敲羯鼓，鸣羌笛。渐夜凉风进，酒杯无力。遥想汉中鸡肋地，未应万里回金勒。看便随、飞诏下南州，朝京国。

## 黄 裳

### 桂枝香 延平阁闲望

人烟一簇。正寄演，客飞升，翠微麓。楼阁参差，下瞰水天红绿。腰间剑去人安在，记千年、寸阴何速。山趋三岸，潭吞二水，岁丰人足。

是处有、雕阑送目。更无限笙歌，芳酝初熟。休诧滕王看处，落霞孤鹜。雨中尤爱烟波上，见渔舟、来去相逐。数声歌向芦花，还疑是湘灵曲。

又

插云翠壁。为送目入遥空，见山色。金鼎丹成去也，晋朝高客。百花岩下遗孙在，赋何人、离尘风骨。翠微缘近，希夷志远，洞天踪迹。近剑有、为龙信息。怪潭上灵光，雷电相击。尤好风波乍霁，鹭汀斜日。倚栏白尽行人鬓，但沈沈、群岫凝碧。利名休事蝇头，飞舫送君南北。

### 新荷叶 雨中泛湖

落日衔山，行云载雨俄鸣。一顷新荷，

坐间疑是秋声。烟波醉客，见快哉、风恼娉婷。香和清点，为人吹在衣襟。

珠佩欢言，放船且向前汀。绿伞红幢，自从天汉相迎。飞鸥独落，芦边对、几朵繁英。侑觞人唱，乍闻应似湘灵。

### 渔家傲 咏月

通一月而泛咏，已侑金卮；辨四时而各言，未劳檀板。晦朔乃取于盈阙，寒暑盖资其往来。群动息而忙者闲，观光台上；众景生而悲者笑，窥影杯中。饮阑梦觉，则斜月得其情；望重意新，则初月致其事。是宜擅有六义，离为七章，尽入歌声，共资一笑。

#### 春月

多幸春来云雨少。且教月与花相照。清色真香庭院悄。前事杳。还嗟此景何时了。

莫道难逢开口笑。夜游须趁人年少。光泛雕栏寒料峭。迂步绕。不劳秉烛壶天晓。

#### 又 夏月

汗漫金华寒委地。火云散尽奇峰势。纨扇团圆休与比。犹可喜。恩情不怕凉飙至。

梦冷魂高何处寄。琉璃砌上笼人睡。逃暑广寒宫似水。缘有累。乘风却下人间世。

#### 又 秋月

人在月中霄汉远。仙槎乘得秋风便。寒信已归砧上练。衣未翦。疏窗空引相思怨。

须信婵娟尤有恋。轻飞叶上清光转。寒菊枝头笼婉变。人初宴。新妆更学铅华浅。

又 中秋月

三月秋光今夜半。一年人爱今回满。莫放笙歌容易散。须同玩。姮娥解笑人无伴。

抱尽金精来碧汉。醉吟莫作寻常看。已过中天欢未断。还同叹。时情已向明朝换。

又 冬月

风入金波凝不住。玉楼间倚谁飞举。霜艳雪光来竞素。分辨处。独垂馀意窥庭户。

强薄罗衣催玉步。美人为我当尊舞。醉到春来能几度。愁今古。月华不去年华去。

又 新月

方令庚生初皎皎。珠帘钩上华堂晓。十二栏干多窈窕。妆欲妙。玉篦偷学娥眉小。

扰扰时人随兔走。十分皆望菱花照。瑞荚莫嫌生得少。圆未了。已圆却恐佳期穹。

又 斜月

已送清歌归去后。东南楼上人声悄。冷落尤临弦上调。欢意少。空将万感收残照。

窗外剑光初出鞘。斜窥梦断人年少。未到盖棺心未了。尘虑扰。双眸竟入扶桑晓。

永遇乐 玩雪

朝靄藏晖，客袍惊暖，天巧无意。杳杳谁知，包含造化，忽作人间瑞。儿童欢笑，忙来花下，便饮九春和气。急拿舟，高人乘兴，江天助我幽思。

缤纷似翦，峥嵘如画，莫道冬容憔悴。  
恍象含空，尘无一点，疑在天宫里。酒楼酣  
宴，茶轩清玩，且待桂花来至。有馀光，明  
年待看，明红暗翠。

又 冬日席上

天接重云，月临残腊，时有幽意。化作  
瑶池，纷纷戏蝶，一色非人世。无情征雁，  
乘风南向，怅望有情难寄。暖惊梅，先传芳  
信，夜来万宝春至。

中齐胜境，东藩和气，自有名园佳丽。  
一梦休嗟，三千好客，何处寻珠履。小堂人  
静，尊前清昼，好惜岁华如逝。管弦中，金  
杯更劝，朱颜皓齿。

蓦山溪 腊日游尧山

春前信息，到处欢声满。旌旆出西郊。  
拥笙歌、婵娟两畔。东巡事往，空有雪中山，  
仙驭悄，古风间，谩动吟人叹。

天边身世，况值重华旦。击壤访遗民，  
想如云、望中不断。功名休论，齐楚共唐虞，  
开口笑，插花归，更候清秋晚。

喜朝天 腊中雪后东湖闲宴

雪云浓。送愁思，衾寒更怯霜风。惹起  
离恨，为光阴恼，人意无穷。谁省年华屡换，  
渐作个、浮生玉鬣翁。休易感，新醅泛蚁，  
且共时同。

全宋词 黄 裳

相逢。笑语相契，况驾言游处，山里齐宫。寂寞时候，自有皓景，粉泽冬容。先顾丽人期约，痛赏候、花开洛城红。三十日，回头过尽，喜对春工。

锦堂春 玩雪

天女多情，梨花碎翦，人间赠与多才。渐瑶池潋滟，粉翹徘徊。面[旋]不禁风力，背人飞去还来。最清虚好处，遥度幽香，不掩寒梅。

岁华多幸呈瑞，泛寒光，一样仙子楼台。虽喜朱颜可照，时更相催。细认沙汀鹭下，静看烟渚潮回。遣青蛾趁拍，斗献轻盈，且更传杯。

霜叶飞 冬日闲宴

谁能留得年华住。韶华今在何处。万林飞尽，但惊天篆，半空无数。望消息、霜催雁过，佳人愁起云垂暮。就绣幕、红炉去。金鸭时飘异香，柳腰人舞。

休道行且分飞，共乐还一岁，见景长是欢聚。大来芳意，既与名园，是花为主。翠娥说、尊前笑语。来年管取人如故。向寂寞，中先喜，俄顷飞琼，化成寰宇。

水龙吟 方外述怀

五城中锁奇书，世间睡里无人唤。家家

自有，月中丹桂，朱衣仙子。能驻光阴，解留颜鬓，引君霄汉。便西归、休梦华胥国□，约无限、烟霞伴。

谁是采真高士，幻中寻取元非幻。时人不为，玉峰三秀，尘缘难断。莫说英雄，万端愁绪，夕阳孤馆。到流年过尽，韶华去了，起浮生叹。

蝶恋花 牡丹

每到花开春已暮。况是人生，难得长欢聚。一日一游能几度。看看背我堂堂去。

蝶乱蜂忙红粉妒。醉眼吟情，且与花为主。雪怨云愁无问处。芳心待向谁分付。

又

兴到浓时春不住。昨夜雕栏，放了花无数。谈笑急邀吟醉侣。青娥也合随轩去。

媚恐情生娇恐妒。今日开尊，多幸无风雨。休唱宴琼林一句。来年花共人何处。

又 东湖

南北两山骄欲斗。中有涟漪，莫道壶山小。落落情怀临漂渺。驾言来处铃斋悄。

行到桃溪花解笑。人面相逢，竞好窥寒照。醉步敲斜西日少。欢声犹唱多情调。

又

高下亭台山水境。两畔清辉，中有垂杨径。鹭点前汀供雪景。花乘流水传春信。

不醉无归先说定。醉待言归，又被风吹

醒。月下壶天游未尽。广寒宫是波中影。

又

杳杳晴虚寒漫漫。放下尘劳，相共游银汉。便入醉乡休浩叹。神仙只在云门馆。饮兴偏宜流水畔。时有红蕖，落在黄金盏。鹭未忘机移别岸。画船更上前汀看。

又

水鉴中看尤未老。乘兴拿舟，更向湘江过。俯仰太虚都一个。九春风思谁吟到。闲上钓台云外坐。待得金鳞，始放芳尊倒。醉后言归犹更早。素纤有数君须道。

喜迁莺 表海亭冬日闲宴

雕栏闲倚，瑞雪霁、浣出人间金碧。下想名园，芳心多少，欲占九州颜色。洞开路入丹汉，自是神仙真宅。寒吟外，看歌云舞雪，光阴难得。

谁共怀古意，东海一老，居易头垂白。自此英雄，功名相继，空有寂寥遗迹。圣贤电拂休笑，离合许多宾客。使君乐与人同，且对云门斜日。

宴琼林 木香

红紫趁春阑，独万簇琼英，尤未开罢。问谁共、绿幄宴群真，皓雪肌肤相亚。华堂路，小桥边，向晴阴一架。为香清、把作寒

梅看，喜风来偏惹。

莫笑因缘，见景跨春空，荣称亭榭。助巧笑、晓妆如画，有花钿堪借。新醅泛、寒冰几点，拚今日、醉尤飞鞚。翠罗帏中，卧蟾光碎，何须待还舍。

宴春台 初夏宴芙蓉堂

夏景舒长，麦天清润，高低万木成阴。晓意寒轻，一声未放蝉吟。但闻莺友同音。宴华堂、绿水中心。芙蓉都没，红妆信息，终待重寻。

清冷相照，邂逅俱欢，翠娥拥我，芳醪强斟。笙歌引步，登临更向瑶岑。卧影沈沈。自风来、与客披襟。纵更深。归来洞府，红烛如林。

雨霖铃 送客还浙东

天南游客。甚而今、却送君南国。薰风万里无限，吟蝉暗续，离情如织。秣马脂车，去即去、多少人惜。为惠爱、烟惨云山，送两城愁作行色。

飞帆过、浙西封域。到秋深、且舣荷花泽。就船买得鲈鳜，新谷破、雪堆香粒。此兴谁同，须记东秦，有客相忆。愿听了、一阕歌声，醉倒拚今日。

桂枝香 重阳

醅醑初熟。竞看九日、西风弄寒菊。

全宋词 黄裳

姝子新妆，向晓淡黄千簇。清香闹处君须住，掺盈头、醉乡相逐。马台欢笑，龙山纵逸，佳话重绪。

共尽日、登临未足。更休问明年，浮世荣辱。难得良辰，鬓发见秋尤绿。且邀月照金尊上，近人寒、如对飞瀑。宴归还趁人来，茱萸佩垂红玉。

喜迁莺 端午泛湖

梅霖初歇。乍绛蕊海榴，争开时节。角黍包金，香蒲切玉，是处玳筵罗列。斗巧尽输年少，玉腕彩丝双结。舫彩舫，看龙舟两两，波心齐发。

奇绝。难画处，激起浪花，飞作湖间雪。画鼓喧雷，红旗闪电，夺罢锦标方彻。望中水天日暮，犹见朱帘高揭。归棹晚，载荷花十里，一钩新月。

洞仙歌 暑中

乱蝉何事，冒暑吟如诉。断续声中为谁苦。阵云行碧落，舒卷光阴，秋意爽，俄作晴空骤雨。

明珠无限数。都在荷花，疑是星河对庭户。莫负昼如年，况有清尊，披襟坐、水风来处。信美景良辰、自古难并，既不遇多才，岂能欢聚。

又

杳无风色，肠断莲花信。水鉴云垂数峰

影。向劳生辛苦，寒暑煎人，争不老，空想秋堂夜静。

玉姬挥皓月，时送微凉，莫吝金卮为伊尽。柳下夕阳收，傍水重游，花茵上、雪回襟冷。问避暑天机、自有奇人，但且对湖光，世间谁醒。

又 七夕

世间言笑，天上谁欢聚。河汉涵秋静无暑。望丹青杳杳，云幄俄开，缘会远，空引时情万缕。

彩楼人送目，今夕无双，巧在灵丝暗相许。爽气御西风，众乐难寻，乘槎看、鹊桥初度。过几刻良时、早已分飞，向月下何辞，十分芳醑。

八声甘州 初秋

化工多事了，却收天巧，都与西风。数峰云如扫，闲垂六幕，初见秋容。昨夜烦襟顿释，一雨洗遥空。偏有银蟾好，千里人同。

引起游人多感，为静中景色，悲思无穷。傍雕栏怀古，谁问紫元翁。也难逢、金华时候，又岂知、幽会水精宫。尘缘满，指烟霞去，多在江东。

满庭芳 咏浮桥

琼馆烟轻，银河风细，玉桥云锁方开。晓虹千丈，宛转下天来。人在水精宫里，行

乐处、锦绣成堆。仍相问，人间天上，何处有蓬莱。

徘徊。追往事，征南巧架，傅野怀才。谩石驱东海，沙合龙台。好是乐成初宴，红牙碎、声隐晴雷。江天晚，游人未散，莫放隼旂回。

### 宴琼林 上元

霜月和银灯，乍送目楼台，星汉高下。爱东风、已暖绮罗香，竞走去来车马。红莲万斛，开尽处、长安一夜。少年即、两两桃花面，有馀光相借。

因甚灵山在此，是何人、能运神化。对景便作神仙会，恐云辇且驾。思曾待、龙楼俯览，笑声远、洞天飞鞚。向东来、尤幸时如故，群芳未开谢。

### 又 东湖春日

遽暖间俄寒，妙用向园林，难问春意。万般声与色，自闻雷、便作浮华人世。红娇翠软，谁顿悟、天机此理。似韶容、可驻无人会，且忘言闲醉。

当度仙家长日，向人间、闲看佳丽。念远处有东风在，梦悠悠往事。桃溪近、幽香远远，谩凝望、落花流水。桂华中、珠佩随轩去，还从卖花市。

### 又 牡丹

已览遍韶容，最后有花王，芳信来报。魏妃天与色，拥姚黄、去赏十洲仙岛。东君

到此，缘费尽、天机亦老。为娇多、只恐能言笑。惹风流烦恼。

莫道两都迥出，倩多才、吟看谁好。为我惨有如花面，说良辰欲过。须勤向、雕栏秉烛，更休管、夕阳芳草。算来年、花共人何处，金尊为花倒。

### 满江红 东湖观莲

绿盖纷纷，多少个、云霄仙子。应是有，瑶池盛会，靓状临水。无奈轻盈风信急，瑞香乱翠红相倚。谁共吟、此景竹林人，桃溪士。

时雨过，明珠细。朝雾染，香腮腻。轻舟破幽径，烦襟都洗。第一朵须寻华池景，寿觞边偶得龟千岁。乘兴泻、云液落新荷，休辞醉。

### 减字木兰花 竞渡

红旗高举。飞出深深杨柳渚。鼓击春雷。直破烟波远远回。

欢声震地。惊退万人争战气。金碧楼西。衔得锦标第一归。

### 瑶池月 云山行

紫元翁一日公馀，危坐寂寥。幽怀逸思，偶往云山烟波之间，想见其为乐也，因作云山、烟波二行，歌之以瑶池月。精严禅老请刻之石，乃书以遗

之。

微尘濯尽，栖真处、群山排在云汉。青盘翠跃，掩映平林寒涧。流水急、数片桃花逝，自有留春仙馆。秦渔问，前朝换。卢郎待，今生满。谁伴。元翁笑语，相从未晚。

更安得、世味堪玩。道未立、身尤是幻。浮生一梭过，梦回人散。卧松庵、当会灵源，现万象、无中须看。乾坤鼎，阴阳炭。琼枝秀，金圆烂。何患。朝元事往，孤云难管。

### 又 烟波行

扁舟寓兴，江湖上、无人知道名姓。忘机对景，咫尺群鸥相认。烟雨急、一片篷声碎，醉眼看山还醒。

晴云断，狂风信。寒蟾倒，远山影。谁听。横琴数曲，瑶池夜冷。

这些子、名利休问。况是物、都归幻境。须臾百年梦，去来无定。向婵娟、留住青春，笑世上、风流多病。蒹葭渚，芙蓉径。放侯印，趁渔艇。争甚。须知九鼎，金沙如圣。

### 蝶恋花 月调

伏以合欢开宴，奉乐国之宾朋；对景摅怀，待良时之风月。此者偶屈三益，幸逢四并。六幕星稀，万椽风细。天发金精之含蓄，地扬银色之光华。远近万情，若知而莫诘；满虚一色，可揽以□将。是故无累而玩之者，喜乐之心生；不足而对之者，悲伤之态作。感群动以无意，涵长空而不流。对坐北堂，方入陆生之牖；共离南馆，便登韩子之台。愿歌三五之清辉，誓倒十千之芳酝。

忽破黄昏还太素。寒浸楼台，缥缈非烟雾。江上分明星汉路。金银闪闪神仙府。影卧清光随我舞。邂逅三人，只愿长相聚。今月亭亭曾照古。古人问月今何处。

又

满到十分人望尽。仙桂无根，到处留光景。听我尊前欢未竟。金卮已弄寒蟾影。银色界中风色定。散了浮云，宝匣初开镜。归去不须红烛影。天边自与人相趁。

又

古往今来忙里过。今古清光，静照人行道。难似素娥长见好。见频只是催人老。欲驻征轮无计那。世上多情，却被无情恼。夜夜乌飞谁识破。满头空恨霜华早。

又

俄落盏中如有恋。盏未乾时，还见霜娥现。说向翠鬟斟莫浅。殷勤此意应相劝。光景尤宜年少面。千里同看，不与人同怨。席上笑歌身更健。良时只愿长相见。

又

千二百回圆未半。人世悲欢，此景长相伴。行到身边琼步款。金船载酒银河畔。谁为别来音信断。那更蟾光，一点窥孤馆。静送忘言愁一段。会须莫放笙歌散。

又

人逐金乌忙到夜。不见金乌，方见人闲暇。天汉似来尊畔泻。须知闲暇欢无价。

银色满身谁可画。两腋风生，爽气駸駸马。待入蟾宫偷造化。姮娥已许仙方借。

又

劝酒致语

适来已陈十二短章，辄歌三五盛景。累累清韵，尚惭梁上之飞尘；抑抑佳宾，须作乡中之醉客。同乐当勤於今夕，相从或系於他年。更赋幽情，再声佳咏。

万籁无声天地静。清抱朱弦，不愧丹青镜。照到林梢风有信。抬头疑是梅花领。

万感只应闲对景。独倚危栏，扰扰人初定。吟不尽中愁不尽。溪山千古沈沈影。

又

谁悟月中真火冷。能引尘缘，遂出轮回境。争奈多情都未醒。九回肠断花间影。

万古兴亡闲事定。物是人非，杳杳无音信。问月可知谁可问。不如且醉尊前景。

又

忽送林光禽有语。飞入遥空，失素归洲鹭。照处无私清望富。馀辉不惜人人与。

玉绳欲到中天路。且待飞觞，缓缓移琼步。花下影圆良夜午。东南楼上还相顾。

又

一望瑶华初委地。更约幽人，共赏岩边翠。试把方诸聊与试。无情争得无中泪。

飞瀑恐从星汉至。渐向宾筵，但觉寒如水。自爱一轮方得意。轻随箕毕还成累。

青门引 社日游云门

鸿落寒滨，燕辞幽馆，西成万室，颦眉人少。自古云齐，洞门何处，南望数峰秋晓。千骑旌麾远，去寻真、忙中心了。佩声盘入，烟霞绝顶，谁闻欢笑。

当候青童相报。因待访仙人。长生微妙。置俎争来，四乡宴社，且看翠围红绕。似可扪青汉，到北扉、两城斜照。醉翁回首，丹台梦觉，钧天声杳。

满路花 和秋风吹渭水

乾坤生古意，草木起秋声。移人名利境，梦中惊。便寻灵宝，凤髓与龟精。密报黄芽就，紫府门开，道情有个莺莺。问归含楚山青。

卧影水天明。松庵谁笑话，见还婴。鹤归日落，聚散两忘情。好笑人痴处，白头青冢，世间犹说醒醒。

卖花声 本意

人过天街，晓色担头红紫。满筠筐、浮花浪蕊。画楼睡醒，正眼横秋水。听新腔、一声催起。

吟红叫白，报道蜂儿知未。隔东西、馀

全宋词 黄 裳

音软美。迎门争买，早斜簪云髻。助春娇、  
粉香帘底。

## 黄 升

### 贺新郎 题双溪冯熙之交游风月之楼

倦整摩天翼。笑归来、点画亭台，按行泉石。落落元龙湖海气，更著高楼百尺。收揽尽、水光山色。曾驾飚车蟾宫去，几回批、借月支风敕。斯二者，惯相识。

玲珑窗户青红湿。夜深时、寒光爽气，洗清肝膈。似此交游真洒落，判与升堂入室。有万象、来为宾客。不用笙歌轻点涴，看仙翁手搦虹霓笔。吟思远，两峰碧。

又

乙巳正月十月，双溪携酒遗蜕亭，桃花方开，主人浩歌酌客，欢甚，即席作此

风送行春步。渐行行、山回路转，入云深处。问讯花梢春几许，半在诗人杖屦。点点是、祥烟膏露。中有瑶池千岁种，整严妆、来作巢仙侣。相妩媚，试凝伫。

风流座上挥谈麈。更多情、多才多调，缓歌金缕。趁取芳时同宴赏，莫惜清樽缓举。有明月、随人归去。从此一春须一到，愿东君、长与花为主。泉共石，闻斯语。

又 菊

莫恨黄花瘦。正千林、风霜摇落，暮秋时候。晚节相看元不恶，采采东篱独秀。试揽结、幽香盈手。几劫修来方得到，与渊明、千载为知旧。同冷淡，比兰友。

柴桑心事君知否。把人间、功名富贵，付之尘垢。不肯折腰营口腹，一笑归欤五柳。怅此意、而今安有。若得风流如此老，也何妨、相对无杯酒。诗自可，了重九。

又 梅

自扫梅花下。问梢头、冷蕊疏疏，几时开也。间者阔焉今久矣，多少幽怀欲写。有谁是、孤山流亚。香月一联真绝唱，与诗人、千载为嘉话。余兴味，付来者。

清癯不恋华亭榭。待与君、白发相亲，竹篱茅舍。喜甚今年无酒禁，溜溜小槽压蔗。已准拟、雪天霜夜。自醉自吟仍自笑，任解冠、落佩从嘲骂。书此意，寄同社。

木兰花慢 题冯云月玉连环词后

自沈香梦断，风雨外、失余春。怅袍锦淋漓，金銮论奏，四海无人。蛾眉古来见妒，奈昭阳、飞燕亦成尘。惟有空梁落月，至今能为传神。

神游八表跨长鲸。谁是再来身。爱云月溪头，玉环一曲，笔力千钧。人间不堪著眼，但香名、百世尚如新。乞我九霄蜚佩，梯空共上秋旻。

又 乙巳病中

问潘郎两鬓，更禁得、几番秋。怅病骨  
臃臃，幽怀渺渺，短发飕飕。云边一声长笛，  
这风情、多属赵家楼。敲枕困寻药裹，薰衣  
慵讯香篝。

悠悠。老矣复焉求。何止赋三休。念少  
日书癖，中年酒病，晚岁诗愁。已攀桂花作  
证，便从今、把笔一齐勾。只有烟霞痼疾，  
相陪风月交游。

又 怀旧

问春春不语，谩新绿、满芳洲。记历历  
前游，看花南陌，命酒西楼。东风翠红围绕，  
把功名、一笑付糟丘。醉里了忘身世，吟边  
自负风流。

风流。莫莫复休休。白发渐盈头。怅十  
载重来，略无欢意，惟有闲愁。多情向人似  
旧，但小桃、婀娜柳纤柔。望断残霞落日，  
水天拍拍飞鸥。

南柯子 丁酉清明

天上传新火，人间试袂衣。定巢新燕觅  
香泥。不为绣帘朱户、说相思。

侧帽吹飞絮，凭栏送落晖。粉痕销淡锦  
书稀。怕见山南山北、子规啼。

又 丙申重九

兰佩秋风冷，茱囊晓露新。多情多感怯  
芳辰。强折黄花来照、碧粼粼。

全宋词 黄 升

落帽参军醉，空樽靖节贫。世间那复有  
斯人。目送归鸿西去、一伤神。

行香子 梅

寒意方浓。暖信才通。是晴阳、暗拆花  
封。冰霜作骨，玉雪为容。看体清癯，香淡  
伫，影朦胧。

孤城小驿，断角残钟。又无边、散与春  
风。芳心一点。幽恨千重。任雪霏霏，云漠  
漠，月溶溶。

卖花声 己亥三月一日

莺蝶太匆匆。恼杀衰翁。牡丹开尽状元  
红。俯仰之间增感慨，花事成空。

垂柳绿阴中。粉絮蒙蒙。多情多病转疏  
慵。不是东风辜负我，我负东风。

又 忆旧

秋色满层霄。剪剪寒飈。一襟残照两无  
聊。数尽归鸦人不见，落木萧萧。

往事欲魂消。梦想风标。春江绿涨水平  
桥。侧帽停鞭沽酒处，柳软莺娇。

长相思 秋怀

天悠悠。水悠悠。月印金枢晓未收。笛  
声人倚楼。

芦花秋。蓼花秋。催得吴霜点鬓稠。香

笺莫寄愁。

又 秋夜

砧声齐。杵声齐。金井栏边败叶飞。夜寒乌不栖。

风淒淒。露淒淒。影转梧桐月已西。花冠窗外啼。

又 春晚

惜春归。爱春归。脱了罗衣著苧衣。绿阴黄鸟啼。

酒醒时。梦醒时。清簟疏帘一局棋。丁东风马儿。

感皇恩 送饶溪台游浙

骑鹤上扬州，腰缠十万。拈起诗人旧公案。看山看水，此去胜游须遍。烦君收拾取，归吟卷。

少日风流，暮年萧散。佳处何妨小留款。沙河塘上，落日绣帘争卷。也须拂拭起，看花眼。

蝶恋花 春感

百计留春春不住。褪粉吹香，日日催教去。心事欲凭莺语诉。流莺划地无凭据。

绿玉阑干围绮户。一点柔红，应在深深处。想倚翠帘吹柳絮。浅颦惆怅芳期误。

月照梨花 闺怨

昼景。方永。重帘花影。好梦犹酣，莺声唤醒。门外风絮交飞。送春归。

修蛾画了无人问。几多别恨。泪洗残妆粉。不知郎马何处嘶。烟草萋迷。鹧鸪啼。

摸鱼儿 为遗蜕山中桃花作，寄冯云月

问山中、小桃开后，曾经多少晴雨。遥知载酒花边去，唱我旧歌金缕。行乐处。正蝶绕蜂围，锦绣迷无路。风光有主。想倚杖西阡，停杯北望，望断碧云暮。

花知道，应倩蜚鸿寄语。年来老子安否。一春一到成虚约，不道树犹如此。烦说与。但岁岁、东风妆点红云坞。刘郎老去。待有日重来，同君一笑，拈起看花句。

水龙吟 赠丁南邻

少年有志封侯，弯弓欲挂扶桑外。一朝敛缩，萧然清兴，了无拘碍。袖里阴符，枕中鸿宝，功名蝉蜕。看舌端霹雳，剧谈玄妙，人间世、疑无对。

阆苑醉乡佳处，想当年、绿阴犹在。群仙寄语，不须点勘，鬼神功罪。碧海千寻，赤城万丈，风高浪快。待踞龟食蛤，相期汗漫，与烟霞会。

西河 己亥秋作

天似洗。残秋未有寒意。何人短笛弄西风，数声壮伟。倚栏感慨展双眸，离离烟树如荠。

少年事，成梦里。客愁付与流水。笔床茶具老空山，未妨肆志。世间富贵要时贤，深居宜有余味。

大江东去日西坠。想悠悠千古兴废。此地阅人多矣。且挥弦寄兴、氛埃之外。目前蜚鸿归天际。

清平乐 宫怨

珠帘寂寂。愁背银缸泣。记得少年初选入。三十六宫第一。

当年掌上承恩。而今冷落长门。又是羊车过也，月明花落黄昏。

又 宫词

深深禁籞。霁日明莺羽。风动槐龙交翠舞。恰恰花阴亭午。

一帘暖絮悠扬。金炉旋炷沈香。天子方看谏疏，内人休斗新妆。

酹江月 戏题玉林

玉林何有，有一弯莲沼，数间茅宇。断堑疏篱聊补葺，那得粉墙朱户。禾黍秋风，

鸡豚晓日，活脱田家趣。客来茶罢，自挑野菜同煮。

多少甲第连云，十眉环座，人醉黄金坞。回首邯郸春梦破，零落珠歌翠舞。得似衰翁，萧然陋巷，长作溪山主。紫芝可采，更寻岩谷深处。

又 夜凉

西风解事，为人间、洗尽三庚烦暑。一枕新凉宜客梦，飞入藕花深处。冰雪襟怀，琉璃世界，夜气清如许。划然长啸，起来秋满庭户。

应笑楚客才高，兰成愁悴，遗恨传千古。作赋吟诗空自好，不直一杯秋露。淡月阑干，微云河汉，耿耿天催曙。此情谁会，梧桐叶上疏雨。

浣沙溪 醮坛

钟磬泠泠夜未央。梨花庭院月如霜。步虚声里拜瑶章。

紫极清都云渺渺，红尘浊世事茫茫。未知谁有返魂香。

鹧鸪天 暮春

沈水香销梦半醒。斜阳恰照竹间亭。戏临小草书团扇，自拣残花插净瓶。

莺宛转，燕丁宁。晴波不动晚山青。玉人只怨春归去，不道槐云绿满庭。

又 张园作

雨过芙蕖叶叶凉。摩挲短发照横塘。一行归鹭拖秋色，几树鸣蝉饯夕阳。

花侧畔，柳旁相。微云澹月又昏黄。风流不在谈锋胜。袖手无言味最长。

秦楼月 秋夕

心如结。西风老尽黄花节。黄花节。塞鸿声断，冷烟凄月。

汉朝陵庙唐宫阙。兴衰万变从谁说。从谁说。千年青史，几人华发。

重叠金 壬寅立秋

西风半夜惊罗扇。蛩声入梦传幽怨。碧藕试初凉。露痕啼粉香。

清冰凝簟竹。不许双鸳宿。又是五更钟。鸦啼金井桐。

又 冬

南山未解松梢雪。西山已挂梅梢月。说似玉林人。人间无此清。

此身元是客。小住娱今夕。拍手凭阑干。霜风吹鬓寒。

又 除日立春

银幡彩胜参差剪。东风吹上钗头燕。一笑绕花身。小桃先报春。

新春今日是。明日新年至。擘茧莫探官。

人间行路难。

谒金门 初春

花事浅。方费化工匀染。墙角红梅开未遍。小桃才数点。

人在暮寒庭院。闲续茶经香传。酒思如冰诗思懒。雨声帘不卷。

南乡子 夏夜

多病带围宽。未到衰年已鲜欢。梦破小楼风马响，珊珊。缺月无情转画栏。

凉入苎衾单。起探灯花夜欲阑。书册满床空伴睡，慵观。拈得渔樵笛谱看。

又 冬夜

万籁寂无声。衾铁棱棱近五更。香断灯昏吟未稳，凄清。只有霜华伴月明。

应是夜寒凝。恼得梅花睡不成。我念梅花花念我，关情。起看清冰满玉瓶。

花发沁园春 芍药会上

晓燕传情，午莺喧梦，起来检校芳事。荼蘼褪雪，杨柳吹绵，迤邐麦秋天气。翻阶傍砌。看芍药、新妆娇媚。正凤紫匀染绡裳，猩红轻透罗袂。

昼暖朱阑困倚。是天姿妖娆，不减姚魏。随蜂惹粉，趁蝶栖香，引动少年情味。花浓

全宋词 黄 升

酒美。人正在、翠红围里。问谁是、第一风流，折花簪向云髻。

阮郎归 效姜尧章体

粉香吹暖透单衣。金泥双凤飞。闲来花下立多时。春风酒醒迟。

桃叶曲，柳枝词。芳心空自知。湘皋月冷佩声微。雁归人不归。

鹊桥仙 春情

青林雨歇，珠帘风细，人在绿阴庭院。夜来能有几多寒，已瘦了、梨花一半。

宝钗无据，玉琴难托，合造一襟幽怨。云窗雾阁事茫茫，试与问、杏梁双燕。

鹧鸪天

天气清和仅两旬。一旬前是佛生辰。当年来应徐卿梦，此夕遥瞻寿宿明。

拚一笑，对诸贤。山翁何以祝龟龄。蟠桃瓜枣皆虚诞，愿把阴功福后人。

## 黄 师 参

### 沁园春 饯郑金部去国

谷口高人，偶溯明河，近尺五天。见紫霄宫阙，空中突兀，玉皇姬侍，云里翩跹。滴露研朱，披肝作纸，细写灵均孤愤篇。排云叫，奈大钧不管，沙界三千。

语高天上惊传。早斥去人间伴谪仙。念赤城丹籍，香名空在，蓬莱弱水，欲到无缘。还倚枯槎，飘然归去，回首清都若个边。家山好，有一湾风月，小小渔船。

## 黄 时 龙

### 浣溪沙

雨歇花梢月正明。映帘人静绣灯昏。鸳鸯成字便停针。

笑启玉奁明酒晕，缓寻金叶熨香心。一春情绪此时深。

### 夜行船

十四弦声犹未断。星月上、西墙一半。却手休弹，含情微妒，报道春宵短。

银烛纱笼须早办。不住地、金蕉催劝。别院人归，小窗灯静，自把花枝看。

### 虞美人

卷帘人出身如燕。烛底粉妆明艳。羯鼓初催按六么。无限春娇都上、舞裙腰。

画堂深窈亲曾见。宛转楚波如怨。小立花心曲未终。一把柳丝无力、倚东风。

## 黄叔达

### 南乡子

落帽晚风回。又报黄花一番开。扶杖老人  
心未老，堪哈。漫有才情付与谁。  
芳意正徘徊。传与西风且慢吹。明日馀  
尊还共倒，重来。未必秋香一夜衰。

## 黄水村

### 解连环 春梦

凤楼倚倦。正海棠睡足，锦香衾软。似不似、雾阁云窗，拥绝妙灵君，霎时曾见。屏里吴山，又依约、兽环半掩。到教人觑了，非假非真，一种春怨。

游丝落花满院。料当时、错怪杏梁归燕。记得栩栩多情，似蝴蝶飞来，扑翻轻扇。偷眼帘帷，早不见、画眉人面。但凝红生半脸，枕痕一线。

## 黄舜英

### 虞美人

一从骨肉相抛了。受了多多少。溪山风月属何人。到此思量、因甚不关情。

而今虽道王孙贵。有事凭谁济。自从今夜得媒言。相见佳期无谓、隔关山。

## 黄谈

### 念奴娇 过西湖

午风清暑 ,过西湖隐约 ,曾游堤路。云径  
烟扉人境绝。真是珠宫玄圃。倦倚阑干 ,笑呼  
艇子 ,同入荷花去。一杯相属 ,恍然身在何许。

休怪梦入巫云 ,凌波罗袜 ,我在迷湘浦。  
缥缈惊鸿飞燕举 ,却怨严城钟鼓。百斛明珠 ,  
千金骏马 ,豪气今犹故。归来清晓 ,幅巾犹带  
香露。

## 黄 廷 琚

### 解连环

乍寒帘幕。愁灯花正结，又还轻落。弄瘦影、瓶里梅梢，为谁缀陇头，向来新萼。万古千今，算惟有、别情难托。把潘郎鬓绿，尽付雁声，几度寥寞。

扁舟暮江旧泊。记携觞就折，烟翠犹弱。漫过却、歌夕吟朝，问天道何时，素纤重握。想得文姬，近更苦、云衣香薄。待更阑、试寻梦境，梦回更恶。

### 忆旧游

乍梅黄雨过，遍倚层楼，时舞垂杨。暗绿知谁换，似烟浓雾薄，望眼偏妨。昔人画鹢无数，相引入横塘。纵细切香蒲，重开绛蕊，懒向清觞。

凄凉。旧游地，谩赋减兰成，才退周郎。总把芳辰误，念纱窗深静，冰簟流光。凤笺试写新句，青羽碧天长。又隐隐城头，随风断角斜照黄。

### 宴清都

坠叶窥檐语。风帘薄，递来幽恨无数。牙签倦展，银缸细剔，悄然归旅。声传漏阁偏长，更奈向、潇潇乱雨。想近日，舞袖翻云，吟笺度雪谁顾。

当时翠缕吹花，东城绣陌，双燕何许。香罗唾碧，晴纱印粉，甚缘重睹。蓝桥镇隔芳梦，念骑省、悲秋漫赋。待倚阑，或遇宾鸿，殷勤寄与。

### 兰陵王

絮花弱。吹满斜阳院落。秋千外，无数小舟，绿水溶溶带城郭。流光漫暗觉。辜却。莺呼燕诺。欢游地，都在梦中，双蝶翩翩度帘幕。

恁谁问康乐。又粉过新梢，红褪残萼。阑干休倚东风恶。怜瑟韵空在，鉴容偷改，青青洲渚遍杜若。故交半寥寞。

漂泊。镇如昨。念玉指频弹，珠泪还阁。孤灯隐隐巫云薄。奈别遽无语，恨深谁托。明朝何处，夜渐短，听画角。

### 琐窗寒

驻马林塘，还寻旧迹，雨收秋晚。残蕉映牖，强把碧心偷展。记相逢、画堂宴开，

乱花影入帘初卷。正小池涨绿，丝纶曾试，事随鸿远。

凄断。情何限。料素扇尘深，怨娥碧浅。清宫丽羽，漫有苔笺题满。问低墙、双柳尚存，几时艳烛亲共剪。但凝眸，数点遥峰，春色青如染。

### 齐天乐

十年汉上东风梦，依然淡烟莺晓。系马桥空，维舟岸易，谁识当时苏小。筹花斗草。任波浴斜阳，絮迷芳岛。笑底歌边，黛娥娇聚怕归早。

京尘衣袂易染，旧游随雾散，新恨难表。燕子朱扉，梨英翠箔，留得春光多少。晴丝漫绕。料带角香销，扇阴诗杳。细倚秋千，片云天共渺。

## 黄庭坚

### 念奴娇

八月十七日，同诸甥步自永安城楼，过张宽夫园待月。偶有名酒，因以金荷酌众客。客有孙彦立，善吹笛。援笔作乐府长短句，文不加点。

断虹霁雨，净秋空，山染修眉新绿。桂影扶疏，谁便道，今夕清辉不足。万里青天，姮娥何处，驾此一轮玉。寒光零乱，为谁偏照醺醺。

年少从我追游，晚凉幽径，绕张园森木。共倒金荷家万里，难得尊前相属。老子平生，江南江北，最爱临风曲。孙郎微笑，坐来声喷霜竹。

### 水调歌头 游览

瑶草一何碧，春入武陵溪。溪上桃花无数，花上有黄鹂。我欲穿花寻路，直入白云深处，浩气展虹霓。祇恐花深里，红露湿人衣。

坐玉石，敲玉枕，拂金徽。谪仙何处，无人伴我白螺杯。我为灵芝仙草，不为朱唇

丹脸。长啸亦何为。醉舞下山去，明月逐人归。

又

落日塞垣路，风劲戛貂裘。翩翩数骑闲猎，深入黑山头。极目平沙千里，惟见雕弓白羽，铁面骏骅骝。隐隐望青冢，特地起闲愁。

汉天子，方鼎盛，四百州。玉颜皓齿，深锁三十六宫秋。堂有经纶贤相，边有纵横谋将，不减翠蛾羞。戎虏和乐也，圣主永无忧。

### 满庭芳 妓女

初绾云鬟，才胜罗绮，便嫌柳陌花街。占春才子，容易托行媒。其奈风情债负，烟花部、不免差排。刘郎恨，桃花片片，随水染尘埃。

风流，贤太守，能笼翠羽，宜醉金钗。且留取垂杨，掩映厅阶。直待朱幡去后，从伊便、窄袜弓鞋。知恩否，朝云暮雨，还向梦中来。

又 茶

北苑春风，方圭圆璧，万里名动京关。碎身粉骨，功合上凌烟。尊俎风流战胜，降春睡、开拓愁边。纤纤捧，研膏溅乳，金缕鹧鸪斑。

相如，虽病渴，一觴一咏，宾有群贤。为扶起灯前，醉玉颓山。搜搅胸中万卷，还

倾动、三峡词源。归来晚，文君未寝，相对小窗前。

鼓笛慢 黔守曹伯达供备生日

早秋明月新圆，汉家戚里生飞将。青骢宝勒，绿沈金锁，曾瞻天仗。种德江南，宣威西夏，合宫陪享。况当年定计，昭陵与子，勋劳在，诸公上。

千骑风流年少，暂淹留、莫辜清赏。平坡驻马，虚弦落雁，思临虏帐。遍舞摩围，递歌彭水，拂云惊浪。看朱颜绿鬓，封侯万里，写凌烟像。

洞仙歌 沪守王补之生日

月中丹桂，自风霜难老。阅尽人间盛衰草。望中秋、才有几日，十分圆，霾风雨，云表常如永昼。

不得文章力，白首防秋，谁念云中上功守。正注意，得人雄，静扫河山，应难纵、五湖归棹。问持节冯唐几时来，看再策勋名，印窠如斗。

雨中花 送彭文思使君

政乐中和，夷夏宴喜，官梅乍传消息。待作新年欢计，断送春色。桃李成阴，甘棠少讼，又移旌戟。念画楼朱阁，风流高会，

顿冷谈席。

西州纵有，舞裙歌板，谁共茗邀棋敌。归来未得，先沾离袖，管弦催滴。乐事赏心易散，良辰美景难得。会须醉倒，玉山扶起，更倾春碧。

忆帝京 黔州张侔生日

鸣鸠乳燕春闲暇。化作绿阴槐夏。寿酒舞红裳，睡鸭飘香麝。醉此洛阳人，佐郡深儒雅。

况坐上、玉麟金马。更莫问、莺老花谢。万里相依，千金为寿，未厌玉烛传清夜。不醉欲言归，笑杀高阳社。

醉蓬莱

对朝云叆叇，暮雨霏微，乱峰相倚。巫峡高唐，锁楚宫朱翠。画戟移春，靓妆迎马，向一川都会。万里投荒，一身吊影，成何欢意。

尽道黔南，去天尺五，望极神州，万里烟水。尊酒公堂，有中朝佳士。荔颊红深，麝脐香满，醉舞裊歌袂。杜宇声声，催人到晓，不如归是。

南歌子

诗有渊明语，歌无子夜声。论文思见老

弥明。坐想罗浮山下、羽衣轻。

何处黔中郡，遥知隔晚晴。雨馀风急断虹横。应梦池塘春草、若为情。

蓦山溪 赠衡阳妓陈湘

鸳鸯翡翠，小小思珍偶。眉黛敛秋波，尽湖南、山明水秀。娉娉袅袅，恰近十三馀，春未透。花枝瘦。正是愁时候。

寻花载酒。肯落谁人后。只恐远归来，绿成阴、青梅如豆。心期得处，每自不由人，长亭柳。君知否。千里犹回首。

转调丑奴儿

得意许多时。长醉赏、月影花枝。暴风狂雨年年有，金笼锁定，莺雏燕友，不被鸡欺。

红旆转逶迤。悔无计、千里追随。再来应缩泸南印，而今目下，恹惶怎向，日永春迟。

品令 送黔守曹伯达供备

败叶霜天晓。渐鼓吹、催行棹。栽成桃李未开，便解银章归报。去取麒麟图画，要及年少。

劝公醉倒，别语怎向醒时道。楚山千里暮云，正锁离人情抱。记取江州司马，坐中

最老。

踏莎行

画鼓催春，蛮歌走饷。雨前一焙谁争长。  
低株摘尽到高株，株株别是闽溪样。

碾破春风，香凝午帐。银瓶雪滚翻成浪。  
今宵无睡酒醒时，摩围影在秋江上。

又

临水夭桃，倚墙繁李。长杨风掉青骢尾。  
尊中有酒且酬春，更寻何处无愁地。

明日重来，落花如绮。芭蕉渐展山公启。  
欲笺心事寄天公，教人长对花前醉。

定风波 次高左藏韵

自断此生休问天。白头波上泛孤船。老  
去文章无气味。憔悴。不堪驱使菊花前。

闻道使君携将吏。高会。参军吹帽晚风  
颠。千骑插花秋色暮。归去。翠娥扶入醉时  
肩。

又 次高左藏使君韵

万里黔中一漏天。屋居终日似乘船。及  
至重阳天也霁。催醉。鬼门关外蜀江前。

莫笑老翁犹气岸。君看。几人黄菊上华  
颠。戏马台南追两谢。驰射。风流犹拍古人  
肩。

又 荔枝

晚岁监州闻荔枝。赤英垂坠压阑枝。万里来逢芳意歇。愁绝。满盘空忆去年时。

涧草山花光照坐。春过。等闲桃李又累累。辜负寒泉浸红皱。消瘦。有人花病损香肌。

又

准拟阶前摘荔枝。今年歇尽去年枝。莫是春光厮料理。无比。譬如痲疔有休时。

碧甃朱阑情不浅。何晚。来年枝上报累累。雨后园林坐清影。苏醒。红裳剥尽看香肌。

又 次东坡七夕韵

八年不见，清都绛阙，望河汉、溶溶漾漾。年年牛女恨风波，拚此事、人间天上。

野麋丰草，江鸥远水，老去惟便疏放。百钱端欲问君平，早晚具、归田小舫。

又 席上赋七夕

朱楼彩舫，浮瓜沈李，报答风光有处。一年尊酒暂时同，别泪作、人间晓雨。

鸳鸯机综，能令侬巧，也待乘槎仙去。若逢海上白头翁，共一访、痴牛骏女。

阮郎归

黔中桃李可寻芳。摘茶人自忙。月团犀胯斗圆方。研膏入焙香。

全宋词 黄庭坚

青箬裹，绛纱囊。品高闻外江。酒阑传碗舞红裳。都濡春味长。

又 效福唐独木桥体作茶词

烹茶留客驻金鞍。月斜窗外山。别郎容易见郎难。有人思远山。

归去后，忆前欢。画屏金博山。一杯春露莫留残。与郎扶玉山。

更漏子 馀甘汤

庵摩勒，西土果。霜后明珠颗颗。凭玉兔，捣香尘。称为席上珍。

号馀甘，争奈苦。临上马时分付。管回味，却思量。忠言君试尝。

绣带子 张宽夫园赏梅

小院一枝梅。冲破晓寒开。晚到芳园游戏，满袖带香回。

玉酒覆银杯。尽醉去、犹待重来。东邻何事，惊吹怨笛，雪片成堆。

撼庭竹 宰太和日吉州城外作

呜咽南楼吹落梅。闻鸦树惊栖。梦中相见不多时。隔城今夜也应知。坐久水空碧，山月影沈西。

买个宅儿住著伊。刚不肯相随。如今果被天瞋作，永落鸡群被鸡欺。空恁可怜伊。

风日损花枝。

减字木兰花 春

馀寒争令。雪共蜡梅相照影。昨夜东风。  
已出耕牛劝岁功。

阴云幂幂。近觉去天无几尺。休恨春迟。  
桃李梢头次第知。

又

距施州二十里，张仲谋遣骑相迎，因送所和乐  
府来，且约近郊相见，复用前韵先往

使君那里。千骑尘中依约是。拂我眉头。  
无处重寻庾信愁。

山云弥漫。夹道旌旗联复断。万事茫茫。  
分付澄波与烂肠。

又 登巫山县楼作

襄王梦里。草绿烟深何处是。宋玉台头。  
暮雨朝云几许愁。

飞花漫漫。不管羁人肠欲断。春水茫茫。  
欲度南陵更断肠。

又

巫山古县。老杜淹留情始见。拨闷题诗。  
千古神交世不知。

云阳台下。更值清明风雨夜。知道愁辛。  
果是当时作赋人。

又 和赵文仪

诗翁才刃。曾陷文场貔虎阵。谁敢当哉。  
况是焚舟决胜来。

三巴春杪。客馆梦回风雨晓。胸次峥嵘。  
欲共涛头赤甲平。

又

苍崖万仞。下有奔雷千百阵。自古危哉。  
谁遣西园沓沓来。

猿啼云杪。破梦一声巫峡晓。苦唤愁生。  
不是西园作麽平。

又 私情

终宵忘寐。好事如何犹尚未。子细沈吟。  
珠泪盈盈湿袖襟。

与君别也。愿在郎心莫暂舍。记取盟言。  
闻早回程却再圆。

又

丙子仲秋，奉陪黔阳曹使君伯达玩月，作减字  
木兰花，兼简施州张使君仲谋

中秋多雨。常是尊罍狼藉去。今夜云开。  
须道姮娥得得来。

不知云外。还有清光同此会。笛在层楼。  
声彻摩围顶上头。

又

中秋无雨。醉送月衔西岭去。笑口须开。  
几度中秋见月来。

前年江外。儿女传杯兄弟会。此夜登楼。  
小谢清吟慰白头。

又

浓云骤雨。巫峡有情来又去。今夜天开。  
不与姮娥作伴来。

清光无外。白发老人心自会。何处歌楼。  
贪看冰轮不转头。

又

丙子仲秋黔守席上，客有举岑嘉州中秋诗曰：  
“今夜鄜州月，闺中只独看。遥怜小儿女，未解忆长安。”因戏作

举头无语。家在月明生处住。拟上摩围。  
最上峰头试望之。

偏怜络秀。苦淡同甘谁更有。想见牵衣。  
月到愁边总不知。

又 戏答

月中笑语。万里同依光景住。天水相围。  
相见无因梦见之。

诸儿娟秀。儒学传家渠自有。自作秋衣。  
渐老生寒人未知。

又 用前韵示知命弟

当年夜雨。头白相依无去住。儿女成围。  
欢笑尊前月照之。

阿连高秀。千万里来忠孝有。岂谓无衣。  
岁晚先寒要弟知。

### 木兰花令

风开水面鱼纹皱。暖入草心犀点透。乍  
看晴日弄柔条，忆得章台人姓柳。

心情老大痴成就。不复淋漓沾翠袖。早  
梅献笑尚窥邻，小蜜窃香如遗寿。

又

东君未试雷霆手。洒雪开春春锁透。帝台应点万年枝，穷巷偏欺三径柳。

峰排群玉森相就。中有摩围为领袖。凝香窗下与谁看，一曲琵琶千万寿。

又

新年何许春光漏。小院闭门风日透。酥花入坐颇欺梅，雪絮因风全是柳。

使君落笔春词就。应唤歌檀催舞袖。得开眉处且开眉。人世可能金石寿。

又

黄金捍拨春风手。帘幕重重音韵透。梅花破萼便回春，似有黄鹂鸣翠柳。

晓妆未惬梅添就。玉笋捧杯离钿袖。会拚千日笑尊前，他日相思空损寿。

又

黔中士女游晴昼。花信轻寒罗袖透。争寻穿石道宜男，更买江鱼双贯柳。

竹枝歌好移船就。依倚风光垂翠袖。满倾芦酒指摩围。相守与郎如许寿。

又

可怜翡翠随鸡走。学绾双鬟年纪小。见来行待恶怜伊。心性娇痴空解笑。

红蕖照映霜林表。杨柳舞风腰袅袅。衾馀枕剩尽相容，只是老人难再少。

清平乐

春归何处。寂寞无行路。若有人知春去处。唤取归来同住。

春无踪迹谁知。除非问取黄鹂。百啭无人能解，因风飞过蔷薇。

又 重九

黄花当户。已觉秋容暮。云梦南州逢笑语。心在歌边舞处。

使君一笑眉开。新晴照酒尊来。且乐尊前见在，休思走马章台。

又

休推小户。看即风光暮。萸粉菊英浮碗醑。报答风光有处。

几回笑口能开。少年不肯重来。借问牛山戏马。今为谁姓池台。

又

舞鬟娟好。白发黄花帽。醉任旁观嘲潦倒。扶老偏宜年少。

舞回脸玉胸酥。缠头一斛明珠。日日梁州薄媚，年年金菊茱萸。

又 示知命

乍清秋好。黄菊敲乌帽。不见清谈人绝倒。更忆添丁小小。

蜀娘漫点花酥。酒槽空滴真珠。兄弟四人别住，他年同插茱萸。

又 饮宴

冰堂酒好。只恨银杯小。新作金荷工献巧。图要连台拗倒。

采莲一曲清歌。急檀催卷金荷。醉里香飘睡鸭，更惊罗袜凌波。

忆帝京 赠弹琵琶妓

薄妆小靥闲情素。抱著琵琶凝伫。慢捻复轻拢，切切如私语。转拨割朱弦，一段惊沙去。

万里嫁、乌孙公主。对易水、明妃不渡。泪粉行行，红颜片片，指下花落狂风雨。借问本师谁，敛拨当心住。

又 私情

银烛生花如红豆。占好事、而今有。人醉曲屏深，借宝瑟、轻招手。一阵白苹风，故灭烛、教相就。

花带雨、冰肌香透。恨啼乌、辘轳声晓。岸柳微凉吹残酒。断肠时、至今依旧。镜中消瘦。那人知后。怕夯你来倬傺。

画堂春

东堂西畔有池塘。使君棐几明窗。日西人吏散东廊。蒲苇送轻凉。

翠管细通岩溜，小峰重叠山光。近池催置琵琶床。衣带水风香。

又

摩围小隐枕蛮江。蛛丝闲锁晴窗。水风山影上修廊。不到晚来凉。

相伴蝶穿花径，独飞鸥舞春光。不因送客下绳床。添火炷炉香。

### 鹧鸪天

明日独酌自嘲呈史应之

万事令人心骨寒。故人坟上土新乾。淫坊酒肆狂居士，李下何妨也整冠。

金作鼎，玉为餐。老来亦失少时欢。茱萸菊蕊年年事，十日还将九日看。

又 坐中有眉山隐客史应之和前韵，即席答之

黄菊枝头生晓寒。人生莫放酒杯乾。风前横笛斜吹雨，醉里簪花倒著冠。

身健在，且加餐。舞裙歌板尽清欢。黄花白发相牵挽，付与时人冷眼看。

又

紫菊黄花风露寒。平沙戏马雨新乾。且看欲尽花经眼，休说弹冠与挂冠。

甘酒病，废朝餐。何人得似醉中欢。十年一觉扬州梦，为报时人洗眼看。

又

表弟李如箴云：“玄真子渔父语，以鹧鸪天歌之，极入律，但少数句耳。”因以玄真子遗事足之。宪宗时，画玄真子像，访之江湖，不可得，因令集其歌诗上之。玄真之兄松龄，惧玄真放浪而不返也，

和答其渔父云：“乐在风波钓是闲。草堂松桂已胜攀。太湖水，洞庭山。狂风浪起且须还。”此余续成之意也

西塞山边白鹭飞。桃花流水鳊鱼肥。朝廷尚觅玄真子，何处如今更有诗。

青箬笠，绿蓑衣。斜风细雨不须归。人间底是无波处，一日风波十二时。

### 醉落魄

旧有醉醒醒醉一曲云：“醉醒醒醉。凭君会取皆滋味。浓斟琥珀浮香蚁。一入愁肠，便有阳春意。须将席幕为天地。歌前起舞花前睡。从他兀兀陶陶里。犹胜醒醒、惹得闲憔悴。”此曲亦有佳句，而多斧凿痕，又语高下不甚入律。或传是东坡语，非也。与“蜗角虚名”、“解下痴缘”之曲相似，疑是王仲父作。因戏作四篇呈吴元祥、黄中行，似能厌道二公意中事。

陶陶兀兀。尊前是我华胥国。争名争利休休莫。雪月风花，不醉怎生得。

邯郸一枕谁忧乐。新诗新事因闲适。东山小妓携丝竹。家里乐天，村里谢安石。

又

陶陶兀兀。人生无累何由得。杯中三万六千日。闷损旁观。自我解落魄。

扶头不起还颓玉。日高春睡平生足。谁门可款新篘熟。安乐春泉，玉醴荔枝绿。

又

老夫止酒十五年矣。到戎州，恐为瘴疠所侵，故晨举一杯。不相察者乃强见酌，遂能作病。因复

止酒，用前韵作二篇，呈吴元祥

陶陶兀兀。人生梦里槐安国。教公休醉  
公但莫。盏倒垂莲，一笑是赢得。

街头酒贱民声乐。寻常行处寻欢适。醉  
看檐雨森银竹。我欲忧民，渠有二千石。

又

陶陶兀兀。醉乡路远归不得。心情那似  
当年日。割爱金荷，一碗淡莫托。

异乡薪桂炊苍玉。摩挲经笥须知足。明  
年细麦能黄熟。不管轻霜，点尽鬓边绿。

### 南乡子

今年重九，知命已向成都，感之，次韵

招唤欲千回。暂得尊前笑口开。万水千  
山还麽去，悠哉。酒面黄花欲醉谁。

顾影又徘徊。立到斜风细雨吹。见我未  
衰容易去，还来。不道年年即渐衰。

又

未报贾船回。三径荒锄菊卧开。想得邻  
船霜笛罢，沾衣。不为涪翁更为谁。

风力裊萸枝。酒面红鳞愜细吹。莫笑插  
花和事老，摧颓。却向人间耐盛衰。

又

黄菊满东篱。与客携壶上翠微。已是有  
花兼有酒，良期。不用登临恨落晖。

满酌不须辞。莫待无花空折枝。寂寞酒  
醒人散后，堪悲。节去蜂愁蝶不知。

又 重阳日寄怀永康彭道微使君，用坡旧韵

卧稻雨馀收。处处游人簇远洲。白发又扶红袖醉，戎州。乱折黄花插满头。

青眼想风流。画出西楼一帧秋。还把去年欢意舞，梁州。塞雁西来特地愁。

### 点绛唇

重九日寄怀嗣直弟，时再（案“再”字疑是“在”字之误）涪陵。用东坡馀杭九日点绛唇旧韵

浊酒黄花，画檐十日无秋燕。梦中相见。起作南柯观。

镜里朱颜，又减年时半。江山远。登高人健。应问西来雁。

### 谒金门 戏赠知命

山又水。行尽吴头楚尾。兄弟灯前家万里。相看如梦寐。

君似成蹊桃李。入我草堂松桂。莫氏岁寒无气味。馀生今已矣。

### 采桑子 赠黄中行

宗盟有技能歌舞，宜醉尊罍。待约新醅。车上危坡尽要推。

西邻三弄争秋月，邀勒春回。个里声催。铁树枝头花也开。

又 送彭道微使君移知永康军

荔枝滩上留千骑，桃李阴繁。燕寝香残。  
画戟森森镇八蛮。

永康又得风流守，管领江山。少讼多闲。  
烟霭楼台舞翠鬟。

又

马湖来舞钗初赐，笳鼓声繁。贤将开关。  
威竦西山八诏蛮。

南溪地逐名贤重，深锁群山。燕喜公闲。  
一斛明珠两小鬟。

### 西江月 茶

龙焙头纲春早，谷帘第一泉香。已醺浮  
蚁嫩鹅黄。想见翻成雪浪。

兔褐金丝宝碗，松风蟹眼新汤。无因更  
发次公狂。甘露来从仙掌。

### 鹧鸪天

吉祥长老设长松汤，为作。有僧病痲癩，尝死  
金刚窟。有人见者，教服长松汤，遂复为完人。

汤泛冰甃一坐春。长松林下得灵根。吉  
祥老子亲拈出，个个教成百岁人。

灯焰焰。酒醺醺。壑源曾未醒醒魂。与  
君更把长生碗，聊为清歌驻白云

### 渔家傲

江宁江口阻风，戏效宝宁勇禅师作古渔家傲。

王环中云：庐山中人颇欲得之。试思索，始记四篇  
万水千山来此土。本提心印传梁武。对  
朕者谁浑不顾。成死语。江头暗折长芦渡。  
面壁九年看二祖。一花五叶亲分付。只  
履提归葱岭去。君知否。分明忘却来时路。

又

三十年来无孔窍。几回得眼还迷照。一  
见桃花参学了。呈法要。无弦琴上单于调。  
摘叶寻枝虚半老。拈花特地重年少。今  
后水云人欲晓。非玄妙。灵云合破桃花笑。

又

忆昔药山生一虎。华亭船上寻人渡。散  
却夹山拈坐具。呈见处。繁驴橛上合头语。  
千户垂丝君看取。离钩三寸无生路。暮  
口一橈亲子父，犹回顾。瞎驴丧我儿孙去。

又

百丈峰头开古镜。马驹踏杀重苏醒。接  
得古灵心眼净。光炯炯。归来藏在袈裟影。  
好个佛堂佛不圣。祖师沈醉犹看镜。却  
与斩新提祖令。方猛省，无声三昧天皇饼。

又

余尝戏作诗云：“大葫芦挈小葫芦。恼乱檀那得  
便沽。每到夜深人静后，小葫芦入大葫芦。”又云：  
“大葫芦乾枯，小葫芦行沽。一住金仙宅，一住黄公  
垆。有此通大道。无此令人老。不问恶与好，两葫  
芦俱倒。”或请以此意倚声律作词，使人歌之，为作  
渔家傲

踏破草鞋参到了。等闲拾得衣中宝。遇

全宋词 黄庭坚

酒逢花须一笑。长年少。俗人不用瞋贫道。  
何处青旗夸酒好。醉乡路上多芳草。提  
著葫芦行未到。风落帽。葫芦却缠葫芦倒。

### 拨棹子 退居

归去来。归去来。携手旧山归去来。有人共、月对尊罍。横一琴，甚处不逍遥自在。  
闲世界。无利害。何必向、世间甘幻爱。与君钓、晚烟寒濑、蒸白鱼稻饭，溪童供笋菜。

### 诉衷情

在戎登临胜景，未尝不歌渔父家风，以谢江山。  
门生请问：先生家风如何？为拟金华道人作此章  
一波才动万波随。蓑笠一钩丝。锦鳞正在深处，千尺也须垂。  
吞又吐，信还疑。上钩迟。水寒江静，满目青山，载月明归。

### 浣溪沙

新妇滩头眉黛愁。女儿浦口眼波秋。惊鱼错认月沈钩。  
青箬笠前无限事，绿蓑衣底一时休。斜风吹雨转船头。

### 菩萨蛮

王荆公新筑草堂于半山，引八功德水作小港，

全宋词 黄庭坚

其上垒石作桥。为集句云：“数间茅屋闲临水。窄衫短帽垂杨里。花是去年红。吹开一夜风。稍稍新月偃。午醉醒来晚。何物最关情。黄鹂三两声。”戏效荆公作

半烟半雨溪桥畔。渔翁醉著无人唤。疏懒意何长。春风花草香。

江山如有待。此意陶潜解。问我去何之。君行到自知。

调笑歌

诗曰：海上神仙字太真、昭阳殿里称心人。犹思一曲霓裳舞，散作中原胡马尘。方士归来说风度。梨花一枝春带雨。分钗半钿愁杀人，上皇倚阑犹无语。

无语。恨如许。方士归时肠断处。梨花一枝春带雨。半钿分钗亲付。天长地久相思苦。渺渺鲸波无路。

步蟾宫 妓女

虫儿真个忒灵利。恼乱得、道人眼起。醉归来、恰似出桃源，但目送、落花流水。

何妨随我归云际。共作个、住山活计。照清溪，匀粉面，插山花，也须胜、风尘气味。

南柯子

东坡过楚州，见净慈法师，作南歌子。用其韵

赠郭诗翁二首

郭泰曾名我，刘翁复见谁。入廛还作和罗槌。特地干戈相待、使人疑。秋浦横波眼，春窗远岫眉。补陀岩畔夕阳迟。何似金沙滩上、放憨时。

又

万里沧江月，波清说向谁。顶门须更下金槌。只恐风惊草动、又生疑。

金雁斜妆颊，青螺浅画眉。庖丁有底下刀迟。直要人牛无际、是休时。

丑奴儿

夜来酒醒清无梦，愁倚阑干。露滴轻寒。雨打芙蓉泪不乾。

佳人别后音尘悄，消瘦难拚。明月无端。已过红楼十二间。

西江月

老夫既戒酒不饮，遇宴集，独醒其旁。坐客欲得小词，援笔为赋。

断送一生惟有，破除万事无过。远山横黛蘸秋波。不饮旁人笑我。

花病等闲瘦弱，春愁没处遮拦。杯行到手莫留残。不道月斜人散。

画堂春 年十六作

东风吹柳日初长。雨馀芳草斜阳。杏花

零乱燕泥香。睡损红妆。

宝篆烟消龙凤，画屏云锁潇湘。夜寒微透薄罗裳。无限思量。

虞美人 至当涂呈郭功甫

平王本爱江湖住。鸥鹭无人处。江南江北水云连。莫笑醯鸡歌舞、瓮中天。当涂舣棹蒹葭外。赖有宾朋在。此身无路入修门。惭愧诗翁清些、与招魂。

又 宜州见梅作

天涯也有江南信。梅破知春近。夜阑风细得香迟。不道晓来开遍、向南枝。玉台弄粉花应妒。飘到眉心住。平生个里愿杯深。去国十年老尽、少年心。

两同心

巧笑眉颦。行步精神。隐隐似、朝云行雨，弓弓样、罗袜生尘。樽前见，玉槛雕笼，堪爱难亲。

自言家住天津。生小从人。恐舞罢、随风飞去，顾阿母、教窄珠裙。从今去，唯愿银缸，莫照离尊。

又

一笑千金。越样情深。曾共结、合欢罗带，终愿效、比翼纹禽。许多时，灵利惺惺，蓦地昏沈。

自从官不容针。直至而今。你共人、女边著子，争知我、门里挑心。记携手，小院回廊，月影花阴。

又

秋水遥岑。妆淡情深。尽道教、心坚穿石，更说甚、官不容针。霎时间，雨散云归，无处追寻。

小楼朱阁沈沈。一笑千金。你共人、女边著子，争知我、门里挑心。最难忘，小院回廊，月影花阴。

### 满庭芳

北苑龙团，江南鹰爪，万里名动京关。碾深罗细，琼蕊暖生烟。一种风流气味，如甘露、不染尘凡。纤纤捧，冰瓷莹玉，金缕鹧鸪斑。

相如，方病酒，银瓶蟹眼，波怒涛翻。为扶起，樽前醉玉颓山。饮罢风生两腋，醒魂到、明月轮边。归来晚，文君未寝，相对小窗前。

又

明眼空青，忘忧萱草，翠玉闲淡梳妆。小来歌舞，长是倚风光。我已逍遥物外，人冤道、别有思量。难忘处，良辰美景，襟袖有馀香。

鸳鸯。头白早，多情易感，红蓼池塘。又须得，樽前席上成双。些子风流罪过，都说与、明月空床。难拘管，朝云暮雨，分付

楚襄王。

又

修水浓青，新条淡绿，翠光交映虚亭。锦鸳霜鹭，荷径拾幽苹。香渡栏干屈曲，红妆映、薄绮疏棂。风清夜，横塘月满，水净见移星。

堪听。微雨过，蹒跚藻荇，琐碎浮萍。便移转，胡床湘簟方屏。练霭鳞云旋满，声不断、檐响风铃。重开宴，瑶池雪沁，山露佛头青。

### 暮山溪

山围江暮。天镜开晴絮。斜影过梨花，照文星、老人星聚。清樽一笑，欢甚却成愁，别时襟，馀点点，疑是高唐雨。

无人知处。梦里云归路。回雁晓风清，雁不来、啼鸦无数。心情老懒，尤物解宜人，春尽也，有南风，好便回帆去。

又 至宜州作，寄赠陈湘

稠花乱叶，到处撩人醉。林下有孤芳，不匆匆、成蹊桃李。今年风雨，莫送断肠红，斜枝倚。风尘里。不带尘风气。

微嗔又喜。约略知春味。江上一帆愁，梦犹寻、歌梁舞地。如今对酒，不似那回时，书谩写，梦来空，只有相思是。

又

山明水秀，尽属诗人道。应是五陵儿，

见衰翁、孤吟绝倒。一觞一咏，潇洒寄高闲，松月下，竹风间，试想为襟抱。

玉关遥指，万里无衢杳。笔阵扫秋风，泻珠玑、琅琅皎皎。卧龙智略，三诏佐升平，烟塞事，玉堂心，频把菱花照。

### 阮郎归

曾敷文既晒陈湘，歌舞便出其类，学书亦进。来求小楷，作阮郎归词付之

盈盈娇女似罗敷。湘江明月珠。起来绾髻又重梳。弄妆仍学书。

歌调态，舞工夫。湖南都不如。它年未厌白髭须。同舟归五湖。

#### 又 茶词

歌停檀板舞停鸾。高阳馀兴阑。兽烟喷尽玉壶乾。香分小凤团。

雪浪浅，露花圆。捧瓯春笋寒。绛纱笼下跃金鞍。归时人倚阑。

#### 又 茶词

摘山初制小龙团。色和香味全。碾声初断夜将阑。烹时鹤避烟。

消滞思，解尘烦。金瓯雪浪翻。只愁啜罢水流天。馀清搅夜眠。

#### 又

退红衫子乱蜂儿。衣宽只为伊。为伊去得忒多时。教人直是疑。

长睡晚，理妆迟。愁多懒画眉。夜来算

得有归期。灯花则甚知。

又

贫家春到也骚骚。琼浆注小槽。老夫不出长蓬蒿。邻墙开碧桃。

木芍药，品题高。一枝烦剪刀。传杯犹似少年豪。醉红浸雪毛。

### 定风波

把酒花前欲问溪。问溪何事晚声悲。名利往来人尽老。谁道。溪声今古有休时。

且共玉人斟玉醕。休诉、笙歌一曲黛眉低。情似长溪长不断。君看。水声东去月轮西。

又

小院难图云雨期。幽欢浑待赏花时。到得春来君却去。相误。不须言语泪双垂。

密约尊前难嘱付。偷顾。手搓金橘敛双眉。庭榭清风明月媚。须记。归时莫待杏花飞。

又

上客休辞酒浅深。素儿歌里细听沈。粉面不须歌扇掩，闲静，一声一字总关心。

花外黄鹂能密语。休诉。有花能得几时斟。画作远山临碧水。明媚。梦为胡蝶去登临。

又

客有两新鬟善歌者，请作送汤曲，因戏前二物。

全宋词 黄庭坚

歌舞阑珊退晚妆。主人情重更留汤。冠帽斜欹辞醉去，邀定，玉人纤手自磨香。

又得尊前聊笑语。如许。短歌宜舞小红裳。宝马促归朱户闭人睡。夜来应恨月侵床。

浪淘沙 荔枝

忆昔谪巴蛮。荔子亲攀。冰肌照映柘枝冠。日擘轻红三百颗，一味甘寒。

重入鬼门关。也似人间。一双和叶插云鬟。赖得清湘燕玉面，同倚阑干。

看花回 茶词

夜永兰堂醺饮，半倚颓玉。烂熳坠钿堕履，是醉时风景，花暗烛残，欢意未阑，舞燕歌珠成断续。催茗饮、旋煮寒泉，露井瓶窦响飞瀑。

纤指缓、连环动触。渐泛起、满瓿银粟。香引春风在手，似粤岭闽溪，初采盈掬。暗想当时，探春连云寻篔竹。怎归得，鬓将老，付与杯中绿。

惜馀欢 茶词

四时美景，正年少赏心，频启东阁。芳酒载盈车，喜朋侣簪合。杯觞交飞劝酬献，正酣饮、醉主公陈榻。坐来争奈，玉山未颓，兴寻巫峡。

歌阑旋烧绛蜡。况漏转铜壶，烟断香鸭。  
犹整醉中花，借纤手重插。相将扶上，金鞍  
骝衰，碾春焙、愿少延欢洽。未须归去，重  
寻艳歌，更留时霎。

### 醉落魄

苍颜华发。故山归计无因得。旧交新贵  
音书绝。惟有家人，犹作殷勤别。

离亭欲去歌声咽。潇潇细雨凉生颊。泪  
珠不用罗巾裛。弹在罗衫，图得见时说。

### 西江月

崇宁甲申，遇惠洪上人于湘中。洪作长短句见  
赠云：“大厦吞风吐月，小舟坐水眠空。雾窗春色翠  
如葱。睡起云涛正拥。往事回头笑处，此生弹指声  
中。玉笺佳句敏惊鸿。闻道衡阳价重。”次韵酬之。  
时余万谪宜阳，而洪归分宁龙安。

月侧金盆堕水，雁回醉墨书空。君诗秀  
色雨园葱。想见衲衣寒拥。

蚁穴梦魂人世，杨花踪迹风中。莫将社  
燕等秋鸿。处处春山翠重。

又

宋玉短墙东畔，桃源落日西斜。浓妆下  
著绣帘遮。鼓笛相催清夜。

转眄惊翻长袖，低徊细踏红靴。舞馀犹  
颤满头花。娇学男儿拜谢。

木兰花令

当涂解印后一日，郡中置酒，呈郭功甫  
凌歊台上青青麦。姑熟堂前馀翰墨。暂  
分一印管江山，稍为诸公分皂白。

江山依旧云空碧。昨日主人今日客。谁  
分宾主强惺惺，问取矶头新妇石。

又 窜易前词

翰林本是神仙谪。落帽风流倾座席。坐  
中还有赏音人，能岸乌纱倾大白。

江山依旧云横碧。昨日主人今日客。谁  
分宾主强惺惺，问取矶头新妇石。

又 次前韵再呈功甫

青壶乃似壶中谪。万象光辉森宴席。红  
尘闹处便休休，不是个中无皂白。

歌烦舞倦朱成碧。春草池塘凌谢客。共  
君商略老生涯，归种玉田秧白石。

又

庾元镇四十兄，庭坚四十年翰墨故人。庭坚假  
守当涂，元镇穷，不出入州县。席上作乐府长句劝  
酒。

庾郎三九常安乐。使有万钱无处著。徐  
熙小鸭水边花，明月清风都占却。

朱颜老尽心如昨。万事休休休莫莫。樽  
前见在不饶人，欧舞梅歌君更酌

又 用前韵赠郭功甫

少年得意从军乐。晚岁天教闲处著。功

全宋词 黄庭坚

名富贵久寒灰，翰墨文章新讳却。

是非不用分今昨。云月孤高公也莫。喜欢为地醉为乡，饮客不来但自酌。

品令 茶词

凤舞团团饼。恨分破、教孤令。金渠体净，只轮慢碾，玉尘光莹。汤响松风，早减了、二分酒病。

味浓香永。醉乡路、成佳境。恰如灯下，故人万里，归来对影。口不能言，心下快活自省。

醉蓬莱 甯易前词

对朝云叆叇，暮雨霏微，翠峰相倚。巫峡高唐，锁楚宫佳丽。蘸水朱门，半空霜戟，自一川都会。虏酒千杯，夷歌百转，迫人垂泪。

人道黔南，去天尺五，望极神京，万重烟水。悬榻相迎，有风流千骑。荔脸红深，麝脐香满，醉舞裊歌袂。杜宇催人，声声到晓，不如归是。

江城子 忆别

画堂高会酒阑珊。倚栏干。霎时间。千里关山，常恨见伊难。及至而今相见了，依旧似、隔关山。

情人传语问平安。省愁烦。泪休弹。哭损眼儿，不似旧时单。寻得石榴双叶子，凭寄与、插云鬢。

又

新来曾被眼奚搐。不甘伏。怎拘束。似梦还真，烦乱损心曲。见面暂时还不见，看不足，惜不足。

不成欢笑不成哭。戏人目。远山蹙。有分看伊，无分共伊宿。一贯一文跷十贯，千不足、万不足。

### 逍遥乐

春意渐归芳草。故国佳人，千里信沈音杳。雨润烟光，晚景澄明，极目危栏斜照。梦当年少。对樽前、上客邹枚，小鬟燕共舞雪歌尘，醉里谈笑。

花色枝枝争好。鬢丝年年渐老。如今遇风景，空瘦损、向谁道。东君幸赐与，天幕翠遮红绕。休休，醉乡岐路，华胥蓬岛。

### 离亭燕 次韵答廖明略见寄

十载樽前谈笑。天禄故人年少。可是陆沈英俊地，看即锁窗批诏。此处忽相逢，潦倒秃翁同调。

西顾郎官湖渺。事看庾楼人小。短艇绝江空怅望，寄得诗来高妙。梦去倚君傍，胡蝶归来清晓。

### 归田乐引

暮雨蒙阶砌。漏渐移、转添寂寞，点点心如碎。怨你又恋你。恨你惜你。毕竟教人怎生是。

前欢算未已。奈向如今愁无计。为伊聪俊，销得人憔悴。这里谩睡里梦里心里。一向无言但垂泪。

又

对景还销瘦。被个人、把人调戏，我也心儿有。忆我又唤我，见我嗔我，天甚教人怎生受。

看承幸厮勾。又是樽前眉峰皱。是人惊怪，冤我忒搠就。拚了又舍了，定是这回休了，及至相逢又依旧。

### 归田乐令

引调得、甚近日心肠不恋家。宁宁地、思量他，思量他。两情各自肯，甚忙咱。意思里、莫是赚人吵。嗽奴真个得、共人得。

### 望远行

勾尉有所眊，为太守所猜。兼此生有所爱，住马湖。马湖出丁香核荔枝，常以遗生。故戏及之

自见来，虚过却、好时好日。这池尿粘腻得处煞是律。据眼前言定，也有十分七八。

冤我无心除告佛。

管人闲底，且放我快活得。便索些别茶  
只待，又怎不遇偎花映月。且与一班半点，  
只怕你没丁香核。

鼓笛令 戏咏打揭

酒阑命友闲为戏。打揭儿、非常惬意。  
各自输赢只赌是。赏罚采、分明须记。

小五出来无事。却跋翻和九底。若要十  
一花下死。管十三、不如十二。

又

宝犀未解心先透。恼杀人、远山微皱。  
意淡言疏情最厚。枉教作、著行宫柳。

小雨勒花时候。抱琵琶、为谁清瘦。翡  
翠金笼思珍偶。忽拚与、山鸡儻侻。

又

见来两个宁宁地。眼厮打、过如拳踢。  
恰得尝些香甜底。苦杀人、遭谁调戏。

腊月望州坡上地。冻著你、影躄村鬼。  
你但那些一处睡。烧沙糖、管好滋味。

又

见来便觉情于我。厮守著、新来好过。  
人道他家有婆婆。与一口、管教屎磨。

副靖传语木大。鼓儿里、且打一和。更  
有些儿得处罗。烧沙糖、香药添和。

### 好女儿

春去几时还。问桃李无言。燕子归栖风劲，梨雪乱西园。

唯有月婵娟。似人人、难近如天。愿教清影常相见，更乞取团圆。

又

粉泪一行行。啼破晓来妆。懒击酥胸罗带，羞见绣鸳鸯。

拟待不思量。怎奈向、目下恹惶。假饶来后，教人见了，却去何妨。

### 采桑子

虚堂密候参同火，梨枣枝繁。深锁三关。不要樊姬与小蛮。

遥知风雨更阑夜，犹梦巫山。浓丽清闲。晓镜新梳十二鬟。

又

投荒万里无归路，雪点鬓繁。度鬼门关。已拚儿童作楚蛮。

黄云苦竹啼归去，绕荔枝山。蓬户身闲。歌板谁家教小鬟。

又

樱桃著子如红豆，不管春归。闻道开时。蜂惹香须蝶惹衣。

楼台灯火明珠翠，酒恋歌迷。醉玉东西。

少个人人暖被携。

又

城南城北看桃李，依倚年华。杨柳藏鸦。  
又是无言颭落花。

春风一面长含笑，偷顾羞遮。分付谁家。  
把酒花前试问他。

### 丑奴儿

济楚好得些。憔悴损、都是因它。那回  
得句闲言语，傍人尽道。你管又还鬼那人吵。

得过口儿嘛。直勾得、风了自家。是即  
好意也毒害，你还甜杀人了，怎生申报孩儿。

### 菩萨蛮

淹泊平山堂。寒食节，固陵录事参军表弟周元  
固惠酒，为作此词

细腰宫外清明雨。云阳台上烟如缕。云  
雨暗巫山。流人殊未还。

阿谁知此意。解遣双壶至。不是白头新。  
周郎旧可人。

### 鹧鸪天 重九日集句

塞雁初来秋影寒。霜林风过叶声乾。龙  
山落帽千年事，我对西风犹整冠。

兰委佩，菊堪餐。人情时事半悲欢。但  
将酩酊酬佳节，更把茱萸仔细看。

又

节去蜂愁蝶不知。晓庭环绕折残枝。自然今日人心别，未必秋香一夜衰。

无闲事，即芳期。菊花须插满头归。宜将酩酊酬佳节，不用登临送落晖。

又

闻说君家有翠娥。施朱施粉总嫌多。背人语处藏珠履，觑得羞时整玉梭。

拖远岫，压横波。何时传酒更传歌。为君写就黄庭了，不要山阴道士鹅。

### 少年心

对景惹起愁闷。染相思、病成方寸。是阿谁先有意，阿谁薄幸。斗顿恁、少喜多嗔。

合下休传音问。你有我、我无你分。似合欢桃核，真堪人恨。心儿里、有两个人人。

又 添字

心里人人，暂不见、霎时难过。天生你要憔悴我。把心头从前鬼，著手摩挲。抖擞了、百病销磨。

见说那厮脾鳖热。大不成我便与拆破。待来时、高上与厮嗽则个。温存著、且教推磨。

### 点绛唇

几日无书，举头欲问西来燕。世情梦幻。

复作如斯观。

自叹人生，分合常相半。戎虽远。念中相见。不托鱼和雁。

又

罗带双垂，妙香长恁携纤手。半妆红豆。各自相思瘦。

闻道伊家，终日眉儿皱。不能勾。泪珠轻溜。衰损揉蓝袖

### 南乡子

重阳日宜（案“宜”原作“宣”，据道山清话所载本事改）州城楼宴集即席作

诸将说封侯。短笛长歌独倚楼。万事尽随风雨去，休休。戏马台南金络头。

催酒莫迟留。酒味今秋似去秋。花向老人头上笑，羞羞。白发簪花不解愁。

### 南歌子

槐绿低窗暗，榴红照眼明。玉人邀我少留行。无奈一帆烟雨、画船轻。

柳叶随歌皱，梨花与泪倾。别时不似见时情。今夜月明江上、酒初醒。

### 更漏子

体妖娆，鬢婀娜。玉甲银筝照座。危柱促，曲声残。王孙带笑看。

全宋词 黄庭坚

休休休，莫莫莫。愁拨个丝中索。了了了，玄玄玄。山僧无碗禅。

好事近 汤词

歌罢酒阑时，潇洒座中风色。主礼到君须尽，奈宾朋南北。

暂时分散总寻常，难堪久离拆。不似建溪春草，解留连佳客。

又 太平州小妓杨姝弹琴送酒

一弄醒心弦，情在两山斜叠。弹到古人愁处，有真珠承睫。

使君来去本无心，休泪界红颊。自恨老来憎酒，负十分金叶。

又

不见片时霎，魂梦镇相随著。因甚近新无据，误窃香深约。

思量模样忔憎儿，恶又怎生恶。终待共伊相见，与佯佯奚落。

喝火令

见晚情如旧，交疏分已深。舞时歌处动人心。烟水数年魂梦，无处可追寻。

昨夜灯前见，重题汉上襟。便愁云雨又难寻。晓也星稀，晓也月西沈。晓也雁行低度，不会寄芳音。

### 留春令

江南一雁横秋水。叹咫尺、断行千里。  
回纹机上字纵横，欲寄远、凭谁是。

谢客池塘春都未。微微动、短墙桃李。  
半阴才暖却清寒，是瘦损、人天气。

### 宴桃源 书赵伯充家小姬领巾

天气把人僝僽。落絮游丝时候。茶饭可  
曾忤，镜中赢得销瘦。生受。生受。更被养  
娘催绣。

### 雪花飞

携手青云路稳，天声迤迤传呼。袍笏恩  
章乍赐，春满皇都。

何处难忘酒，琼花照玉壶。归裊丝梢竞  
醉，雪舞郊衢。

### 下水船

总领神仙侣。齐到青云岐路。丹禁风微，  
咫尺谛闻天语。尽荣遇。看即如龙变化，一  
掷灵梭风雨。

真游处。上苑寻春去。芳草芊芊迎步。  
几曲笙歌，樱桃艳里欢聚。瑶觞举。回祝尧  
龄万万，端的君恩难负。

### 贺圣朝

脱霜披茜初登第。名高得意。樱桃荣宴  
玉墀游，领群仙行缀。

佳人何事轻相戏。道得之何济。君家声  
誉古无双，且均平居二。

### 青玉案 至宜州次韵上酬七兄

烟中一线来时路。极目送、归鸿去。第  
四阳关云不度。山胡新啜，子规言语。正在  
入愁处。

忧能损性休朝暮。忆我当年醉时句。

渡水穿云心已许。暮年光景，小轩南浦。  
同卷西山雨。

### 沁园春

把我身心，为伊烦恼，算天便知。恨一  
回相见，百方做计，未能偎倚，早觅东西。  
镜里拈花，水中捉月，觑著无由得近伊。添  
憔悴，镇花销翠减，玉瘦香肌。

奴儿。又有行期。你去即无妨我共谁。  
向眼前常见，心犹未足，怎生禁得，真个分  
离。地角天涯，我随君去。掘井为盟无改移。  
君须是，做些儿相度，莫待临时。

## 千秋岁

少游得谪，尝梦中作词云：“醉卧古藤阴下，了不知南北。”竟以元符庚辰，死于藤州光华亭上。崇宁甲申，庭坚窜宜州，道过衡阳。览其遗墨，始追和其千秋岁词

苑边花外。记得同朝退。飞骑轧，鸣珂碎。齐歌云绕扇，赵舞风回带。严鼓断，杯盘狼藉犹相对。

洒泪谁能会。醉卧藤阴盖。人已去，词空在。兔园高宴悄，虎观英游改。重感慨，波涛万顷珠沈海。

又

世间好事。恰恁厮当对。乍夜永，凉天气。雨稀帘外滴，香篆盘中字。长入梦，如今见也分明是。

欢极娇无力，玉软花敲坠。钗冑袖，云堆臂。灯斜明媚眼，汗浹薜萝醉。

奴奴睡，奴奴睡也奴奴睡。

## 河 传

有士大夫家歌秦少游“瘦杀人、天不管”之曲。以好字易瘦字，戏为之作

心情老懒。对歌对舞，犹是当时眼。巧笑靓妆，近我衰容华鬢。似扶著、卖卜算。

思量好个当年见。催酒催更，只怕归期短。饮散灯稀，背锁落花深院。好杀人、天不管。

### 望江东

江水西头隔烟树。望不见、江东路。思量只有梦来去。更不怕、江阑住。

灯前写了书无数。算没个、人传与。直饶寻得雁分付。又还是、秋将暮。

### 桃源忆故人

碧天露洗春容净。淡月晓收残晕。花上密烟飘尽。花底莺声嫩。

云归楚峡厌厌困。两点遥山新恨。和泪暗弹红粉。生怕人来问。

### 卜算子

要见不得见，要近不得近。试问得君多少怜，管不解、多于恨。

禁止不得泪，忍管不得闷。天上人间有底愁，向个里、都谙尽。

### 蝶恋花

海角芳菲留不住。笔下风生，吹入青云南去。仙籍有名天赐与。致君事业安排取。

要识世间平坦路。当使人人，各有安身处。黑发便逢尧舜主。笑人白首耕南亩。

### 浣溪沙

飞鹊台前晕翠蛾。千金新买帝青螺。最难如意为情多。

几处泪痕留醉袖，一春愁思近横波。远山低尽不成歌。

又

一叶扁舟卷画帘。老妻学饮伴清谈。人传诗句满江南。

林下猿垂窥涤砚，岩前鹿卧看收帆。杜鹃声乱水如环。

### 诉衷情

小桃灼灼柳鬖鬖。春色满江南。雨晴风暖烟淡，天气正醺酣。

山泼黛，水挼蓝。翠相搀。歌楼酒旆，故故招人，权典青衫。

又

旋揜玉指著红靴。宛宛斗弯讹。天然自有殊态，供愁黛、不须多。

分远岫，压横波。妙难过。自敲枕处，独倚阑时，不奈颦何。

又

珠帘绣幕卷轻霜。呵手试梅妆。都缘自有离恨，故画作、远山长。

思往事，惜流光恨难忘。未歌先敛，欲

笑还颦，最断人肠。

### 昼夜乐

夜深记得临岐语。说花时、归来去。教人每日思量，到处与谁分付。其奈冤家无定据。约云朝、又还雨暮。将泪入鸳衾，总不成行步。

元来也解知思虑，一封书、深相许。情知玉帐堪欢，为向金门进取。直待腰金拖紫后，有夫人、县君相与。争奈会分疏，没嫌伊门路。

### 一落索

谁道秋来烟景素。任游人不顾。一番时态一番新，到得意、皆欢慕。

紫萸黄菊繁华处。对风庭月露。愁来即便去寻芳，更作甚、悲秋赋。

### 满庭芳 雪中戏呈友人

风力驱寒，云容呈瑞，晓来到处花飞。遍装琼树，春意到南枝。便是渔蓑旧画，纶竿重、横玉低垂。今宵里，香闺邃馆，幽赏事偏宜。

风流，金马客，歌鬟醉拥，乌帽斜敲。问人间何处，鹏运天池。且共周郎按曲，音微误、首已先回。同心事，丹山路稳，长伴

彩鸾归。

西江月 用惠洪韵

细细风清撼竹，迟迟日暖开花。香帏深卧醉人家。媚语娇声娅姹。

姹娅声娇语媚，家人醉卧深帏。香花开暖日迟迟。竹撼清风细细。

失调名

直须把、茱萸遍插，看满座、细嗅清香。

好事近 橄榄

潇洒荐冰盘，满坐暗惊香集。久后一般风味，问几人知得。

画堂饮散已归来，清润转更惜。留取酒醒时候，助茗瓯春色。

瑞鹤仙

环滁皆山也。望蔚然深秀，琅琊山也。山行六七里，有翼然泉上，醉翁亭也。翁之乐也，得之心、寓之酒也。更野芳佳木，风高日出，景无穷也。

游也。山肴野蔌，酒冽泉香，沸筹觥也。太守醉也。喧哗众宾欢也。况宴酣之乐、非丝非竹，太守乐其乐也。问当时、太守为谁，

醉翁是也。

蓦山溪 春晴

朝来风日，陡觉春衫便。翠柳艳明眉，  
戏秋千、谁家倩盼。烟匀露洗，草色媚横塘，  
平沙软。雕轮转。行乐闻弦管。

追思年少，走马寻芳伴。一醉几缠头，  
过扬州、珠帘尽卷。而今老矣，花似雾中看，  
欢喜浅。天涯远。信马归来晚。

捣练子

梅凋粉，柳摇金。微雨轻风敛陌尘。厚  
约深盟何处诉，除非重见那人人。

失调名

屋角数声鸦噪柳。

又

旧家杨柳依依绿，长锁春来庭院。

菩萨蛮

轻风袅断沈烟注。霏微尽日寒塘雨。残  
绣没心情。鸟啼花外声。

离愁难自制。年少乘盟誓。寂寞掩朱门。  
罗衣空泪痕。

渔家傲 题船子钓滩

荡漾生涯身已老。短蓑箬笠扁舟小。深入水云人不到。吟复笑。一轮明月长相照。

谁谓阿师来问道。一桡直与传心要。船子踏翻才是了。波渺渺。长鲸万古无人钓。

踏莎行

堆积琼花，铺陈柳絮。晓来已没行人路。长空犹未绽彤云，飘飘尚逐回风舞。

对景衔杯，迎风索句。回头却笑无言语。为何终日未成吟，前山尚有青青处。

## 黄通判

### 满江红 寿太守赵司直

太守风流 ,管领尽、十分春色。开藩了、万  
花妆就 ,舒长化国。太白方观宫锦样 ,老人又  
现端门侧。听螺州、千里沸观声 ,春无极。

龙种贵 ,蟾宫客。熊轼彦 ,鱼书直。更精  
神天赋 ,寒光停碧。宝篆定膺铜狄数 ,金樽好  
按梁州拍。待予环、赤舄映貂蝉 ,头方黑。

## 黄童

### 卜算子 和思宪兄韵

不忍更回头 ,别泪多于雨。肺腑相看四十  
秋 ,奚止朝朝暮暮。

何事值花时 ,又是匆匆去。过了阳关更向  
西 ,总是思兄处。

## 黄 孝 迈

### 行香子

一春花下，幽恨重重。又愁晴，又愁雨，  
又愁风。

### 水龙吟

自侧金卮，临风一笑，酒容吹尽，恨东  
风、忙去熏桃染柳，不念淡妆人冷。

……惊鸿去后，轻抛素袜，杳无音信。  
细看来，只怕蕊仙不肯，让梅花俊。

### 湘春夜月

近清明。翠禽枝上消魂。可惜一片清歌，  
都付与黄昏。欲共柳花低诉，怕柳花轻薄，  
不解伤春。念楚乡旅宿，柔情别绪，谁与温  
存。

空樽夜泣，青山不语，残月当门，翠玉  
楼前，惟是有、一波湘水，摇荡湘云。天长  
梦短，问甚时、重见桃根。这次第，算人间  
没个并刀，翦断心上愁痕。

### 水龙吟

闲情小院沈吟，草深柳密帘空翠。风檐夜响，残灯慵剔，寒轻怯睡。店舍无烟。关山有月，梨花满地。二十年好梦，不曾圆合，而今老、都休矣。

谁共题诗秉烛，两厌厌、天涯别袂。柔肠一寸，七分是恨，三分是泪。芳信不来，玉箫尘染，粉衣香退。待问春，怎把千红换得，一池绿水。

## 黄岩叟

### 望海潮

梅天雨歇，柳堤风定，江浮画鹢纵横。  
瀛女弄箫，冯夷伐鼓，云间凤咽鼉鸣。波面走长鲸。卷怒涛来往，搅碎沧溟。两岸游人笑语，罗绮间簪纓。

灵均逝魄无凭。但湘沅一水，到底澄清。  
菰黍万家，丝桐五彩，年年吊古深情。锦帜片霞明。使操舟妙手，翻动心旌。向晚鱼龙戏罢，千里浪花平。

## 黄 应 武

### 念奴娇

乾坤开辟，桂林有、元气自来融结。石磴盘空行木杪，天柱屹然中立。窟宅幽深，泉源清远，不是灵神擘。潜通后洞，张刘万古遗迹。

输我长剑凌虚，六尘尽扫，银海秋波碧。志气飘飘游物外，惟有清风知得。唤起白龙，护持飙驭，稽首朝金阙。山灵欣喜，紫云已在诗壁。

黄 右 曹

卜算子 寿两国夫人胡氏

清晓听麻姑，来约西王母。共取蟠桃簇  
玉盘，来劝摩耶酒。

王母问摩耶，此意还知否。只为曾生我  
佛来，更与千千寿。

## 黄宰

### 酹江月 寿韩元吉

三光五岳 ,孕乾坤英彩 ,非金非玉。赫赫  
岩岩真相种 ,来驾横空仙鹄。十万儿童。和丰  
堂下 ,齐指梅山祝。黑头难老 ,岁寒苍桧修竹。

须信自有家传 ,中庸一卷 ,是长生真篆。  
借问洛阳归去后 ,几度桃开桃熟。十九年间 ,  
梦回天上 ,再见棠阴绿。相将促觐 ,已闻沙路  
新筑。

## 黄 载

### 昼锦堂 牡丹

丽景融晴，浮光起昼，玉妃信意寻春。  
一笑酒杯翻手，满地祥云。宝台艳蹙文绡帕，  
郎官娇舞郁金香。嫣然处，况是生香微湿，  
腻脸余醺。

暖烘肌欲透，愁日炙还销，风动成尘。  
细为品归雪调，度与朱唇。翠帟晚映真图画，  
金莲夜照越精神。须拚醉，回首夕阳流水，  
碧草如茵。

### 隔浦莲 荷花

瑶妃香透袜冷。伫立青铜镜。玉骨清无汗，  
亭亭碧波千顷。云水摇扇影。炎天永。一国清凉境。

晚妆靓。微酣不语，风流幽恨谁省。沙鸥少事，  
看到睡鸳双醒。兰棹歌遥隔浦应。催暝。藕丝萦断归艇。

## 洞仙歌

姑苏旧台在三十里外，今台在胥门上，次潘紫岩韵

吴宫故壑，是天开图画。缥缈层云出飞榭。隐隐栖空翠巘，水绕芜城，平畴迥，点染霜林雕谢。

越来溪上雁，声切阑干，似觅胥门怨吴霸。屡镂沈，香溪断，梦散云空，千年外、等是渔樵闲话。但极目荒台郁苍烟，衰草里、又还夕阳西下。

## 孤 鸾

四明后圃石峰之下，小池之上，有梅花

冰心孤寂。恋几插灵峰，半泓寒碧。骨瘦和衣薄，清绝成愁极。萧然满身是雪，怕人知、镜中消息。独向百花梦外，自一家春色。

记罗浮幽梦浑如昔。有浸眼鲸波，倚云丹壁。夜醉空山酒，叫裂横霜笛。回头洞天未晓，但迢迢、江南千驿。饮散东风落月，正海山浮碧。

## 东风第一枝 探梅

迅影雕年，嫩晴赏暖，意行问讯春色。

不知春在谁家，闯香幔拢玉勒。一枝竹外，  
似欲诉、经年相忆。奈情多、难剪愁来，寂  
寞水寒烟碧。

吟正好、悲笳唤恨，酒正殢、夕阳催客。  
殷勤片月飞来，更随暗香细索。横斜瘦影，  
看尽未开时消息。为春来，还怕春多，肠断  
夜阑霜笛。

## 黄 中

### 瑞鹤仙 用陆淞韵

睡余抛倦枕。忆篆鼎香销，起来慵整。晴光破清冷。正柳黄梅淡，染金匀粉。茶瓯隳永。试经行、桐花旧井。记前回、未绿鸥波，近日燕芹青尽。

因省。春风如旧。人面何归，对时伤景，楼高望迥。潮有信、雁无准。任相如多病，沈郎全瘦，都没音尘寄问。便做无、阿鹊频频，可能睡稳。

## 黄中辅

### 念奴娇

炎精中否 ,叹人材委靡 ,都无英物。胡马  
长驱三犯阙 ,谁作长城坚壁。万国奔腾 ,两宫  
幽陷 ,此恨何时雪。草庐三顾 ,岂无高卧贤杰。

天意眷我中兴 ,吾皇神武 ,踵曾孙周发。  
河海封疆俱效顺 ,狂虏何劳灰灭。翠羽南巡 ,  
叩阍无路 ,徒有冲冠发。孤忠耿耿 ,剑铓冷浸  
秋月。

### 满庭芳 题太平楼

快磨三尺剑 ,欲斩佞臣头。

## 黄 铸

### 小重山

凉入秋檐雨意长。竹深啼络纬，响虚堂。  
一枝灯影耿昏黄。疏帘外，风度木樨香。  
心事易成伤。燕支坡下路，语如簧。定  
仙螺子玉钗梁。鸳屏梦，应到旧韦郎。

### 秋蕊香令

花外数声风定。烟际一痕月净。水晶屏  
小敲醉枕。院静鸣蛩相应。  
香销斜掩青铜镜。背灯影。寒砧夜半和  
雁阵。秋在刘郎绿鬓。

## 黄子功

### 水调歌头

绾纤钓台下 ,敛衽谒严陵 ,石矶封藓 ,一笑  
挟策独先登。山献修蛾几抹 ,江绕青罗千顷 ,  
今古富春声。行有二三子 ,心迹喜双清。

吊羊裘 ,追往躅 ,尚仪型。丹青洒落三反 ,  
谁动紫垣星。重袖调元大手 ,归傲纶巾一线 ,  
志不在寒鲸。千载仰风节 ,鸿鹄自冥冥。

## 黄子行

### 西湖月 自度商调

湖光冷浸玻璃，荡一饷薰风，小舟如叶。  
藕花十丈，云梳雾洗，翠娇红怯。壶觞围坐处，  
正酒醪吹波红映颊。尚记得、玉臂生凉，不放  
汗香轻浹。

殢人小摘墙榴，为碎掐猩红，细认裙褶。  
旧游如梦，新愁似织，泪珠盈睫。秋娘风味在，  
怎得对银缸生笑靥。消瘦沈约诗腰，仿佛堪  
捻。

### 又 探梅

初弦月挂林梢，又一番西园，探梅消息。  
粉墙朱户，苍枝露蕊，淡匀轻饰。玉儿应有恨，  
为怅望东昏相记忆。便解佩、飞入云阶，长伴  
此花倾国。

诗腰瘦损刘郎，记立马攀条，倚阑横笛。  
少年风味，拈花弄蕊，爱香怜色。扬州何逊在，  
试点染吟笺留醉墨。谩赢得、疏影寒窗，夜深  
孤寂。

### 贺新郎 冰箸

开遍寒梅萼。正东皇、排酥砌玉，幻成楼

全宋词 黄子行

阁。十万琼琚仙女队 ,来趁春光游乐。向醉里、玉簪轻落。零乱不知何处去 ,甚人间、一夜东风恶。吹起在 ,画檐角。

参差向晓森如削。似吴姬、妆残粉指 ,向人垂著。好似西园春笋瘦 ,红锦裯鞞儿乍剥。且莫遣、儿童敲却。拟办羔儿香瓮酒 ,唤刘叉、来醉尊前约。吟好句 ,再描摸。

满江红 归自湖南题富春馆

津鼓匆匆 犹记得、故人相送。春江上、鸟啼花影 ,马嘶香鬣。情逐阳关金缕断 ,泪和杨柳春丝重。算别来、几度月明时 ,相思梦。

山万叠 ,愁眉耸。春一点 ,归心动。问风俦月侣 ,有谁游从。百里家山明日到 ,一尊芳酒今宵共。任楼头、吹尽五更风 ,梅花弄。

花心动 落梅

谁倚青楼 ,把谪仙长笛 ,数声吹裂。一片乍零 ,千点还飞 ,正是雨晴时节。水晶帘外东风起 ,卷不尽、满庭香雪 ,画阑小 ,斜铺乱飏 ,翠苔成缬。

袅袅余香未歇。空怅望音尘 ,两眉愁切。翠袖泪干 ,粉额妆寒 ,此恨有谁同说。江南春信无痕迹 ,余情在、冷烟残月。梦魂远 ,兰灯伴人易灭。

小重山

一点斜阳红欲滴。白鸥飞不尽 ,楚天碧。

全宋词 黄子行

渔歌声断晚风急。搅芦花，飞雪满林湿。

孤馆百忧集。家山千里远，梦难觅。江湖  
风月好休拾。故溪云，深处著蓑笠。

## 黄铢

### 江神子 晚泊分水

秋风袅袅夕阳红。晚烟浓。暮云重。万叠青山，山外叫孤鸿。独上高楼三百尺，凭玉楯，睇层空。

人间日月去匆匆。碧梧桐。又西风。北去南来，销尽几英雄。掷下玉尊天外去，多少事，不言中。

### 菩萨蛮 夜宿崇安县第三铺闻吹箫

海山翠叠青螺浅。暮云散尽天容远。匹马度江皋。北风生怒号。

解鞍栖倦翮。皓月空庭白。何处小阑干。玉箫吹夜寒。

### 渔家傲 朱晦翁示欧公鼓子词戏作一首

永日离忧千万绪。雪舟远泛清漳浦。珍重故人寒夜语。挥玉麈。沈沈画阁凝香雾。

风砌落花留不住。红蜂翠蝶闲飞舞。明日柳营江上路。云起处。苍山万叠人归去。

## 惠 洪

### 浣溪沙 送因觉先

南涧茶香笑语新。西州春涨小舟横。困  
顿人归烂熯晴。

天迥游丝长百尺，日高飞絮满重城。一  
番花信近清明。

### 又 妙高墨梅

日暮江空船自流。谁家院落近沧洲。一  
枝闲暇出墙头。

数朵幽香和月暗，十分归意为春留。风  
撩片片是闲愁。

### 述古德遗事作渔父词八首

#### 万回

玉带云袍童顶露。一生笑傲知何故。万  
里归来方旦暮。休疑虑。大千捏在豪端聚。

不解犁田分亩步。却能对客鸣花鼓。忽  
共老安相耳语。还推去。莫来拦我球门路。

#### 丹霞

不怕石头行路滑。归来那爱驹儿踏。言

下百骸俱拨撒。无剩法。灵然昼夜光通达。

古寺天寒还恶发。夜将木佛齐烧杀。炙背横眠真快活。憨抹拈。从教院主无须发。

宝 公

来往独龙冈畔路。杖头落索闲家具。后事前观如目睹。非讪语。须知一念无今古。

长笑老萧多病苦。笑中与药皆狼虎。蜡炬一枝非嘱付。聊戏汝。热来脱却娘生裤。

香 严

画饼充饥人笑汝。一庵归扫南阳坞。击竹作声方省悟。徐回顾。本来面目无藏处。

却望沔山敷坐具。老师头角浑呈露。珍重此恩逾父母。须荐取。堂堂密密声前句。

药 山

野鹤精神云格调。逼人气韵霜天晓。松下残经看未了。当斜照。苍烟风撼流泉绕。

闺阁珍奇徒照耀。光无渗漏方灵妙。活计现成谁管绍。孤峰表。一声月下闻清啸。

亮 公

讲虎天华随玉麈。波心月在那能取。旁舍老僧偷指注。回头觑。虚空特地能言语。

归对学徒重自诉。从前见解都欺汝。隔岸有山横暮雨。翻然去。千岩万壑无寻处。

灵 云

急雨颠风花信早。枝枝叶叶春俱到。何待小桃方悟道。休迷倒。出门无限青青草。

根不覆藏尘亦扫。见精明树唯心造。试

借疑情看白皂。回头讨。灵云笑杀玄沙老。

### 船 子

万叠空青春杳杳。一蓑烟雨吴江晓。醉眼忽醒惊白鸟。拍手笑。清波不犯鱼吞钓。

津渡有僧求法要。一桡为汝除玄妙。已去回头知不峭。犹迷照。渔舟性燥都翻了。

### 凤栖梧

碧瓦笼晴烟雾绕。水殿西偏，小立闻啼鸟。风度女墙吹语笑。南枝破腊应开了。

道骨不凡江瘴晓。春色通灵，医得花重少。爆暖酿寒空杳杳。江城画角催残照。

### 千秋岁

半身屏外。睡觉唇红退。春思乱，芳心碎。空余簪髻玉，不见流苏带。试与问，今人秀整谁宜对。

湘浦曾同会。手拏轻罗盖。疑是梦，今犹在。十分春易尽，一点情难改。多少事，却随恨远连云海。

### 青玉案

绿槐烟柳长亭路。恨取次、分离去。日永如年愁难度。高城回首，暮云遮尽，目断人何处。

解鞍旅舍天将暮。暗忆丁宁千万句。一

寸柔肠情几许。薄衾孤枕，梦回人静，彻晓潇潇雨。

### 西江月

十指嫩抽春笋，纤纤玉软红柔。人前欲展强娇羞。微露云衣霓袖。

最好洞天春晚，黄庭卷罢清幽。凡心无计奈闲愁。试捻花枝频嗅。

又

大厦吞风吐月，小舟坐水眠空。雾窗春晓翠如葱。睡起云涛正涌。

往事回头笑处，此生弹指声中。玉笺佳句敏惊鸿。闻道衡阳价重。

### 鹧鸪天

蜜烛花光清夜阑。粉衣香翅绕团团。人犹认假为真实，蛾岂将灯作火看。

方叹息，为遮拦。也知爱处实难拚。忽然性命随烟焰，始觉从前被眼瞞。

### 清商怨

一段文章种性。更谪仙风韵。画戟丛中，清香凝宴寝。

落日清寒勒花信。愁似海、洗光词锦。后夜归舟，云涛喧醉枕。

### 青玉案

凝祥宴罢闻歌吹。画毂走，香尘起。冠  
压花枝驰万骑。马行灯闹，凤楼帘卷，陆海  
鳌山对。

当年曾看天颜醉。御杯举，欢声沸。时  
节虽同悲乐异。海风吹梦，岭猿啼月，一枕  
思归泪。

### 西江月

入骨风流国色，透尘种性真香。为谁风  
鬓浣新妆。半树入村春暗。

雪压枝低篱落，月高影动池塘。高情数  
笔寄微茫。小寝初开雾帐。

### 浪淘沙

城里久偷闲。尘浣云衫。此身已是再眠  
蚕。隔岸有山归去好，万壑千岩。

霜晓更凭阑。减尽晴岚。微云生处是茅  
庵。试问此生谁作伴，弥勒同龕。

又

自南游，多崇冈，陵峻岭，略见西湖秀色，用  
和靖语作长短句云

山径晚樵还。深壑孱颜。孙山背后泊船  
看。手把遗编披白帔，剩却清闲。

篱落竹丛寒。渔业凋残。水痕无底照秋  
宽。好在夕阳凝睇处，数笔秋山。

## 晦庵

### 满江红

胶扰劳生 ,待足后、何时是足。据见定、随家丰俭 ,便堪龟缩。得意浓时休进步 ,须知世事多翻覆。漫教人、白了少年头 ,徒碌碌。

谁不爱 ,黄金屋。谁不羨 ,千种禄。奈五行不是 ,这般题目。枉费心神空计较 ,儿孙自有儿孙福。也不须、采药访神仙 ,惟寡欲。

## 乱仙

### 忆少年

凄凉天气 ,凄凉院落 ,凄凉时候。孤鸿叫  
斜月 ,伴寒灯残漏。

落尽梧桐秋影瘦。菱鉴古、画眉难就。重  
阳又近也 ,对黄花依旧

### 鹊桥仙 七夕

鸾舆初驾 ,牛车齐发 ,隐隐鹊桥咿轧。尤  
云殢雨正欢浓 ,但只怕、来朝初八。霞垂彩幔 ,  
月明银烛 ,馥郁香喷金鸭。年年此际一相逢 ,  
未审是、甚时结煞。

## 家 铉 翁

### 水调歌头 题旅舍壁

瀛台居北界，靦面是重城。老龙蹲踞不动，潭影净无尘。此地高阳胜处，天付仙翁为主，那肯借闲人。暂挂西堂锡，仍同旦过宾。

六年里，五迁舍，得比邻。儒馆豆笪于粢，弦诵有遗音。甚喜黄冠为侣，更得青衿来伴，应不叹飘零。夜宿东华榻，朝餐泮水芹。

### 念奴娇 中秋纪梦

神仙何处，人尽道、我州三神之一。为问何年飞到此，拔地倚天无迹。缥缈琼宫，溟茫朱户，不与尘寰隔。翩然鹤下，时传云外消息。

露冷风清夜阑，梦高人过我，欢如畴昔。道骨仙风谁得似，谈笑云生几席。共踏银虬，迫随降节，恍遇群仙集。云韶九奏，不类人间金石。

又 送陈正言

南来数骑，问征尘、正是江头风恶。耿耿孤忠磨不尽，惟有老天知得。短棹浮淮，轻毡渡汉，回首觴棱泣。缄书欲上，惊传天外清跸。

路人指示荒台，昔汉家使者，曾留行迹。我节君袍雪样明，俯仰都无愧色。送子先归，慈颜未老，三径有余乐。逢人问我，为说肝肠如昨。

## 贾昌朝

### 木兰花令

都城水绿嬉游处。仙棹往来人笑语。红随远浪泛桃花，雪散平堤飞柳絮。东君欲共春归去。一阵狂风如骤雨。碧油红旆锦障泥，斜日画桥芳草路。

## 贾逸祖

### 朝中措

青山隐隐水斜斜。修竹两三家。又是水寒山瘦，依然行客遍天涯。

天教流落，东西南北，不恨年华。祇恨夜来风雨，投明月、老却梅花。

## 贾应

### 水调歌头 呈判府宣机先生乞赐笑览

晚日浴鲸海，璧月挂鳌峰。不知今夕何夕，灯火万家同。楼外芙蓉开遍，人在琉璃影里，语笑隔帘重。对景且行乐。一醉任东风。

黄堂宴，春酒绿，艳妆红。文章太守，和气都在笑谈中。正此觥筹交错，只恐笙歌未散，温诏促追锋。来岁传柑处，侍宴自从容。

## 贾奕

### 南乡子

闲步小楼前。见个佳人貌类仙。暗想圣情浑似梦，追欢。执手兰房恣意怜。

一夜说盟言。满掬沈檀喷瑞烟。报道早朝归去晚，回銮。留下鲛绡当宿钱。

## 鉴堂

### 菩萨蛮 答伯山四时四首

#### 春

落花丛外风惊鹊。鹊惊风外丛花落。乡梦困时长。长时困梦乡。

暮天江口渡。渡口江天暮。林远度栖禽。禽栖度远林。

#### 夏

竹枝高映荷池绿。绿池荷映高枝竹。流水碧浮鸥。鸥浮碧水流。

酒尊陪旧友。友旧陪尊酒。吟客坐时斟。斟时坐客吟。

#### 秋

砌风鸣叶繁霜坠。坠霜繁叶鸣风砌。山外水潺潺。潺潺水外山。

冷衾愁夜永。永夜愁衾冷。砧响更蛩吟。吟蛩更响砧。

#### 冬

浦南回桨归庭户。户庭归桨回南浦。帘卷欲晴天。天晴欲卷帘。

全宋词 鉴堂

月光交映雪。雪映交光月。残漏怯宵寒。  
寒宵怯漏残。

## 姜个翁

### 霓裳中序第一 春晚旅寓

园林罢组织。树树东风翠云滴。草满旧家行迹。时听得声声，晓莺如觅。愁红半湿。煞憔悴、墙根堪惜。可念我、飘零如此，一地送岑寂。

龟石。当年第一。也似老、人间风日。余葩选甚颜色。羞捻江南，断肠词笔。留春浑未得。翻些入、啼鹃夜泣。清江晚，绿杨归思，隔岸数峰出。

## 姜特立

### 画堂春

故园二月正芳菲。红紫团枝。一番草绿  
谢郎池。人醉如泥。

底事江乡风物，年年独殿芳时。无情燕子  
背人飞。似愧春迟。

### 浣溪沙

节序回环已献裘。不堪风叶夜鸣秋。寒  
蛩吟露月阶幽。

蜗角虚名真误我，蝇头细字不禁愁。班超  
何日定封侯。

### 菩萨蛮

日长庭院无人到。琅玕翠影摇寒飏。困  
卧北窗凉。好风吹梦长。

璧月升东岭。冷浸扶疏影。苗叶万珠明。  
露华圆更清。

又

蓬山学士文章伯。尊前风味谁能敌。新

全宋词 姜特立

觅似花人。添成小院春。

玉纤呵翠袖。满劝金杯酒。寿酒莫辞斟。  
酒深人意深。

又 中秋不见月

镜天良月皆佳节。休恨今宵妨皎洁。玉  
锁闾蟾宫。姮娥意自通。

终有开时节。莫放笙歌歇。来夕尚婵娟。  
何妨把酒看。

霜天晓角 为夜游湖作

欢娱电掣。何况轻离别。料得两情无奈，  
思量尽、总难说。

酒热。凄兴发。共寻波底月。长结西湖  
心愿，水有尽、情无歇。

阮郎归 寄人

绿阴庭院记年时。家人捧寿卮。乐声催  
拍送腰支。香风匝地衣。

清梦断，彩云飞。刘郎今鬓丝。强将杯酒  
破愁眉。如今触事非。

浪淘沙

春事有来期。且喜春归。问春何似去年  
时。报道今年春意好，随分开眉。

往事莫伤悲。光景如飞。十分潘鬓已成  
丝。幸是风流犹未减，且醉芳菲。

朝中措 应令锦林檎

芳林曲径锦玲珑。膩白借微红。元是海棠标格 ,司花点化东风。

端相浑似 ,玉真未醉 ,春思先慵。留取浅顰低笑 ,夜深翠幄轻笼。

又 送人

十分天赋好精神。宫样小腰身。迷却阳城下蔡 ,未饶宋玉东邻。

不堪回首 ,高唐去梦 ,楚峡归云。从此好寻夫婿 ,有书频寄鸿鳞。

又 和欧阳公韵

如山堂上翠横空。山影浪花中。夜夜林间明月 ,时时柳外清风。

如今到此 ,倏然万事 ,无处情钟。唯有尊前一笑 ,分明好个山翁。

蝶恋花 送妓

飘粉吹香三月暮。病酒情怀 ,愁绪浑无数。有个人人来又去。归期有恨难留驻。

明日尊前无觅处。咿轧篮舆 ,只向双溪路。我辈情钟君谩与。为云为雨应难据。

声声慢 岩桂

云迷越岫 ,枫冷吴江 ,天香忽到人寰。满

全宋词 姜特立

额涂黄 ,别更一种施丹。天教素秋独步 ,笑同时、霜菊秋兰。最好处 ,向水阶月地 ,把酒相看。

应有骚人雅韵 ,将胆瓶筠管 ,簇向屏山。野店云房 ,争待结屋中间。无奈猖狂老子 ,架巢卧、风露清闲。待早晚 ,约姮娥、同住广寒。

卜算子 用坡仙韵

丹桂一枝芳 ,陡觉秋容静。月里人间总一般 ,共此扶疏影。

枕畔忽闻香 ,夜半还思省。争奈姮娥不嫁人 ,寂寞孤衾冷。

西江月 戊午生朝

富贵从来自有 ,人生最羨长年。駉駉八秩未华颠。更喜此身强健。

金印新来如斗 ,丝纶御墨犹鲜。枣如瓜大藕如船。莫惜尊前满劝。

满江红 己未生朝

听说梅山 ,一邱内、深藏曲折。过醒心桥下 ,水光清彻。迢迢跻攀登翠岭 ,沈沈烟壑千峰列。更小亭、风露逼华堂 ,荷香发。歌声动 ,云横阙。舞腰转 ,风回雪。正良辰美景 ,众宾欢悦。老子中间聊笑傲 ,酒行莫放觥筹歇。愿此生、长似钓璜公 ,添华发。

全宋词 姜特立

念奴娇 庚申生朝

官途岷嶮,问急流勇退,几人闻早。自别修门今正是,一纪生朝还到。绿野风光,平泉草木,争似梅山好,园林如画,芰荷香泛芳沼。

早晚玉节来临,君恩踵至,金印应如斗。好是华堂开宴处。歌舞管弦声奏。海上蟠桃,山中仙杏,共劝长生酒。莫辞沈醉,年年此会依旧。

满江红 辛酉生朝

小小华堂,朱阑外、乱山如簇。更云中仙掌,一峰高矗。南极老人呈瑞处,丙丁躔次光相烛。又谁知、堂上有闲人,无拘束。

宾朋至,须歌曲。风月好,纷丝竹,都不管、世间是非荣辱。屈指如今侪辈少,几人老后能知足。问此身、何地寄生涯,唯松菊。

临江仙

桃李飞花春渐老,海棠次第芬芳。庭前红药已成行。酴醾开未到,犹更有花王。

从此便须排日醉,莫将闲事相妨。老来不是太疏狂。尊前君看取,潘鬓已成霜。

感皇恩 壬戌生朝

儿女沸欢声,生朝来到。帘幕中间喷香

全宋词 姜特立

兽。京祠新任 ,好事日边还又。清闲无个事 ,  
君恩厚。

赢得乞食 ,歌姬一笑。旧衲云山伴红袖。  
蓬莱弱水 ,试问神仙何有。近来饶落托 ,贪杯  
酒。

## 姜 夔

### 令

#### 小重山令 赋潭州红梅

人绕湘皋月坠时。斜横花树小，浸愁漪。  
一春幽事有谁知。东风冷、香远茜裙归。  
鸥去昔游非。遥怜花可可，梦依依。九  
疑云杳断魂啼。相思血，都沁绿筠枝。

### 江梅引

丙辰之冬，予留梁溪，将诣淮而不得，因梦思  
以述志

人间离别易多时。见梅枝。忽相思。几  
度小窗，幽梦手同携。今夜梦中无觅处，漫  
徘徊。寒侵被、尚未知。

湿红恨墨浅封题。宝箏空、无雁飞。俊  
游巷陌，算空有、古木斜晖。旧约扁舟，心  
事已成非。歌罢淮南春草赋，又萋萋。漂零  
客、泪满衣。

蓦山溪 题钱氏溪月

与鸥为客。绿野留吟屐。两行柳垂阴，  
是当日、仙翁手植。一亭寂寞。烟外带愁横，  
荷冉冉，展凉云，横卧虹千尺。

才因老尽，秀句君休觅。万绿正迷人，  
更愁入、山阳夜笛。百年心事，惟有玉阑知，  
吟未了，放船回，月下空相忆。

莺声绕红楼

甲辰春，平甫与予自越来吴，携家妓观梅于孤山之西村，命国工吹笛，妓皆以柳黄为衣

十亩梅花作雪飞。冷香下、携手多时。  
两年不到断桥西。长笛为予吹。

人妒垂杨绿，春风为、染作仙衣。垂杨  
却又妒腰肢。近前舞丝丝。

鬲溪梅令 仙吕调 丙辰冬自无锡归，作此寓意

好花不与殢香人。浪粼粼。又恐春风归  
去绿成阴。玉钿何处寻。

木兰双桨梦中云。小横陈。漫向孤山山  
下觅盈盈。翠禽啼一春。

阮郎归

为张平甫寿，是日同宿湖西定香寺

红云低压碧玻璃。惺惚花上啼。静看楼角拂长枝。朝寒吹翠眉。

休涉笔，且裁诗。年年风絮时。绣衣夜半草符移。月中双桨归。

又

旌阳宫殿昔徘徊。一坛云叶垂。与君闲看壁间题。夜凉笙鹤期。

茅店酒，寿君时。老枫临路歧。年年强健得追随。名山游遍归。

好事近 赋茉莉

凉夜摘花钿，苒苒动摇云绿。金络一团香露，正纱厨人独。

朝来碧缕放长穿，钗头挂层玉。记得如今时候，正荔枝初熟。

点绛唇 丁未冬过吴松作

燕雁无心，太湖西畔随云去。数峰清苦。商略黄昏雨。

第四桥边，拟共天随住。今何许。凭阑怀古。残柳参差舞。

又

金谷人归，绿杨低扫吹笙道。数声啼鸟。

也学相思调。

月落潮生，掇送刘郎老。淮南好。甚时重到。陌上生春草。

虞美人 赋牡丹

西园曾为梅花醉。叶翦春云细。玉笙凉夜隔帘吹。卧看花梢摇动、一枝枝。

娉婷袅袅教谁惜。空压纱巾侧。沈香亭北又青苔。唯有当时蝴蝶、自飞来。

又

摩挲紫盖峰头石。上瞰苍崖立。玉盘摇动半崖花。花树扶疏、一半白云遮。

盈盈相望无由摘。惆怅归来屐。而今仙迹杳难寻。那日青楼。曾见似花人。

忆王孙 番阳彭氏小楼作

冷红叶叶下塘秋。长与行云共一舟。零落江南不自由。两绸缪。料得吟鸾夜夜愁。

少年游 戏平甫

双螺未合，双蛾先敛，家在碧云西。别母情怀，随郎滋味，桃叶渡江时。

扁舟载了，匆匆归去，今夜泊前溪。杨柳津头，梨花墙外，心事两人知。

鹧鸪天 己酉之秋苕溪记所见

京洛风流绝代人。因何风絮落溪津。笼鞋浅出鸦头袜，知是凌波缥缈身。

红乍笑，绿长嗔。与谁同度可怜春。鸳鸯独宿何曾惯，化作西楼一缕云。

又

予与张平甫自南昌同游西山玉隆宫，止宿而返，盖乙卯三月十四日也。是日即平甫初度，因买酒茅舍，并坐古枫下。古枫，旌阳在时物也。旌阳尝以草屨悬其上，土人谓屨为屨，因名曰挂屨枫。苍山四围，平野尽绿，隔涧野花红白，照影可喜，使人采撷，以藤纠缠著枫上。少焉月出，大于黄金盆。逸兴横生，遂成痛饮，午夜乃寝。明年，平甫初度，欲治身往封禺松竹间，念此游之不可再也，歌以寿之

曾共君侯历聘来。去年今日踏莓苔。旌阳宅里疏疏磬，挂屨枫前草草杯。

呼煮酒，摘青梅。今年官事莫徘徊。移家径入蓝田县，急急船头打鼓催。

又 丁巳元日

柏绿椒红事事新。隔篱灯影贺年人。三茅钟动西窗晓，诗鬓无端又一春。

慵对客，缓开门。梅花闲伴老来身。娇儿学作人间字，郁垒神荼写未真。

又 正月十一日观灯

巷陌风光纵赏时。笼纱未出马先嘶。白头居士无呵殿，只有乘肩小女随。

花满市，月侵衣。少年情事老来悲。沙河塘上春寒浅，看了游人缓缓归。

又 元夕不出

忆昨天街预赏时。柳悭梅小未教知。而今正是欢游夕，却怕春寒自掩扉。

帘寂寂，月低低。旧情惟有绛都词。芙蓉影暗三更后，卧听邻娃笑语归。

又 元夕有所梦

肥水东流无尽期。当初不合种相思。梦中未比丹青见，暗里忽惊山鸟啼。

春未绿，鬓先丝。人间别久不成悲。谁教岁岁红莲夜，两处沈吟各自知。

又 十六夜出

辇路珠帘两行垂。千枝银烛舞困困。东风历历红楼下，谁识三生杜牧之。

欢正好，夜何其。明朝春过小桃枝。鼓声渐远游人散，惆怅归来有月知。

## 夜行船

己酉岁，寓吴兴，同田几道寻梅北山沈氏圃，载雪而归

略彳横溪人不度。听流澌、佩环无数。屋角垂枝，船头生影，算唯有、春知处。

回首江南天欲暮。折寒香、倩谁传语。玉笛无声，诗人有句，花休道、轻分付。

## 杏花天〔影〕

丙午之冬，发沔口。丁未正月二日，道金陵。北望淮楚，风日清淑，小舟挂席，容与波上

绿丝低拂鸳鸯浦。想桃叶、当时唤渡。又将愁眼与春风，待去。倚兰桡、更少驻。

金陵路。莺吟燕舞。算潮水、知人最苦。满汀芳草不成归，日暮。更移舟、向甚处。

## 醉吟商小品

石湖老人谓予云：琵琶有四曲，今不传矣：曰濩索（一曰濩弦）梁州、转关绿腰、醉吟商湖渭州、历弦箏媚也。予每念之。辛亥之夏，予谒杨廷秀丈于金陵邸中，遇琵琶工，解作醉吟商湖渭州，因求得品弦法，译成此谱，实双声耳

又正是春归，细柳暗黄千缕。暮鸦啼处。梦逐金鞍去。一点芳心休诉。琵琶解语。

## 玉梅令

高平调 石湖家自制此声，未有语实之，命予作。石湖宅南隔河有圃，曰范村，梅开雪落，竹院深静，而石湖畏寒不出，故戏及之

疏疏雪片。散入溪南苑。春寒锁、旧家亭馆。有玉梅几树，背立怨东风，高花未吐，暗香已远。

公来领略，梅花能劝。花长好、愿公更健。便揉春为酒，翦雪作新诗，拚一日、绕

花千转。

### 踏莎行

自沔东来，丁未元日至金陵，江上感梦而作  
燕燕轻盈，莺莺娇软。分明又向华胥见。  
夜长争得薄情知，春初早被相思染。  
别后书辞，别时针线。离魂暗逐郎行远。  
淮南皓月冷千山，冥冥归去无人管。

### 诉衷情 端午宿合路

石榴一树浸溪红。零落小桥东。五日凄凉心事，山雨打船篷。  
谙世味，楚人弓。莫忡忡。白头行客，不采苹花，孤负薰风。

### 浣溪沙

予女须家沔之山阳，左白湖，右云梦，春水方生，浸数千里。冬寒沙露，衰草入云。丙午之秋，予与安甥或荡舟采菱，或举火置兔，或观鱼簑下，山行野吟，自适其适，凭虚怅望，因赋是阕  
著酒行行满袂风。草枯霜鹘落晴空。销魂都在夕阳中。  
恨入四弦人欲老，梦寻千驿意难通。当时何似莫匆匆。

又

己酉岁，客吴兴，收灯夜阖户无聊，俞商卿呼

之共出，因记所见

春点疏梅雨后枝。翦灯心事峭寒时。市桥携手步迟迟。

蜜炬来时人更好，玉笙吹彻夜何其。东风落靛不成归。

又 辛亥正月二十四日发合肥

钗燕笼云晚不忺。拟将裙带系郎船。别离滋味又今年。

杨柳夜寒犹自舞，鸳鸯风急不成眠。些儿闲事莫萦牵。

又 丙辰岁不尽五日吴松作

雁怯重云不肯啼。画船愁过石塘西。打头风浪恶禁持。

春浦渐生迎棹绿。小梅应长亚门枝。一年灯火要人归。

又

丙辰腊，与俞商卿、钜朴翁同寓新安溪庄舍，得腊花韵甚，赋二首

花里春风未觉时。美人呵蕊缀横枝。隔帘飞过蜜蜂儿。

书寄岭头封不到，影浮杯面误人吹。寂寥惟有夜寒知。

又

翦翦寒花小更垂。阿琼愁里弄妆迟。东风烧烛夜深归。

落蕊半黏钗上燕，露黄斜映鬓边犀。老夫无味已多时。

## 霓裳中序第一

丙午岁，留长沙，登祝融，因得其祠神之曲曰黄帝盐、苏合香。又于乐工故书中得商调霓裳曲十八阙，皆虚谱无辞。按沈氏乐律，霓裳道调，此乃商调。乐天诗云：“散序六阙”，此特两阙，未知孰是。然音节闲雅，不类今曲。予不暇尽作，作中序一阙传于世。予方羁游，感此古音，不自知其辞之怨抑也

亭皋正望极。乱落江莲归未得。多病却无气力。况纨扇渐疏，罗衣初索。流光过隙。叹杏梁、双燕如客。人何在，一帘淡月，仿佛照颜色。

幽寂。乱蛩吟壁。动庾信、清愁似织。沈思少年浪迹。笛里关山，柳下坊陌。坠红无信息。漫暗水、涓涓溜碧。漂零久，而今何意，醉卧酒垆侧。

## 庆宫春

绍熙辛亥除夕，予别石湖归吴兴，雪后夜过垂虹，尝赋诗云：“笠泽茫茫雁影微。玉峰重叠护云衣。长桥寂寞春寒夜，只有诗人一舸归。”后五年冬，复与俞商卿、张平甫、铎朴翁自封禺同载诣梁溪，道经吴松。山寒天迥，云浪四合。中夕相呼步垂虹，星斗下垂，错杂渔火，朔吹凛凛，卮酒不能支。朴翁以衾自缠，犹相与行吟，因赋此阙，盖过旬涂稿乃定。朴翁咎予无益，然意所耽，不能自己也。平甫，商卿，朴翁皆工于诗，所出奇诡，予亦强追逐之。此行既归，各得五十余篇

双桨莼波，一蓑松雨，暮愁渐满空阔。  
呼我盟鸥，翩翩欲下，背人还过木末。那回  
归去，荡云雪、孤舟夜发。伤心重见，依约  
眉山，黛痕低压。

采香径里春寒，老子婆娑，自歌谁答。  
垂虹西望，飘然引去，此兴平生难遏。酒醒  
波远，政凝想、明珰素袜。如今安在，唯有  
阑干，伴人一霎。

### 齐天乐

黄钟宫 丙辰岁，与张功父会饮张达可之堂，  
闻屋壁间蟋蟀有声、功父约予同赋，以授歌者。功  
父先成，辞甚美。予裴回未利花间，仰见秋月，顿  
起幽思，寻亦得此。蟋蟀，中都呼为促织，善斗。  
好事者或以三二十万钱致一枚，镂象齿为楼观以贮  
之

庾郎先自吟愁赋。凄凄更闻私语。露湿  
铜铺，苔侵石井，都是曾听伊处。音似诉。  
正思妇无眠，起寻机杼。曲曲屏山，夜凉独  
自甚情绪。

西窗又吹暗雨。为谁频断续，相和砧杵。  
候馆迎秋，离宫吊月，别有伤心无数。豳诗  
漫与。笑篱落呼灯，世间儿女。写入琴丝，  
一声声更苦。

### 满江红

满江红旧调用仄韵，多不协律。如末句云“无  
心扑”三字，歌者将心字融入去声，方谐音律。予

欲以平韵为之，久不能成。因泛巢湖，闻远岸箫鼓声。问之舟师，云：居人为此湖神姥寿也。予因祝曰：得一席风径至居巢，当以平韵满江红为迎送神曲。言讫，风与笔俱驶，顷刻而成。末句云“闻佩环”，则协律矣。书以绿笺，沈于白浪。辛亥正月晦也。是岁六月，复过祠下，因刻之柱间。有客来自居巢云：土人祠姥，辄能歌此词。按曹操至濡须口，孙权遗操书曰：春水方生，公宜速去。操曰：孙权不欺孤。乃彻军还。濡须口与东关相近，江湖水之所出入。予意春水方生，必有司之者，故归其功于姥云

仙姥来时，正一望、千顷翠澜。旌旗共、乱云俱下，依约前山。命驾群龙金作辂，相从诸娣玉为冠。向夜深、风定悄无人，闻佩环。

神奇处，君试看。奠淮右，阻江南。遣六丁雷电，别守东关。却笑英雄无好手，一篙春水走曹瞒。又怎知、人在小红楼，帘影间。

### 一萼红

丙午人日，予客长沙别驾之观政堂。堂下曲沼，沼西负古垣，有卢橘幽篁，一径深曲。穿径而南，官梅数十株，如椒、如菽，或红破白露，枝影扶疏。著屐苍苔细石间，野兴横生，亟命驾登定王台。乱湘流、入麓山，湘云低昂，湘波容与。兴尽悲来，醉吟成调

古城阴。有官梅几许，红萼未宜簪。池面冰胶，墙腰雪老，云意还又沈沈。翠藤共、闲穿径竹，渐笑语、惊起卧沙禽。野老林泉，故王台榭，呼唤登临。

南去北来何事，荡湘云楚水，目极伤心。  
朱户黏鸡，金盘簇燕，空叹时序侵寻。记曾共、西楼雅集，想垂杨、还袅万丝金。待得归鞍到时，只怕春深。

### 念奴娇

予客武陵，湖北宪治在焉。古城野水，乔木参天，予与二三友日荡舟其间，簿荷花而饮。意象幽闲，不类人境。秋水且涸，荷叶出地寻丈，因列坐其下。上不见日，清风徐来，绿云自动。间于疏处窥见游人画船，亦一乐也。揭来吴兴，数得相羊荷花中。又夜泛西湖，光景奇绝。故以此句写之

闹红一舸，记来时、尝与鸳鸯为侣。三十六陂人未到，水佩风裳无数。翠叶吹凉，玉容销酒，更洒菰蒲雨。嫣然摇动，冷香飞上诗句。

日暮。青盖亭亭，情人不见，争忍凌波去。只恐舞衣寒易落，愁入西风南浦。高柳垂阴，老鱼吹浪，留我花间住。田田多少，几回沙际归路。

### 又 谢人惠竹榻

楚山修竹，自娟娟、不受人间袪暑。我醉欲眠伊伴我，一枕凉生如许。象齿为材，花藤作面，终是无真趣。梅风吹溽，此君直恁清苦。

须信下榻殷勤，翛然成梦，梦与秋相遇。翠袖佳人来共看，漠漠风烟千亩。蕉叶窗纱，荷花池馆，另有留人处。此时归去，为君听尽秋雨。

眉 妩 一名百宜娇 戏张仲远

看垂杨连苑，杜若侵沙，愁损未归眼。  
信马青楼去，重帘下，娉婷人妙飞燕。翠尊  
共款。听艳歌、郎意先感。便携手、月地云  
阶里，爱良夜微暖。

无限。风流疏散。有暗藏弓履，偷寄香  
翰。明日闻津鼓，湘江上，催人还解春缆。  
乱红万点。怅断魂、烟水遥远。又争似相携，  
乘一舸、镇长见。

月下笛

与客携壶，梅花过了，夜来风雨。幽禽  
自语。啄香心、度墙去。春衣都是柔荑翦，  
尚沾惹、残茸半缕。怅玉钿似扫，朱门深闭，  
再见无路。

凝伫。曾游处。但系马垂杨，认郎鹦鹉。  
扬州梦觉，彩云飞过何许。多情须倩梁间燕，  
问吟袖、弓腰在否。怎知道，误了人，年少  
自恁虚度。

清波引

予久客古沔，沧浪之烟雨，鹦鹉之草树，头陀、  
黄鹤之伟观，郎官、大别之幽处，无一日不在心目  
间。胜友二三，极意吟赏。揭来湘浦，岁晚凄然，  
步绕园梅，摘笔以赋

冷云迷浦。倩谁唤、玉妃起舞。岁华如

许。野梅弄眉妩。屐齿印苍苔，渐为寻花来去。自随秋雁南来，望江国、渺何处。

新诗漫与。好风景、长是暗度。故人知否。抱幽恨难语。何时共渔艇，莫负沧浪烟雨。况有清夜啼猿，怨人良苦。

### 法曲献仙音

俗名大石 黄钟商 张彦功官舍在铁冶岭上，即昔之教坊使宅。高斋下瞰湖山，光景奇绝。予数过之，为赋此（原未注宫调，据陆钟辉本白石道人歌曲补，下二首同）

虚阁笼寒，小帘通月，暮色偏怜高处。树隔离宫，水平驰道，湖山尽入尊俎。奈楚客淹留久，砧声带愁去。

屡回顾。过秋风、未成归计。谁念我、重见冷枫红舞。唤起淡妆人，问逋仙、今在何许。象笔鸾笺，甚而今、不道秀句。怕平生幽恨，化作沙边烟雨。

### 琵琶仙

黄钟商 吴都赋云：户藏烟浦，家具画船。唯吴兴为然。春游之盛，西湖未能过也。己酉岁，予与萧时父载酒南郭，感遇成歌

双桨来时，有人似、旧曲桃根桃叶。歌扇轻约飞花，蛾眉正奇绝。春渐远、汀洲自绿，更添了、几声啼鴂。十里扬州，三生杜牧，前事休说。

又还是、宫烛分烟，奈愁里、匆匆换时

节。都把一襟芳思，与空阶榆荚。千万缕、藏鸦细柳，为玉尊、起舞回雪。想见西出阳关，故人初别。

### 玲珑四犯

此曲双调，世别有大石调一曲越中岁暮闻箫鼓感怀

叠鼓夜寒，垂灯春浅，匆匆时事如许。倦游欢意少，俯仰悲今古。江淹又吟恨赋。记当时、送君南浦。万里乾坤，百年身世，唯有此情苦。

扬州柳，垂官路。有轻盈换马，端正窥户。酒醒明月下，梦逐潮声去。文章信美知何用，漫赢得、天涯羁旅。教说与。春来要、寻花伴侣。

### 侧犯 咏芍药

恨春易去。甚春却向扬州住。微雨。正茧栗梢头弄诗句。红桥二十四，总是行云处。无语。渐半脱宫衣笑相顾。

金壶细叶，千朵围歌舞。谁念我、鬓成丝，来此共尊俎。后日西园，绿阴无数。寂寞刘郎，自修花谱。

### 水龙吟

黄庆长夜泛鉴湖，有怀归之曲，课予和之  
夜深客子移舟处，两两沙禽惊起。红衣

入桨，青灯摇浪，微凉意思。把酒临风，不思归去，有如此水。况茂林游倦，长干望久，芳心事、箫声里。

屈指归期尚未。鹊南飞、有人应喜。画阑桂子，留香小待，提携影底。我已情多，十年幽梦，略曾如此。甚谢郎、也恨飘零，解道月明千里。

### 探春慢

予自孩幼从先人宦于古沔，女须因嫁焉。中去复来，几二十年。岂惟姊弟之爱，沔之父老儿女子，亦莫不予爱也。丙午冬，千岩老人约予过苕霅，岁晚乘涛载雪而下。顾念依依，殆不能去。作此曲别郑次皋、辛克清、姚刚中诸君。

衰草愁烟，乱鸦送日，风沙回旋平野。拂雪金鞭，欺寒茸帽，还记章台走马。谁念漂零久，漫赢得、幽怀难写。故人清沔相逢，小窗闲共情话。

长恨离多会少，重访问竹西，珠泪盈把。雁碛波平，渔汀人散，老去不堪游冶。无奈苕溪月，又照我、扁舟东下。甚日归来，梅花零乱春夜。

### 八 归 湘中送胡德华

芳莲坠粉，疏桐吹绿，庭院暗雨乍歇，无端抱影销魂处，还见筱墙萤暗，藓阶庵切。送客重寻西去路，问水面、琵琶谁拨。最可惜、一片江山，总付与啼鴂。

长恨相从未款，而今何事，又对西风离别。渚寒烟淡，棹移人远，缥缈行舟如叶。想文君望久，倚竹愁生步罗袜。归来后、翠尊双饮，下了珠帘，玲珑闲看月。

### 解连环

玉鞭重倚。却沈吟未上，又萦离思。为大乔、能拨春风，小乔妙移箏，雁啼秋水。柳怯云松，更何必、十分梳洗。道郎携羽扇，那日隔帘，半面曾记。

西窗夜凉雨霁。叹幽欢未足，何事轻弃。问后约、空指蔷薇，算如此溪山，甚时重至。水驿灯昏，又见在、曲屏近底。念唯有、夜来皓月，照伊自睡。

### 喜迁莺慢 太簇宫 功父新第落成

玉珂朱组。又占了、道人林下真趣。窗户新成，青红犹润，双燕为君胥宇。秦淮贵人宅第，问谁记、六朝歌舞。总付与、在柳桥花馆，玲珑深处。

居士。闲记取。高卧未成，且种松千树。觅句堂深，写经窗静，他日任听风雨。列仙更教谁做，一院双成俦侣。世间住。且休将鸡犬，云中飞去。

### 摸鱼儿

辛亥秋期，予寓合肥。小雨初霁，偃卧窗下，心事悠然。起与赵君猷露坐月饮，戏吟此曲，盖欲一洗钿合金钗之尘。他日野处见之，甚为予击节也

向秋来、渐疏班扇，雨声时过金井。堂虚已放新凉入，湘竹最宜敲枕。闲记省、又还是、斜河旧约今再整。天风夜冷。自织锦人归，乘槎客去，此意有谁领。

空赢得，今古三星炯炯。银波相望千顷。柳州老矣犹儿戏，瓜果为伊三请。云路迥。漫说道、年年野鹊曾并影。无人与问。但浊酒相呼，疏帘自卷，微月照清饮。

### 自度曲

### 扬州慢

中吕宫 淳熙丙申至日，予过维扬。夜雪初霁，茅麦弥望。入其城，则四顾萧条，寒水自碧，暮色渐起，戍角悲吟。予怀怆然，感慨今昔，因自度此曲。千岩老人以为有黍离之悲也

淮左名都，竹西佳处，解鞍少驻初程。过春风十里，尽荠麦青青。自胡马窥江去后，废池乔木，犹厌言兵。渐黄昏，清角吹寒，都在空城。

杜郎俊赏，算而今、重到须惊。纵豆蔻词工，青楼梦好，难赋深情。二十四桥仍在，波心荡、冷月无声。念桥边红药，年年知为

谁生。

### 长亭怨慢

中吕宫 子颇喜自制曲，初率意为长短句，然后协以律，故前后阙多不同。桓大司马云：昔年种柳，依依汉南。今看摇落，凄怆江潭。树犹如此，人何以堪。此语予深爱之

渐吹尽、枝头香絮。是处人家，绿深门户。远浦萦回，暮帆零乱向何许。阅人多矣，谁得似、长亭树。树若有情时，不会得、青青如此。

日暮。望高城不见，只见乱山无数。韦郎去也，怎忘得、玉环分付。第一是、早早归来，怕红萼、无人为主。算空有并刀，难剪离愁千缕。

### 淡黄柳

正平调近 客居合肥南城赤阑桥之西，巷陌凄凉，与江左异。唯柳色夹道，依依可怜。因度此阕，以纾客怀

空城晓角。吹入垂杨陌。马上单衣寒恻恻。看尽鹅黄嫩绿，都是江南旧相识。

正岑寂。明朝又寒食。强携酒、小桥宅，怕梨花落尽成秋色。燕燕飞来，问春何在，唯有池塘自碧。

### 石湖仙 越调 寿石湖居士

松江烟浦。是千古三高，游衍佳处。须

信石湖仙，似鸱夷、翩然引去。浮云安在，我自爱、绿香红舞。容与。看世间、几度今古。

卢沟旧曾驻马，为黄花、闲吟秀句。见说胡儿，也学纶巾敲雨。玉友金蕉，玉人金缕。缓移箏柱。闻好语。明年定在槐府。

### 暗 香

仙吕宫 辛亥之冬，予载雪诣石湖。止既月，授简索句，且徵新声。作此两曲，石湖把玩不已，使工妓隶习之，音节谐婉，乃名之曰暗香、疏影

旧时月色。算几番照我，梅边吹笛。唤起玉人，不管清寒与攀摘。何逊而今渐老，都忘却、春风词笔。但怪得、竹外疏花，香冷入瑶席。

江国。正寂寂。叹寄与路遥，夜雪初积。翠尊易泣。红萼无言耿相忆。长记曾携手处，千树压、西湖寒碧。又片片、吹尽也，几时见得。

### 疏 影

苔枝缀玉。有翠禽小小，枝上同宿。客里相逢，篱角黄昏，无言自倚修竹。昭君不惯胡沙远，但暗忆、江南江北。想佩环、月夜归来，化作此花幽独。

犹记深宫旧事，那人正睡里，飞近蛾绿。莫似春风，不管盈盈，早与安排金屋。还教一片随波去，又却怨、玉龙哀曲。等恁时、

重觅幽香，已入小窗横幅。

### 惜红衣

吴兴号水晶宫，荷花盛丽。陈简斋云：“今年何以报君恩。一路荷花相送到青墩。”亦可见矣。丁未之夏，予游千岩，数往来红香中。自度此曲，以无射宫歌之

簟枕邀凉，琴书换日，睡馀无力。细洒冰泉，并刀破甘碧。墙头唤酒，谁问讯、城南诗客。岑寂。高柳晚蝉，说西风消息。

虹梁水陌。鱼浪吹香，红衣半狼藉。维舟试望故国。眇天北。可惜渚边沙外，不共美人游历。问甚时同赋，三十六陂秋色。

### 角 招

黄钟角 甲寅春，予与俞商卿燕游西湖，观梅于孤山之西村。玉雪照映，吹香薄人。已而商卿归吴兴，予独来，则山横春烟，新柳被水，游人容与飞花中。怅然有怀，作此寄之。商卿善歌声，稍以儒雅缘饰。予每自度曲，吟洞箫，商卿辄歌而和之，极有山林缥缈之思。今予离忧，商卿一行作吏，殆无复此乐矣

为春瘦。何堪更绕西湖，尽是垂柳。自看烟外岫。记得与君，湖上携手。君归未久。早乱落、香红千亩。一叶凌波缥缈，过三十六离宫，遣游人回首。

犹有。画船障袖。青楼倚扇，相映人争秀。翠翘光欲溜。爱著宫黄，而今时候。伤春似旧。荡一点、春心如酒。写入吴丝自奏。

问谁识，曲中心、花前发。

## 徵 招

越中山水幽远。予数上下西兴、钱清间，襟抱清旷。越人善为舟，卷篷方底，舟师行歌，徐徐曳之，如偃卧榻上，无动摇突兀势，以故得尽情聘望。予欲家焉而未得，作徵招以寄兴。徵招、角招者，政和间，大晟府尝制数十曲，音节驳矣。予尝考唐田畸声律要诀云：徵与二变之调，咸非流美，故自古少徵调曲也。徵为去母调，如黄钟之徵，以黄钟为母，不用黄钟乃谐。故隋唐旧谱，不用母声，琴家无媒调、商调之类，皆徵也，亦皆具母弦而不用。其说详于予所作琴书。然黄钟以林钟为徵，住声于林钟。若不用黄钟声，便自成林钟宫矣。故大晟府徵调兼母声，一句似黄钟均，一句似林钟均，所以当时有落韵之语。予尝使人吹而听之，寄君声于臣民事物之中，清者高而亢，浊者下而遗，万宝常所谓宫离而不附者是已。因再三推寻唐谱并琴弦法而得其意。黄钟徵虽不用母声，亦不可多用变徵蕤宾、变宫应钟声。若不用黄钟而用蕤宾、应钟，即是林钟宫矣。馀十一均徵调仿此。其法可谓善矣。然无清声，只可施之琴瑟，难入燕乐。故燕乐阙徵调，不必补可也。此一曲乃予昔所制，因旧曲正宫齐天乐慢前两拍是徵调，故足成之。虽兼用母声，较大晟曲为无病矣。此曲依晋史名曰黄钟下徵调、角招曰黄钟清角。

潮回却过西陵浦，扁舟仅容居士。去得几何时，黍离离如此。客途今倦矣。漫赢得、一襟诗思。记忆江南，落帆沙际，此行还是。

迤邐。剡中山，重相见、依依故人情味。似怨不来游，拥愁鬟十二。一丘聊复尔。也

孤负、幼舆高志。水滨晚，漠漠摇烟，奈未成归计。

## 自制曲

### 秋宵吟 越调

古帘空，坠月皎。坐久西窗人悄。蛩吟苦，渐漏水丁丁，箭壶催晓。引凉飈、动翠葆。露脚斜飞云表。因嗟念，似去国情怀，暮帆烟草。

带眼销磨，为近日、愁多顿老。卫娘何在，宋玉归来，两地暗萦绕。摇落江枫早。嫩约无凭，幽梦又杳。但盈盈、泪洒单衣，今夕何夕恨未了。

## 凄凉犯

仙吕调犯商调 合肥巷陌皆种柳，秋风夕起骚骚然。予客居阖户，时闻马嘶。出城四顾，则荒烟野草，不胜凄黯，乃著此解。琴有凄凉调，假以为名。凡曲言犯者，谓以宫犯商、商犯宫之类。如道调宫上字住，双调亦上字住。所住字同，故道调曲中犯双调，或于双调曲中犯道调，其他准此。唐人乐书云：犯有正、旁、偏、侧。宫犯宫为正，宫犯商为旁，宫犯角为偏，宫犯羽为侧。此说非也。十二宫所住字各不同，不容相犯，十二宫特可犯商、角、羽耳。予归行都，以此曲示国工田正德，使以哑觱栗角吹之，其韵极美，亦曰瑞鹤仙影（原未注

宫调，据陆钟辉本补）

绿杨巷陌。秋风起、边城一片离索。马嘶渐远，人归甚处，戍楼吹角。情怀正恶。更衰草寒烟淡薄。似当时、将军部曲，迤迤度沙漠。

追念西湖上，小舫携歌，晚花行乐。旧游在否，想如今、翠凋红落。漫写羊裙，等新雁来时系著。怕匆匆、不肯寄与、误后约。

### 翠楼吟

双调 淳熙丙午冬，武昌安远楼成，与刘去非诸友落之，度曲见志。予去武昌十年，故人有泊舟鹦鹉洲者，闻小姬歌此词，问之颇能道其事，还吴为予言之。兴怀昔游，且伤今之离索也

月冷龙沙，尘清虎落，今年汉酺初赐。新翻胡部曲，听毡幕、元戎歌吹。层楼高峙。看槛曲萦红，檐牙飞翠。人姝丽。粉香吹下，夜寒风细。

此地。宜有词仙，拥素云黄鹤，与君游戏。玉梯凝望久，叹芳草、萋萋千里。天涯情味。仗酒祓清愁，花销英气。西山外。晚来还卷，一帘秋霁。

### 湘 月

长溪杨声伯典长沙楫棹，居濒湘江。窗间所见，如燕公郭熙画图，卧起幽适。丙午七月既望，声伯约予与赵景鲁、景望、萧和父、裕父、时父、恭父大舟浮湘，放乎中流。山水空寒，烟月交映，凄然其为秋也。坐客皆小冠练服，或弹琴、或浩歌、或

自酌、或援笔搜句。予度此曲，即念奴娇之鬲指声也，于双调中吹之。鬲指亦谓之过腔，见晁无咎集。凡能吹竹者，便能过腔也

五湖旧约，问经年底事，长负清景。暝入西山，渐唤我、一叶夷犹乘兴。倦网都收，归禽时度，月上汀洲冷。中流容与，画桡不点清镜。

谁解唤起湘灵，烟鬟雾鬓，理哀弦鸿阵。玉麈谈玄，叹坐客、多少风流名胜。暗柳萧萧，飞星冉冉，夜久知秋信。鲈鱼应好，旧家乐事谁省。

### 小重山令

赵郎中谒告迎侍太夫人，将来都下。予喜，为作此曲

寒食飞红满帝城。慈乌相对立，柳青青。玉阶端笏细陈情。天恩许，春尽可还京。

鹄报倚门人。安舆扶上了，更亲擎。看花携乐缓行程。争迎处，堂下拜公卿。

### 念奴娇 毁舍后作

昔游未远，记湘皋闻瑟，澧浦捐褌。因觅孤山林处士，来踏梅根残雪。獠女供花，伧儿行酒，臣看青门辙。一丘吾老，可怜情事空切。

曾见海作桑田，仙人云表，笑汝真痴绝。说与依依王谢燕，应有凉风时节。越只青山，吴惟芳草，万古皆沈灭。绕枝三匝，白头歌

尽明月。

卜算子 吏部梅花八咏，夔次韵。

江左咏梅人，梦绕青青路。因向凌风台下看，心事还将与。

忆别庾郎时，又过林逋处。万古西湖寂寞春，惆怅谁能赋。

又

月上海云沈，鸥去吴波迥。行过西泠有一枝，竹暗人家静。

又见水沈亭，举目悲风景。花下铺毡把一杯，缓饮春风影。

又

藓干石斜妨，玉蕊松低覆。日暮冥冥一看来，略比年时瘦。

凉观酒初醒，竹阁吟才就。犹恨幽香作许慳，小迟春心透。

又

家在马城西，今赋梅屏雪。梅雪相兼不见花，月影玲珑彻。

前度带愁看，一饷和愁折。若使逋仙及见之，定自成愁绝。

又

摘蕊暝禽飞，倚树悬冰落。下竺桥边浅立时，香已漂流却。

空径晚烟平，古寺春寒恶。老子寻花第

一番，常恐吴儿觉。

又

绿萼更横枝，多少梅花样。惆怅西村一  
坞春，开遍无人赏。

细草藉金舆，岁岁长吟想。枝上么禽一  
两声，犹似宫娥唱。

又

象笔带香题，龙笛吟春咽。杨柳娇痴未  
觉愁，花管人离别。

路出古昌源，石瘦冰霜洁。折得青须碧  
藓花，持向人间说。

又

御苑接湖波，松下春风细。云绿峨峨玉  
万枝，别有仙风味。

长信昨来看，忆共东皇醉。此树婆娑一  
惘然，苔藓生春意。

### 洞仙歌 黄木香赠辛稼轩

花中惯识，压架玲珑雪。乍见缃蕤间琅  
叶。恨春风将了，染额人归，留得个、袅袅  
垂香带月。

鹅儿真似酒，我爱幽芳，还比酴醾又娇  
绝。自种古松根，待看黄龙，乱飞上、苍髯  
五鬣。更老仙、添与笔端春，敢唤起桃花，  
问谁优劣。

蓦山溪 咏柳

青青官柳，飞过双双燕。楼上对春寒，卷珠帘、瞥然一见。如今春去，香絮乱因风，沾径草，惹墙花，一一教谁管。

阳关去也，方表人肠断。几度拂行轩，念衣冠、尊前易散。翠眉织锦，红叶浪题诗。烟渡口，水亭边，长是心先乱。

永遇乐 次韵辛克清先生

我与先生，夙期已久，人间无此。不学杨郎，南山种豆，十一微微利。云霄直上，诸公衮衮，乃作道边苦李。五千言，老来受用，肯教造物儿戏。

东冈记得，同来胥宇，岁月几何难计。柳老悲桓，松高对阮。未办为邻地。长干白下，青楼朱阁，往往梦中槐蚁。却不如、洼尊放满，老夫未醉。

虞美人

括苍烟雨楼，石湖居士所造也。风景似越之蓬莱阁，而山势环绕，峰岭高秀过之，观居士题颜，且歌其所作虞美人。夔亦作一解

阑干表立苍龙背。三面峩天翠。东游才上小蓬莱。不见此楼烟雨、未应回。

而今指点来时路。却是冥蒙处。老仙鹤驭几时归。未必山川城郭、是耶非。

永遇乐 次稼轩北固楼词韵

云隔迷楼，苔封很石，人向何处。数骑秋烟，一篙寒汐，千古空来去。使君心在，苍崖绿嶂，苦被北门留住。有尊中酒差可饮，大旗尽绣熊虎。

前身诸葛，来游此地，数语便酬三顾。楼外冥冥，江皋隐隐，认得征西路。中原生聚，神京耆老，南望长淮金鼓。问当时、依依种柳，至今在否。

水调歌头 富览亭永嘉作

日落爱山紫，沙涨省潮回。平生梦犹不到，一叶眇西来。欲讯桑田成海，人世了无知者，鱼鸟两相推。天外玉笙杳，子晋只空台。

倚阑干，二三子，总仙才。尔歌远游章句，云气入吾杯。不问王郎五马，颇忆谢生双屐，处处长青苔。东望赤城近，吾兴亦悠哉。

汉宫春 次韵稼轩

云曰归欤。纵垂天曳曳，终反衡庐。扬州十年一梦，俯仰差殊。秦碑越殿，悔旧游、作计全疏。分付与、高怀老尹，管弦丝竹宁无。

知公爱山入剡，若南寻李白，问讯何如。年年雁飞波上，愁亦关予。临皋领客，向月边、携酒携鲈。今但借、秋风一榻，公歌我亦能书。

又 次韵稼轩蓬莱阁

一顾倾吴。苕萝人不见，烟杳重湖。当时事如对弈，此亦天乎。大夫仙去，笑人间、千古须臾。有倦客、扁舟夜泛，犹疑水鸟相呼。

秦山对楼自绿，怕越王故垒，时下樵苏。只今倚阑一笑，然则非欤。小丛解唱，倩松风、为我吹竽。更坐待、千岩月落，城头眇眇啼鸟。

点绛唇 寿

祝寿筵开，画堂深映花如绣。瑞烟喷兽。帘幕香风透。

一点台星，化作人间秀。韶音奏。两行红袖。齐劝长生酒。

越女镜心 别席毛莹

风竹吹香，水枫鸣绿，睡觉凉生金缕。镜底同心，枕前双玉，相看转伤幽素。傍绮阁、轻阴度。飞来鉴湖雨。

近重午。燎银篝、暗薰溽暑。罗扇小、空写数行怨苦。纤手结芳兰，且休歌、九辩怀楚。故国情多，对溪山、都是离绪。但一

川烟苇，恨满西陵归路。

月上海棠 夹钟商 赋题

红妆艳色，照浣花溪影，绝代姝丽。弄  
轻风、摇荡满林罗绮。自然富贵天姿，都不  
比、等闲桃李。帘栊静悄，月上正贪春睡。

长记初开日，逞妖丽、如与人面争媚。  
过韶光一瞬，便成流水。对此日叹浮华，惜  
芳菲、易成憔悴。留无计。惟有花边尽醉。

## 江汉

### 喜迁莺

升平无际。庆八载相业，君臣鱼水。镇抚风棱，调燮精神，合是圣朝房魏。凤山政好，还被画毂朱轮催起。按锦辔。映玉带金鱼，都人争指。

丹陛。常注意。追念裕陵，元佐今无几。绣袞香浓，鼎槐风细。荣耀满门朱紫。四方具瞻师表，尽道一夔足矣。运化笔，又管领年年，烘春桃李。

## 江 开

### 玉楼春

风前帘幕沾飞絮。家在垂杨深处住。倚楼无语忆郎时，恰是去年今日去。

帝城箫鼓青春暮。应有多情游冶处。争知日日小阑干，望断斜阳芳草路。

### 菩萨蛮 商妇怨

春时江上廉纤雨。张帆打鼓开船去。秋晚恰归来。看看船又开。

嫁郎如未嫁。长是凄凉夜。情少利心多。郎如年少何。

### 浣溪沙

手捻花枝忆小苹。绿窗空锁旧时春。满楼飞絮一筝尘。

素约未传双燕语，离愁还入卖花声。十分春事倩行云。

杏花天

谢娘庭院通芳径。四无人、花梢转影。  
几番心事无凭准。等得青春过尽。

秋千下、佳期又近。算毕竟、沈吟未稳。  
不成又是教人恨。待倩杨花去问。